

გრიგოლ აბაშიძე

დიდი ღამე

თავი პირველი

ღარის წყალთან ბაღლები თამაშობდნენ. თხუთმეტობიოდე წლის ჭაბუკი ნაკადულზე დახრილიყო, ღარიდან გადმომდინარ წყალს პაწაწინა ბორბალს უსწორებდა და მიწაში ჩარჭობილ ორკაპა ჯოხებზე მართავდა. მერე უცებ ხელი უშვა, ბორბალს წყალი მოხვდა და თავბრუდამსხმელად დატრიალდა. ბორბლის აბრუნება და ბავშვების აჟივლება ერთი იყო. ბრუნავდა ბორბალი და შხეფებს ყრიდა. კისკისებდნენ გახარებული ბავშვები და დედის ძუძუზე მიხვეული გოჭებივით ერთიმეორეს არ აცლიდნენ «წისქვილთან» ადგილის დაჭერას.

ნაკადული ჭაბუკის ლაჯებქვეშ მიედინებოდა და კრიალა წყალში ბავშვების გაცინებული სახეები ირეკლებოდა. ვაჟი ფიქრში წასულიყო, წყალს დაჩერებოდა, მაგრამ, ეტყობოდა, იქ ვერაფერს ხედავდა. არც ბავშვების გნიასი წვდებოდა მის სმენას, რადგან გულისყური და გონების თვალი სხვაგან ჰქონდა.

ამ ჟივილ-ხივილში რაღაც მაინც გაიგონა, თუ მოელანდა, – ადგილს მოსწყდა და ჭიშკრისაკენ გაექანა.

შარაგზაზე სახედარი მოჩაქჩაქებდა. ზედ სიმსუქნით ნაადრევად დამძიმებული კაცი იჯდა, შემუშებულ სახეზე მკრთალი ფერი გადაჰკრავდა და სუნთქვა უმძიმდა.

სახედარს ქვეითად მოუძლოდა ცამეტობიოდე წლის ქალიშვილი. ცალ ხელში ავშარა ეჭირა და ცალით დროდადრო წვეპლას იქნევდა.

ვაჟი ჭიშკართან გამოვიდა, შარვალზე სველი ხელები შეიმშრალა და გზის პირას უხერხულად დადგა.

ქალიშვილმა შორიდანვე შეჰღიმა, სახედარს გზისპირისკენ მოსწია და ნაბიჯი შეანელა.

– მიდიხარ? – ოდნავგასაგონად იკითხა ვაჟმა და მზერა უმაღლ სახედარზე მჯდომარეზე გადაიტანა, თუმცა მისი კითხვა მხოლოდ ქალიშვილისთვის იყო ნათქვამი.

– ერთ წუთს დამიცადე, პავლია... ცაგო... ახლავე მოვალ! – შეეხვეწა ვაჟი ორთავეს, დასტურს აღარ დაელოდა და ეზოს სიღრმეში ჩაკარგულ პატარა სახლისკენ გაიქცა.

– ნეტავ ვაჩეც მოდიოდეს! – ამოოხვრით თქვა ცაგომ.

– ბარემ კარგი იქნებოდა! გამიმძნელდება უმაგისოდ რუკების ხაზვა, – სინანულით დასძინა პავლიამ.

ცაგომ არაფერი თქვა, მხოლოდ ამოიოხრა და სახე იბრუნა.

ქლოშინით მოიჭრა ვაჩე. აბრეშუმის ქსოვილში სათუთად გახვეული რაღაც გადასცა ცაგოს და მორცხვად უთხრა თავდახრილმა:

– შენი იყოს... მოგისწარი...

ცაგომ საჩუქარს აბრეშუმში შემოაცალა, უცხოდ მოხატულ წიგნს დახედა და აღტაცებით შესძახა:

– თორელის წიგნი!

სწრაფად გადაშალა, თითქო სურდა, დარწმუნებულიყო ხომ ნამდვილად ის არის, ვაჩესაგან აგრე მუყაითად, ფურცელ-ფურცელ მოხატული თორელის წიგნიო.

სიამით სახეგაბადრულმა წიგნი მაშინვე დახურა, ვაჩე თავისკენ მიიზიდა და ანგარიშმიუცემლად უცებ ლოყაზე აკოცა.

ვაჟი გაშრა, ერთიანად გაწითლდა. ქალი, თითქო გონს მოეგო, უცებვე მოშორდა ცივად, სახედარს წკეპლა გადაჰკრა და ჩქარი ნაბიჯით გზას გაუდგა.

დიდხანს იდგა ვაჩე სახელაწილი და გაოგნებული. უხურდა ლოყა, ცეცხლი ეკიდა. ნაკოცნ ადგილზე ხელისზურგს იდებდა, მაგრამ სახე უფრო ენთებოდა, საფეთქლები უროებივით სცემდნენ და თვალში ბინდი ერეოდა.

მუხლებში სისუსტე იგრძნო. არ წავიქცეო, შეეშინდა, ღობეს ხელი შეაშველა და ქვაზე ჩამოჯდა.

ერთხანს ასე იყო რეტდასხმული. მერე ქვა და მიწა მოსინჯა, თავისსავე ტან-ფეხს ხელით შეეხო. ყველაფერი ძველებურად იყო, თავის წესსა და ადგილას, მხოლოდ ახლა მთელ სხეულში რაღაც სითბო ეღვრებოდა და თავით ფეხებამდე საამო ჟრუანტელი უვლიდა.

იჯდა ასე, მანამდე განუცდელი ნეტარებით მთვრალი, ბურანში ჩაძირული, ქვეყნისაგან გამოთიშული და ვნების ფრთებით დარწეული, გაბრუებული.

თავს ტოლები წამოადგნენ.

არც უკითხავთ, ისე ჩამოსხდნენ მის გვერდით.

– გაიგე, ვაჩე? ტახტის ბედი გადაწყვეტილა... – დაიწყო ერთმა.

ვაჩემ რომ მისი ნათქვამი არაფრად ჩააგდო და ხმაც არ გასცა, გაჯავრებულმა დასძინა:

– დარბაზს რუსუდანის გამეფება დაუდგენია...

– მერე ჩვენ რა?! ჩვენ რა გვეკითხება, მეფე ვინ იქნება?! – არხეინად თქვა მეორემ, ვაჩეს მხარი წაჰკრა და დაუმატა, – ასე არ არი, ვაჩე?

ვაჩე არც შერხეულა.

– როგორ თუ ჩვენ არ გვეკითხებაო, გესმის, ვაჩე?! – გაწიწმატდა ამბის მთქმელი და მუხლზე ხელი დაიკრა. – მეფედ ქალი დასვან და ჩვენ არ გვეკითხება? ქალის მეფობით ჩვენ რა სიკეთე მოგვივა, ომს ვერ იქმს და ლაშქრად ვერ წაგვიძღვება!

– სახელი ჩვენ არ გვექნება და ნადავლი! – დაურთო მესამემ.

ბიჭები ვაჩეს ტოლები იყვნენ, საულვაშე უკვე შავად დაჩნეოდათ და გული სახელისა და ხმლისკენ მიუწევდათ.

– თამარიც ქალი იყო, მაგრამ მის დროს ქართველთა ხმალს არ მოშვივია! – შენიშნა მეორე ჭაბუკმა.

– თამარი სხვა იყო! თამარი ერთი იყო და სხვა ველარავინ იქმს თამარობას! – მოსჭრა ისევ პირველმა და, სამეფოს ბედისადმი ვაჩეს უნაღვლელობით გაბრაზებული, ფეხზე წამოდგა.

წავიდეთო, ანიშნა ბიჭებს და საყდრის გზას გაუყვნენ. ცოტა რომ გაიარეს, შეჩერდნენ, ერთმანეთს რაღაც უთხრეს და ვაჩეს გადმოსძახეს:

– საჭიდაოდ არ წამოხვალ, ვაჩე?

ვაჩე ფეხზე წამოდგა ტოლებს ზურგი აქცია, კლდის ქიმს გადაადგა და თბილისის გზას დააცქერდა.

დაბლა, ხეობაში მდინარის გასწვრივ ფერდობ-ფერდობ მიიკლაკნებოდა თბილისის გზა.

უკვე დიდი მანძილი გაევლოთ, მაგრამ ჯერ კიდევ ჩანდნენ სახედარზე ამხედრებული და ქვეითად მიმავალი.

ვაჩეს უნდოდა დაემახა და ხმა მიეწვდინა მათთვის. მაგრამ ტოლებისა თუ შერცხვა, ისევ დუმილი არჩია და უხმოდ ჩამოიქცა.

მიდიოდნენ მგზავრები, გზა იკეცებოდა და კვლავ იშლებოდა. ვაჩეს თვალის მათთან ერთად კეცავდა იმ გრძელ გზას და ფიქრი ფიქრს მისდევდა.

ვაჩეს მამა ადრე დაეღუპა ლაშქრად. ოზლად, დედის ანაბარად დარჩენილი ბალღი სანახევროდ ცაგოს სახლში იზრდებოდა.

ცაგოს მამა გააზნაურებული მოლაშქრე იყო და ერთ დროს მეფის კარზე ტრიალებდა.

სხვა კარისკაცების მსგავსად, მეფეთა საზაფხულო სადგომების ახლო მასაც ჰქონდა აგარაკი ახალდაბაში.

კარგად ცხოვრობდნენ, მაგრამ ეშმაკს შეშურდა და ოჯახის უფროსს მარცხი შეამთხვია: უებრო რაინდი და უბადლო მოზურთალი, მეფეთა გასართობად გამართულ ასპარეზობაზე, ცხენიდან გადმოვარდა, ცხენმა ათრია და მოედნიდან უსულოდ გაიტანეს.

ოჯახის ბედი ჩარხუკულმა დატრიალდა. მალე მევალებმა წამოჰყვეს თავი და თითქმის ყველაფერი წაიღეს. სამი შვილის დაქვრივებულმა დედამ აგარაკილა შეინარჩუნა, ხილის მცირე ბაღითა და მცირე სახნავ-სათესით.

კიდევ კარგი, რომ უფროსი ვაჟი მალე წამოესწრო და მხარში ამოუდგა დედას. მამუკამ მამის სიცოცხლეშივე მოასწრო სწავლის მიღება, ხელოვანის

ნიჭი გამოიჩინა, ოქროს კვეთა ისწავლა და ახლა ქალაქში პირველ ოქრომჭედლად ითვლებოდა.

სწორედ მამუკასთან მიდიოდა ახლა მისი უმცროსი და-ძმა, მისივე წვევითა და შემოხვეწნით.

ძმას ორი წლის ასაკიდან ორივე ფეხის დამბლა ჰქონდა და კუტი იყო. სოფელმა ეს ხინჯი მეორე სახელად უქცია და დიდი და პატარა «პავლია კუტს» ეძახდა. თვითონაც ისე შეეჩვია ამ ზედწოდებას, რომ არათუ დამამცირებლად მიაჩნდა იგი, მარტო სახელის დამახეზაზე კაცს აღარ აგონებდა, თუ ზედ «კუტსაც» არ დააყოლებდნენ.

მთელი სიცოცხლე მარტოდდენ ჯდომად და წოლად განწირული ხეივანი თავიდანვე შეეგუა უძრავ ყოფას, სწავლას დაეწაფა და ცოდნითა და წიგნით ცდილობდა იმ დიდი სულიერი ტკივილის დაყუჩებას, რომელსაც სხეულის გამოუსწორებელი ნაკლი აყენებდა.

ფეხები არ ემორჩილებოდა პავლია კუტს, თორემ სხვა მხრივ ძალუმი სხეული ჰქონდა. ხელით ცხენის ნალს ღუნავდა და სუფრაზე სამი ვაჟკაცის ულუფას ჭამდა.

უძრაობამ და ჭამაში მოუპირაობამ ქონი მორია და სხეული ნაადრევად დაუმიძიმა. სიმსუქნისაგან ცოტა სუნთქვა უჭირდა, მაგრამ მუშაობით დაღლა არ იცოდა. ღამეების ტეხვა წაბმით შეემლო და ქვეყანა რომ დაქცეულიყო, დაწყებულ საქმეს დამთავრებამდე არ მოშორდებოდა.

ენებს საოცარი სისწრაფით ითვისებდა. უცნობ ენას ორ-სამ თვეში სწავლობდა.

საქართველო სავსე იყო ომებიდან წამოყვანილი ტყვეებითა და მონებით. სპარსელი და ბერძენი, თურქი და არაბი კარდაკარ დაწანწალებდნენ სამუშაოს საძებრად და სამათხოვროდ.

პავლია კუტი შესაფერ შემთხვევას ხელიდან არ გაუშვებდა. უცხოელს მაშინვე ქირაზე მოურიგდებოდა და მერე ის უბედური მისი ნამდვილი ტყვე იყო: ისიც მის მაგიდასთან უნდა მიჯაჭვულიყო ან მისი ბორბლებიანი სკამი ეგორებინა და ყოველი ფრინველისა და ცხოველის, ბალახისა თუ ყვავილის, საგნისა თუ საქმის სახელი გამუდმებით ემეორებინა ცოდნას დახარბებული ხეიბრისათვის.

ორ-სამ თვეში გამვალტყავებული გადამთიელი მოსულიერდებოდა და ხორცს შეიბამდა, მაგრამ უცნაური ბატონი მისი გულუბრყვილო გაკვეთილებით ვეღარ კმაყოფილდებოდა, რადგან მასწავლებლის ენა უკვე თვითონ მასზე უკეთ იცოდა და იმ ენაზე წიგნებს თავისუფლად კითხულობდა.

ხეიბრის ახირებასა და სურვილების შესრულებას შეჩვეული უცხოელი ცრემლით სტოვებდა მისთვის იოლ სამუშაოს და ხელახლა სოფელ-სოფელ წანწალს იწყებდა ლუკმაპურის საძებრად.

ლამაზი ხელი ჰქონდა პავლია კუტს. მისი გადაწერილი დავითნი ან ოთხთავი ხელიდან ხელში გადადიოდა და კარგ ფასადაც იყიდებოდა. ამ საქმეში მისი განუყრელი თანაშემწე ვაჩე იყო.

კუტმა ვაჩეს წერა-კითხვა და ხატვა ასწავლა; წიგნისა და ხატვის სიყვარული ჩაუნერგა გონიერ ბავშვს. ღარიბსა და ობოლს სხვა რა მადლის გადახდა შეეძლო, – თავის მასწავლებელს წიგნების გადაწერასა და ყდაში ჩასმას შველოდა.

ბოლო დროს პავლია კუტი «საქართველოს სამეფოს» აღწერას შეუდგა. უამრავი ქართული და უცხოური წიგნი დაიწყო წინ, ნავალთა, მნახველთა და გამგონეთაგან ნაამბობს იწერდა, აღწერილსა და გადმოცემულს ერთიმეორეს ადარებდა და წერდა. დღედაღამ თავაუღებლად წერდა იმ ქვეყნის ადგილისა და მდებარეობის, ჰავისა და მოსავლის, ხალხის ზნისა და ჩვეულებისათვის, რომელიც აგრერიგად უყვარდა; წერდა იმ ქვეყნის ავსა და კარგს, რომელიც არათუ ფეხდაფეხ არ მოეწლო, ერთი თვალის გადავლებითაც არ ენახა.

სკამ-ლოგინზე მიჯაჭვულს საქართველოს შემოვლის ნატვრაც არ შეეძლო. თავის საოცნებო სამშობლოს მხოლოდ ერთ უმცირეს ნაწილს ხედავდა დღემუდამ თავისივე სახლის აივნებიდან და ეზოდან. მაგრამ, ჰოი, რა ლამაზი, რა წარმტაცი იყო ეს პატარა ნაკვეთი მშობელი ქვეყნისა! წინ – ფერად-ფერად ხალიჩებად დაფენილი, ღობეებითა და ხეთა მწკრივებით დასერილი მინდვრები, დაბლა – მწვანით დაბურული, ბნელი ხევი ღრანტეებით, ტყვისფერი მდინარითა და პირდაღებული უფსკრულებით, მაღლა – ცად აზიდული ლურჯი მთები გაცრეცილი ნისლის ლეჩაქით, კალთებზე შეფენილი ცხვარ-ძროხით და შორს... უფრო შორს, ცის დასალიერზე ღრუბლის თეთრ სვეტებად თუ ბროლის კოშკებად ამართული კავკასიონი.

წარმოდგენით, პავლია კუტს თავისი კუთხის ამ საზღვრებში მოექცია მთელი დანარჩენი საქართველოს სურათი. ჩარჩო პატარა იყო, მაგრამ ოცნება დიდი და უნაპირო – სამშობლო მთლიანად ასე წარმტაცი და მიმზიდველი ეჩვენებოდა და თუმცა მისი ყოველი ნაწილის ხილვის ბედნიერებას მოკლებული იყო, წიგნებითა და ნაამბობით საქართველო თავისი ხუთი თითივით იცოდა.

პავლია კუტის სწავლულობისა და მეცნიერობის ხმა შორს განთქმულიყო. მის მიერ დიდის რუდუნებით გადაწერილ საღმრთო წიგნებს, მონასტრებს გარდა, დიდგვარიანთა ოჯახებისკენაც გაეკვლია გზა და ბოლოს მეფის კარზეც შეეღწია.

გელათის აკადემიის მოძღვართმოდღვარს უცნობი მწიგნობრის მიერ გადაწერილი «ბალავარიანი» ჩავარდნოდა ხელთ. გადამწერის ხელს სწავლულის ყურადღება მაშინვე მიუპყრია, მაგრამ მოძღვართმოდღვარი უფრო მეტად იმ შენიშვნებს დაეფიქრებინა, რომლებიც პავლია კუტს წიგნისათვის დაერთო, მსჯელობის სიღრმესა და აზრის სითამამეს წინამძღვარი გაეოცებინა და უცნობი მწიგნობრის ხილვა მოესურვებინა.

აკადემიის მოძღვართმოდღვარი სწორედ იმხანად თბილისში უნდა ყოფილიყო მეფის კურთხევაზე და მამუკა მასთან შესახვედრად იწვევდა თავის კუტ მმას.

თვალი ძლივს სწვდება მიმავალთ. უკვე ცალ-ცალკე აღარ ჩანან სახედარზე მჯდომი კუტი და ქვეითად მიმავალი ცაგო. ყველანი ერთ სხეულად შეკრულან იმ შორეთში და ლანდადლა ხედავს. ფიქრი კი, ვაჩეს ფიქრი, მაინც მათთან არის, მათთან ერთად აგრძელებს დიდ გზას.

მარტოოდენ წიგნის სიყვარული როდი იზიდავდა ვაჩეს პავლია კუტის ეზო-კარისაკენ, ცაგო მისი ტოლი იყო, ერთად იზრდებოდნენ. ჯერ ერთად თამაში, მერე ერთად ოცნება და ბოლოს თვითონაც აღარ იცოდა, რა ეწეოდა მისკენ, გრძნობა თუ ჩვეულება. ეს კი იყო, რომ მასთან სიახლოვე მოთხოვნილებად გადაქცეოდა.

პავლია კუტის ყველა წიგნი ერთად ჰქონდათ გადაკითხული ცაგოს და ვაჩეს. ხატვის სიყვარულიც პირველად მათ ოჯახში გაეღვიძა ყრმას.

ათი წლისაც არ იყო ვაჩე, მათ სოფელში ბეთანიისკენ მიმავალი უცნობები რომ გამოჩნდნენ. ცნობისმოყვარე ბავშვები უკან აედევნენ უცხოებს, რომელთაც ტაძრის ეზოში კარვები დადგეს, ახლად აშენებულ ტაძარში ხარაჩოები გამართეს და კედლების მოხატვას შეუდგნენ.

მხატვრებმა მაშინვე შენიშნეს ცნობისმოყვარე ბიჭი, მათ საქმიანობას გაფაციცებით რომ ადევნებდა თვალს. დაუძახეს, მოეფერნენ, დასაქმეს კიდევ მცირე რამ. ბიჭუნა დაუზარლად, ხალისით ასრულებდა მხატვრების ყველა თხოვნას. ხან ცივი წყალი მოჰქონდა მათთვის, ხან ახლომახლო ეგზავნებოდა და ხანაც საღებავების გაზავებაში შეელოდა.

გამჭრიახი, მკვირცხლი ვაჩე თვალში მოუვიდა მხატვართუხუცესს, დემეტრე იყალთოელს. ვინაობა გამოჰკითხა. როცა გაიგო, რომ მამუკას მეზობელი იყო, ესიამოვნა.

– არ გინდა, შენც მამუკასავით ხელოვანი გამოხვიდე? – შეეკითხა მოკრძალებულ ბიჭს იყალთოელი. – იქნებ მასაც აჯობო, ა? რას იტყვი? – შეუჩნდა ოსტატი და, ბავშვმა რომ ხმის ამოდებაც ვერ მოახერხა, ხელით ანიშნა, – ე მანდ რომ ფუნჯია, აილეო.

ვაჩე ფუნჯს დასწვდა, ოსტატმა საღებავში ჩააწებინა და პირველი ხაზები გაავლებინა.

ასე, მოულაპარაკებლად, ყოველგვარი პირობის დაუდებლად დაემოწაფა იყალთოელს ვაჩე, თვითონაც სანახევროდ ბეთანიაში დაიდო ბინა და ერთ წუთსაც არ შორდებოდა თავის მასწავლებელს.

ნელა, მაგრამ გულმოდგინედ მუშაობდა იყალთოელი. მისი ჯადოსნური ყალმის ქვეშ ნელ-ნელა ინაკვეთებოდა დიდებული თამარის სახე; უკვირდა ყმაწვილს, როგორ შეუმჩნევლად ცოცხლდებოდა მის თვალწინ ფერი და ხაზი, როგორ თანდათანობით ისხამდა ხორცს მხატვრის ფიქრი და შთაგონება.

არარაობიდან _ ცარიელი კედლიდან დაიწყო იყალთოელმა. ორი წელიც არ იყო გასული, რომ ეს ცივი, მუნჯი კედელი გაცოცხლდა, ამოძრავდა და ამეტყველდა.

სუნთქავდა სხეული და ეს მშვიდი სუნთქვა იმ მძიმე ტანსაცმლის ქვეშიდანაც მჟღავნდებოდა, რომლითაც ასე თვალისმომჭრელად შემოსა მხატვარმა ღვთაებრივი დედოფალი.

ისე მიიწურა სამუშაო, ისე თვალსა და ხელს შუა გაირბინა ორმა წელიწადმა, არც კი გაუგია ვაჩეს.

ბოლო დროს უცნაურობა დასჩემდა დემეტრე მხატვარს: მთელი დღეები ხარაჩოდან არ ჩამოდიოდა, იდგა და კი არ ხატავდა, ისე, გარინდებული უჭვრეტდა თამარის სახეს. ფიქრსა თუ ოცნებაში წასულს საჭმლის ჭამა ავიწყდებოდა. როდის-როდის, თვითონვე თუ მოვიდოდა გონს, თორემ შეხსენებასა და ხმის გაცემას ვერავინ უბედავდა. ამ დროს ტაძარში სულდგმული არავინ იყო ხოლმე და მხატვარი თავის ქმნილებასთან მარტოდარჩენილი ეძლეოდა შთაგონების თავდავიწყებას. ღამღამობით, სხვები რომ შუადღიში იყვნენ, დემეტრე მხატვარი ჩუმად დგებოდა ხოლმე, მთვარიანში მაღლა მთებისკენ მიდიოდა, რაღაცას თავისთვის ღიღინებდა და მერე გვიანობამდე, სადმე, კლდის ქიმზე ჩამომჯდარი დაჟინებით უცქერდა ვარსკვლავებით მოჭედილ ცას.

ერთ ღამეს კარავში მძინარე ვაჩეს ხმაური ჩაესმა. გამოელვძიძა. ტაძრიდან სინათლე გამოდიოდა, ტაძრის კარი დაკეტილი იყო. ვაჩე, ცოტა არ იყოს, შეშინდა, მაგრამ ცნობისმოყვარეობამ დასძლია. სარკმელთან მივიდა და ტაძარში ჩაიხედა: ტაძარში დემეტრე იყო მარტო. სანთლები ანთო და თამარის ფრესკას ხარაჩოებს აშორებდა.

ვაჩე სარკმელზე აცოცდა, რომ უფრო კარგად დაენახა: დემეტრემ უკანასკნელი ფიცარი კუთხეში დადო, მძიმედ ამოისუნთქა და იმავე ფიცარზე ჩამოჯდა. ერთხანს ასე უყურა. სახეზე ღიმი უთამაშებდა. მერე ნელა წამოდგა და ადგილი მოინაცვლა. ტაძრის ხან ერთი კუთხიდან, ხან მეორედან უცქერდა დემეტრე თამარის სახეს, უცქერდა და თან რაღაცას ღიღინებდა თუ ბუტბუტებდა. ვაჩეს უცებ მოეჩვენა, რომ თამარიც თვალს ადევნებდა მხატვრის მოძრაობას კედლიდან, ისიც იქით იბრუნებდა პირს, საითაც მხატვარი დგებოდა. ბოლოს სულ ახლო მივიდა დემეტრე თავის ქმნილებასთან, ალბათ, ვაჩესავით მასაც ცოცხლად ეჩვენა თამარის სახე, ეგებ შეეშინდა კიდევ მისი, _ მუხლებზე დაეცა, ეთაყვანა და კალთაზე ემთხვია.

მერე, თითქო გონს მოვიდაო, უცებ წამოდგა, სანთლებს ჩამოუარა, სათითაოდ ჩააქრო და ტაძრიდან სწრაფად გავიდა.

მეორე დღეს, როცა ყველამ გაიღვიძა, დემეტრე აღარსად ჩანდა. არავის გაჰკვირვებია, რადგან დილაადრიან იცოდა დემეტრემ მუშაობის დაწყება. საუზმე რომ გააწყვეს, ტაძარში შეიხედეს ოსტატის მოსაპატიჟებლად. ტაძარი ცარიელი იყო, ხარაჩოები დაშლილი და მილაგებული. კუთხეში ფუნჯები და საღებავები ეწყო შეკრულ-შეხვეული.

ტაძრის წინამძღვარი და სამუშაოთა ზედამდგომელი გაოცდნენ, მხოლოდ იყალთოელის მოწაფეები და თანაშემწეები, მასთან ერთად დიდხანს ნამუშევარი მხატვრები და თანამშრომლები მიხვდნენ, რომ ოსტატს ხატვა დაესრულებინა და ბეთანიიდან წასულიყო.

ასე იცოდა თურმე იმ მარჯვენანაკურთხმა: ხატვას რომ მორჩებოდა, ერთხანს უნდა დაკარგულიყო, ნადირობასა და ქეიფში უნდა დაევიწყებინა ის, რითაც ასე დიდხანს ცხოვრობდა და ამას მარტო იმიტომ კი არ სჩადიოდა, რომ ახალი თვალთ შეეხედა თავისი ქმნილებისათვის; უფრო მეტად თურმე მნახველთა და შემფასებელთა აზრის მოსმენა აღიზიანებდა, სანამ მუშაობას არ დაასრულებდა, გარეშეთაგან ტაძარში არავის შეახედებდა, მაგრამ როგორც კი ხმა დაირხეოდა, დემეტრე მხატვარმა ხატვა დაამთავრაო, უამრავი მნახველი მოაწყდებოდა. მოდიოდნენ დიდ-დიდი მთავრები და დიდებულები, საერონი და სამღვდელონი დემეტრეს ქმნილების სანახავად, რომ შემდეგ თვითონაც მიეწვიათ მხატვარი ახლად ნაშენი ტაძრებისა და პალატების მოსახატავად.

მოდიოდნენ თავად მეფენიც, მაგრამ მოსულთა შორის ყველაზე მეტი მხატვრები იყვნენ მუდამ. საიდან არ ეწვეოდნენ – აფხაზეთიდან თუ ჰერეთიდან, ლეკეთიდან თუ ტრაპიზონიდან. ყველა მოუთმენლად ელოდა იყალთოელის ახალი ქმნილების ნახვას. საათობით იდგნენ და უცქერდნენ ნახატს, ერთიმეორეს უხსნიდნენ და ეკამათებოდნენ. თავის ქნევითა და გაოცებით სტოვებდნენ იქაურობას, რომ შემდეგ დემეტრეს ხაზი თუ ფერი, ჩრდილი თუ შუქი გადაეტანათ და გაემეორებინათ სამცხისა თუ ლეკეთის, ჰერეთისა თუ ჯიქეთის, ტრაპიზონისა თუ სომხეთის ტაძრებსა და სასახლეებში.

ოსტატის წასვლის შემდეგ ვაჩეც აღარ გაჩერებულა ბეთანიაში. დემეტრეს ნაჩუქარი საღებავები და ყალამ-ფუნჯები აბგაში ჩაალაგა და შინ დაბრუნდა.

გაგარეგნებულმა ბიჭმა გული ველარ დაუდო სოფლის ყოველდღიურ საქმეს, ბაღისა და ვენახის მოვლას და, ალბათ, სახლიდან გაიქცეოდა, ცაგო და პავლია კუტი ახლო რომ არ ყოფილიყვნენ.

ხეივარმა თავისი ახალი შრომისათვის რუკების დახაზვა სთხოვა. ვაჩემ ჩინებულად დაუხაზა რუკები. ყმაწვილის გულისმოდგინებითა და ნიჭიერებით წათამამებულმა პავლიამ მეტი მოინდომა, თავის «საქართველოს სამეფოს» აღწერის წიგნში ქვეყნის ღირსშესანიშნაობათა ჩახატვა განიზრახა და ვაჩეც ამ საქმეს დიდი ხალისით შეუდგა.

პავლია კუტი და ვაჩე რომ ამ შრომაში იყვნენ, ცაგოს გული შინ არ უდგებოდა, მთელი დღე გარეთ იყო, გოგო-ბიჭებში, მაცვლისა თუ შინდის საკრეფად დადიოდა, ქაჯივით დარბოდა ტყეებსა და მინდვრებში და შინ მხოლოდ საჭმელისათვის თუ შეიხედავდა.

პირველად აგდებულად უყურებდა ვაჩეს ნაადრევ სიდინჯეს, უკვირდა, მასაც გული მინდვრისკენ რომ არ მიუწევდა ტოლებივით, მაგრამ, ერთ მშვენიერ დღეს, როცა მის მიერ მოხატული წიგნი ნახა, არც თავის თვალს დაუჯერა, არც ყმაწვილის შრომით აღტაცებულ ძმას და არც თვითონ

თავმდაბლად გაღიმებულ ვაჩეს. წიგნს ხელი დაავლო, ჯერ დედას მიუბრუნებინა, მერე შარაზე გავარდა და ტოლებს გადაუშალა.

გაოცებული ბავშვები წიგნს ეტანებოდნენ, მაგრამ ცაგო ხელს არავის აკიდებინებდა, ნელა ფურცლავდა და თავის აღფრთოვანებას ბავშვებს უზიარებდა.

იმ დღიდან ტოლებმა ხომ სხვა თვალთ დაუწყეს ყურება ვაჩეს, მაგრამ მთავარი ის იყო, რომ თავად ცაგომაც ზნე იცვალა. კუტი ძმის ოთახში რომ არ შეეხედა, ვეღარ ძლებდა. ჯერ ძმისა და ტოლის მუშაობას აკვირდებოდა, მერე თვითონაც მოუხდა შრომა, დედას აბრეშუმის ქსოვილი გამოართვა და ხელსაქმეს შეუდგა.

ქარგვა რომ მოსწყინდებოდა, ცაგო ჩონგურს დაავლებდა ხელს, სიმებს ჩამოკრავდა და ტკბილად დასძახებდა:

ახალდაბაო, დაბაო,
შორს ურჯულოებს ვკაფავო...

მაშინ ვაჩეც თავაულებლად აჰყვებოდა:

მანდ ერთი გოგო დავტოვე,
ტანს ეცვა მწვანე კაბაო...

უცნაურად გამოცოცხლებული ცაგოს ხეივანი ძმაც დვრინს დააბუბუნებდა:

თუ მომკლავს, მტერი ვერ მომკლავს,
ის მომკლავს, შავთვალწარბაო.

მღეროდნენ და მუშაობას ეშხი და ხალისი ემატებოდა.

მაგრამ ცაგო დიდხანს ვერც სიმღერას უდებდა გულს, საკერავსაც მალე სტოვებდა და კვლავ ეზოსკენ, მზისა და მინდვრისკენ გარბოდა.

ერთხელ ნაქარგი გვერდზე გადასდო, მომწყინდა სულ პეპლებისა და ყვავილების, ჩიტებისა და ქურციკების ქარგვაო, _ ჩაილაპარაკა და წავიდა.

ნათქვამი გულში ჩარჩა ვაჩეს. დედას თეთრი მანდილი გამოართვა და ჩუმად შეუდგა ხატვას.

ის იყო, მოათავა კიდევ, რომ ჭიშკარს ცხენოსანი კაცი მოადგა. უცხო კაცს დედამ გახედა. ცხენოსანმა ვაჩე იკითხა და დედამ სტუმარი შინ შეიწვია.

სარკმლიდან უყურებდა ვაჩე და თვალს არ უჯერებდა: ცხენიდან დემეტრე იყალთოელი ჩამოხდა, დედას მიესალმა, ცხენი აღვირით ჭიშკრის ბოძთან გამოაბა და სახლისკენ წამოვიდა.

ცას სწვდებოდა სიხარულით ვაჩე. დემეტრე ოსტატი გუდარეხის სასახლის მოსახატავად მიდიოდა და ვაჩეს დედას სთხოვდა, შვილი შეგირდად გაეყოლებინა.

დედა ხედავდა, როგორ გაიხარა შვილმა ოსტატის ნახვით, იმასაც კარგად გრძნობდა, რომ ვაჩეს გული შინ არ უდგებოდა, ამ უცხო კაცისკენ, ხატვისა და შემოქმედებისაკენ მიუწევდა. დედას ბევრი აღარ უყოყმანია, გუდარეხი არც ისე შორს იყო, მხატვარს თანხმობის პირი მისცა და საგზლის სამზადისს შეუდგა.

დილით, ვიდრე სტუმარი ადგებოდა, ვაჩემ ცაგოსას გადაირბინა. პავლია კუტის ოთახის სარკმელი ღია იყო. კუტი მაგიდას უჯდა და წერდა. ცაგოს მეორე ოთახში ეძინა. ხმადაბლა, სხაპასხუპით უამბო ვაჩემ უფროს მეგობარსა და მასწავლებელს თავისი გამგზავრების ამბავი, გადაეხვია, გადაჰკოცნა და წასვლისას ხელმანდილი გადასცა, – ცაგოს მიეცო.

ვაჩე სირბილით გაშორდა იქაურობას. პავლია კუტმა ერთხანს თვალი გააყოლა, მერე დაკეცილი მანდილი გახსნა და ზედ ამოსაქარგავად მკრთალად გამოყვანილ ნახატს დააცქერდა: ცაგოს სახე დაეხატა, გაღიმებული, ბედნიერი გოგონას სახე; თავს მინდვრის ყვავილების გვირგვინი დაედგა, მინდვრის ყვავილები ეყარა მხრებსა და მთელს ტანზე ცაგოს და ხელები რატომღაც მარცხნივ ჰქონდა აპყრობილი.

მიხვდა პავლია კუტი და გაეღიმა: ვაჩეს ბეთანიის კედლის ის მხატვრობა გადმოეტანა მანდილზე, რომელზედაც ასე გატაცებით უამბობდა ხოლმე მას, მხოლოდ იმ განსხვავებით, რომ დიდი თამარის ნაცვლად, პატარა ცაგოს სახე დაეხატა და ძვირფასი სამკაულების მაგივრად, მინდვრის ყვავილებით შეემკო იგი.

თბილისის გზა ვიწროებში შედის, მგზავრები ბუზის ტოლად ჩანან. მიდიან და თან ვაჩეს ფიქრი მიყვებათ, იმ გზასავით გაგრძელებული და ჩახლართული ფიქრი...

ორი წლის თავზე დაბრუნდა გუდარეხიდან ვაჩე. იყალთოელს სასახლის მოხატვა დაესრულებინა და ახლა ხლათის მელიქის აშრაფის მოწვევით, ვანის ტბისპირა ქვეყანაში უნდა გამგზავრებულიყო ხლათელთა სათაყვანებელი ქართველი დედოფლის, თამთას ეკლესიის მოსახატავად. ამ ხნის განმავლობაში ვაჩეს შეჩვეოდა, ნიჭიერი ჭაბუკი მისი უახლოესი თანაშემწე გამხდარიყო და გულით უნდოდა ხლათშიც თან წაეყვანა. დედამ მაშინვე შორს დაიჭირა, ერთადერთ, დამმარხველ შვილს ცხრამთას იქით როგორ დაეკარგავო.

იყალთოელმა ერთი კვირის ვადა დაუდო დედა-შვილს. კარგად მოიფიქრეთო, მე თქვენთვის სიკეთე მინდა და კარზე მომდგარ ბედს ხელს ნუ კრავთო.

ვაჩეს თავის გულში პასუხი გადაწყვეტილი ჰქონდა. იყალთოელს ხლათში კი არა, ჯანდაბასა და დოზანაში გაჰყვებოდა, ოღონდ მისი მუშაობისთვის ეცქირა, მისი რჩევა და შეგონება ესმინა და მისივე დახმარებით თვითონაც ამაღლებულიყო, როგორც მხატვარი და შემოქმედი.

იყალთოელის გასტუმრებისთანავე ვაჩე ცაგოსას გადავიდა.

ეზოში არავინ იყო და პირდაპირ პავლიას ოთახს მიაშურა. კუტი საწერს უჯდა და მისი შესვლა არც გაუგია, ვაჩემ ფეხი წინ წადგა და მისი ჩრდილი ეტრატს დაეცა. მხოლოდ მაშინ ასწია თავი საპყარმა. გაცეხული უყურებდა

ხეიბარი გაღიმებულ ვაჩეს. მერე, რომ იცნო, სკამზე ბურთივით შეხტა იმსიმძიმე კაცი და ალტაცებით აღმოხდა:

– ვაჩე! ჩემო ვაჩე, რამოდენა გაზრდილხარ, როგორ დავაჟკაცებულხარ. ულვაშებიც დაგიშვენივია, – ბუბუნებდა კუტი და გულში იკრავდა მის სკამთან ჩაჩოქილ ვაჩეს.

ხვევნას რომ მორჩნენ, ვაჩემ თავი აიღო. კედელზე მისეული ხელმანდილი იცნო. მისივე ნახატით ამოქარგული. ნახატის გულუბრყვილობაზე გაეღიმა. ხოლო მარცხნივ წმიდანივით გაშვერილი ცაგოს ხელების დანახვაზე გაწითლდა, შერცხვა უკვე დაოსტატების გზაზე შემდგარ მხატვარს.

ხმაურზე ცაგო გამოვიდა. კარის ზღურბლზე გაჩერდა და გაცეცხებით მიაჩერდა იქ მყოფთ. ვაჩე წამოდგა, ცაგოს მიგებება გაიფიქრა, მაგრამ ფეხი წინ ვერ დასძრა: კართან ცაგო იყო, მაგრამ ის ძველი ცაგო კი არა, – ტანაყრილი, მკერდგაღვიძებული. ქალიშვილიც, ალბათ ასევე ფიქრობდა შეღერებულ ჭაბუკზე, რომელიც ვაჩეს ჰგავდა, მაგრამ წინანდელი ვაჩე აღარ იყო.

რატომღაც ორივე გაწითლდა, ორივეს შერცხვა, მაგრამ რისა და რატომ – არც ერთს არ ესმოდა.

– ცაგო! ვაჩე დაბრუნდა... ნუთუ ვერ იცანი! – შესძახა ხეიბარმა. ცაგო თავისკენ მისწია და თითქმის ძალით ჩამოართმევინა ქალ-ვაჟს ხელი.

იმ ღამეს ვაჩეს არ ეძინა. თვალწინ სულ ცაგო ედგა, დამშვენებული და თითქმის ქალობაში შესული, მაგრამ ჯერ კიდევ ბავშვი და წმინდა.

მეორე დღეს დილიდან ისევ ცაგოსას დაიკარგა და ვაჩეს დედა მიხვდა, რომ მისი შვილი შორს აღარსად წავიდოდა.

ცაგომ პირველი დღეებიდანვე აღადგინა ვაჩესთან ადრინდელი დამოკიდებულება – თავის ტოლ-სწორთან ძველებურად უშუალოდ ეჭირა თავი და ბუნებრივი, ბავშვური მიამიტობით ისევ ისე თავისუფლად და ძალდაუტანებლად იქცეოდა მასთან, როგორც წინათ, ვაჩეს გუდარეხში წასვლამდე. თითქო იმ ორ წელს არც ჰასაკი მოეტანოს მათთვის, არც ბაგეებზე პირველი ულვაში აეშალოს, არც მკერდი შეემალღებინოს ოდნავ და არც ახალ, მანამდის უცნობ ზმანებებში ეტარებინოს სიმწიფის ზღურბლზე მისული ქალ-ვაჟი.

ერთი ცვლილება შენიშნა ვაჩემ: ცაგო ძველებურად ანცი და დაუდგრომელი, კისკისა და უნაღვლო აღარ იყო. რაღაც სევდა შეჰპარვოდა, ნაადრევი, აუხსნელი და გაუგებარი სევდა, რომელიც მის ღამაზე თვალებს ახალ, უჩვეულო შუქს აძლევდა და კიდევ უფრო სანდომიანს ხდიდა.

განუყრელად თან დაჰქონდა პატარა წიგნი ცაგოს. დროდადრო ფიქრში წასული ამ წიგნს შლიდა და ლექსებს ბუტბუტებდა. ცოტა რომ შეეჩვია ვაჩეს, ცაგომ წამღერებით ერთი ლექსი წაუკითხა. ვაჩე გაშტერდა. უცებ მოეჩვენა, რომ ეს ლექსი მისი იყო, მისი გამოუთქმელი სათქმელი, რომელიც სხვას მისანივით ამოეკითხა მის გულში და უმისოდ გამოეთქვა.

ვაჟის ყურადღებით წახალისებულმა ცაგომ კიდევ ერთი ლექსი წაიმღერა და რომ დაამთავრა, შეკავებული ოხვრა ჩაესმა. ვაჩეს მოხედა: ჭაბუკი ერთიანად წამოწითლებულიყო.

– საიდან იცოდა?! – წაიდუღუნა ვაჟმა და გაკვირვებით მოშტერებულ ცაგოს თვალი აარიდა.

– რაო, რა საიდან იცოდაო? – იკითხა ცაგომ.

– ჩემი გულისთქმა, ჩემი სათქმელი საიდან იცოდა მაგის გამომთქმელმა, – ოდნავასაგონად თქვა ვაჟმა და ისევ თავი ჩაჰკიდა.

გოგონას კისკისი აუვარდა. უყურებდა გოცებულსა და გოგნებულ ვაჩეს და იცინოდა, იცინოდა, სიცილით კვდებოდა.

ვაჟმა არ იცოდა, როგორ მოქცეულიყო, შეურაცხყოფად და დაცინვად მიეღო ქალიშვილის სიცილი და გაბრაზებულიყო, თუ თავათაც შუბლი გაეხსნა, ცაგოს აჰყოლოდა და მასავით უმიზეზოდ ეცინა, ეხარხარნა.

ვაჟმა მეტი ვეღარაფერი მოიფიქრა, წიგნი ხელიდან გამოსტაცა და ხარბად დააჩერდა.

ქალმა არ იწყინა. ახლო მივიდა და გვერდით ჩამოუჯდა.

– იცი, ვისი ნათქვამია? – ხმადაბლა ჰკითხა.

– აბა, საიდან მეცოდინება! – მხრების აჩეჩვით უპასუხა ვაჟმა და წიგნი გადაფურცლა.

– თორელის ლექსებია, მეფის კარის მგოსნის, თურმან თორელის, – წარმოთქვა ქალმა, გადაშლილ ფურცლებზე ლექსის სათაურს დახედა და ისევ ზეპირად, წამღერებით დაიწყო ლექსის კითხვა.

ვაჟმა წიგნი დახურა და მოჯადოებული მიაჩერდა.

– რა კარგად უთქვამს! – აღმოხდა ჭაბუკს, როგორც კი ქალმა დაასრულა.

– თორელის ლექსები გამიგონია, – დასძინა ვაჟმა, მერე ისევ ცაგოს ახედა და ჰკითხა:

– თამთას ლექსია?

– არა! – თავის გაქნევით უპასუხა ცაგომ.

– მაშ, რუსუდანისა იქნება! – დაჯერებულად თქვა ვაჟმა.

ქალმა ისევ თავი გააქნია და წამოწითლდა. ეტყობოდა, ეწყინა ვაჟის მიუხვედრელობა, რადგან თავის გულში, რატომღაც, ამ ლექსებს მისდამი მიძღვნილად, მისი სიყვარულით დაწერილად თვლიდა, თუმცა მათ დამწერს იგი თვალითაც არსად ენახა და, ალბათ, მისი არსებობაც არ იცოდა.

– სულ ზეპირად იცი? – ჰკითხა ვაჟმა.

– სულ, თავიდან ბოლომდე, – დაუდასტურა ქალმა.

– ნეტავ, მეც ვიცოდე! – ინატრა ვაჟმა და გაუბედავად დაუმატა, – მომეცი ეს წიგნი.

ქალმა წარბი შეიკრა.

– არა, სულ კი არა, – დაამშვიდა ვაჟმა, – ცოტა ხნით მომეცი, გადავწერ და დავასურათებ.

– დაასურათებ?

– ჰო, რასაც ამ ლექსებში დავინახავ, ყველაფერს იქვე დავხატავ, თვითულ ლექსთან.

– მართალს ამბობ? გულით დავხატავ?

– გულით... სულით და გულით დავხატავ... – უთხრა ვაჟმა და წიგნი სათუთად დაკეცა.

წაიღო ვაჟმა წიგნი და ცოტა ხანში მანაც ზეპირად ისწავლა.

თავიდანვე რომ თავის ნათქვამად მოეჩვენა თორელის ლექსები, შემდეგ, რაც უფრო ჩაუფიქრდა თავის გულსა და ამ ლექსებით თქმულს, მით უფრო განუმტკიცდა რწმენა, რომ მგოსანს მისი სათქმელი გამოეთქვა.

თავად მისთვის ლექსად გამოთქმის ნიჭი არ მოემადლებინა ღმერთს. რამდენი კარგი ლექსი წაუკითხავს და მოუსმენია, მაგრამ მანამდე მგოსნების არ შეხარბებია, არც ლექსად თქმის ნიჭი უნატრია. ახლა კი, თორელის ამ ლექსების კითხვისას, გრძნობდა, რომ მგოსანი მის გულისთქმას ამბობდა და შურდა, რომ მისი სათქმელი სხვას გამოეთქვა.

დემეტრე იყალთოელი ლექსების დიდად მოყვარული იყო. ბევრი წიგნი უჩვენებია ოსტატს მოწაფისათვის, არაბული თუ ირანული, ბერძნული თუ სომხური, ზოგი უჩუქნია კიდევ მისთვის. ბევრი მათგანი ლამაზ ყდაში იყო ჩასმული და შიგნით უცხოდ მოხატული: სარკეში მზირალი ფართოხალიანი ხათუნებით, დაკოდირი შვლის ნუკრებით, მოზიდული მშვილდ-ისრებით, დაჭრილი გულებითა და გონწასული მიჯნურებით.

ვაჩემ ზოგი სხვისი გაიხსენა, ზოგიც თავისი მოიგონა და შეუდგა წიგნის ხატვას.

პატარ-პატარა სატრფიალო ლექსებს ეტრატის თითო გვერდს უთმობდა. სათაურები და დასაწყისი ასოები ფრინველებისა და ცხოველების მიმსგავსებით გამოჰყავდა და ეტრატის თავსა და ბოლოში ლექსის გმირებს აცოცხლებდა. მაგრამ გასაოცარი ის იყო, რომ ყველა ლექსის მისამართი და მთავარი გმირი ერთადერთი სახით, ცაგოს სახით ეცხადებოდა და არც კი დაფიქრებულა, თუ რატომ – წიგნის ყველა გვერდზე მარტო ის ჩნდებოდა საზთან თუ ნიამორთან, იასთან თუ ვარდთან, ხეზე გასულ ვაზის მტევანთან თუ წყლის დასაღევად წყაროზე ჩაჩოქებულ შვლის ნუკრთან. თვითონაც არ იცოდა, როგორ გაჩნდა მისი ყალმის ქვეშ ეს სახე, გონების რომელი კუნჭულიდან ამოტივტივდა მის დაუკითხავად და როგორ გაცოცხლდა ხაზსა და ფერში.

ვაჩემ მეტს არაფერს აკეთებდა, თორელის წიგნს უჯდა და გარეთ აღარ გამოდიოდა. ცაგოს საყვარელი წიგნის მოხატვას თავის არსებას, ფიქრსა და შთაგონებას, სულსა და გულს ატანდა.

ცაგო მოუთმენლად ელოდა, ვაჩემს ნამუშევრის ნახვისათვის სული მისდიოდა, მაგრამ თავს იკავებდა, მხატვარს არ აკითხავდა, რომ ხელი არ შეეშალა.

ბოლოს ვაჩემ თვითონ მიიწვია. მთავარი უკვე დაესრულებინა და დასახატავი ცოტადა დარჩენოდა.

წიგნის გადაშლა და ცაგოს წამოწითლება ერთი იყო. თავის თავს თუ ეგრე წარმტაცად და ნაირფერად დახატულს ნახავდა, არ ელოდა. ბაგის ბოლოსთან ღიმი აუთამამდა და თვალში უცხო ნაპერწკალმა გაუელვა. უყურებდა ვაჩე სახელეწილსა და სუნთქვააჩქარებულ ცაგოს და ვერ გაეგო, ეს სიწითლე და შეკავებული ღიმილი სიამაყისა იყო თუ მოკრძალების.

ცაგომ თავის თავზე არაფერი თქვა, მაგრამ მხატვრობით აღტაცება არ დაჰფარა:

– მსგავსი ჯერ არაფერი მინახავს, ვაჩე! – თავაულებლად, წიგნის ფურცვლით თქვა ცაგომ და ვაჩე სიხარულით ცას ეწია.

ამაზე მეტი ჯილდო, ალბათ, არც ერთ მხატვარს არ უნატრია, – იმ უმაღლეს მსაჯულს, რომლის შთაგონებითაც ესოდენ დაშვრა ჭაბუკი, მისი ნამუშევარი მოსწონდა.

– ასეთი წიგნი მეფეებსაც არ ექნებათ!

თავმომწონედ თქვა სახეგაბრწყინებულმა ცაგომ და თავის ფიქრში წასულმა დაუმატა:

– ალბათ, არც თორელს ექნება ასეთი წიგნი!

ვაჟი არაფერს ამბობდა, თავს არ იღებდა და უხერხულად იღიმებოდა.

– მალე დაასრულებ, ვაჩე?

– მალე, რაღა დამრჩა! სულ სამიოდე დღის სამუშაოა...

– კარგი იქნება, ჩემს წასვლამდე მოასწრებდე.

ვაჟი შეკრთა, გაოცებულმა ახედა.

– თბილისში მივდივარ, ჩემი ძმა მამუკა მეფის კურთხევაზე გვიწვევს.

მოულოდნელი ამბის გაგონებამ თითქო მეხი დასცა ვაჩეს. შეტორტმანდა და სკამის ზურგს წაატანა ხელი.

– იქნებ, მეფის კარზეც მოვხვდე... ეგებ, იქ თორელიც ვნახო... – თავისთავთან მარტოდ დარჩენილივით ლაპარაკობდა ოცნებაში წასული ცაგო.

– თბილისში დიდხანს დარჩები?

შეშინებულივით ძლივს ამოიდგა ენა ვაჩემ.

– ვინ იცის, ეგ ბედზეა, ვაჩე! იქნებ, სულაც იქ დავრჩე! – აღტაცებით თქვა ქალიშვილმა.

ვაჟს ფერი ეცვალა, შუბლი შეკრა და სახე დაეღრუბლა.

– სწორედ სამ დღეში მივდივარ, ვაჩე, ეგებ, მოასწრო დამთავრება, – შეეხვეწა ცაგო და მკლავში ხელი ჩასჭიდა.

– ვეცდები... უთუოდ მოვასწრებ! – უხალისოდ, მძიმედ უთხრა ვაჟმა და წიგნი იქით მისწია.

– შენ იცი, ვაჩე, თუ თან გამატან, იქნებ, ეს წიგნი თორელსაც ჩაუვარდეს ხელთ. – ოცნებაში წასულმა ქალმა გულზე მიიდო ხელი, თითქო აჩქარებული სუნთქვის შეჩერება სურდა. მერე უცებ გამოერკვა და ცივად მოსჭრა:

– წავალ, აღარ გაგაცდენ... თავათაც ბევრი საქმე მაქვს, წასასვლელად უნდა მოვემზადო...

ქალი სირბილით გავიდა. ვაჟი მხრებჩამოყრილი დაეშვა სკამზე.

იმ სამმა დღემ სწრაფად გაირბინა. ცაგო წასვლის სამზადისში იყო და ვაჩესთან შესასვლელად აღარ ეცალა.

ვაჩე წიგნს უჯდა და ხატავდა, თუმცა ძველი გულით ველარ მუშაობდა. სულაც თავს მიანებებდა, მაგრამ ცაგოსათვის მიცემული სიტყვა სამუშაოზე აბამდა. ცაგოს წასვლის ამბავმა მთლად ააფორიაქა ჭაბუკი. ისე ეჩვენებოდა, თითქო ცაგოს წასვლით მარტო მისი ცხოვრების ჩვეულებრივი მდინარება და ახალდაბის პატარა აგარაკის მყუდროება კი არ ირღვეოდა, არამედ მთელი სამყაროს წესი და რიგი იშლებოდა, თავდაყირა დგებოდა და ცხოვრება მოულოდნელობით და გაურკვევლობით ივსებოდა.

ასე რატომ მიუხაროდა თბილისისაკენ ცაგოს, ასე გატაცებით რატომ ოცნებობდა იქ დარჩენასა და ცხოვრებაზე?

ამ კითხვას თავი ადვილად გაართვა: თბილისში ცხოვრება და, მით უფრო, სამეფო კარზე მოხვედრა ყველასათვის სანატრელი იყო და უმშვენიერეს ცაგოს რატომ არ უნდა ეოცნება ფუფუნებითა და სანიმუშო რაინდობით საქვეყნოდ განთქმულ ბაგრატიონთან კარზე.

საწყენი და გულდასაწყვეტი ის იყო, რომ ცაგო უკან არ იხედებოდა, დატოვება არაფრისა ენანებოდა და განშორება არავისი ეძნელებოდა.

მაგრამ იქნებ არც არავინ იყო ასეთი, იქნებ...

იქნებ, ვერც ხედავდა ცაგო, თუ რა ძვირფასი იყო ვაჩესათვის მისი სიახლოვე! განა ცაგოსთან განშორების შიშით არ უთხრა უარი ვაჩემ თავის უსაყვარლეს მასწავლებელს ხლათში წასვლაზე? განა მცირე იყო მსხვერპლი იმ ახალგაზრდა მხატვრისათვის, რომელიც სიცოცხლის აზრსა და თავის მომავალს დემეტრე იყალთოელის გვერდით ხატვასა და ცხოვრებაში ხედავდა!

რატომ ვერ გრძნობდა ცაგო, რაოდენ ერთგული, რაოდენ მალმერთებელი ჰყავდა ასე ახლო, სულ ახლო, კარის მეზობლად, როგორ თაფლის სანთელივით წმინდად იწვოდა მის ხატთან ამქვენიური ბიწისაგან ჯერ კიდევ შორს მდგარი უწვევრული ჭაბუკი.

იქნებ, იმიტომ არ ესმოდა ცაგოს ვაჩეს გაუმხელელი გულისთქმა, რომ ისიც ბავშვი იყო, მასავით გამოუცდელი და მიუხვედრელი?

მაგრამ რატომ ამბობდა ასე გრძნობითა და გატაცებით თორელის ლექსებს... და განა მარტო ლექსებს... თავათ მგოსნის სახელს... ასეთი სასოებით მხოლოდ ღმერთის სახელს წარმოსთქვამენ ხოლმე.

რატომ ნატრობს ცაგო თორელის ნახვას, მასთან შეხვედრას ასეთი დაჟინებით, ასეთი თავდავიწყებით?

ნუთუ?

მაგრამ საიდან, ცაგოს თვალითაც არ უნახავს თორელი.

დასრულდა წიგნის ხატვა. ძველებურად აღარ ახარებდა, თითქო სძულდა კიდევ ვაჩეს ეს საოცარი წიგნი, რომელსაც ასეთი შთაგონებით ხატავდა და რომელმაც ასე აუხსნელად დაუკარგა სიმშვიდე.

აბრეშუმის ქსოვილში შეახვია სათუთად წიგნი მხატვარმა და უცებ საშინელმა ფიქრმა გაჰკრა: ვაითუ, მზითვად ვატან ცაგოს ამ წიგნს თბილისშიო.

გული და გონება მოეწამლა, წიგნს უწმინდურებასავით უშვა ხელი და უცებ მოშორდა.

მაინც გულმა არ უქნა. წედან ქალაქისაკენ მიმავალი ცაგო რომ დაინახა, წიგნი მაინც გამოუტანა და გადასცა. მერე ის უცნაური კოცნა და უცნაური განშორება...

სიშორეში ჩაკარგულან, წაშლილან და გათქვეფილან თვალის დასალიერში მიმავალი მგზავრები. ლანდადაც, წერტილის ოდენაც აღარ ჩანან.

ვაჩე წამოდგა, სოფლისკენ მობრუნდა და თვითონაც არ უფიქრია, ისე დაუყვა შარას.

ეკლესიის ეზოში ბიჭები ჭიდაობდნენ, ერთი აურზაური ჰქონდათ, ვაჩე დაინახეს და დაუძახეს. ჭაბუკს არც გაუგონია, გზა განაგრძო. გზაზე ვიღაცეები ხვდებოდნენ, ალბათ, მეზობლები და ნაცნობები იყვნენ, სალამს ეუბნებოდნენ და უღიმოდნენ, მაგრამ მათგან ვერავის ცნობდა და არც არავისი ესმოდა. სოფელი სავსე იყო, დიდი და პატარა ყანასა და ბაღში, ეზოსა და გზაზე გამოსულიყო, მაგრამ ვაჩეს ყველაფერი დაცარიელებული, უკაცური ეჩვენებოდა – ეზოებიც და სახლებიც, ბაღებიცა და მინდვრებიც.

რალა გაძლებს, რალა აცხოვრებს ამ აკლდამასავით გაცივებულსა და გამოცარიელებულ სოფელში ვაჩეს?!

შინ მობრუნდა. წყალთან ბავშვები აღარ იდგნენ, დედაც აღარსად ჩანდა. სახლი მიიარ-მოიარა. მკვდრული სიჩუმე იყო ყველგან და იქაურობაც გამოცარიელებული ეჩვენა.

კედელზე იყალთოელისეული აბგა ეკიდა, მაგიდაზე ყალმები და ფუნჯები ეყარა.

თითქო მათმა დანახვამ გამოარკვიაო, უცებ გამოცოცხლდა, აბგა ჩამოხსნა, საღებავები, ფუნჯები და ყალმები შიგ უწესრიგოდ ჩაჰყარა, განჯინიდან შოთი პური გამოიღო, იმასაც აბგაში უკრა თავი, ზურგზე მოიგდო და სახლიდან გავიდა.

თ ა ვ ი მ ე ო რ ე

ქალაქი საზეიმოდ იყო მოკაზმული. აივანზე ფერადი ხალები გადმოეფინათ, ქულბაქები დაეკეტნათ და ბანზე ხალხი გამოსულიყო.

პურისა და ღვინის სავაჭროები, ფუნდუკები ღია იყო.

გამვლელ-გამომვლელი პურსა და ღვინოს ყველგან უფასოდ მიირთმევდა. ზურნა-დოლის ხმასა და მემთვრალეთა ყაყანს ყურთასმენა მიჰქონდა.

პირველსავე ფუნდუკთან გავლისას ხელი სტაცეს ვაჩეს. შეზარხომებული ქალაქის ხელოსნები იყვნენ. ვაჩე დიდ რუმბთან მიაგდეს.

– ქალაქში ისე შესვლა არ შეიძლება, მეფე თუ არ გვიდღეგრძელებს!
– რუსუდან დედოფლის ტახტზე ასვლა დალოცე!
მიამახეს აქეთ-იქიდან და რამდენიმე დაკოჟრილმა ხელმა ერთად გამოუწოდა ვეება სასმისები.

ვაჩემ ერთი დასცალა, დედოფლის კურთხევა დალოცა და მეორე სასმისზე რომ უარი თქვა, არაფერი გაუვიდა.

– ახლა ღვთისგვირგვინოსანი, ნეტარცხოვნილი თამარი გვიდღეგრძელებს, რუსუდან მეფეს მის კვალზე სიარული უსურვე.

მიეძალნენ ვაჩეს და დიდი თამარის სადღეგრძელოც დააღვინეს.

წასვლა დააპირა, მაგრამ ღმერთი სამეხით არისო, – შესძახეს აქეთ-იქიდან, – ჩვენც ხალხნი ვართ, მეფე და მთავარი ჩვენით არის, ჩვენი მარჯვენაც დალოცე, საქართველო და მისი ხალხი ადღეგრძელებო.

ესეც დალია ვაჩემ და ფუნდუკიდან უკვე ლოყებშევარდისფერებული გამოვიდა.

გულიდან დარდი გადაეყარა, თვალში შუქი მოემატა და მუხლში ძალა. აზგამოკიდებული მოდიოდა ღიღინით შუა ქუჩაზე, ცა ქუდად არ მიაჩნდა და დედამიწა ქალამნად.

ქალაქის მოედანზე უამრავი ხალხი ირეოდა. ზედ მოედნის შუაგულში ორი ხე აღმართათ: ერთი მთლიანად ოქროსი და მეორე – ვერცხლისა. ამ ხეებზე ოქროსა და ვერცხლის ჩიტები ისხდნენ და ტოტებიდან წითელი და თეთრი ღვინის შადრევანი სდიოდა.

ხალხი გაოცებული უყურებდა ქვეყნის სიმდიდრესა და ხელოვნების ამ სასწაულს. გარს უვლიდნენ, აკვირდებოდნენ, ტოტებიდან გადმოფრქვეულ ღვინოს აჭაშნიკებდნენ და ქართველი ოქრომჭედლების ოსტატობის გამო აღტაცებას გამოსთქვამდნენ.

რამდენი ოქროა დახარჯული ამ შადრევანზე, მერე სულ ბაჯალლო, წმინდა ოქრო!

– ვინ იცის, რამდენ ხანს სჭედდნენ ოქროსა და ვერცხლს, რომ ასეთი საზღაპრო შადრევნები გაეკეთებინათ!

ესმოდა გაოცებული მნახველების ლაპარაკი ვაჩეს და თავათაც განცვიფრებული უვლიდა იმ სამოთხის ხეებს.

– ამბობენ, მამუკა ოქრომჭედლის გაკეთებულია საკუთარი ხელითო.

– ჰო, ხელობა მამუკასია, გეგმა და აზრი კარის ხუროთმოძღვარს გოჩი მუხასძეს ეკუთვნის, – უხსნიდა ვაჩეს გვერდით მდგარი ერთი მოქალაქე მეორეს.

გოჩი მუხასძის სახელი პირველად არ ესმოდა ვაჩეს, მისი მასწავლებელი დემეტრე ხშირად ახსენებდა ქებით მეფის კარის ხუროთმოძღვარს. ვაჩეს ყურადღება უფრო მამუკა ოქრომჭედლის ხსენებამ მიიპყრო. მამუკა ცაგოს ძმა იყო, ვაჩეს ახლო მეზობელი და კარგი ნაცნობი. მამუკას ოქრომჭედლობაზე ბევრი რამ სმენოდა ვაჩეს, მაგრამ თუ ესოდენ დიდი ხელოვანი და მეფის კარზე მიღებული ოსტატი იყო, ეს კი არ იცოდა.

უცრად სადღაც ძელსა სცეს და ქალაქის სხვადასხვა კუთხიდან რეკვა ატყდა.

ვაჩემ ერთი კი მიუგდო ყური ამ დიდ ხმაურს, მაგრამ არაფრად ჩააგდო და ისევ არხეინი ღიღინით გააგრძელა გზა შუა ქუჩაზე.

უცებ ცხენის ფეხის ხმა გაისმა და ვიდრე ცხენოსნები გამოჩნდებოდნენ, ბუკის ხმა და ძახილი გაიგონა:

– გზა! გზა!..

ცხენოსანთა რაზმმა ქუჩაში გამოსულნი აქეთ-იქით მიჰყარ-მოჰყარა. ვაჩეს ხალხის ტალღა მოაწვა და თან გაიყოლა.

ხან აქეთ მიაგდეს და ხან იქით. ბოლოს პატარა შუკაში მოხვდა და ხალხიც შემოეცალა.

მიიხედ-მოიხედა, ხალხი ღია ბანებზე არბოდა. თვითონაც მათ მიჰყვა და იმ მთავარ ქუჩას, რომელზედაც წელან მიაბიჯებდა, ზემოდან მოექცა.

დაცარიელებულ ქუჩაზე ცხენოსნებმა გაირბინეს, მათ ბუკისმკვრელები მოჰყვნენ და შემდეგ სპა წამოვიდა გაშლილი დროშებით..

თავჩაჩქიან და თორშუბოსან სპას ცოტა მოშორებით სამღვდელონი მოჰყვებოდნენ საცეცხლურების ქნევითა და აიაზმის სხურებით.

ოქროთი დარახტულ თეთრ კვიცზე ულამაზესი ქალიშვილი იჯდა, თავს მეფის გვირგვინი ედგა და ტანსაცმელიც ერთიანად პატიოსანი თვლებით ჰქონდა შემკული.

ვაჩე მიხვდა, რომ მშვენიერი გვირგვინოსანი რუსუდან მეფე უნდა ყოფილიყო.

პირველად ხედავდა დიდი თამარის აწ უკვე მეფედ ნაკურთხ ასულს. გაგონილი ჰქონდა, რომ სიტურფით თამარს ამსგავსებდნენ რუსუდანს. ალბათ, თამარიც არ იქნებოდა ასე ტურფაო, – გაიფიქრა ვაჩემ და თვალი ვედარ მოსწყვიტა თეთრ კვიცზე ამხედრებულ ტანკენარ რუსუდანს.

სახე ჯერ კიდევ ბავშვური ჰქონდა და ტანი დაუსრულებელი გვირგვინოსანს. სწორედ ცაგოს ხნისა იქნებო, გაიფიქრა და ცაგოს გახსენებამ ისევ ააფორიაქა.

მეფის უკან მიმავალ ბრწყინვალე ამაღას, გვირგვინოსნებსა და დიდებულებს ქუჩის ორივე მხრიდან უამრავი ხალხი უქცერდა, ყველა წინ დგომასა და სეირის უკეთ ნახვას ცდილობდა, ერთიმეორეს აწვებოდნენ, ფეხისწვერებზე დგებოდნენ და ყელს იღერებდნენ.

ქუჩის პირას სახედარს მოჰკრა თვალი ვაჩემ. მოწოლილ ხალხს სახედრიანად მიეჭყლიტა პავლია კუტი დარაბებდაკეტილ სახელოსნოსთან. ცაგო ხალხის მოწოლისაგან იცავდა თავს და ფეხისწვერებზე ამალღებული, თვალს არ ამორებდა დედოფალსა და მის ამაღას.

მეფის ამაღაში მოხდენილი ცხენოსანი შეჩერდა უცებ. პირი უკან იბრუნა და ვაჩემ დაინახა, როგორ გაუყარეს წამით თვალი ერთმანეთს ცაგომ და უცნობმა ცხენოსანმა.

ცაგო გაწითლდა და თავი დახარა. ცხენოსანმა ცხენი დასძრა, მაგრამ თავი დიდხანს არ მიიბრუნა და თვალი იქ დარჩა, დარაბებდახურულ სახელოსნოს წინ.

მეფის ამაღამ გაიარა, ხალხმაც იხუვლა და უკან მიჰყვა.

ხალხი რომ მოეცალათ, ქუჩის პირად დარჩენილმა პავლია კუტმა შვებით ამოისუნთქა, სახედარზე გასწორდა და ცაგოს მოხედა: ცაგო ისევ ფეხისწვერებზე იდგა და, თუმცა მეფის ამაღა უკვე კარგა შორს იყო წასული, უცნობი ცხენოსნის დანახვას ცდილობდა.

პავლია კუტთან ვიღაც მიიჭრა და გადაეხვია. მხარზე კაცის მოხვეული ხელი რომ იგრძნო, მაშინდა გამოერკვა საპყარი, კისერზე ჩამოეკიდა და ვაჩემ იცნო ცაგოს უფროსი ძმა მამუკა.

მამუკამ პატარა ბავშვივით აიყვანა პავლია კუტი და ხელში ატატებული სახელოსნოსაკენ წაიყვანა. დარაბები გახსნა და კარზე დაარახუნა. კარი მაშინვე გაუღეს და დარაბაც მიხურეს.

ცაგო ისევ ძველ ადგილას იდგა, ისევ წინ იყურებოდა და ამაოდ ცდილობდა, უკვე შორს წასული უცნობის დანახვას.

სახელოსნოს კარში ისევ მამუკა გამოჩნდა, ცაგოს დაუძახა და ქალი გამოფხიზლდა. უხალისოდ, ნამალადევად გაღიმებული მიბრუნდა, სახელოსნოში შევიდა და დარაბაც მიიხურა.

ბანი უკვე დაცარიელებულიყო, ხალხი მეფის ამაღას გაჰყოლოდა. ვაჩემ წასვლას აპირებდა, მაგრამ წასასვლელი არსად ჰქონდა და იმას ფიქრობდა, მარჯვნივ დადგომოდა გზას თუ მარცხნივ, ზემოთ თუ ქვემოთ.

ფიქრიდან ცხენის ფეხის ხმამ გამოიყვანა. ცხენს ის უცნობი მოაჭენებდა, წელან რომ მეფის ამაღას ჩამორჩა და ცაგოს თვალში თვალს უყრიდა.

ხედვად და სმენად იქცა ვაჩემ, გულმა გამალეებით უწყო ცემა.

უცნობმა ცხენი იქ გააჩერა, სადაც პავლია კუტის სახედარი იდგა, ცხენიდან გადმოხტა და ახლა უფრო მოხდენილი, ტანადი ეჩვენა იგი ვაჩემს. უცნობმა ცხენი სახედრის გვერდით გამოაბა, დარაბა გამოაღო და სახელოსნოს კარზე დააკაკუნა.

კარი გაუღეს და დარაბა ისევ მიიხურა.

მამუკას სახელოსნოში რომ შევიდა, ცაგოს არც პირის დაბანასა და თმის დავარცხნაზე უფიქრია, არც საჭმელსა და სასმელზე. ძმას დედისა და ნათესავ-მეზობლების ამბის კითხვა არ აცალა, თორელის წიგნი ამოიღო და წინ გადაუშალა.

მამუკას თვალი მოსტაცა ულამაზესი ხელით ნაწერმა და გასაოცარმა მხატვრობამ. გაოცებული დააცქერდა და ნელა ფურცლავდა პატარა წიგნს.

– რა მშვენიერი მხატვრობაა!

აღმოხდა მამუკას და რომელიღაც ნახატს დაჟინებით ჩააცქერდა?

– ვისია? – ისევ თავაუღებლივ იკითხა მამუკამ.

– ჩემია! ვისი იქნება? – უპასუხა ცაგომ.

_ სად იშოვე ან ვისი ნახელავია? _ გაკვირვებით შეხედა მამუკამ ცაგოს.
 _ სად ვიშოვიდი, ჩვენი ვაჩეს მოხატულია!
 _ ვაჩესი? გრძელიაანთ ვაჩესი?
 _ ჰო, გრძელიშვილის ობლის, ვაჩესი, იყალთოელის მოწაფისა.
 _ თურმე ტყუილად როდი მიქებდა დემეტრე მხატვარი გრძელიშვილის ობოლს... ასეთი მაინც არ მეგონა!
 გაოცებით გააქნია თავი მამუკამ და ისევ წიგნს დააცქერდა.
 _ მართლა კარგია, მამუკა? ნამდვილად მოგწონს?
 _ მომწონსო? ამ ნამუშევარს ფასს ვერავინ დასდებს.
 _ თუ ეგრეა, ოქროთი მომიჭედე და მეფის კარზე როცა წარმადგენ, რუსუდან დედოფალს მივართმევ.
 _ მართლაც რომ კარგი ძღვენი იქნება! მაგრამ დღეს მეფის კურთხევის დღეა, ყველა უქმობს და მეც ოსტატები დავითხოვე.
 _ შენ თვითონ მოჭედე, მამუკა, შენსავით ვინ გააკეთებს! _ შეეხვეწა ცაგო.
 _ კარგი, მე თვითონ გავაკეთებ, მაგრამ შემდეგ იყოს, ახლა დავისვენოთ და საუზმეს შევექცეთ. _ ღიმილით მოხვია ხელი დას მამუკამ, ფარდა ასწია და ცაგოს სახელოსნოს გვერდით ოთახისკენ წაუძღვა.
 პავლია კუტი რბილ ტახტზე წამოწოლილიყო, წყალი მოერთმიათ, ხელპირი დაებანა და ახლა საუზმის მოლოდინში ლოცვას ბუტბუტებდა.
 _ ახლავე, პავლია! აბა, ცაგო, შენც მიშველე! _ შესძახა მამუკამ და ის იყო, ტაბლის გასაწყობად უნდა დატრიალებულიყო, რომ კარზე კაკუნი გაისმა.
 _ მათე, კარი გააღე, ვილაც აკაკუნებს!
 გასძახა მსახურ ბიჭს და ცოტა ხნის უკან დაადევნა:
 _ მე თუ ვინმემ მიკითხოს, უთხარი, შინ არ არის-თქო.
 ბიჭი ისევ ჩქარა მობრუნდა.
 _ ვილაც დიდი დიდებულია. ძალიან საჩქარო საქმე მაქვსო.
 _ მერე, მე როგორ დაგარიგე!
 _ ვუთხარი, ოსტატი შინ არ არის-მეთქი და არ დამიჯერა. კარი არ მიმახურვინა, შინ ძალით შემოვიდა.
 _ დამიცადოს.
 ცივად უთხრა მამუკამ და ბიჭი სახელოსნოში გავიდა.
 _ დიდ დიდებულს ახლა აქ რა უნდა? _ გაიკვირვა მამუკამ, ცნობის სურვილმა დასძლია და ფარდის კუთხე ოდნავ ასწია.
 ფარდა მაშინვე დაუშვა, და-ძმისკენ მობრუნდა და ხმადაბლა წარმოსთქვა:
 _ თურმან თორელია, მეფის კარის მგოსანი!
 დაფაცურდა და სწრაფად გავიდა მამუკა.
 სტუმარს მდაბლად მიესალმა და სავარძელი შესთავაზა. თორელს უკვე შეენიშნა მაგიდაზე გაშლილი წიგნი, ყურადღებით დაჩერებოდა და მოწონების ნიშნად თავს აქნევდა.
 ცაგო ფეხაკრეფით მივიდა ფარდასთან, ოდნავ ასწია და სულგანაბული მიაჩერდა.

წელან, სულ რამდენიმე წუთის წინ, მეფის ამაღლაში მიმავალმა ცხენოსანმა რომ თვალი თვალში გაუყარა და გული და გონება მისტაცა, თურმე, თორელი ყოფილა, მისი საოცნებო თორელი! როცა მის ლექსებს იქ, ახალდაბის მინდვრებსა და ტყეებში ზეპირობდა, მომხიბლავ ვაჟკაცად ჰყავდა თურმან თორელი წარმოდგენილი, მაგრამ რა იცოდა, თუ ესოდენ საჩინო, მიმზიდველი და თვალტანადი იქნებოდა!

– შენთან ერთი სათხოვარი მაქვს, მამუკა! – მიმართა თორელმა ოქრომჭედელს და წიგნს თავი ანება.

– მუდამ მზად ვარ, თქვენისთანა სახელოვან დიდებულს ვემსახურო! – თავდახრით უთხრა ოქრომჭედელმა.

– რუსუდან მეფეს ტახტზე ასვლა მინდა მივულოცო.

– აკი მიულოცეთ, თურმან ბატონო! მთელი საქართველო თქვენს მიერ თქმულ რუსუდანის ქებას მღერის.

– ეგ ლექსად, ჩემო მამუკა, მაგრამ სხვა სახსოვარიც მინდოდა მეძღვნა, ხელოვნების რაიმე ნიმუში, პატიოსანი თვლებით შემკული ოქროს რაიმე ნივთი.

– ვწუხვარ, რომ დაიგვიანე. ამ დღისათვის ყველა ადრე დატრიალდა, თუ რამ დედოფლისა და თქვენისთანა დიდებულის საკადრისი მქონდა, ადრევე დაიტაცეს. თქვენი ღირსი აღარა მაზადია რა.

– მე არც ისე ძვირფასს ვეძებ, მამუკა. მოგეხსენება, სიმდიდრესა და შემღებაზე თავს არ ვდებ. ერთი კარის მგოსანი ვარ და ჩემი ქონება ლექსია მხოლოდ. ჩემგან უბრალო ძღვენსაც მიითვლიდა დიდებული რუსუდანი, მაგალითად, ჩემი ლექსების წიგნს, ოღონდ ოსტატის ხელით გადაწერილსა და ხელოვანი მხატვრის სურათებით შემკულს... თუნდაც ასეთს...

ფრთხილად შეაპარა თურმანმა და მაგიდაზე გაშლილი, ვაჩეს მიერ მოხატული წიგნი უჩვენა.

მამუკა გაშრა. თხოვნა რომ დამასწროს, უარი როგორ შევბედოო, – გაიფიქრა და სცადა გზა მოეჭრა:

– ეგ წიგნი ჩემი ახალდაბელი მეზობლის, ახალგაზრდა მხატვრისაა. თავის ხელით გადაუწერია და თვითონვე მოუხატავს.

– დიდი ხელოვანი ყოფილა შენი მეზობელი, მამუკა. ჩემი წიგნი კი არა, რუსთველის «ვეფხისტყაოსანი» არ მინახავს ასე ოსტატურად მოხატული... ამ ნახატებმა ჩემი ლექსები სულ სხვაგვარად დამანახა და წარმომიდგინა... კარგ ფულს მივცემდი ამის პატრონს, რომ დამითმობდეს.

ფარდის იქით მდგარ ცაგოს სუნთქვა შეეკრა. უნდოდა გასულიყო, მუხლზე დავარდნილიყო, წიგნი მიერთმია და ვედრებით ეთქვა: – ეს წიგნი შენია, შენზე ნაოცნებარი, შენთვის გამზადებული და შენვე გეკუთვნისო, – მაგრამ რაღაც ძალა აჩერებდა, ფარდის გადაწევასა და გამოჩენას ვერ ბედავდა.

თორელი გამომცდელად უყურებდა მამუკას და ოსტატი დაიბნა.

– სამწუხაროდ, ეგ წიგნი პატრონს აღარ ეკუთვნის, ჩემს დას უძღვნა. ნაჩუქარის გაცემა კი მოგეხსენებათ, წესი არ არის, – თავდახრით უთხრა ოსტატმა.

– სამწუხაროა, მაგრამ რა გაეწყობა! – დანანებით თქვა თურმანმა, წიგნი დასდო და მამუკას, ვითომ სხვათა შორის ჰკითხა:

– დაცა გყავს, მამუკა?

– დიახ, ერთადერთი დაი მყავს. სწორედ დღეს მეწვია მეფის კურთხევით სანახავად.

– ის ხომ არ არის შენი დაი, წელან რომ აქ იდგა, შენი სახელოსნოს წინ, სახედარზე მჯდომი კაცის გვერდით, თეთრკაბიანი გოგონა.

– სწორედ ის არი. იმ სახედრით ჩემი საპყარი ძმა ჩამოიყვანა... ჩემი ძმა სწავლულია, მწიგნობარი და მეცნიერი. გელათის აკადემიის წინამძღვარმა ისურვა მისი გაცნობა და, ალბათ, ამ დღეებში ინებებს აქ მობრძანებას.

– გამახარე, მამუკა, ძმა ჩემი ხელობისა გყოლია, მეც სიამოვნებით გავეცნობოდი და ვესაუბრებოდი... რამდენ ხანს დარჩებიან შენი სტუმრები?

– არ ვიცი... ერთხანს აქ იქნებიან.

– მაშ, შევხვდებით! ახლა კი წავალ, სასახლეში მიგვიანდება, – უთხრა თორელმა, ერთი თვალი გააპარა ფარდისაკენ და შენიშნა: ფარდის კუთხე ოდნავ შეირხა და უკან ლანდმა გაირბინა.

გარედან ცხენის ჭიხვინი მოისმა. თორელმა ხელი გაუწოდა მამუკას. ოსტატი დაემშვიდობა და კარამდე მიაცილა.

უცხო სახლის ბანიდან თვალი არ მოუშორებია ვაჩეს იმ კარისათვის, სადაც ჯერ ცაგო და მისი კუტი ძმა, ხოლო შემდეგ უცნობი დიდებული გაუჩინარდნენ.

ვაჩე გრძნობდა, რაღაც არაჩვეულებრივი, მისთვის დიდად მნიშვნელოვანი ხდებოდა მიხურულ დარაბებს იქით, მამუკას სახელოსნოს კარს თვალს არ აცილებდა და ადგილიდან არ იძროდა.

ცოტა ხანი საუკუნედ ეჩვენა, აწრიალდა. ვერც ვერსად მიდიოდა და აღარც იქ დარჩენა შეეძლო. ბედად, გვერდით გამობმულმა ცხენმა სახედრის მეზობლობა იუკადრისა, გაელურსა და საკბენად მიიწია. სახედარმა ყელში ცემა მოასწრო ჯიშთან ქურანს და ცხენი განწირულად აჭიხვინდა.

ვაჩეს მამუკას კართან მისვლის საბაბი მიეცა, დააპირა კიდეც ცხენისა და სახედრის გასაშველებლად გადასვლა, რომ სახელოსნოდან უცნობი დიდებული გამოვიდა ოქრომჭედლის თანხლებით. მამუკა სახედართან მიიჭრა, ცხენს მოაშორა და იქით გააგდო. მერე დიდებულს ცხენი მიჰგვარა, აღვირი გადაუგდო და უზანგი დაუჭირა.

დიდებული უარზე დადგა, მაგრამ მამუკა არ დაეხსნა, ვიდრე სტუმარი ცხენზე არ შეჯდა. უცნობი დიდის ამბით გამოემშვიდობა და ცხენს აღვირი მიუშვა.

მიტრიალდა თუ არა ცხენოსანი, ცაგო გარეთ გამოვიდა და დიდხანს, დიდხანს უყურა ჭენებით მიმავალ სტუმარს.

ცხენოსანი უკვე აღარ ჩანდა, ცაგო კი ისევ მის გზას გაჰყურებდა.

პირდაპირ, სახლის ღია ბანზე იდგა ვაჩე. ერთი რომ მოეხედა ცაგოს, მაშინვე დაინახავდა, მერე როგორ ნატრობდა იმ ერთ მოხედვას ვაჩე!

მამუკა კართან მოდგა და ცაგო იხმო.

ცაგომ ერთი ამოიოხრა და თორელის გზიდან თვალმოუშორებლად შევიდა მამუკას სახლში.

ვაჩე ერთხანს იდგა – ცაგოზეც, იმ უცნობ ცხენოსანზეც და თავის თავზეც გაბრაზებული. მისი იქ ყოფნა არავის ადარდებდა, იმ დარაბებმიხურულ სახელოსნოსა თუ სახლში ის არავის ახსოვდა.

იგი ისევ ობოლი იყო ამ დიდ ქვეყანაზე, დედა შორს ჰყავდა და ამოდენა ქალაქში გამკითხავი ან გულშემატკივარი ერთი არავინ ეგულებოდა.

ღარიბი და უნათესავო ვაჩე ამაყი და თავმოყვარე იყო, მოწყალებას არავისგან ითხოვდა და შინაგანად სჯეროდა, რომ მარტოდმარტოც, სხვათა დაუხმარებლადაც გაიკვლევდა ცხოვრების გზას.

პირი იბრუნა და ჩქარი ნაბიჯით გაჰყვა ქუჩას.

იმ ღამეს არც მამუკას დაუძინია, არც ცაგოს ეძინა.

მეორე დღეს დედოფალს უნდა ხლებოდა მამუკა და ცაგო უნდა წარედგინა. დრო არ ითმენდა, ახლის გაკეთებას ვეღარ მოასწრებდა და ისევ გამზადებული ამჯობინა: რომელიღაც დიდებულის მიერ შეკვეთილი «ვისრამიანის» ყდა ჰქონდა მოჭედილი. ოქროზე ამოკვეთილი მხატვრობის სასიყვარულო შინაარსი თორელის სატრფიალო წიგნისათვის შესაფერისად მიიჩნია, ზომას მიუყენა და წიგნი ყდაში ისე ოსტატურად ჩასვა, თითქო საგანგებოდ საამისოდ ჰქონდა გამზადებული.

ცაგო დიდხანს არ დაწვა. მამუკას მუშაობას ადევნებდა თვალს და ძმას სოფლის ავ-კარგის მოყოლით ართობდა.

ნაშუალამევს მიწვა ლოგინზე, მაგრამ თვალს ძილი არ მიეკარა. იწვა ღამეში თვალდაჭყეტილი და საკუთარი გულის აჩქარებული ცემა არ აძინებდა. რაღაც დიდისა და არაჩვეულებრივის მოლოდინში იყო ცაგო. მეორე დღეს მეფის კარზე უნდა წამდგარიყო, დედოფალს უნდა ხლებოდა. ვინ იცის, როგორი თვალით შეხედავდა რუსუდან დედოფალი, ან სეფექალები როგორ შეხვდებოდნენ?! ამაზე ადრეც უფიქრია, მაგრამ ახლა ეს იმდენად აღარ ადარდებდა. იქნებოდა თუ არა თორელი ხვალ მეფის კარზე, ნახავდა თუ არა ცაგო პირისპირ იმ რაინდს, რომელზედაც ასე დიდხანს უოცნებია? ეს ფიქრი უკარგავდა ძილსა და მოსვენებას.

იმ ღამეს არც თორელს სძინებია.

მეფის კურთხევას ბევრი უცხო სტუმარი დაესწრო: ბიზანტიელი და ტრაპიზონელი, იკონიელი და არზრუმელი, შამელი და ხლათელი, ადარბადაგანელი და შირვანელი; იმპერატორების, სულტნების, მეფეებისა, ათაბაგებისა და მელიქების მემკვიდრეები და უფლისწულები საგანგებო

ძღვენი და აღკაზმულობით ეახლნენ ტახტზე ასულ უმშვენიერეს დედოფალს, რათა საქართველოს სამეფოსთან მეგობრობისა და ერთგულების მზადყოფნა გაეცხადებინათ.

უცხო უფლისწულებსა და მთავრებს თან რჩეული მობურთაღნი, მსახიობნი და მგოსანნი ახლდნენ.

თორელს იმ დღეს მეტიც მოუვიდა. ჯერ იყო და, მეფეთა საცქერლად გამართულ მობურთაღთა ასპარეზობაში სიმკვირცხლითა და სიკასკასით მოხიბლა ყველა; მერე, ლხინის დროს, შირვანელ და ადარბადაგანელ მგოსნებს გაეჯიბრა და აქ უკვე სიტყვისა და გონების ბრწყინვალეობით მოაჯადოვა მსმენელნი.

ბურთშიაც და შაირობაშიაც უჩვეულო თავგამოდება და მგზნებარება გამოიჩინა. უცხოებს არ გაჰკვირვებიათ, რადგან კარის მგოსნის და რჩეული რაინდის აღტკინებას ქართველთა დედოფლის ემხისა და სილამაზის შთაგონებით ხსნიდნენ.

ახლობლები გაოცებულნი დარჩნენ: ლაშა-გიორგის სიკვდილის შემდეგ თორელი ხეირიანად გაცინებული აღარ ენახათ და უკვირდათ მისი გუნების ეგრე უეცარი შეცვლა.

ლხინში ღვინო ჩქარა მოეკიდა საერთოდ ამტან თორელს. ნაშუადამევს მეფეებმა სუფრა დასტოვეს და თურმანი თავის სახელოვან ბიძაშვილსა და მეგობარს შალვა ახალციხელს შეუჩნდა, – შენთან სალაპარაკო მაქვსო. დაიყოლია, ლხინი დაათმობინა და ცხენებით გაჰყვინენ უკვე დაწყნარებულ უკაცრიელ ქუჩებს.

ცისა და ბარის ამბები თქვეს, მაგრამ ფხიზელმა ახალციხელმა შეატყო, რომ თორელი ერთსა ფიქრობდა და სულ სხვას კი ლაპარაკობდა.

საუბარში მამუკას სახელოსნოს წინ აღმოჩნდნენ. თორელმა ცხენი შეაყენა. მიხურული დარაბიდან შუქი გამოდიოდა.

– ოქრომჭედელთან ხომ არ შევიდეთ?

თვალით ანიშნა თორელმა.

– რა დროს ოქრომჭედელია?! ხვალ ნახე, დღისით, თუ ოქრო გაწუხებს! – გაეხუმრა, ცოტა არ იყოს, გაკვირვებული შალვა და გზა განაგრძო.

მტკვრის პირს დაჰყვინენ და ორთაჭალის ბაღებს შემოუარეს. შემობრუნებულნი, როგორღაც ისევ მამუკას სახელოსნოს წინ გაჩნდნენ და თორელმა ისევ შეაჩერა ცხენი. მესამედ რომ იქვე მოსწია ცხენს სადავე, ახალციხელმა ეჭვით შეხედა თორელს.

– ისე უტრიალებ ამ ოქროს სამჭედლოს, რაღაც დიდი განძი უნდა გქონდეს მიბარებული! – ღიმილით უთხრა შალვამ, გადმოიხარა და თვალებში ჩახედა თურმანს.

– დიდი, ძალიან დიდი! – ამოოხვრით თქვა თორელმა, მაგრამ ზედმეტის გამხელისა შეეშინდა და უმაღვე სიტყვა ბანზე აავდო.

– კარგი ღამეები იცის თბილისმა, დილამდე რომ ასე ვიარო, არ მომწყინდება.

– ეეჰ, შენ თავრიზი და ყაზვინი არ გინახავს! აი, იქ იცის ღამეები!

– მაგრამ იქ ასე არხეინად ვერ ივლიდი, იარაღით დაჰყრობილ უცხო ქალაქებში.

– ასე, რა თქმა უნდა, ვერა. შელეწილ ციხეებსა და ბრძოლით აღებულ ქალაქებში ასე არავინ გაგიშვებს. მაგრამ ბანაკიდან ან სიმაგრიდან ცქერაც დიდ სიამოვნებას გვრის კაცს, როცა შენს ფერხთაწინ უზარმაზარი ქალაქი დამხოვლილი, შენივე ხმლითა და მკლავით გატეხილი.

შალვა ცოტა ხნით ოცნებამ წაიღო, მერე ისევ ახლო მივიდა თორელთან, ცხენი შეაჩერა და ხმადაბლა უთხრა:

– ამ დღეებში ადარბადაგანზე უნდა ვილაშქროთ. წამოდი, კარგ დროს გაატარებ.

– ვერა, შალვა, ვერ წამოვალ! – ამოოხვრით თქვა თორელმა. – სწორედ ამ დღეებში ერთი დიდი საქმე მაქვს და სანამ ის არ გადაწყდება, ვერსად ვერ წავალ.

ახალციხელმა ისევ გაკვირვებით შეხედა. თორელმა მეტი არაფერი თქვა და შალვამაც აღარ ჩაჰკითხა.

– შენ იცი, როგორც გინდოდეს! – მხრების აჩეჩვით უთხრა და გზა განაგრძო.

შინმისული თორელი ამაოდ ტრიალებდა ლოგინში, ძილი არ მოსდიოდა და ფიქრი არ ეხსნებოდა.

ნუთუ, მართლა ასე ღამაზია მამუკას და? სულ ერთი წუთით დაინახა და, იქნებ, მოეჩვენა, კაცი ხან რა თვალით შეხედავს ქალს და ხან რა თვალთ! ეგებ არც ისე დამაბრმავებელია იმ გოგონას სიტურფე, თვალები რომ ეშმაკურად უციმციმებდა და ულამაზესი ქალების ცქერას მიჩვეული თორელი, რეტდასხმული, კინაღამ გადმოაგდო ცხენიდან.

არც ისე ღამაზია? მაშ, საიდან დახატა უცნობმა მხატვარმა ესოდენ წარმტაცი და მომხიბვლელი, წიგნის ყველა გვერდიდან ხომ მისი უმშვენიერესი სახე უცქერდა ოდნავ გაზიდული თვალებით, ბოლოებგატყორცნილი წარბებითა და ბაგეებთან მოთამაშე ეშმაკური ღიმილით.

რაღა ეს წიგნი, თორელის ლექსების წიგნი გახდა მისი მშვენიერი სახის ჩარჩო და სახატე!

განგება, სწორედ განგება ურევია ამ საქმეში!

ამ ლექსებს თორელი უმისამართოდ წერდა, როგორც ზოგჯერ არაერთ დიდ მგოსანს დაუწერია. სასიყვარულო ლექსების ეს წიგნი ისე შეჰქმნა, რომ არავინ ჰყვარებია. ვინ ვის მიაწერდა ამ ლექსებს, ზოგი ვის თვლიდა მგოსნის საგონებლად და ზოგი ვის!

თორელს კი ბუნდოვნადაც არავინ ჰყავდა ხორცმესხმულად წარმოდგენილი.

და ახლა პირველად იპოვა იგი, ვისთვისაც ეს ლექსები უწერია, ვისზედაც უნახავად, შორიდან უოცნებია!

გაცოცხლდა, ხორცი შეესხა მის ოცნებას და მისმა ლექსებმაც განგებისაგან დათქმული მისამართი იპოვეს.

იპოვა თორელმა ის, ვინც ასე ჰყვარებია, რომ არ ცნობია, ვისი ოცნებითაც ღამეები უთევია. იპოვა, მაგრამ ეგებ სჯობდა, რომ არ ეპოვა. ახლა უკვე მისი დაპატრონება უნდოდა და, ვინ იცის, წინ რა დაბრკოლება გადაეღობებოდა.

არ ეძინა თორელს თეთრკაბიან გოგონას დარდით.

არც იმ გოგონას ეძინა თორელზე ფიქრით.

გაოგნებული გაშორდა ვაჩე მამუკას სახელოსნოს. თავში ათასი ფიქრი უტრიალებდა, დაუწყობელი და გაურკვეველი, მიდიოდა, მაგრამ თავათაც არ გაეგებოდა _ საით. ფეხები მის უნებურად მოძრაობდნენ, ისე მიაბიჯებდნენ და მიჰყავდათ წინ, რომ ვაჩემ არ იცოდა, სად შეჩერდებოდა ან სადამდე ივლიდა.

სიონთან შედგა. ტაძრის კარი ღია იყო. ჭაბუკი ზღურბლზე შეჩერდა და შიგ შეიხედა: ტაძარში უამრავი სანთელი ენთო და გაჩაღებული კანდელებიდან თვალისმომჭრელი შუქი იფრქვეოდა.

კედლები, კამარები, სვეტები და გუმბათები მთლად მოხატული იყო. ვაჩემ ისე გადადგა ფეხი, ძირს არც დაუხედა. ხან იქით აცეცებდა თვალს და ხან აქეთ, აღარ იცოდა, რისთვის ეცქირა, რომელ ნახატზე შეეჩერებინა თვალი და რომლიდან დაეწყო.

ძირს დაიხედა და კიდევ უფრო გაოცდა: ფერადი მოზაიკა გაფენილიყო მის ფეხქვეშ და მთელი იატაკი წითელ-ყვითლად ჰყვავდა.

ფეხის დადგმა მოერიდა, მუხლზე ფრთხილად ჩაიჩოქა და სულგანაბული დაამტერდა იატაკს:

დახეთქილი ბროწეულები მიჯრით მიწყობილი სისხლისფერი კბილებით უცინოდნენ, ფარშევანგების ბოლოები ცისარტყელებივით იშლებოდნენ და მწვანე ტოტებში შეყუჟული მტრედები ცალ-ცალი თვალით უცქერდნენ.

ვაჩემ ხელი დაადო მოზაიკას, ფრთხილად და სათუთად, თითქო სურდა, დარწმუნებულიყო, მართლა ცოცხალი იყვნენ თუ არა ის მტრედები და ფარშევანგები. ხელისგულმა ქვის სიცივე იგრძნო. ვაჟი ოდნავ წამოიწია და თვალი ბოლომდე გააყოლა იატაკს: მწვანედ და ყვითლად, ლურჯად და წითლად ჰყვავდა იატაკი და ჭაბუკს უცბად მოეჩვენა, რომ ეს იატაკი კი არა, ზღაპრული წალკოტი, ფერად-ფერადი ყვავილებით დაფარული სამოთხის მინდორი იყო და თვითონ _ ამ ყვავილების საკრეფად შემოსული ბავშვი.

მავედრებელივით ჩოქვით მიჰყვა იატაკს, მაგრამ მისი სახე მლოცველის სასოებას როდი გამოხატავდა. საკვირველებისა თუ სასწაულის ხილვით გაბრწყინებული თვალები იატაკის ერთი კუთხიდან მეორისკენ მიუბრუნდა. ერთიმეორეზე მიჯრილი ნაირფერი კენჭებით, უთვალავი პაწაწინა კენჭებით მოხატულ იატაკს ხან სულ ახლო დაამტერებოდა, ხან უკან დაწეული, შორიდან მიაჩერებოდა და ცქერით ველარ ძლებოდა.

ბოლოს, ალბათ, დაიღალა დაბლა ცქერით და წამით თავი ასწია. ასწია და ახლა მაღლა გაექცა თვალი: გუმბათის თალიც მოზაიკით იყო მოხატული და მთელ ჭერს ცისფერი, მწვანე და ყვითელი კენჭების ნაზი ზოლები მიჰყვებოდა.

კისერი ეტკინა მაღლა ცქერით. კედლებზე მოხატულ ძველი და ახალი აღთქმის ამბებს გააყოლა თვალი და უცებ მზერა მაცვლის ბუჩქებთან ლოცვად დაცემულ, ხელაპყრობილ წმინდა ნინოსკენ გაექცა.

რატომღაც დედა მოაგონდა, თავისი ტკბილი დედა. ახალგაზრდობაშივე დაქვრივებული, ერთადერთი შვილის, ვაჩეს გაზრდისა და ბედნიერებისათვის მზრუნველი და მარადმლოცველი.

შეებრალა თავისი კარგი დედა, ახლა მისგან უპატრონოდ მიტოვებული. გული ამოუჯდა და ცრემლი რომ არ წასკდომოდა, თვალი სხვა ნახატზე გადაიტანა.

ჭაბუკმა მხარზე ხელის დადება იგრძნო. მოიხედა. თავს ბერი დადგომოდა.

_ ტამარში შენს მეტი კაცი აღარ არი. უკვე დაღამდა, _ უთხრა ბერმა.

ვაჩე გამოერკვა, მიტრიალდა და უსიტყვოდ გაემართა კარისკენ.

დიდი დრო გასულიყო. გარეთ უკვე ბნელოდა. ტამარშიც ნელ-ნელა აქრობდნენ სანთლებს.

დაღლილმა შიმშილი იგრძნო და ხელი თავისთავად წავიდა აბგისაკენ.

გარეთ რომ გამოდიოდა, ერთხელ კიდევ მოიხედა უკან და პირდაპირ, სვეტზე დახატულ ქრისტეს შეხედა: სახედარზე შემჯდარი შემოდიოდა მაცხოვარი იერუსალიმში.

სახედრის დანახვაზე ისევ ცაგო და პავლია კუტი გაახსენდა, შებრუნდა და ჩქარი ნაბიჯით გაჰყვა ღამეულ ქუჩას.

ქალაქში მამუკას მეტს არავის იცნობდა. მის კარზე მიდგომა კი სიკვდილივით არ უნდოდა.

ქულბაქები, სახელოსნოები და სავაჭროები დაეკეტათ, სინათლე არსაიდან გამოდიოდა და ქუჩაში კაცის ჭაჭანება აღარსად იყო.

ქალაქის განაპირას მიაღწია. მოსახვევთან ურო-გრდემლის ხმა მოესმა და სინათლესაც მოჰკრა თვალი.

ახლო მივიდა. სამჭედური დაკეტილი იყო. კარის ღრიჭოში შეიხედა, ცეცხლთან დამკლაული მჭედლები დაინახა, გავარვარებულ რკინას სცემდნენ, ნალებს სჭედდნენ და ხმლებს პირავდნენ.

ვიღაცამ კარი გამოაღო, გამოვიდა და ისევ სწრაფად მიხურა. უცნობი ბიჭი აათვალ-ჩაათვალა იერა.

_ აქ რას აკეთებ? _ ჰკითხა და თან დოქით წყალი მოიყუდა.

ვაჩემ არაფერი უპასუხა. მჭედელმა წყალი მოსვა. სული მოითქვა და ისევ უცნობ ბიჭს დააცქერდა. ეტყობოდა, მისი მხარ-ბეჭი და განიერი მკლავები თვალში მოუვიდა.

_ სამუშაოს ემებ?

ვაჩემ თავი დაუქნია დასტურის ნიშნად.

_ შემოდი! _ უთხრა მჭედელმა და შინ შეუშვა.

სამჭედლოში უროსა და ჩაქუჩის ცემისაგან აღარაფერი ისმოდა. ვაჩეს შემომყვანი მოგიზგიზე ქურასთან მდგარ ოსტატს მიუახლოვდა და რაღაც უთხრა. ოსტატმა ხმლის გამოპირვას თავი ანება და ვაჩესკენ წამოვიდა.

_ იმუშავებ? _ ჰკითხა გამაყრუებელ გუგუნში.

ვაჩემ ისევ უხმოდ დაუქნია თავი.

პირობებზე არ ულაპარაკნიათ. ოსტატმა ურო მისცა და ვაჩეც მხარში ამოუდგა დამკლავულ, გახვითქულ მჭედლებს.

რომელიღაც თავისი ტოლი მჭედლისაგან საიდუმლოდ გაიგო ვაჩემ: იმ დღეებში ქართველები სამხრეთით ლაშქრობისათვის ემზადებოდნენ თურმე. ქალაქი სავსე იყო უცხო სტუმრებითა და მზვერავებით და ამიტომ მუშაობდნენ ღამით კარდახშული მთელი ქალაქის სამჭედლოები.

მეორე დღეს ცაგო და მამუკა სასახლეში მივიდნენ.

იქ მისვლამდე ცაგოს გული უფანცქალებდა და ფარული ღელვისაგან ფერი მისდიოდა. მაგრამ საოცრება მოხდა: როგორც კი სასახლის კიბეები აიარეს და ცაგო დიდ, ნათელ დარბაზში შეკრებილთა შორის გაერია, ეს მღელვარება უმალ გაქრა. თავი ისე ეჭირა, გეგონებოდა, მეფის კარზე იყო გაზრდილი. არაფერს უცხოობდა და არაფერი უკვირდა. ყოველ შემთხვევაში, გარეგნულად არ ამჟღავნებდა გაოცებას, თუმცა სასახლეში პირველად მისული გოგონასთვის უცხოც ბევრი რამ იყო და გასაკვირიც.

ერთი შენიშნა შესვლისთანავე: ყველა იქ მყოფმა განსაკუთრებული ყურადღება მიაქცია, ერთიმეორეს რაღაცას უჩურჩულებდნენ და მისკენ თვალით ანიშნებდნენ. გულის ცემამ უმატა, ოდნავ გაწითლდა, მაგრამ არ შეიმჩნია და არ დაიბნა. თავი ისე დაიჭირა, თითქო ასეც უნდა ყოფილიყო, ასე აღტაცებით უნდა ეცქირათ მისი სიტურფით მოხიბლულებსა და გონწართმეულებს.

რუსუდან მეფე ტახტზე იჯდა. ტახტის გვერდით და უკან ვაზირები და დიდებულები იდგნენ კარის წესისა და რიგის მიხედვით.

მამუკამ ხელი ჩაჰკიდა დას და მეფის მიმლოცველთა რიგს მიჰყვა. უცებ ცაგომ თორელს მოჰკრა თვალი და დაიბნა, კალაპოტიდან ამოვარდა. გულმა ისევ გამალებით დაუწყო ცემა და საფეთქლების სიმხურვალით იგრძნო, რომ სახე წამოენთო.

თორელმა ოდნავ შესამჩნევად დახარა თავი, თითქო ესალმებო. მერე ცაგომაც რომ თავი დახარა და თვალი მოაშორა, თურმანმა შალვასკენ გაიკვლია გზა. დედოფლის უკან მდგარ ახალციხელთან მივიდა, ყურში რაღაც უჩურჩულა და თვალით მეფის სათაყვანებლად მომავალ და-ძმაზე ანიშნა. ახალციხელი ოქრომჭედლის დას დააკვირდა, შეეტყო, რომ მოეწონა და თორელს მრავალმნიშვნელოვნად გადახედა.

მამუკა მუხლზე დავარდა და ცაგომაც მაშინვე ჩაიჩოქა.

დედოფალი თავისი ტოლი გოგონას დანახვისთანავე გამოცოცხლდა. პირველად სახეზე გაოცება გამოეხატა, ალბათ, ცაგოს სიტურფის გამო, მაგრამ

წონასწორობა ისევ მალე დაიბრუნა და მის ფერხთა წინაშე დაცემულ და-ძმას მოწყალე თვალთ დახედა.

ოქრომჭედელმა თავი აიღო, პატიება ითხოვა მცირე ძღვენისათვის და ცაგომ თორელის წიგნი გაუწოდა კრძალვით დედოფალს.

დედოფალმა წიგნი ჩამოართვა და უბრძანა, ფეხზე წამომდგარიყვნენ.

მამუკა არც წამოწეულა. ცაგო კი ნელა წამოდგა და თავდახრილი, გაკრძალული დადგა დედოფლისა და დიდებულების წინაშე. იგი გრძნობდა, ათასი თვალი იმ წუთს მისკენ იყო მიჰყრობილი, ზოგი აღტაცებითა და ზოგი გაოცებით. თავათ დედოფალი ყველაზე მეტად აკვირდებოდა და ჩხრეკდა მის ყოველ ნაკვთს.

ცაგოს არც დედოფლის დაჟინებული მზერა შეაკრთობდა, არც ათასი უცხოელი და ქართველი დიდებულის თვალის მიშტერება, იმ თვალთა შორის თორელისაც რომ არ ყოფილიყო. იგი შინაგანად გრძნობდა, მგოსანი თვალმოუცილებლად უცქერდა და რატომღაც ფიქრობდა, რომ ისიც მასზე მეტად ღელავდა.

– კარგი დაი გყოლია, ოსტატო.

ბრძანა მამუკას გასაგონად დედოფალმა და ცაგოს გაუღიმა.

ცაგომ კიდევ უფრო დალუნა თავი და წელშიც მეტად მოიხარა.

რუსუდანმა ამდენ ხალხში ძლივს ტოლი მონახა, მასთან განმარტოება და გართობა მოუნდა, ისე, როგორც უსაკოებს შეჰფერით, მაგრამ სხვა ვერაფერი მოიფიქრა, ცაგოს ხელი გაუწოდა და ამხანაგით უთხრა:

– აგერ, ჩამოჯექ ჩემს ფერხთით!

სეფექალებმა მიიწ-მოიწიეს და ტახტის ახლო, დედოფლის ფერხთან დაუთმეს ადგილი უცხო გოგონას.

ცაგო დედოფალს ეთაყვანა და რუსუდანის ახლო ჩაიჩოქა.

– სახელად რას უხმობენ შენს დას, მამუკა?

იკითხა დედოფალმა.

– ცაგოს ვეძახით, თქვენი ფეხის მტვერიმც გვქნა, დედოფალო! – მიუგო ოქრომჭედელმა.

– ცაგო თუ გათხოვილი არ არი და ქმარ-შვილი არ ჰყავს, ჩემთან იყოს, ჩემს შიმუნვარად დავიტოვებ.

– ღირს არ ვართ, დედოფალო, ეგოდენ დიდი პატივისა! – აღმოხდა გახარებულ მამუკას და და-ძმა შუბლით ერთად შეეხო მოფარდაგულ იატაკს.

ახლალა დახედა რუსუდანმა მირთმეულ წიგნს და თვალი ველარ მოაშორა. ჯერ ოქროთი შეჭედილ ყდას სინჯავდა მუშტრის თვალთ, მერე წიგნი გადამალა და სუნთქვაშეკრული დააცქერდა. ნელ-ნელა, ლექსის უხმოდ კითხვით და ნახატებით გულდაგულ სინჯვით მიჰყვა რუსუდანი წიგნის ფურცვლას. მერე უცებ რაღაც გაახსენდა, თავი აიღო და იქ მყოფნი მოათვალაიერა.

– თორელი სად არი, ჩვენი მგოსანი?

იკითხა და ვიდრე ვინმე პასუხს მოასწრებდა, თორელმა ტახტის წინ ჩაიჩოქა:

– აქ გახლავართ, დიდებულო ხელმწიფევ!

ეთაყვანა კარის მგოსანი.

– შენი ლექსების წიგნია, თურმან. ნახე, რა ხელოვნებით შემკულია! – უთხრა დედოფალმა და წიგნი კი ვერ შესთავაზა, ისევ თავათ განაგრძო ფურცვლა.

– ვისი ნაოსტატარია? – კვლავ თავაუღებლად იკითხა დედოფალმა.

– ყდა ჩემი ძმის მამუკას შეჭედილია, დედოფალო, ხოლო თავათ წიგნი ჩემი მეზობლის ხელითაა გადაწერილი და მოხატული, – მოახსენა ცაგომ.

რუსუდანმა თავის ტოლს მოხედა, – ცოტა არ იყოს, ეუცხოვა მისი სითამამე.

– სულ შენ დაუხატხარ იმ შენს მეზობელს წიგნის ყოველ გვერდზე, – სიცილით უთხრა რუსუდანმა.

ცაგო გაწითლდა და თავი უფრო დახარა.

– ნიჭიერი ხელოვანი ყოფილა. ღირსია ჩვენს კარზე ყოფნისა, – ბრძანა რუსუდანმა და ისევ ნახატებს ჩაუკვირდა.

მხოლოდ ახლა მოაგონდა ცაგოს მისი სიყრმის მეგობარი, განუყრელი ტოლი და კარის მეზობელი, რომელიც იქ, მშვენიერ ახალდაბაში, დასტოვა თავის ბავშვობასთან, ყოველივე იმასთან ერთად, რაც ესოდენ უყვარდა და რასთანაც ასე შეჩვეული და შემტკბარი იყო.

გახარებულნი, ფრთაშესხმულნი დაბრუნდნენ შინ ცაგო და მამუკა. რუსუდან დედოფალმა მოწყალე თვალთ შეხედა და-ძმას, ძღვენი მოიწონა და ცაგოს უდიდესი პატივი მიანიჭა, ამიერიდან იგი დედოფლის ამაღაში ითვლებოდა და მეფის კარზე უნდა გადასულიყო საცხოვრებლად.

პავლია კუტმა უზომოდ გაიხარა დის წარმატებით.

– რაკი შენი საქმე ასე ბედნიერად წარიმართა, ჩანს, კარგი ფეხით ჩამოვსულვართ თბილისში. იქნებ, მეც ბედმა გამიღიმოს და გელათის წინამძღვარს შევხვდე, – უთხრა გახარებულმა საპყარმა დას, მოეხვია და თვალები დაუკოცნა.

ათასნაირ გეგმებს აწყობდნენ მომავლისათვის, ღმერთს მადლობას სწირავდნენ და გულმოწყალე დედოფალს ადიდებდნენ.

ის იყო, სადილს მიუსხდნენ, რომ მამუკას მსახურმა მოახსენა:

– ვილაც დიდი დიდებული მობრძანდა ამალით და ოქრომჭედელს კითხულობს.

მამუკა მაშინვე წამოდგა და დიდებულის მისაგებებლად გავიდა.

სახელოსნოში შალვა ახალციხელი შემოვიდა. ოქრომჭედელი დაიბნა სამეფოს უძლიერესი დიდებულისა და მიუთხრობელი გმირის დანახვაზე.

შალვა ახალციხელი ჯარისკაცის წესსა და რიგს იცავდა პირად ცხოვრებაში, სხვებივით ფუფუნებას არ დაგიდევდა და ოქრომჭედლებს შეკვეთებით არ ანებივრებდა. მით უფრო მნიშვნელოვნად ეჩვენა მამუკას მეფის ვაზირისა და სწორუპოვარი სარდლის სტუმრობა.

სალამსა და ურთიერთმოკითხვას რომ მორჩნენ, ახალციხელმა გადაკრულად დაუწყო:

– ერთი ძვირფასი თვლის პატრონი ყოფილხარ, ოსტატო, და იმის სათხოვნელად ვარ მოსული.

– რომელ თვალზე ბრძანებს დიდი ვაზირი? – იკითხა დაბნეულმა და, ცოტა არ იყოს, შემკრთალმა მამუკამ.

– სამეფოს უძვირფასეს თვალზე მოგახსენებ... შენი დის მთხოვნელი ვარ.

მამუკა გაშრა, რაღაც საშინელისა და გაურკვეველის მოლოდინში. შალვა ახალციხელი დიდი ხანია ცოლშერთული იყო და უკვე მოსწრებული ვაჟიც ჰყავდა, როგორ შეიძლებოდა სამეფოს უპირველესი მოღვაწე და ესოდენ დარბაისელი დიდებული მისი დის მთხოვნელი ყოფილიყო?!

– რძლად მთხოვნელი ვარ შენი დისა, მამუკა, ხომ ხედავ, სიბერეში მაჰანკლობა დავიწყე, – ღიმილით დასძინა ახალციხელმა და მამუკას ცოტა გულზე მოეშვა.

– გუშინ თავათ იყო ამ საქმეზე შენთან ჩემი სახლიკაცი თურმან თორელი, მაგრამ თვითონ ვერ გაგიმჟღავნა გულისწადილი და ახლა მე ვარ მოციქული: თურმანს გადაწყვეტილი აქვს შენი დის შერთვა. ჩემი ბიძაშვილი დასაწუნი არ არი და თუ ქალისა და შენი თანხმობაც იქნება, ამ დღეებში დავწეროთ ჯვარი.

მამუკა ენაჩავარდნილი იდგა, არ იცოდა, რა ეპასუხა, აღტაცება გამოეთქვა ესოდენ გასახარელი ამბის გამო, თუ თავი შეეკავებინა, კარგად აეწონ-დაეწონა და პასუხი სხვა დროს მიეცა.

– რა საგონებელში ჩავარდი, ოსტატო, ბედი კარს მოგდგომია და რაღას ფიქრობ, საქმე ჩქარა გავათავოთ.

– საჩქარო რა არი, დიდო ვაზირო! ჯერ ქალს უნდა მოველაპარაკო, მერე დედა გვყავს, მისი დასტურიც თუ არ გვექნა...

– სასიძო ჩქარობს, მამუკა. მაგრამ სასიძოზე მეტად მე მეჩქარება. ამ დღეებში შორს მივემგზავრები, თურმანს ჩემზე ახლობელი არავინა ჰყავს და მინდა მისი მაყარი ვიყო.

– თანახმაც რომ ვიყო, ორ დღეში რას მოვასწრებთ, ბატონო. ჩვენც ხალხნი ვართ, ჩვენც მომზადება გვინდა.

– ეგ საქმეს არ დააბრკოლებს, მამუკა. შენს დას მოელაპარაკე და პასუხი მაცნობე, – უთხრა საქმის ბედნიერად დაბოლოებაში წინასწარ დარწმუნებულმა ახალციხელმა, გამოემშვიდობა და წავიდა.

მამუკა და-ძმასთან შებრუნდა. ცაგოს გადაეხვია და სანატრელი ბედის კარზე მოსვლა მიულოცა. სიტყვა-სიტყვით გადასცა ცაგოს ვაზირის ნალაპარაკევი. ქალი გაწითლა და გაიტრუნა. რეტდასხმულივით ჩამტერებოდა იატაკს გაოგნებული ცაგო და ტანში ჟრუანტელი უვლიდა. იდგა ენაჩავარდნილი და არ იცოდა, ეტირა თუ გაეღიმა.

დის ბედნიერებით აღტაცებული კუტი ფრთაშესხმულივით მალლა მიიწევდა, მაგრამ დავრდომილი სხეული არ მიჰყვებოდა და ადგილზევე ცმუტავდა, ხელებს შლიდა და ტაშს უკრავდა.

მამუკას დამთავრებული არ ჰქონდა მოყოლა, რომ კარი ისევ მსახურმა ბიჭმა შემოაღო და შეშინებულმა მოახსენა:

– მეფის შუბოსნები გვეახლნენ, ოსტატის ნახვას ითხოვენ.

კიდევ ახალი მოულოდნელობით შეშფოთებულმა მამუკამ იქ მყოფთ თვალი მოავლო, პირჯვარი გადაიწერა და მეფის მცველების შესახვედრად გავიდა.

– მეფის ბრძანებით, ახალდაბაში უნდა წამოგვეყვე, ოსტატო, – უთხრა ათისთავმა, – თქვენი მეზობელი მხატვარი უნდა მოვძებნოთ და დედოფალს ვაახლოთ.

მამუკამ კინალამ იკითხა, რომელი მხატვარიო, მაგრამ უმაღლვე გონს მოეგო და ამ მოულოდნელი დავალებითაც გაიხარა. ახალდაბას ასვლა და მოლაპარაკება გადაუდებლად საჭირო იყო და რაკი შესაფერისი შემთხვევაც მიეცა, ბევრი აღარ უფიქრია, და-ძმას დაემშვიდობა და შუბოსნებს გაჰყვა.

იმ დღეს კიდევ ერთმა საპატიო სტუმარმა შეაღო მამუკას სახლის კარი – გელათის აკადემიის მოძღვართმოდვარმა.

ცაგო სუფრის გასაწყობად დატრიალდა, მაგრამ სწავლულმა შორს დაიჭირა, მაგდენი დრო არა მაქვსო.

– შენი წიგნი დაკვირვებით წავიკითხე, – გაუბა საუბარი პავლია კუტს წინამძღვარმა, – კარგად შეგისწავლია ჩვენი სამეფოს ყოველი კუთხე, ბევრი ახალი და საგულისხმო აზრი გამოგითქვამს, მაგრამ მთავარი წიგნის ის ნაწილია, სადაც ჩვენი ერის მომავლისათვის წერ. ახლა ჩვენი აკადემიაც, ყველა ქართველი მეცნიერი, ფილოსოფოსი და რიტორი ერთსა ქადაგებს: საქართველო არი ახალი რომი, მან უნდა ღირსეულად დაიჭიროს დაბერებული და დაუძღურებული ბიზანტიის ადგილი; თავის დრომის ქვეშ უნდა გააერთიანოს სრულიად აღმოსავლეთი და დასავლეთი და ქრისტეს ჯვრის წამძღვარებით დათრგუნოს ურჯულონი. ეს აზრი შენს წიგნშიაც მკაფიოდ ჩანს. ისიც მოსაწონია, რომ ქართველთა ნათესავის გამრავლებას ქადაგებ. ჩვენ მარტონი ვართ ამქვეყნად. ყველა ტომსა და ერს ჰყავს სისხლით ნათესავი, მსგავს ენაზე მოლაპარაკე ტომი და ხალხი. მხოლოდ ჩვენა ვართ მარტონი და უნათესაონი. საქართველოს გარდა, ჩვენს ენაზე კაცი არსად ლაპარაკობს, ამბობენ, ესპანეთის იბერიაში გვეყვანან ნათესავებიო, მაგრამ ჯერ იქ ქართველთაგან არავინ ჩასულა, რომ ამ ამბის სიმართლე დაედასტურებინა და არც იქ მოუკითხავს არავის ჩვენი მონათესავე იბერებისაგან. ამიტომ ქართველთათვის გამრავლებაზე ზრუნვა უპირველესი და უმნიშვნელოვანესი საქმე უნდა იყოს. სხვანაირად ჩვენ ვერ ვძლევთ და წინ ვერ აღვუდგებით ირგვლივ მოწოლილ თურქთა და სპარსთა აურაცხელ სიმრავლეს. ერთს ვერ შევიწყნარებ შენს მოსაზრებათაგან: შენ ზრუნავ იმისათვის, რათა საქართველოს სამეფომ მომავალში მიაღწიოს ისეთსავე ბუნებრივ საზღვრებს აღმოსავლეთითა და სამხრეთით, როგორც მას ჩრდილოეთითა და დასავლეთით გააჩნია – კავკასიონის ქედი და შავი ზღვა. შენ გინდა, ასეთ საზღვრად აღმოსავლეთით კასპიის ზღვა იყოს, ხოლო სამხრეთით ისეთი

ზღუდე მთებისა, როგორც კავკასიონია. თუ საქართველო მომავალში ამ გზას დაადგება, იგი ამით შეზღუდავს თავის განვითარებას. კეისარი და ალექსანდრე მაკედონელი თავიანთი ქვეყნის შემოზღუდვაზე როდი ზრუნავდნენ, თვითონ ლაშქრავდნენ მეზობლებს, იპყრობდნენ ახალ ქვეყნებს და იმორჩილებდნენ უცხო ტომებს.

– მართალსა ბრძანებთ, წინამძღვარო, მაგრამ ყველა ერის გაძლიერებასა და მომავალს თავისი პირობები გააჩნია. ჩვენ, როგორც ბრძანეთ, მარტონი ვართ და უმცირესნი, გარშემორტყმულნი ურიცხვ ურწმუნოთაგან. აღმოსავლეთითა და სამხრეთით ბოროტი მაჰმადის აღმსარებელნი გვახვევიან. აგერ, თითქმის საუკუნეზე მეტი იქნება, მათი კირთებისაგან დაისვენა საქართველომ. სანამ მათ ერთურთთან ქიშპი და ომი აქვთ, ჩვენ ადვილად ვძლევთ; როგორც კი გამოუჩნდებათ ძლიერი და გონიერი მეთაური, რომელიც მათ ერთი მიზნითა და რწმენით გააერთიანებთ, ჩვენ ვეღარ შევძლებთ მათი სიმრავლის წინააღმდეგობას.

– განუწყვეტელი რბევითა და თავდასხმით არ უნდა მივცეთ მათ ღონე გაერთიანებისა და გაძლიერებისა.

– საისლამო დიდია და ჯერ თავათ უნდა მოვლონიერდეთ, რომ მათ ვსძლიოთ, მარტო ხმალი ვერ დაიპყრობს და ვერც შემოიმტკიცებს აგარიანთა სიმრავლეს. ქრისტეს სჯულის ქადაგებით უნდა დავიახლოვოთ და დავინათესავოთ ჩვენი ახლო მეზობლები. ლეკნი, ჯიქნი, ალანნი და უმრავლესნი ტომნი მთიელთა უკვე ქრისტეს აღმსარებელნი და ჩვენი თანამდგომელნი არიან. ვიდრე, ასევე, ჩვენს რჯულზე არ მოვაქცევთ შირვანელთ, მანამ მტკიცე არ იქნება ჩვენი მეგობრობა ჩვენი კარის მეზობელთან. ასევე, ჩვენი და სომხების მეგობრობა მაშინ იქნება საბოლოოდ დაურღვეველი, როცა მარტო მიწა-წყალი და ხელისუფლება კი არა, აღსარებაც საერთო გვექნება. საბედნიეროდ, ჩვენი ურთიერთობა აქეთვე მიდის და ჩვენ ყოველმხრივ ხელი უნდა შევუწყოთ ამ სულიერი ერთობის დაჩქარებას. როცა კავკასია შავი ზღვიდან კასპიამდე ერთი რწმენითა და ერთი გვირგვინით იქნება გაერთიანებული, მაშინ ჩვენი ერის ძლიერებაც მტკიცე იქნება და შეურყეველი.

– ძველი რომაელები ისე იპყრობდნენ ხალხებს, რომ არათუ მათ მოქცევაზე ზრუნავდნენ, არამედ თავად მიჰქონდათ ხოლმე დამორჩილებულ ხალხთა კერპები და რომში დგამდნენ თავიანთი ღმერთების გვერდით.

– ძველ რომს დიდი ძალა ჰქონდა და ნათესავიც ბევრი ჰყავდა. ჩვენ უთვისტომონი ვართ ამქვეყნად და ჯერ არც რომის ძალა შეგვწყვეს. როცა ჩვენი ხმალი რომაელთა ძლევამოსილებას მიაღწევს, მაშინ შინაგანი ძალაც მეტი გვექნება და სხვათა ურწმუნოება ჩვენთვის საფრთხე აღარ იქნება. ვიდრე რომი აღზევდებოდა და ქვეყნის მპყრობელი გახდებოდა, მანამ ბევრი პატარა ერი ჩაყლაპა და მოინელა. სანამ ერი შინაგანად არ არი მთლიანი და ძლიერი, გარეთ ძალის გამოჩენა ნაადრევია და მოსაჩვენარი.

– საგულისხმოდ უბნობ, მაგრამ სჯობია, ჩვენი საუბარი გელათში განვაგრძოთ, – უთხრა წინამძღვარმა.

პავლია კუტს სიხარულისგან გულის ცემა აუჩქარდა და ქოშინი აუვარდა.

– ოღონდ ერთი მინდოდა შემეტყო, – დაუმატა უკვე წასასვლელად წამომდგარმა წინამძღვარმა, – კიდევ რა წიგნის დაწერას აპირებ, შვილო?

– ჟამთა აღწერას მინდა მივყო ხელი, ვითარცა ბერძენთა აქვთ ხრონოლორაფი და ქართველთაც მრავალი წიგნი საისტორიონი.

– კეთილად განგიზრახავს, შვილო, ყოველი ღონით შემწე ვიქნები ამ საქმის. სამ-ოთხ დღეში გელათს წავალ და მზად იყავ ჩემთან ერთად გასამგზავრებლად.

მამუკა, მეფის შუბოსნების თანხლებით, მიადგა გრძელიშვილების სახლს. ვაჩეს დედას შუბოსნების დანახვაზე ელდა ეცა, უმალ ის გაიფიქრა, ჩემს შვილს რაიმე უბედურება ხომ არ შეემთხვაო, და შეშინებულმა ფეხი ველარ გადადგა ჭიშკრის გასაღებად.

მამუკა ცხენიდან გადმოხდა, ეზოში შევიდა და გადაეხვია. ქვრივი გონს მოვიდა, დიდი ხნის უნახავი მეზობელი მოიკითხა და შინ შეიპატიჟა.

– მოსალოცი საქმეა, ძალო! ვაჩეს წასაყვანად მოვედით, მეფის კარზე იბარებენ, – უთხრა მამუკამ და შუბოსნებზე ხელით ანიშნა.

– მეფის კარზე ვაჩესთან რა ესაქმებათ?! – იკითხა ისევ შემკრთალმა დედამ.

– მისი დახატული წიგნი მიართვა ცაგომ რუსუდან მეფეს. ხელმწიფეს ნახატები მოეწონა და მხატვრის ხლება ბრძანა.

– ეგ კარგი დაგემართოს, შვილო, მაგრამ განა ვაჩე ცაგოსთან ერთად არ არი?

– ცაგოსთან?.. არა! ცაგოსთან რად უნდა იყოს? – გაიკვირვა მამუკამ.

– გუშინწინდელს აქეთ აღარ ჩანს ვაჩე, შინიდან ისე გასულა, არ გამიგია. მეზობლის ბიჭებმა თქვეს, ცაგოს და პავლია კუტს გაჰყვაო, ერთად მიდიოდნენ თბილისის გზაზეო...

– არა მგონია, მართალი იყოს, ცაგო და პავლია მარტონი ჩამოვიდნენ, ვაჩე იმათ არ ხლებია, არც მათ უთქვამთ რაიმე. აგერ, ცაგომ წერილიც კი მოსწერა, რომ საჩქაროდ წამოსულიყო.

– მაშ, სად წავიდოდა? რა ვიფიქრო მე უბედურმა? – აწრიალდა შემფოთებული დედა.

– არა უშავს რა, სადმე იქნება. შენ დაწყნარდი და ჩვენ მოვძებნით, – ანუგემა მამუკამ, ცხენზე შეჯდა და შუბოსნებს წაუძღვა.

ახალდაბაში რომ ამაოდ ეძებდნენ, ვაჩე ამ დროს დედაქალაქის ტაძრებსა და სასახლეებს ათვალიერებდა. სადაც შესვლა შეიძლებოდა, საათობით იდგა და აკვირდებოდა მხატვრობისა და ხუროთმოძღვრების შესანიშნავ ძეგლებს. პურის ჭამა ავიწყდებოდა, დაღლას ვერ იგებდა და გარეთ მხოლოდ ხუცების ან გუშაგების მრავალგზის გაფრთხილების შემდეგ გამოდიოდა.

სადამოს სამჭედურში იყო და დილამდე საბერველსა და გრდემლს უტრიალებდა. დილას, დაიბანდა თუ არა, საჭმელს შესჭამდა და ძილად მივარდებოდა.

ქალაქში აქა-იქ ნაცნობები გაიჩინა. იყალთოელის ამბავი გაიკითხა. ხლათში თამთა დედოფლის ეკლესიას ხატავსო, _ უთხრეს და მაშინ ხლათის გზის ამბავი გამოიძია, რამდენი დღის სავალი იყო, ან როგორ შეიძლებოდა წასვლა. ქარავნები ხშირად დადიანო, გაიგო და ახლა იმის ფიქრი დაიწყო, თუ ფული როგორ მოეგროვებინა და ხლათის გრძელ გზას როდის დადგომოდა.

ერთგან ყური მოჰკრა, ახალგაზრდა დიდებულები ლაპარაკობდნენ, მეფის კარზე ახალი სეფექალი გამოჩნდა, სიტურფით რუსუდან დედოფალსაც აღემატებო.

რალაც ენიშნა ვაჩეს, მაგრამ უცნობების საუბრიდან მეტი ველარა გაიგო რა.

გარეუბანში სამჭედურის გვერდით ათევდა ღამეს ვაჩე.

იმ დღეს რატომღაც უგუნებოდ გამოვიდა. ღამენათევი ქუჩებს გაჰყვა, ისნის პალატებისაკენ აპირებდა წასვლას. სიონიდან ჯერ კიდევ შორს იყო, რომ ძელის ცემის ხმა გაიგონა.

ვიღაც ჯვარს იწერსო, ყური მოჰკრა, მაგრამ არაფრად ჩააგდო. გზადაგზა შეამჩნია, ხალხი სახლებიდან გამორბოდა და სიონისკენ მიეშურებოდა. მოსახვევთან მაყრული მოესმა.

ბავშვები გამოჩნდნენ. ჟივილ-ხივილით უსწრებდნენ მაყრიონს.

სეირის მაყურებლებს შორის გაჩერდა ქუჩის პირას ვაჩე.

_ ამბობენ, კარგი ქალი შეურთავს თორელსაო, _ თქვა ერთმა.

_ სიტურფით ცალი არ ჰყავს მთელ სამეფოშიო, _ დაუდასტურა მეორემ.

_ რომელ თორელზე ამბობთ? _ გაუბედავად ჰკითხა ვაჩემ უცნობს.

_ მეფის კარის მგოსანზე. თურმან თორელმა სამეფოს ულამაზესი ქალი შეირთო და ახლა აგერ, ჯვარდაწერილი, სიონიდან მოდის, _ მიუგო უცნობმა და თავი, რაც შეეძლო, მაღლა ასწია, რომ მოახლოებული მაყრიონი კარგად დაენახა.

ვაჩეს გულში რალაცამ გაკენწლა, მაგრამ ფიქრის დრო აღარ იყო, მაყრიონი მოსახვევიდან გამოვიდა.

_ შალვა ახალციხელი!

_ შალვა და ივანე ახალციხელები!

_ ბიძაშვილებად ეკუთვნიან თურმან თორელს!

გაისმა აქა-იქ.

_ აგერ, მეფე-დედოფალი!

_ უი, რა ლამაზია!

ჩაესმა ვაჩეს და მერე აღარც არაფერი გაუგონია, აღარც არა დაუნახავს რა: მოჰკრა თუ არა თვალი თორელის გვერდით საქორწინოდ გამოწყობილ ცაგოს, ჭაბუკს გონი წაერთვა, თვალთ დაუბნელდა, მუხლებმა უსუსტეს და უხმოდ ჩაიკეცა.

გონს რომ მოეგო, ქულბაქში აღმოჩნდა. თავს დახლის ბიჭები ადგნენ. წყალს აკურებდნენ და რაღაც წამალს ასუნთქებდნენ.

– მგონი, მოზრუნდა! – სიბრაღულით თქვა ერთმა.

– ალბათ, შიმშილისაგან მოუვიდა, ხომ ხედავ, როგორ გამხდარა ამოდენა ვაჟკაცი, გაჭირვებული იქნება, – ჩაესმა მეორის ნათქვამი.

– საჭმელსა და ღვინოს მოვუტან, – თქვა ისევ პირველმა და ქულბაქიდან გავიდა.

ნელ-ნელა მოიკრიბა ვაჩემ ღონე. ტახტზე წამოჯდა, წინ გაწყობილი ტაბლა დაუდგეს. ზედაც არ დახედა საჭმელ-სასმელს.

– არ მინდა, რად წუხდებით! – ხელის ჩაქნევით წაილაპარაკა, ტაბლა მისწია და ფეხზე წამოდგა.

– ცოტა კიდეც დაგესვენა, – უთხრა ერთმა.

– სახლამდე გაგყვებით, – შესთავაზა მეორემ სამსახური.

ვაჩემ თავი გაიქნია უარის ნიშნად, მადლობა წაილულლულა და უცნობებს გაშორდა.

გეზი არ აუღია, მაგრამ რატომღაც მტკვრისაკენ კი წავიდა. ნაპირს რომ მიუახლოვდა, მხოლოდ მაშინ მიხვდა, რომ ახლო იყო მდინარეც და ცხოვრების ბოლოც.

ხიდზე იდგა ვაჩე. მის ფეხებქვეშ მიედინებოდა ვიწროში შემდორებული მტკვარი. დაჰყურებდა ტყვიისფრად მიმდინარე წყალს, თავბრუ ესხმოდა და თვალი უჭრელდებოდა. ტალღა ტალღას მისდევდა და ფიქრი – ფიქრს.

– რატომ მოექცა ასე უგულოდ ცაგო. ნუთუ, რამდენიმე დღის განშორება იყო საკმაო, რომ იგი, მისი სიყრმის განუყრელი მეგობარი, დაევიწყებინა, და სხვას, უცხოსა და შეუჩვეველ კაცს გაჰყოლოდა. ნუთუ ვერ ატყობდა და არ იცოდა ცაგომ, როგორი ძვირფასი იყო იგი ვაჩესათვის. განა მისი სიახლოვისათვის არ უთხრა უარი დემეტრე იყალთოელს ხლათში გაყოლაზე და ამით ზურგი არ შეაქცია თავის საოცნებო მომავალს, სახელსა და პატივს? განა დღედაღამ ცაგოს გარდა სხვა საფიქრალი გააჩნდა ვაჩეს? განა მის გარდა სხვა რამეს ან ვინმეს ხატავდა კიდეც მას შემდე, რაც მისდამი ეს გაურკვეველი მიზიდულობა თუ აღტაცებული სწრაფვა იგრძნო?! ერთხელ მაინც რად არ იკითხა ცაგომ, თუ რატომ აირჩია თორელის სატრფიალო ლექსების გმირად, სასოწარკვეთილი მიჯნურის უღმობელი სატრფოს სახის გამოსახატავად.

თორელის წიგნი! დაწყველილი თორელის წიგნი! აკი გული ეუბნებოდა, რომ რაღაცას ცუდს, გამოუსწორებლად ცუდს აკეთებდა, როცა ამ წიგნის მოხატვას ამთავრებდა. ერთხელ იმ ფიქრმაც კი გაუელვა, ვაითუ, მზითვად ვუმზადებ ცაგოს ამ წიგნსო და ასეც მოხდა. ცაგოს ქმარი, ალბათ, სასთუმალთან დაიდებს თავის ლექსების იმ წიგნს, გადაფურცლავს და თავმომწონედ წაუკითხავს ყელზე შემოჭდობილ ცოლს თავის ლექსებს, ბედნიერებით გაბრუებულს, ალერსში გატრუნულ ცაგოს, მის საოცნებოსა და სათაყვანებელ ცაგოს; ცაგო ნეტარებისაგან თვალს მოხუჭავს და ზედაც არ შეხედავს მის ნახატებს, ერთხელაც არ გაიხსენებს მისი სიყვარულის უსახელო

რაინდს, რომელიც შთაგონების ფრთების ყველაზე მძლავრად გაშლისასაც ვერ იოცნებებდა თორელის ასეთ ბედზე. ანკი როგორ უნდა ეოცნება! რა გააჩნდა მას, სახელი თუ სიმდიდრე, ქონება თუ ღირსება! ერთი უბირი ბიჭი იყო, ობლობასა და გაჭირვებაში წვალებით გამოზრდილი, და ცაგოზე უკეთ ეს ვინ იცოდა. თავათ ცაგოც გაჭირვებაში იყო გაზრდილი. ღარიბი აზნაურის ობოლი გოგონა უკეთეს ცხოვრებაზე, სიმდიდრესა და ფუფუნებაზე ოცნებობდა და ამ ოცნების ხორცის შემსხმელად, ალბათ, თავის სწორსა და მეზობელს, მასავით ღარიბსა და ხელმოკლეს, ვერასოდეს წარმოიდგენდა.

მაშ, რაღა აზრი აქვს ვაჩეს ცხოვრებას, თუკი იგი ველარასოდეს ვერ დადგება ცაგოს ოცნების სიმაღლეზე; რისთვისღა ათევს ღამეებს სამჭედურში, გრდემლთან, რატომღა შეჰყურებს დღისით ტაძრებსა და სასახლეებში მხატვართა ხელოვნებას, ვისთვისღა უნდა ისწავლოს და იწვალოს მთელი სიცოცხლე, ვისკენღა უნდა გაიკაფოს გზა, როდემდის უნდა ებრძოლოს ცხოვრების ტალღების მოწოლას, თუკი ოდესმე ნაპირზე გასულს მისი საოცნებო ცაგო იქ არ დახვდება?!

ვაჩემ თვალი დახუჭა. ხელები ხიდის მოაჯირს მოავლო და ის იყო, ფეხის წვერებზე აიწია გადასახტომად, რომ ყურში სასოწარკვეთილი ყვირილი ჩაესმა:

– მი-შვე-ლე-ეთ!

თვალი უმაღლე გაახილა: მდინარეს ყმაწვილი მოჰქონდა. განწირული ბალღი ხელებს მაღლა იქნევდა, ტალღები მორევისკენ ეწეოდნენ, ხან ზედ გადაუვლიდნენ და ქვეშ მოიქცევდნენ, ხანაც მაღლა ამოაგდებდნენ და ერთხანს ნაფოტივით მოატივტივებდნენ.

მდინარის ნაპირს ქალები და ბავშვები მოსდევდნენ ზრიალითა და გულისწამლები კვილით. ისინიც მშველელს უხმობდნენ.

ვაჩე არც დაფიქრებულა, ხიდის მოაჯირს გადაევლო და გაუხდელად წყალში გადაეშვა. მორევმა ერთი კი შეატრიალა, მაგრამ ჭაბუკმა ღონივრად მოუსვა მხარული და მდინარეს აღმა შეჰყვა. დინების წინააღმდეგ ჭრიდა წყალს და მაღლა ნელა მიიწევდა, მაგრამ შორს წასვლაც არ დასჭირდა, მტკვარს თავათ მოჰქონდა მისკენ უკვე გონდაკარგული ბავშვის მოშვებული, უღონო სხეული.

მიახლოებისთანავე, ერთი მაგრად უბიძგა ნაპირისაკენ, მერე ცალი ხელი ქოჩორში ჩაჰკიდა და ცალიც ღონივრად მოუსვა.

ნაპირთან მოსვლისას ქალების და ბავშვების ზრიალმა იმატა. ისე მოეჩვენა, თითქო მთელი ქალაქი იქ მოსულიყოს, ტიროდნენ, კიოდნენ და წიოკობდნენ.

თმაგაწეწილმა ქალმა მუხლამდე წყალში შემოტოპა და ბავშვს მივარდა. სხვებიც მაშინვე მიჰყვნენ დედას და ნაპირზე ციმციმ გამოიყვანეს ყმაწვილი. ჯერ თავდაღმა დაჰკიდეს, მერე სახე და ტანი დაუსრისეს და როგორც იყო, ბავშვს გონი მოუბრუნეს.

საიდანღაც ბიჭის მამაც გაჩნდა. ბავშვი რომ გონს მოსული ნახა, ვაჩეს ფეხქვეშ ჩაუვარდა და მოეხვია. ვაჩემ ფეხები ძლივს წაართვა და ბავშვის მამა

წამოაყენა. ახლა მხრებზე მოეხვია გახარებული მამა, მკერდში თავი ჩაუდო, ჰკოცნიდა და ცრემლით ულტობდა უბეს.

გადარჩენილი ბავშვის მამა დიდვაჭარი შიო აღმოჩნდა, მეფის კართან დაახლოებული, სამეფოს უმდიდრესი კაცი. მუდამ მოქარავენესა და განუწყვეტლად სხვადასხვა ქვეყნებში მოგზაურ შიოს, თურმე, ეს ერთადერთი ვაჟი გააჩნდა და მზე და მთვარე მასზე ამოსდიოდა.

შიო შინ არ ყოფილიყო, მისი ბიჭი ტოლებს გაჰყოლოდა მტკვარზე, წყალში ღრმად შესულიყო და ტალღას მოეტაცნა. ახლა, როცა თავისი ერთადერთი მემკვიდრე და იმედი ბეწვზე გადარჩენილი ნახა, გულით უნდოდა, მისი მხსნელისთვის რითიმე გადაეხადა. ყველა იქ მყოფთან ერთად შინ წაიყვანა და სუფრა გაუშალა.

სუფრაზე მოწყენილი იჯდა ვაჩე, პირი არ გაუხსნია, საჭმელს არ მიჰკარებია. სამაგიეროდ, ღვინოს დაემალა და ყველა გააოცა, იმდენი სვა.

დიდვაჭარი მხიარულად იყო. არ იცოდა, რით ეამებინა შვილის მხსნელისათვის.

– სამეფოს ყველა დიდებულსა და ვაზირებსაც დაგიპატიჟებდი და გაგაცნობდი, მაგრამ დღეს მეფის კარის მგოსნის ქორწილია და ყველანი იქ არიან, – მოიბოდიშა შიომ და ვერ მიხვდა, როგორ ატკინა გული ვაჩეს, რომელიც თავისი დარდის ჩახშობას ღვინოში ცდილობდა.

შიოს ნათქვამმა ცოტა ხნით მივიწყებული სადარდელი ისევ აუშალა ვაჩეს. სუფრაზე ველარ გაძლო, ბოდიში მოიხადა და ფეხზე წამოდგა. მასპინძელი სტუმარს მიჰყვამ, მერე წინ წაუძღვა და საიდუმლო კარით სალაროში შეიყვანა.

ოქრო-ვერცხლისა და პატიოსანი თვლების ხვავმა დააბრმავა ვაჩე.

– წაიღე, რამდენიც გინდოდეს, ოქრო-ვერცხლი უანგარიშო მაქვს, შვილი კი ერთადერთი მყავს და მისი სიცოცხლე შენგან მაქვს ნაჩუქარი, – უთხრა შიომ.

ვაჩე ოქროს ზედაც არ უყურებდა. მთელი ქვეყნის სიმდიდრე ჩალადაც არ უღირდა ახლა, რადგანაც თავათ სიცოცხლე აღარაფრად უნდოდა. ჭაბუკმა ხელი ჩაიქნია და უანგარიშო სიმდიდრისაგან პირი იბრუნა.

შიოს, ცოტა არ იყოს, უცნაურად ეჩვენა ჭაბუკის ქცევა. მკლავი დაუჭირა და თვალებში ჩააცქერდა.

– მთელი ჩემი ქონება კი არა, სიცოცხლაც ცოტაა შენი მადლის გადასახდელად. მითხარი, რას ითხოვ და ისეთი რა უნდა იყოს, რომ ვერ აგისრულო, – შეეხვეწა შეწუხებული შიო.

ვაჩე გულგრილად უყურებდა დიდვაჭრის თავგამოდებას და არაფერს ამბობდა.

– ყმად დაგიდგები, რითაც გსურდეს, მიმსახურე! – ისევ შესთხოვა შიომ.

– ერთადერთი სათხოვარი მაქვს და, მგონია, შენ არ უნდა გაგიძნელდეს ამის შესრულება, – მცირე ხნის ყოყმანის შემდეგ თქვა ვაჩემ, – ხლათს წასვლა მინდა და ეგებ, იქით მიმავალი ქარავანი გეგულეობდეს, რომ თან გამიყოლოს.

– თავათ ახლახან დავბრუნდი ხლათიდან. ჩემი მექარავენეები წავლენ ამ ორ დღეში და იმათზე უკეთესს ვის გაჰყვები, ისე ჩაგიყვანენ, ცივ ნიავს არ

მოგაკარებენ. ხლათში გავლენიანი ნაცნობებიცა მყავს, თვით თამთა დედოფალთან მიგიწერ წიგნს, მის კარზე ჩემი ხათრით არაფერს გაგიჭირვებენ, – დიდვაჭარმა მხარზე დაჰკრა ხელი ვაჩეს, თვალეზში ჩააცქერდა და გამომცდელად ჰკითხა, – ეგრე შორს გამგზავრება რად გადაგიწყვეტია?

– – ხლათში ჩემი მასწავლებელი მხატვარი მიზარებს. დემეტრე იყალთოელი, მისი შეგირდი ვარ და სამუშაოდ მიწვევს.

– იყალთოელს კარგად ვიცნობ, კარგი ოსტატია და თამთას კარზეც დიდი სახელი აქვს. ახლაც ვნახე იქ ყოფნისას, ქართველი დედოფლის ეკლესიას ხატავს. ურჯულოები ბოლმით უყურებენ მაჰმადიანი მელიქის სასახლისა და მიზგითის გვერდით ამართულ ქრისტიანულ ეკლესიას, მაგრამ, ერთის მხრივ, თამთასა და აშრაფის რიდითა და სიყვარულით, მეორეს მხრივ – ქართველთა შიშით ვერაფერს ამბობენ...

ორი დღის შემდეგ დიდვაჭარმა შიომ, მისმა ოჯახმა და ნათესაობამ ხლათის გზაზე გაისტუმრა მათი მხსნელი და გადამრჩენელი.

დიდვაჭარმა წერილები მისწერა თამთა დედოფალსა და თავის გავლენიან ნაცნობებს, თან საგზლითა და საქონლით დატვირთული ჯორ-აქლემები გაატანა.

თურმან თორელი უბედნიერესი კაცი იყო.

ტრფობის სიამით ტკბობა გამოუფხიზლებლად გრძელდებოდა. მტკვრის ნაპირას პატარა ბაღიანი სახლი იყიდა კარის მგოსანმა. სახლი სანახევროდ მდინარეზე იდგა. აივნის ქვეშ მტკვარი მიედინებოდა და ბედნიერი წყვილი ხომალდზე გაწოლილი მოგზაურებივით მიჰყავდა ოცნებას სიყვარულის დაუსრულებელ ზღაპარში. უცხო სიამეთა მიუჰკვლეველ ქვეყნებში.

სამეფოში დიდი ამბები ხდებოდა. რუსუდან დედოფალმა, დარბაზის დასტურითა და საკუთარი არჩევანით, არზრუმის სულტნის ტოდრილმას შვილი მოღასედინი შეირთო. უმშვენიერესი დედოფლის ტრფობით გონდაკარგულმა მოღასედინმა საქართველოს დარბაზის პირობა უყოყმანოდ მიიღო, მაჰმადის სჯული უარყო და ქრისტიანულად მოინათლა.

შალვა და ივანე ახალციხელები სამხრეთის ქვეყნებში ლაშქრობდნენ. სამეფო ახალი არხებითა და გზატკეცილებით იქსელებოდა, ახალი ტაძრები და სასახლეები, სასწეულოები და ხანაგები შენდებოდა.

გელათსა და თბილისში, მცხეთასა და ანისში ბიზანტიელ, სომეხ და ქართველ ფილოსოფოსთა პაექრობა გრძელდებოდა, ახალი წიგნები იწერებოდა და ითარგმნებოდა.

და ყველაფერი ეს, თითქო სადღაც, თორელისაგან ძლიერ შორს ხდებოდა. გარე სამყაროსაგან სანახევროდ მოწყვეტილი თორელი, თავის ლამაზ ცოლთან ერთად, უკაცურ კუნძულზე დასახლებულს ჰგავდა, ერთიმეორის გარდა აღარც არავინ იცოდნენ, აღარც ვინმეს ახსოვდათ და აღარც არავინ უნდოდათ.

ერთხანს მოგზაურობით გაერთვნენ. თავის საყვარელ თორში წაიყვანა პატარძალი თურმანმა, მერე მცირე ხანი ახალდაბაში დაჰყვეს ცაგოს დედასთან

და შემდეგ ისევ თბილისს დაუბრუნდნენ, მტკვარზე გადამდგარ კოხტა სახლსა და პატარა ბაღს.

ცაგო მთელი დღე სასიყვარულოდ ეტიტინებოდა თორელს. იგი ასაკითაც უმცროსი იყო, თურმანთან შედარებით თითქმის ბავშვი, და თორელს მასთან ყოფნისას ყველაფერი ავიწყდებოდა, განვლილი ცხოვრების ავ-კარგიც, მომავალზე ფიქრიცა და თავისი ვალიც ქვეყნისა და ხალხის წინაშე, ხანდახან გამოფხიზლდებოდა და შეეშინდებოდა ხოლმე: ვაითუ, ამოდენა ბედნიერება დიდხანს არ გაგრძელდეს და უბედურება რამ შემემთხვესო!

რუსუდან მეფე სანახევროდ თბილისში არ იყო, ჭაბუკ თანამეცხედრესთან ერთად სამყოფელს ხშირად იცვლიდა და თავის სეფექალსა და კარის მგოსანს იშვიათად აწუხებდა სასახლეში მიხმობით.

მაგრამ, როგორც კი გვირგვინოსნები დედაქალაქში გამოჩნდებოდნენ, მისი ახალი სეფექალიცა და კარის მგოსანიც მაშინვე ეახლებოდნენ.

ცაგოს განსაკუთრებით იზიდავდა მეფის ბრწყინვალე კარი, სადაც მუდამდღე ტრიალებდნენ სხვადასხვა ქვეყნებიდან ჩამოსული მეფეები და უფლისწულები, მთავრები თუ დიდებულები, ვაზირები და უებრო რაინდები, სამეფოს საუკეთესო მოყმეები, სწავლულები, ფილოსოფოსები და რიტორები.

რუსუდანის ულამაზესი სეფექალის გამოჩენა შუქს მატებდა ტურფა ქალებით სავსე სასახლესა და დედოფლის ამაღას და ცაგო ყოველთვის გრძნობდა მისკენ გამორჩეულ მზერას. უამრავი თვალი აღტაცებით შეჰყურებდა მისი კენარი ტანის ნატიფ მიხრა-მოხრას და ცაგო ცდილობდა, უფრო მეტად ლამაზი და მომხიბლავი გამოჩენილიყო.

ხლათში ჩასული ვაჩე პირველი დღიდანვე ჩაითრია ცხოვრების ახალმა დინებამ. ჯერ კიდევ გრძელი გზის შთაბეჭდილებით იყო გაბრუებული და დაღლილი, რომ ხლათის მელიქის კარის ბრწყინვალეობამ დააბრმავა.

შიოს ქარავანბაშმა პირდაპირ თამთა დედოფალს წარუდგინა ვაჩე.

იჯდა ოქროს მაღალ ტახტზე ქართველი დედოფალი, თვალწარმტაცი და თავდაჯერებული. მის ერთ გამოხედვაზე ან წარბის შერხევაზე ოთხად იკეცებოდნენ ხლათის კეთილშობილი დიდებულები და მისი ბრძანების შესრულებას ერთმანეთს ასწრებდნენ დედოფლის წყალობისა და ყურადღების დამსახურების მოსწრაფენი.

თავათ ხლათის მელიქი აშრაფი ქეიფსა და ნადირობას გადაყოლილი, თამთას ყოფილი მაზლი და აწ თანამეცხედრე, სასახლეში არ ჩანდა და ვაჩე მიხვდა, რომ საქართველოს ამ ყმადნაფიცი სამეფოს ნამდვილი ბატონ-პატრონი ივანე მხარგრძელის ასული, ქართველი დედოფალი თამთა იყო.

წლებს ოდნავ დაეჩნია კვალი ქართველი დედოფლის სწორუპოვარი სილამაზისათვის, მაგრამ იმდენად კი ვერა, რომ მის პირველად მნახველს შეეტყო. ორმოციოდე წლის დედოფალი კიდევ ბევრს დაუკარგავდა გონებას და მისი სიტურფითა და ბრწყინვალეებით მოხიბლული ჭაბუკი შეკრთა.

ძალიან მაღლა და ძალიან ახლო იგრძნო თავი დიდ ნათელთან, თვალი ვედარ გაუსწორა, თავი დახარა და შეშინებულმა ოდნავ უკან დაიხია.

– მოდი, ჭაბუკო, მომიახლოვდი! – დაუყვავა დედოფალმა და დედაშვილურად მიუალერსა.

– საქართველოში ხომ მშვიდობაა? დაჯექი, მიაძზე, – დედოფალმა სელზე ანიშნა და მორიდებული ჭაბუკი კრძალვით, გაუბედავად დაემშვა სკამზე. კიდევ ცოტა ხანიც და, ვაჩეს წელანდელი გაუბედაობისაგან აღარაფერი დარჩა, შიში თუ კრთომა სადღაც გაიფანტა და დაიკარგა.

და ვაჩე გუმანით მიხვდა, რომ თამთა დედოფლის ძალა მის გულითადობასა და გონიერებაშიც ისევე იყო, როგორც მის სიტურფეში.

დემეტრე იყალთოელმა ვაჩეს მისვლით დიდად გაიხარა.

– ვიცოდი, რომ ბოლოს მაინც მომძებნიდი უძღვები შვილივით, ბოლოს მაინც მე უნდა დამბრუნებოდი, რადგან მას შემდეგ, რაც მუხებთან ღამე გათევინე, მე შენი მეორე მამა ვარ, – უთხრა დემეტრემ და გადაეხვია.

თამთა დედოფლის კარის ეკლესია აჩვენა დემეტრემ ვაჩეს. ახლადნაშენი, მცხეთის ჯვრის მსგავსი მომცრო საყდარი პატიოსანი თვალივით ბრწყინავდა ფერადი ქვებით შემკულ, ნოხებივით აჭრელებულ მიზგიტებს შორის. წუთიერი ქვის პერანგში ქართული ჩუქურთმები დალალ-კავებივით ჩახვეულიყვნენ და ოთხსავე კედელზე ჯვრის სახედ შეკრულიყვნენ.

ეკლესიაში ხარაჩოები იდგა, დემეტრეს თანაშემწეები მუშაობდნენ; კედლების მოხატვა ახალი დაწყებული ჩანდა.

იყალთოელმა საყდარი შემოატარა ვაჩეს, დაწვრილებით აუხსნა, თუ სად რის დახატვას ფიქრობდა. თავისი გეგმა გააცნო. ბოლოს ეკლესიის ერთი კედელი ჩააბარა და მისი მოხატვა მთლიანად მას მიანდო.

მოწყურებულივით დაეწაფა სამუშაოს ვაჩე. თავბედმოდულებულს ქვეყნად სხვა აღარაფერი იზიდავდა, თავდავიწყებას მხოლოდ ხატვაში პოულობდა და გამოუფხიზლებელი ლოთივით სხვაზე აღარაფერზე ფიქრობდა. შთაგონებით გაბრუებული, ოცნებადქცეული ვაჩე იშვიათი აღმაფრენითა და გაქანებით ხატავდა. იყალთოელი და მისი ოსტატები გაოცებულნი შეჰყურებდნენ ჭაბუკის მუშაობას, იგი მათ თვალწინ იზრდებოდა და ვაჟკაცდებოდა, მათთვის მიუწვდომელი სიმაღლეებისაკენ მიიწევდა.

დემეტრე გახარებული იყო მოწაფის წარმატებით.

ხალისიანი, ცხოვრების ყველა სიკეთის მოყვარული ოსტატი, გემოთმიმყოლი და დედათა მოყვარეც იყო. ფული თავზესაყრელად ჰქონდა, პატივი და ყურადღება არ აკლდა. იყალთოელმა დაუღალავად იცოდა მუშაობა, როცა შთაგონების ასეთი დღეები ჰქონდა, ეკლესიიდან არც თავათ გამოდიოდა, არც თანაშემწეებს იშორებდა. მაგრამ, როგორც კი აღმაფრენის ოდნავ შესუსტებას იგრძნობდა, ხატვას მიატოვებდა და აიწყვეტდა.

მაშინ ღამეები უძილოდ გარბოდნენ სპარსელ და თურქ ხათუნებთან ლხინში, აუღებელ სუფრასა და მეგობრებთან ქეიფში.

ვაჩე აქაც განუყრელად გვერდით ჰყავდა დემეტრეს, მისი ლხინის სული და გული იყო.

რამდენ უტურფეს ქალს გადაეყარა ვაჩე, ღვინისაგან გაბრუებულს ბევრჯერ ეგონა, რომ გულისსწორი იპოვა, მაგრამ გამოფხიზლებულს უმაღლესი თვალი ეხილებოდა, გუშინდელ კერპზე გული უცივდებოდა და თავისი თავი ეზარებოდა.

ასეთ წუთებში თვალწინ ისევ ცაგო ედგა, თავი უბედურ ადამიანად მიაჩნდა და თავდავიწყებას ხელახლა ამოდ ეძებდა მუშაობასა და სმამი.

დარდიმანდს, ქეიფისა და დროსტარების მოყვარულ დემეტრესაც მალე ყირჭდებოდა გაბმული ლხინი და ღამეების თევა. ასეთ წუთებში ოსტატი საოცრად მოიწყენდა ხოლმე, ვაჩესთან განაპირდებოდა და საქართველოს ამბებით, საკუთარი სახლისა და ოჯახის მოგონებით იქარვებდა დარდს.

– არც ჩვენი ხელობა ვარგა, ვაჩე! წლობით შინ არა ვარ და ერთადერთი შვილის ნახვა საოცნებოდ მაქვს. რაც ცოლი გარდამეცვალა, ჩემი ლელასათვის მამაც მე ვარ და დედაც.

– რამოდენაა ლელა? – უფრო დემეტრეს გულის გასახალისებლად იკითხავდა ვაჩე.

– თოთხმეტისა გახდა ღვინობისთვეში. ალბათ, უკვე დაქალდებოდა ჩემს აქ ყოფნაში. რომ იცოდე, რა თვალ-ტანადია! – აღტაცებით ამოხდებოდა დემეტრეს და სიხარულით გაბრწყინებული მოჰყვებოდა ლელას სიტურფისა და სიკისკასის ამბავს.

დემეტრე ერთხელ მოთხრობილს მრავალჯერ უბრუნდებოდა და ვაჩემ უკვე ზეპირად იცოდა ოსტატის სათქმელი. თუმცა თვალთა ჯერ არ ენახა ჭაბუკს დემეტრეს ქალი, ოსტატის ნაამბობით მისი გარეგნობა, კეთილი ზნე და ნატიფი ქცევა კარგად ჰქონდა წარმოდგენილი. დემეტრეს ნაამბობით შეეჩვია თვალთა უნახავ ლელას; რაკი მამას ენაზე სულ მისი სახელი ეკერა, ვაჩესაც ახლობელივით წარმოედგინა ოსტატის ესოდენ ტურფა და მიმზიდველი ასული და მისი ამბების თხრობა მასაც მოთხოვნილებად ექცა.

თამთას ეკლესიის კარის მოხატვა თავდებოდა. ხლათის დედოფალმა თავისი სახის დახატვა ინება საყდრის მარჯვენა კედელზე. ეს საქმე დემეტრემ თამთას არჩევანითვე ვაჩეს მიაწოდო.

საქვეყნო საქმისაგან მოცალების ჟამს ხლათის დედოფალი თავის ახალ ეკლესიაში მიბრძანდებოდა ხოლმე და ჭაბუკი მხატვარი გატაცებით ხატავდა მის მშვენიერ სახეს.

მტკვრის პირას, მეტეხის კლდეზე ნელ-ნელა წამოიმართა მთელ ქალაქში ყველაზე მაღალი შენობა. ვიდრე შენობა ჩვეულებრივ სიმაღლეს არ ამორებოდა, მნახველები ვერ ამჩნევდნენ რაიმე განსაკუთრებულს, მაგრამ როცა ხარაჩოები თანდათან მაღლა-მაღლა ავიდნენ და შენობას რამდენიმე სართულზე სვეტებით დამშვენებული ბანები შემოეველო, გამვლელ-გამომვლელნი თვალს ვედარ აცილებდნენ ამ უცხოსა და ლამაზ ნაგებობას.

ბოლოს, ოქროსფერი ქვის პერანგით შემოსეს ჯერ კიდევ დაუმთავრებელი შენობა. დამშვენდა, დამაბრმავებლად გაბრწყინდა სხვა შენობებს შორის. უთვალავი ეკლესიის გუმბათებზე მაღლა ამართული, ქალაქის ყოველი კუთხიდან მოჩანდა მეტეხის ტინზე მკვიდრად დაშენებული ახალი სასახლე რუსუდან მეფისა.

რუსუდანის გამეფების დღეს ჩაუყარეს საფუძველი ამ ახალ პალატებს. პატივმოყვარე რუსუდანს სურდა, მისი სასახლე ულამაზესი ყოფილიყო არა მარტო საქართველოში, არამედ მთელს წინააზიაში. კარის ხუროთმოძღვარი გოჩი მუხასძე საგანგებოდ გაგზავნა კონსტანტინეპოლსა და რომს, რათა იქაური სასახლეები ერთხელ კიდევ მოეხილა და თბილისში მათი მჯობი პალატები აეგო.

ბიზანტიაში ნასწავლმა და ნამუშევარმა მუხასძემ აღმოსავლეთისა და დასავლეთის საუკეთესო სრა-სასახლეების გეგმები წინ დაიდო, ქართული ეროვნული ხუროთმოძღვრების მიღწევებიც სახელმძღვანელოდ გაითვალისწინა და სასახლის ბრწყინვალე გეგმა შექმნა.

ბაგრატიონთა სახლს თავისი მოდგმა ბიბლიური დავითისა და სოლომონისაგან გამოჰყავდა და საქართველოს ახალ რომად გადაქცევის მქადაგებლებმა მუხასძეს ისიც მოსთხოვეს, რუსუდანის პალატები სოლომონის ზღაპრული ტაძრისათვისაც მიემსგავსებინა, იმ ტაძარზე დიდი, უკეთ შემკული და უფრო ბრწყინვალე აეშენებინა.

მუხასძე ძველი აღთქმის მეფეთა წიგნსაც ჩაუჯდა და ზოგი რამ მართლაც საგანგებოდ გადმოიღო სოლომონის ტაძრიდან, რათა ქართველი გვირგვინოსნის დავითიან-სოლომონიანის წარმომავლობა მეფის ახალი სასახლის ყველა მნახველისათვის ნათელი გაეხადა.

ათასობით მონა დაახვიეს სასახლის მშენებლობას. ასობით ქარავანი წამოვიდა ქვეყნის ყველა კუთხიდან. განუწყვეტელ ნაკადად მოედინებოდა თბილისისაკენ სომხეთის ფერად-ფერადი ქვა, აფხაზეთის ხე-ტყის ძვირფასი, გამძლე ჯიშები, კირი და კრამიტი, მარმარილო და მინა საგანგებოდ მზადდებოდა რუსუდანის სასახლისათვის და ურიცხვი ურმითა და ჯორკიდებულთ მოდიოდა ქვეყნის ყოველი მხრიდან.

საქართველოს ყველა ხუროთმოძღვარი, მხატვარი, მეცნიერი თუ ფილოსოფოსი რუსუდანის ამ ახალ სასახლეს საქართველოს სახელმწიფოს უდიდესი ძლიერებისა და აყვავების ძეგლად თვლიდა, ყველას უნდოდა, ეს ძეგლი სამარადისო ყოფილიყო და ყველას თავისი შემოქმედების წვლილი შეჰქონდა მის შენებაში.

ხუროთმოძღვრები და სწავლულები რომ სასახლის გარეგნულ სილამაზესა და მარადიულ აზრზე ფიქრობდნენ, ქართველი მთავრები ერთიმეორეს ეჯიბრებოდნენ რჩეული მასალის მოზიდვაში, ხოლო საქართველოს ყმადნაფიცები, ტრაპიზონის იმპერატორი და არზრუმის სულტანი, ადარბადაგანელი ათაბაგები და თურქმანი სულტანები უჩვეულო

თავგამოდებას იჩენდნენ, რუსუდანის სასახლის მშენებლობას ოქრო-ვერცხლსა და იშვიათ შესამკობელ მასალას სწირავდნენ.

შენობა სახურავამდე ავიდა და მუხასძემ სასახლის შიგნი მოხატვაზე დაიწყო ზრუნვა. სამეფოს ყველა მხატვარს კარგად იცნობდა, მეზობელი ქვეყნების მხატვართა ოსტატობაც გაცნობილი ჰქონდა და მათგან ყველაზე განთქმულ ხელოვანთა გამორჩევას ფიქრობდა.

დროს სწრაფად გაერბინა, ორი წელი გასულიყო. ქართველ მხატვრებს ხლათის კარის ეკლესიის მოხატვა დაესრულებინათ. ეკლესიის მხატვრობისა და განსაკუთრებით მარჯვენა კედელზე გამოხატული თამთა დედოფლის სახის სანახავად განუწყვეტლად მოდიოდნენ ის მუსულმანებიც კი, რომლებიც ქრისტიანთა სალოცავს უწმინდურებასავით უვლიდნენ ხოლმე გვერდს და მისგან ზურგმექცეული გარბოდნენ, ახლა, ქრისტეს საყდარში ქურდულად შეპარულნი, მაცხოვრისა და ღვთისმშობლის ხატებს თვალს არიდებდნენ და საათობით უცქერდნენ თავიანთი საამაყო დედოფლის სახეს.

მთელს ქვეყანაზე გაითქვა სახელი ამ პატარა ეკლესიის მხატვრობამ და გოჩი მუხასძე საგანგებოდ ჩამოვიდა თბილისიდან თავისი თანაშემწეებით, რათა ადგილზე ენახა საარაკო ნახატი.

ეკლესიის მხატვრობამ და განსაკუთრებით თამთას სახემ ბევრის მნახველი ხუროთმოძღვარიც განაცვიფრა.

თბილისში დაბრუნებისთანავე კარის ხუროთმოძღვარმა მეფეს გადაჭრით მოახსენა: ყველას ნიჭი და ოსტატობა ავწონ-დავწონე, მეფის პალატების გარეგნობის ღირსად სასახლის დარბაზების მოხატვას მხოლოდ დემეტრე იყალთოელი და მისი თანაშემწე ვაჩე შესძლებენო.

რუსუდანმა მალემსრბოლები აფრინა ხლათისაკენ.

თამთა დედოფალმა ქართველი მხატვრები უხვად დააჯილდოვა და საქართველოსაკენ გამოისტუმრა.

რალაც გაურკვეველი გრძნობით შეპყრობილი მოჰყვებოდა გზას ვაჩე. სამშობლოში დაბრუნება ახარებდა და თან აშინებდა. ვინ იცის, რა მოხდა ამ ორი წლის განმავლობაში, რამდენი რამ შეიცვალა მისი ახლობლების ცხოვრებაში.

თავათ ვაჩეს ცხოვრებაში კი თითქო არაფერი მომხდარა ღირსსახსოვარი. ორი წელი რა არის, ამ ორ წელს ისე გაურბენია, რომ მის პირად ბედზე თითქმის არავითარი კვალი არ დაუტოვებია, მაგრამ თავათ გამოცვლილა ვაჩე, ხასიათი შეცვლია, გუნება დამძიმებია და ცხოვრებას სხვა თვალთ უყურებს...

ხუთიოდე ცხენოსანი თბილისში შემოვიდა. სამშობლოს დანატრებული, გრძელი გზით დაღლილი მგზავრები დედაქალაქის ხილვამ გამოაცოცხლა. ხმამაღლა ალაპარაკდნენ, ხელებს იშვერდნენ და ერთიმეორეს ანიშნებდნენ ნაცნობსა თუ უცნობ შენობებზე და უბნებზე, ძველსა თუ ახალზე.

გაუთავებელი გზით მოქანცულ, დამტვერიანებულ მგზავრთაგან ვაჩე სადღესასწაულოდ გამოწყობილივით გამოირჩეოდა. ისე არხინად მოჰყვებოდა მტკვრის ნაპირს, თითქო ორი წლის წინ სწორედ ამ მტკვარში თავის დახრჩობა არც გაეფიქროს, ყველაფერი ახარებდა და იტაცებდა, ლურჯი ცაცა და მწვანით დაფარული მთებიც, ნელა მოდუდუნე მტკვარიცა და ფუტკრის სკასავით ახმაურებული ქალაქიც.

მტკვრის პირას, მეტეხის კლდეზე დაშენებულმა, ცადატყორცნილმა ახალმა შენობამ მიიპყრო მგზავრების ყურადღება. ცხენები შეაყენეს და მიაშტერდნენ. კლდეზე ამოსულივით, თავათ ამ კლდის ნაწილივით იდგა ღრუბლებში ატყორცნილი უცხო ნაგებობა.

– აი, ეს არი რუსუდანის ახალი პალატები! – წარმოსთქვა დემეტრემ და სასახლეს აღტაცებით მიაჩერდა.

– რა ლამაზია! რა მსუბუქი და ჰაეროვანი! – აღმოხდა ვაჩესაც.

– გოჩი მუხასძის აგებულია, მისი ნაშენები ყველა ასე ლამაზია და ხელთუქმნელსა ჰგავს.

– სარკმლებს შეხედეთ, სარკმლებს, რამსიმადლიდან დაჰყურებენ მტკვარს! – წამოიძახა რომელიღაცამ.

– მოცურავე ის იქნება, ვინც მაგ სარკმლიდან გადახტება მტკვარში! – დასძინა მეორემ.

– რას ამბობ, მტკვარამდე სული არ დაჰყვება! – შეიცხადა მესამემ.

– როგორი ზომიერებით არი ყველაფერი განაწილებული, სიმადლე და სიღრმე, სვეტები და ჩუქურთმები!..

– ღირს, განა, მაგ სასახლის მოხატვა, ვაჩე?!

– ღირს, მაგრამ ძნელიცაა! – ჩაფიქრდა ვაჩე, – თუმცა, რაც ძნელია, მიმზიდველიც სწორედ ის არი!

– გოჩი მუხასძეს უნდა ვაჯობოთ, ვაჩე, შიგნი ისე უნდა მოვხატოთ მეფის ახალი პალატები, მისი გარეგნობა უნდა დავავიწყოთ მნახველს.

– აი, ეგ კი მართლა ძნელი საქმე იქნება! – თავი გადააქნია ვაჩემ და ცხენი ნელა დასძრა.

გზადაგზა ემშვიდობებოდნენ და სტოვებდნენ თანამგზავრები ვაჩესა და დემეტრეს, ზოგი სად უხვევდა და ზოგი სად რჩებოდა.

მარტონი რომ დარჩნენ, ვაჩემ გონსმოსულივით წამოიძახა:

– მე სადღა მივდივარ, ლაპარაკმა როგორ შემიყოლია!

– სად უნდა მიდიოდე, ჩემსას წამოხვალ! – მტკიცედ უთხრა დემეტრემ.

– დედასთან წავიდოდი, სოფლად, აქედან შორს არ არი. – გაიწია ვაჩემ.

– ჯერ ჩემსას დავისვენოთ, ნამგზავრები ვართ, აბანოში წავიდეთ. დედის ნახვას მერეც მოასწრებ, ხვალაც, ზეგაც... თუ გუნებაზე ვიქენი, მეც თან წამოგყვები.

– მაგას რაღა აჯობებს! – გაიხარა ვაჩემ და მორჩილად მიჰყვა ოსტატს.

კობტა აივნისან პატარა სახლთან შეჩერდნენ. ჭიშკარი გაიღო და წინსაფრიალი ქალიშვილი გამოეგებათ. «მამაო», – ერთი შესძახა და

დემეტრესკენ გაქანდა. უნაგირიდან გადმოსვლა არ აცალა მამას, ცხენიდან გადმოხრილს მოეხვია. ცრემლმორეული, გულაჩუყებული დემეტრე მკერდში იხუტებდა ამდენი ხნის უნახავ ერთადერთ ქალიშვილს, კოცნიდა და ეფერებოდა.

ვაჩე განზე იდგა და ღიმილით შეჰყურებდა მამა-შვილის გაუთავებელ ალერსს.

როგორც იყო, გული იჯერეს ერთმანეთის ხვევით, დემეტრე ცხენიდან გადმოხდა, ვაჩემაც დაიქვეითა.

– ჩემი ქალიშვილია, ლელა, – მიმართა ვაჩეს, ქალიშვილს მკლავში ხელი გამოსდო და ვაჩესკენ წაიყვანა.

ქალს სახე ერთიანად გაბრწყინებოდა, თვალეში სიხარულის შუქი ჩასდგომოდა. მოდიოდა ვაჟისკენ ხელის ჩამოსართმევად, გული უჩვეულოდ უცემდა და მუხლიც უცნაურად უკანკალებდა.

– რამოდენა ქალი ყოფილა და მე კი არ ვიცნობდი! – ღიმილით თქვა ვაჩემ და ლელა თავით ფეხამდე აათვალ-ჩაათვალა.

– მე კი თქვენი ყოველივე დაწვრილებით ვიცოდი, მამაჩემი ხშირად მიაგებოდა და წერილებშიც მწერდა.

– ჰოო! – გაიკვირვა ვაჩემ და ისევ ალაღად გაეღიმა.

დემეტრე სასოებით შეჰყურებდა თავის ერთადერთ შვილსა და უსაყვარლეს მოწაფეს. ვაჩეს ზნესა და ქცევას რომ აკვირდებოდა ხოლმე შორეულ ხლათში, ბევრჯერ გულში მისი დამოყვრება უნატრია. ახლა, მათ რომ ერთად ხედავდა, ის ოცნება ადვილად განსახორციელებელი ეჩვენებოდა და გული სიხარულით ევსებოდა.

ჭიშკარში დემეტრეს დაი გამოჩნდა.

– დემეტრე! შენ გაგახარა ღმერთმა, როგორც ჩვენ გავიხარეთ შენი გამოჩენით! – შესძახა და ძმას მოეხვია.

ცხენები დააბინავეს და შინ შევიდნენ.

პატარა სახლი გემოვნებით იყო მოწყობილი. ვაჩემ ნაამბობით იცოდა, რომ ადრე დაქვრივებულ დემეტრეს ეს ერთადერთი ქალიშვილი დარჩენოდა, რომელიც მამიდის მზრუნველობით იზრდებოდა.

იქაურობას წკრიალი გაჰქონდა და ვაჩე მიხვდა, რომ ეს შნო და ლაზათი ლელას იქ ყოფნას შეჰქონდა ყველაფერში.

ხელ-პირი დაიბანეს. ლელამ სუფრა გააწყო. ქალიშვილი უჩვეულოდ ადგზნებული და ატაცებული იყო, ისე დაჰქროდა, გეგონებოდათ, მიწას ფეხს არ აკარებსო. ვაჩეს შორიდან შესციცინებდა, მის ყოველ გამოხედვაზე ფერი მისდიოდა და თავს ხრიდა.

თვითონ ვაჩემაც დაიჭირა თავისი თავი: როცა ლელა იქ არ იყო, თვალი სულ კარისკენ გაუბრუნებოდა, ლელა რომ გამოჩნდებოდა, უჩვეულო სიხარული ეუფლებოდა, გული მისკენ მიუწევდა და დაუსრულებლად მასთან ყოფნა უნდოდა.

იმ ღამეს შორი გზით დაღლილებს ძილი არ გასტეხიათ. ძმის დაბრუნებით გახარებულ მამიდასაც მშვიდად ეძინა. მხოლოდ ლელას თვალს არ ეკარებოდა ძილი.

თვალის დახუჭვა არ შეელოდა, წინ ისევ და ისევ ვაჩე ედგა – მამამისის საყვარელი მოწაფე და აწ უკვე მარჯვენა ხელი, ოდნავ შავგვრემანი და ტანბრგე, ბავშვივით წრფელი და ალერსიანი, თანაც ამაყი და თავმოყვარე ვაჟკაცი.

რამდენი რამ უამბნია დემეტრეს თავისი ერთადერთი ქალისათვის ვაჩეს კაიბიჭობისა. ლელას მამის ნაამბობი გადაჭარბებულად ეჩვენებოდა. სინამდვილეში კი რა სიტყვაძვირი ყოფილა დემეტრე, ასეთ ვაჟკაცზე ლაპარაკი ხომ დაუსრულებლად შეიძლება და არც არასოდეს მოგწყინდება.

აგერ, ამ თხელ კედელს იქით მინავს ახლა იმ ვაჟკაცს, ყური რომ მიუგდოს, იქნებ ფშვინვაც მოესმას მძინარის. რა ბედნიერი იქნება, ვინც მასთან ერთად დაიძინებს, მის ღონიერ მკლავზე!

ლელას თავისი ფიქრისა თვითონვე შეეშინდა, პირჯვარი გადაიწერა და გულამოვარდნილმა თავზე საბანი წაიხურა, თითქო იმ თამამ ფიქრს ემალებოდა.

მეორე დღეს მეფის კარზე გამოცხადდნენ დემეტრე და ვაჩე. დედოფალმა მათი მოსვლით გაიხარა.

– ალბათ, ნახავდით ჩვენს ახალ პალატებს. რას იტყვით, როგორ მოგეწონათ? – იკითხა დედოფალმა.

– ჭეშმარიტად ღირსია თქვენი ბრწყინვალე მეფობისა. ფრიად მოვიწონეთ, რაც გარედან ვნახეთ, – მოახსენა დემეტრემ.

მეფეს ესიამოვნა.

– შიგნი უფრო ლამაზი და მიმზიდველი იქნება. ოქრო და ვერცხლი დაფარავს სასახლის უთვალავ თაღსა და სვეტებს. ულპობელი ხისა და ბროლის იატაკი შეენაცვლება ფერადი მარმარილოსას და ძვირფასი ქვებისას. მაგრამ ეს ყოველივე უთქვენოდ კეთდება. მთავარი შნო და შუქი კი თქვენ უნდა შეიტანოთ ჩვენს ახალ პალატებში. თქვენმა ფერებმა სიცოცხლე და ხალისი უნდა შემატონ დარბაზებს. ჩვენი პალატები მზითა და ჰაერით უნდა იყვეს სავსე, თვალსა და გულს იქაც ისე უნდა უხაროდეს, როგორც გარეთ, ჩვენი ბუნების წარმტაც წიაღში.

დედოფალი ძნელსა, მაგრამ საგულისხმო ამოცანას უყენებდა მხატვრებს. ვაჩემ მრავლისმთქმელი თვალთ შეხედა დემეტრეს და გულისყური მიუპყრო დედოფალს.

– ასეთი ძნელი სამუშაოს მონდობა მხოლოდ შენთვის შეგვეძლო, დემეტრე. ბეთანია და გუდარეხი შენი ყალმით ცოცხლობენ, ეს ახალი სასახლეც შენმა ნიჭმა და შთაგონებამ უნდა გაანათოს. სასახლე დამთავრებულია, მოხატვალა აკლია და ამიტომ გიხმე სასწრაფოდ ხლათიდან. მხოლოდ ერთი გახსოვდეს,

ბეთანია უფლის ტაძარია, ჩვენი პალატები კი მოკვდავთა სამყოფელი იქნება. იქ ზეციერზე ფიქრი იყო მთავარი, აქ კი მიწიერზე ზრუნვა იქნება უმთავრესი.

– იმედი გქონდეთ, დედოფალო, ჩემი და ამ ჩემი ოსტატის გულისმოდგინებისა და თავდადების, – დემეტრემ ხელით აჩვენა და ვაჩე წელში მოიხარა.

რუსუდანი ყურადღებით აკვირდებოდა უცხო ვაჟკაცს. მერე რაღაც გაახსენდა და დემეტრეს მიუბრუნდა:

– ეს, ალბათ, ის ოსტატია, ხლათში რომ გახლდა.

– დიახ! სწორედ ის გახლავთ, – დაუდასტურა თავისდაკვრით დემეტრემ.

– დიდად მიქებდა თავის უსტარებში ჩვენი, დისაგან უახლოესი, დედოფალი თამთა შენი ოსტატის ხელოვნებას. ფრიად მსიამოვნებს, რომ თავის ხელოვნებას ახლა ჩვენს კარზე გამოაჩენს. მხოლოდ ერთი ახსოვდეს ახალ ოსტატსაც, ჩვენი სასახლე ხლათის ეკლესია როდია, აქ ასპარეზიც მეტი ექნება და ნიჭსაც დიდს მიიღებს ჩვენგან. – მუხასძე ნახეთ, გეგმას გაეცანით და საქმეს სწრაფად შეუდექით, – ბრძანა დედოფალმა და ფეხზე წამოდგა. ეს იმას ნიშნავდა, რომ დედოფლის მშვენიერი პირის ჭკვრეტის ბედნიერება გათავებული იყო და მხატვრებს მეფის დარბაზი უნდა დაეტოვებინათ.

ორივე მხატვარი მოფარდაგულს ეამბორა. წამოდგნენ და დარბაზიდან გავიდნენ.

ხუროთმოძღვარმა სასახლის მოხატვის გეგმა გააცნო მხატვრებს.

დედოფლის ბრძანებით, დიდი დარბაზის კედლებზე მისი მეფედ კურთხევა და ტახტზე ასვლა უნდა დაეხატათ.

დემეტრემ ეს საქმე, როგორც ყველაზე ძნელი და პასუხსაგები, ვაჩეს მიანდო. დანარჩენის მოხატვა თავათ იკისრა.

დამშეულივით მიადგა სამუშაოს ვაჩე. სამი კედლის გეგმა მოხაზა: ერთზე – ღვთისმშობლის წინაშე დაჩოქილ რუსუდანს ხელთ ქრისტეს კვართი ეპყრა, ცრემლით ალტობდა და გულში იკრავდა, მარჯვნივ – ბაგრატოვანთა გვარის ღვთაებრივი წინაპარი დავითი ღრუბლებიდან იმ შურდულს უწვდიდა, რომლითაც გოლიათი დაამარცხა ჭაბუკმა მეფემ; მარცხნივ – მეფეთა შორის უგონიერესი, სოლომონ ბრძენი იმ სასწორს სთავაზობდა, რომელმაც მის სამართალს საუკუნო სახელი დაუმკვიდრა.

თავზე რუსუდანს დიდი თამარი ადგამდა გვირგვინს, ხოლო ახალგაზრდა დედოფლის ფეხქვეშ გაწოლილიყო თვინიერად და უწყინრად ის ორი მრისხანე ლომი, რომლებიც ქართველთა დროშებიდან და სამეფო ნიშნებიდან ყალყზე ამდგარნი ზარავდნენ მნახველებს.

მეორე კედელზე ტახტზე დაბრძანებული, თავგვირგვინოსანი და ხელსკიპტროსანი რუსუდანი მოეხაზა ვაჩეს. ტახტის წინაშე საქართველოს უძლეველი მეფის სათაყვანებლად და მისთვის მორჩილების გამოსაცხადებლად მოსული თურქთა და სპარსთა, ბიზანტიელთა და ერაყელთა, ადარბადაგანელთა და ხვარასნელთა ელჩები გართხმულიყვნენ.

რუსუდანს მოწყალე ხელი გაემვირა და თავისი მფარველობის ქვეშ შეევრდომებინა ქრისტეს სჯულისა და საქართველოს ტახტის უზენაესობის აღმსარებელნი.

მესამე კედელი სამეფოს იმ ბრწყინვალე მომავალზე მოუთხრობდა, რომლისთვისაც საქართველოს რუსუდანის მეფობის ჟამს უნდა მიეღწია: ცალი ხელით რუსუდანს ვაზის ჯვარი აღეპყრო, ხოლო მეორით დოვლათის კალთა დაებერტყა და ღვარად მოდიოდა ოქრო და ვერცხლი, ყურძნის მტევანი და ხორბლის ხვავი; ყვავილოვან წალკოტებს არხები ქსელავდნენ, უდაბნოებში მონასტრების გუმბათები მაღლდებოდნენ და გრძელ გზებზე აქლემების ქარავნები მიიზღაზნებოდნენ, ხოლო იქ, სადაც რუსუდანის ხელს ვაზის ჯვარი აემართა, თხა და მგელი ერთად სძოვდნენ.

მეოთხე კედელზე ვაჩეს განზრახული ჰქონდა, რუსუდანის გამეფების გამო თბილისში გამართული სახალხო ზეიმი ეჩვენებინა. მხატვრის წარმოსახვით, ეს უნდა ყოფილიყო დიდი, საყოველთაო დღესასწაული, ბერიკებისა და ოჩოკოჩების, ალებისა და ჭინკების ნიღბებით მოზეიმე მოქალაქეთა მონაწილეობით.

დარბაზის მოხატვის გეგმა რომ მოუწონეს და დაუდასტურეს, ვაჩემ ბინა ახალ პალატებში დაიდო. სამი ოსტატი თანაშემწედ აიყვანა და მათთან ერთად შეუდგა ჩანაფიქრის ხორცშესხმას.

პირველი სამი კედელი თავის თანაშემწეებს დაუნაწილა. ოსტატები მისი მუდმივი თავსდგომითა და ხელმძღვანელობით მუშაობდნენ, ყოველი წვრილმანი ვაჩეს უშუალო მონაწილეობითა და დასტურით იხატებოდა; მხოლოდ მეოთხე კედელს, ერთიანსა და ყველაზე დიდს, ვაჩე არავის აკარებდა. იგი ნელა, მაგრამ ბეჯითად ემზადებოდა ამ კედლის მოსახატავად.

ბევრმა უძილო ღამემ გაირბინა ფიქრსა და ძიებაში, სანამ უზარმაზარი კედლის მხატვრობას მთლიანობაში ჩამოაყალიბებდა. ადამიანებისა და ცხენების სურათის ყოველი წვრილმანის უთვალავ მონახაზს აკეთებდა, ერთს იწუნებდა და მეორეს იწყებდა, ვიდრე მის წარმოდგენაში კედლის ყოველმა კუნჭულმა გარკვეული სახე და ფერი, თავისი ადგილი და ურთიერთმიმართება არ მიიღო: თეთრ კვიცზე ამხედრებული რუსუდან დედოფალი, ბრწყინვალე ამალის თანხლებით, მეფედ საკურთხებლად მიბრძანდებოდა; ქუჩა გაჭედილი იყო ხალხით, ხელოსნებითა და ვაჭრებით, კაცითა და ქალით, სეირის საყურებლად დიდი და პატარა გამოსულიყო; სახელოსნოს მიხურულ დარაბებთან, იქ, სადაც ბრწყინვალე მეფის ამალის კუდი იყო და კარისკაცების რიგი თავდებოდა, მოზღვავებულ ხალხს სახედარზე მჯდარი საპყარი მიეჭყლიტა. მოწოლილი ხალხისაგან საპყარს მკერდით იცავდა თეთრკაბიანი გოგონა. ქალიშვილს ცალ ხელში აღვირი ეჭირა, მეორეთი ხალხს აკავებდა; გოგონას თავისა და სახის ნაკვთები მხატვარს არ მოეხაზა, ოღონდ ტანისა და ყელის დაყენებით აშკარად ჩანდა, რომ მისი სახე და მზერა წინ წასული მეფის ამალისაკენ იყო მიმართული; მეფის ამალას რომელიღაც ცხენოსანი ჩამორჩენოდა, უნაგირზე სანახევროდ

შემობრუნებულიყო და დაჟინებით იხედებოდა იქით, სადაც საპყარის გვერდით მდგარი გოგონას სახე იყო ნაგულისხმევი.

ყველაფერი – საზეიმოდ მორთული ქუჩაც, მეფის ამაღაც და ზღვად მომდგარი ხალხიც, კუთხის სახლის პატარა ბანიდან იყო დანახული: ამ ბანზე ტევა აღარ იყო, ყველანი წინ მიმავალ მეფესა და მის დიდებულებს უცქერდნენ, ერთიმეორეს აწვებოდნენ და უკეთ დანახვას ცდილობდნენ. მხოლოდ მწარედ ჩაფიქრებული ერთი ჭაბუკი მობრუნებულიყო სანახევროდ. მისი სახის გამომეტყველება რაღაც უძვირფასესის დაკარგვის მოლოდინსა და თავისი უღონობით სასოწარკვეთას გამოხატავდა.

ნელ-ნელა, თითქო ნაზამთრალ მინდორზე გაზაფხული მკვიდრდებოდა, ახალ-ახალი ფერებით იფარებოდა, ცოცხლდებოდა და სუნთქვას იწყებდა მანამდე მკვდარი და ცივი კედელი.

იყალთოელი ხშირად შემოდოდა ვაჩეს დარბაზში. საათობით მოჯადოებულებით იდგა მისი ნახატის წინაშე. ოსტატი ხედავდა, რომ აქ, ამ დარბაზში დიდი შემოქმედის აფორიაქებული სული ტრიალებდა, რაღაც უჩვეულოს, მარადიულისა და საუკუნოს ქმნიდა და ბედნიერი იყო მასწავლებელი. ერთ დროს უბირი ჭაბუკი და აწ უკვე დიდოსტატი ვაჩე მხატვარს თავის ქმნილებად მიაჩნდა და თავის თავს მისი ამ ამაღლებული შემოქმედების ზიარად თვლიდა.

ვაჩე გრძელ სკამზე იჯდა და ხატავდა. დარბაზში დემეტრე შემოვიდა. სხვა დროს შორიდან გაუცინებდა ჭაბუკს, გაეხუმრებოდა და რაიმე სასიამოვნოს ეტყოდა. ახლა ხმაამოუღებლად, მთვრალივით მობარბაცებდა დემეტრე და კედელ-კედელ მოდიოდა, რომ არ დაცემულიყო.

– ადრე მოგსვლია, ოსტატო! – შორიდან დაუძახა ვაჩემ და ხატვას თავი ანება.

დემეტრეს ხმა არ გაუცია, კედელთან შეჩერდა და ხელით ანიშნა, მისულიყო. ვაჩემ ფუნჯი გააგდო და ოსტატთან მიიჭრა.

სიცხისაგან გათარანებულ დემეტრეს სახეზე ალმური ასდიოდა, მუხლს ძლივს იმაგრებდა და, ალბათ, წაიქცეოდა, ვაჩე რომ დროზე არ მიშველებოდა.

– ავად ვარ, შინ წამიყვანე! – ძლივს ამოსთქვა დემეტრემ და ვაჩეს მხარზე ჩამოეკიდა. ვაჩემ თავისი თანაშემწეები მოიხმო, ავადმყოფი ბავშვივით აიყვანეს და შინისკენ გააქანეს.

დემეტრეს, სადღაც, უცხოეთში შექმნილმა ციებ-ცხელებამ გაუხსენა. ვაჩემ თავს ექიმები დაახვია, მაგრამ ვერაფერს გახდნენ, სწეულებას წამალი არ შველოდა და ავადმყოფი დღითიდღე უარესობისკენ მიდიოდა.

დემეტრე ატყობდა, საამქვეყნო პირი აღარ ჰქონდა. გამობრუნების იმედი რომ დაჰკარგა, ერთ საღამოს ვაჩე მოიხმო, ლოგინთან სკამზე დასვა და თვალზე ცრემლმომდგარმა უთხრა:

– შენ ჩემთვის შვილზე მეტად საყვარელი იყავი; რაც შემემლო, ამაგი არ დამიშურებია. ახლა სახელგანთქმული ოსტატი ხარ და უჩემოდაც გზა ხსნილი

გაქვს. მე დიდი დღე აღარ დამრჩენია და ერთადერთი თხოვნით მოგმართავ სიკვდილის წინ. თუ სათნოდ გეჩვენოს ჩემი თხოვნა, ამისრულე, თუ არა და, უარიც გულწრფელად მითხარი, არც ეს მეწყინება.

ვაჩეს თვალს ცრემლი მოადგა.

– ბრძანე, ოსტატო, რა უნდა მთხოვო, რომ არ აგისრულო! – ჩასძახა გაფითრებულმა ვაჩემ და სკამი უფრო ახლო მისწია.

სწეულმა სული მოითქვა და ვაჩეს მავედრებელი თვალი მიაპყრო.

– ჩემს ერთადერთ ქალსა და მთელ ჩემს ქონებას შენ გიტოვებ. შენს მეტი იმედად არავინ მრჩება. ჩემი ქალი ართვალა არ არი და ოჯახის საქმის უმეცარი. თუ შენც გული სხვას არ გითქვამს, შენ – ქმარი და ის – ცოლი. შეირთე ჩემი შვილი და იყავით ბედნიერნი.

დემეტრე გაჩუმდა, თავი განზე გასწია და დააკვირდა, თუ რა შთაბეჭდილება მოახდინა ნათქვამმა.

– შენს ნებაზე იყოს, ოსტატო!

ამოსთქვა ვაჩემ, ცრემლი წასკდა და გულამომჯდარი დემეტრეს ხელს დააკვდა.

– თუ გულით არ გსურს, ნუ იქმ, შვილო. ჩემი ხათრით ცხოვრებას ნუ გაიმწარებ.

– არა, მამა! გულით მსურს შენი შვილობა... შენი სიძეობა, – სლუკუნით ამბობდა ვაჩე და თან ხელით მომაკვდავის ხელს ეალერსებოდა.

– მაშ, ლელა მიხმე! – შესძახა მოცოცხლებულმა დემეტრემ და ლოგინზე წამოიწია.

ვაჩე გავიდა და ისევ მალე შემობრუნდა ლელასთან ერთად.

– ლელა, შვილო!.. – მიმართა ქალიშვილს.

ლელა დაბნეული უყურებდა მამასა და ვაჩეს და ვერაფერს მიმხვდარიყო.

– მიეცით ხელი ერთმანეთს! – უბრძანა დემეტრემ.

ვაჩემ და ლელამ ხელი ხელს მისცეს.

– დღეიდან შენ – ცოლი და შენ – ქმარი! დამილოცნიხართ, შვილებო, აწ და მარადის და უკუნითი უკუნისამდე...

დემეტრემ ჯვარი გადასწერა და ლოგინზე უღონოდ დაეცა.

ქორწილი მეორე დღესვე გადაიხადეს. ვაჩეს დედა სოფლიდან ჩამოიყვანეს, ზოგი ნათესავი და ახლობელი მოიპატიჟეს.

შინ მომაკვდავი ჰყავდათ და თუმცა მასპინძელი სიმღერასა და მხიარულებას აძალებდა, ლხინი მაინც არ გამოვიდა.

ორი დღის შემდეგ დემეტრე მიიცვალა.

დემეტრეს სიკვდილის შემდეგ ვაჩეს შინ და გარეთ ტვირთი და პასუხისმგებლობა მოემატა. მანამდე თუ თავისი მოსახატავი დარბაზის გარდა სხვაზე არაფერზე ზრუნავდა, ახლა დემეტრეს დაუმთავრებელი სამუშაოც მას უნდა დაესრულებინა, სხვა მხატვრების ხელმძღვანელობაც მასვე უნდა ეკისრა.

გულით ეწადა, თავისი მასწავლებლის პატიოსანი სახელი არ შეერცხვინა, მისი ნდობა და იმედი გაემართლებინა. დღე და ღამეს ასწორებდა, თავაუღებლად შრომობდა.

ჯან-ღონით სავსე ვაჟკაცი ყველაფერს ასწრებდა, მისი მუყაითობა საქმესაც მალე დაეტყო და ოჯახსაც.

პალატების მოხატვა თითქმის თავდებოდა.

სამუშაოდან შინ გვიან ბრუნდებოდა დაღლილი ვაჩე. ოჯახში სითბო და სიხარული ელოდა. რაგინდ უგუნებოდ ყოფილიყო, დემეტრეს ჭერქვეშ, ლელას გვერდით ყველა წყენა ავიწყდებოდა, გულს დარდი გადაეყრებოდა და მშვიდი ცხოვრების ბედნიერებით თავდავიწყებას ეძლეოდა. ამ სიმშვიდის დარაჯი და ბედნიერების შემოქმედი მისი კერიის ანგელოზი ლელა იყო. ეს ქალი მთელი დღე ჯარასავით ტრიალებდა, ოჯახის საქმეს სანიმუშოდ უთავდებოდა, ვაჩეს თვალ-წარბში შეჰყურებდა და მტრედივით შეჰკლულუნებდა.

შინ რომ ასე მყუდრო და დალაგებული ცხოვრება ჰქონდა, გარეთაც მეტი ხალისით მუშაობდა ვაჩე. მისი მხატვრობის სანახავად, მისი მუშაობის საცქერლად უამრავი ხალხი მოდიოდა, ოსტატებს ახალგაზრდა მხატვრები მოჰყავდათ, ხელით უჩვენებდნენ და ხმადაბლა უხსნიდნენ მხატვრის ჩანაფიქრისა და შესრულების თავისებურებას, ხაზისა და ფერის, შუქისა და ჩრდილის ადგილსა და მნიშვნელობას.

დემეტრესაც ასე ეხვეოდნენ თავის დროზე თაყვანისმცემლები და მხატვრობისმოყვარულნი. ვაჩე გრძნობდა, რომ უკვე მიეღწია იმ მდგომარეობისათვის, რომელზედაც ოდესღაც დემეტრეს ჩრდილში მოფუსფუსე ყმაწვილი ჩუმად და გაუბედავად ოცნებობდა. მისი სახელიც ძალიან შორს განთქმულიყო და ვაჩეს ნამუშევრის სანახავად მოსვლას ტრაპიზონიდან და ბიზანტიიდანაც კი კადრულობდნენ ამპარტავანი ბერძენი მხატვრები.

ვაჩეს სახელი ახლა თითქმის მთელმა ქვეყანამ იცოდა. პატივი და დიდება, სიყვარული და დაფასება არც მეფის კარისაგან აკლდა და არც ხალხისაგან. მაგრამ მხატვარი ისე იფერებდა ამ საყოველთაო დაფასებასა და ყურადღებას, არც იმჩნევდა, ისევ ისე უბრალო და უშუალო რჩებოდა, სხვა დიდი ხელოვანებივით ზვიადობას, ან უცნაურობასა და ახირებას არ იჩენდა.

სწორედ მისი ეს სიჩუმე და მოკრძალება, დიდი შინაგანი ძალა და დაჟინებული შრომის მოუწყინარობა მოეწონა კარის ხუროთმოძღვარსა და მეფის ახალი სასახლის შემოქმედს – გოჩი მუხასძეს. თუმცა სასახლის მშენებლობა დამთავრებულიყო და კარგა ხანია, კალატოზები და დურგლები იქიდან გაკრეფილიყვნენ, გოჩი მაინც მთელ დღეს თავის ამ ულამაზეს შენობაში ტრიალებდა, შეყვარებულივით თვალგაშტერებით შეჰყურებდა თაღებს, სვეტისთავებსა და კამარებს, უთვალავ გასასვლელსა და კიბეს, მოხატული მინის მაღალ სარკმელებსა და ზომიერად გაბნეულ ჩუქურთმას.

მხატვრების მოსვლის პირველი დღიდანვე, თითქმის განუშორებლად, იქ იყო გოჩი და მათ მუშაობას თვალს ადევნებდა. როცა დემეტრემ ყველაზე მნიშვნელოვანი სამუშაო ახალგაზრდა მხატვარს ჩააბარა, გოჩი, ცოტა არ იყოს, დაეჭვდა, ოსტატისაგან მეტისმეტ ნდობად ეჩვენა და თუმცა დემეტრესათვის არაფერი უთქვამს, გულში შიში ჰქონდა, ვაითუ, ვაჩემ ვერ შესძლოს ესოდენ პასუხსაგები დავალების ღირსეულად შესრულებაო. შორიდან აკვირდებოდა ვაჩეს მუშაობას და თანდათან აზრი ეცვლებოდა. მარტო აზრი კი არა, მის შეუმჩნეველად გულიც ნელ-ნელა ამ ჭაბუკი მხატვრისაკენ იხრებოდა. ნელ-ნელა იხიბლებოდა მუხასძე მხატვრის მუშაობით, იმ ზომამდე აკვირდებოდა მისი ფუნჯისა და ყალმის მოძრაობას, მისი ფიქრისა და ოცნების ხორცშესხმას, რომ, თავისდაუნებურად, ისიც მისი შემოქმედების ფარული მონაწილე, მისი შთაგონებით შთაგონებული ხდებოდა. რაც უფრო შორს მიდიოდა მხატვარი, მით უფრო მეტად რწმუნდებოდა გოჩი მის მაღალ ნიჭსა და ჩუმ შინაგან ძალაში, დემეტრეს არჩევანის სისწორესა და თავისი პირვანდელი ეჭვის უსაფუძვლოებაში.

მუდმივად ერთად ყოფნამ და ახლო ურთიერთობამ ეს ორი შემოქმედი მართლაც ისე დაახლოვა, რომ უერთმანეთოდ გაძლება უძნელდებოდათ.

ვაჩეს მოსწონდა კეთილშობილი ვაჟკაცი, მეფის კარზე აღზრდილი მუხასძე, მისი ფართო განათლება და მაღალი გემოვნება, ღრმა აზროვნება და დიდი გაქანება.

ხელოვნებასა და შაირობაზე დაუსრულებლად შეეძლო მსჯელობა მუხასძეს. მისი შეხედულებები სითამამითა და თავისებურებით გამოირჩეოდა და თანაც, დახასიათების ზედმიწევნილობის გამო, თანამოსაუბრისათვის სავალდებულო ხდებოდა. ამას გოჩის მეტყველების ელვარება და შეგონების ნიჭიც ხელს უწყობდა. მუხასძე მარტოდენ ხუროთმოძღვარი როდი იყო, თუმცა ამ თავის უმთავრეს მოწოდებაში სწორი არ ჰყავდა. იგი, როგორც ბევრი მაშინდელი ხელოვანი, მეფის კარის გამოჩენილი მოღვაწე და ბრძოლებში სახელგანთქმული მეომარიც იყო.

მუხასძე სუფრაზედაც ისევე სანატრელი იყო, როგორც საქმეში, ომსა თუ შრომაში. მისი ენაწყლიანობა და ვაჟკაცური ბანი ქალსა და კაცს ერთნაირად ხიბლავდა და კარის ხუროთმოძღვარს დიდგვაროვანთა ოჯახების სასურველ სტუმრად ხდიდა.

ვაჩესაც მასთან ჯდომა და საუბარი ყველაფერს ერჩივნა. მუშაობას რომ მორჩებოდა, გოჩი თუ იქ იყო, აუცილებლად შინ მიიპატიჟებდა, უცოლშვილო გოჩიც ხალისით მიჰყვებოდა და ხან ვაჩესთან, ხანაც სადმე მყუდრო ფუნდუკში მეგობრული საუბრით ატარებდნენ დროს.

საღამოს ჩვეულებრივად გამოუარა გოჩიმ. ის იყო, ხელსაწყოები ჩაელაგებინა ვაჩეს და ახლა წინსაფარს იხსნიდა.

– ამ საღამოს რას აპირებ, ვაჩე?

შეეკითხა შესვლისთანავე გოჩი.

– თავათ არ ვიცი, დავიღალე, – მიუგო ვაჩემ.

– ჰოდა, მაგ დადლილობის წამალი მომივიდა, ჩემი სოფლიდან ღვინო ჩამომიტანეს; შენზე კარგთან ვისთან დავლევ! – ღიმილით უთხრა გოჩიმ და მხარზე ხელი დაადო, – წავიდეთ ჩემსას, ვაჩე, ორი მეგობარიც მეყოლება.

– წავიდეთ.

დაეთანხმა ვაჩე და მუხასძის სახლისკენ გაემართნენ.

კიბესთან დედა გამოეგება გოჩის.

– რად დაიგვიანე, შვილო, თორელი უკვე მოვიდა და გელოდება, – უსაყვედურა და სტუმარი შინ შეიპატიჟა.

თორელის გაგონებაზე ვაჩე შეკრთა, ვაითუ, ცაგოც აქ იყოსო, გაიფიქრა და გული ყელში მოადგა. სიამოვნებით დაბრუნდებოდა უკან, თავის ბედნიერ ოჯახში. აღარ უნდოდა ახალი შეხვედრით ძველი ტკივილის გახსენება, იმაზე ხელახლა ფიქრის აშლა, რასაც არც ერთისთვის აღარ ჰქონდა აზრი და რაც ზედმეტ უსიამოვნებად ეჩვენებოდა.

როგორღაც უკან ჩამორჩა.

– შემოდი... შემოდი... რა ფეხს ითრევ! – შესძახა მასპინძელმა და შინ თითქმის ძალით შეაგდო.

სარკმელთან თორელი იდგა, სტუმრის დანახვაზე მობრუნდა და მისკენ წამოვიდა.

გოჩიმ სტუმრები ერთმანეთს გააცნო.

თორელმა ხელი ჩამოართვა, ვაჩეს თვალში შეხედა პირდაპირ და ღიმილით თქვა:

– ვიცნობ, გამიგონია...

ვაჩესაც უნდოდა ეთქვა, – მეც ვიცნობ შორიდანო, მაგრამ როგორღაც არ გამოუვიდა, გაწითლდა და თავდახრილი მიესალმა მგოსანს.

სუფრა ოთხი კაცისთვის იყო გაშლილი.

გოჩიმ შეგვიანების გამო მოიბოდიშა.

– ავაგი უნდა მობრძანდეს, ივანე მხარგრძელის ძე, ცოტაც დავუცადოთ, სადაცაა გამოჩნდება.

– დავუცადოთ, რა საჩქაროა! – დაეთანხმა თორელი და შემოთავაზებულ სელზე ჩამოჯდა. უხმოდ დაჯდა ვაჩეც. თავს არ იღებდა, მაგრამ გრძნობდა, რომ თორელი მას უყურებდა. უხერხულობის დასაფარავად ვაჩე სკამზე თითებს ათამაშებდა. თორელი ვაჩეს ხელებს მისჩერებოდა, მხატვრის თითების სიგრძე და სინატიფე აოცებდა.

უხერხული დუმილი დიდხანს არ გაგრძელებულა.

ცხენის ფეხის ხმა გაისმა და ეზოში გოჩის დედამ შესძახა:

– მთავარი მობრძანდა! გოჩი, გამო, შვილო, მთავარი გვეწვია.

გოჩიმ კიბე ბავშვივით ჩაირბინა. ჭიშკარი გაალო და უკვე დაქვეითებულ მთავარს გადაეხვია...

საქართველოს უგვირგვინო მეფის ძესა და რუსუდან მეფესთან ძმასავით შეზრდილ ავაგს თავი ისე ეჭირა, თითქო დიდი ხნის მონატრებულ ტოლ-სწორებს შეხვედროდეს: გოჩი შინაურულად მოიკითხა და კიბეზე შეგებებული

თორელიც ძმურად გადაჰკოცნა. ტოლები კი იყვნენ, მაგრამ სამეფოს პირველი დიდებულის ძესა და ამ ღარიბ კარისკაცებს შორის ძალიან დიდი მანძილი იყო და ვაჩეც ამიტომ მისჩერებოდა მხიარულსა და გულლალ მხარგრძელს ასე გაოცებული.

მუხასძის სტუმართაგან ყველაზე უგვარო ყველაზე გვიან მიესალმა ათაბაგის ძეს. გოჩიმ მისი ვინაობა მოახსენა და მხარგრძელი ცნობისმოყვარე თვალით დააცქერდა მხატვარს.

– გამიგონია შენი სახელი, ჭაბუკო, ხელოვნებას გიქებენ და თუ შენი და გოჩის ნებართვა იქნება, სიამოვნებით ვნახავდი შენს მხატვრობას.

– არც მე მინახავს, მთავარო, და თუ მიახლებთ, მეც არ დავზარდებოდი მეფის ახალი პალატების ნახვას, – ჩაერია თორელი.

– როცა გენებოთ, თუნდაც ხვალვე... ძალიან მასიამოვნებთ, – გაიხარა ვაჩემ.

– ხვალ არა და, ამ დღეებში თავათ მეფე მობრძანდება პალატების სანახავად. სულერთია, მეფის ხლება მაინც არ აცდებათ და გინდათ თუ არა, ჩემს შენობასაც ნახავთ და ვაჩეს მხატვრობასაც, – თქვა გოჩიმ და სტუმრები სუფრისკენ მიიწვია.

სუფრის თავში მხარგრძელი დაბრძანდა. აქეთ-იქით კარის მგოსანი და ხუროთმოძღვარი მოისვა.

ვაჩე თორელის პირისპირ აღმოჩნდა.

– ოო, შენ გადმომკარი კიდეც, გოჩი. მართალია, საყვედური მეკუთვნის შენგან, რომ ამდენ ხანს ვერ დავათვალთვალე შენი ახალი სასახლე. ყველა ხელალებით აქებს და გარედან მეც ვხედავ, რა დიდებულები არი. აქამდე შიგნითაც უნდა მენახა, მაგრამ რა ვქნა, ეს მეფის კარიო, ეს დიდებულებთან მისვლა-მოსვლაო, და ხომ იცით, საწყალი მგოსნის ვალი, ყველას უნდა ეახლოს და ყველას უნდა აამოს. ამას კიდევ ოჯახი დაემატა, რაც ბიჭი გამიჩნდა, ლექსის დასაწერადაც აღარ მცალია, სულ იმასთან თამაშს ვუნდები.

გოჩის დედამ კერძი შემოიტანა, თორელის უკანასკნელ სიტყვებს მოჰკრა ყური, თეფში დადო და საუბარში ჩაერია.

– ამბობენ, პირწავარდნილი დედააო, ერთი ვერა ვნახე, ახლა დიდი იქნება.

– დიდია, მესამე წელში გადავიდა. რაც დედამისი გინახავთ, სულ ის არი, მთლად ცაგოს ასლია.

– კარგი იქნება, თუ ცაგოსა ჰგავს, ვენაცვალე, – შესცინა დედამ თავის წარმოდგენაში თურმანის ბალღს და სუფრას ისევ მოსცილდა.

ვაჩე თავჩაღუნული იჯდა და სულგანაბული უსმენდა საუბარს.

გოჩიმ დიდი სასმისი გაუვსო მხარგრძელს, ავაგი წამოდგა და მეფისა და სამშობლოს სადღეგრძელო შესვა. ალავერდს თურმანთან გადავიდა.

– ახლა კი მთელი გულით გვმართებს ჩვენი სამშობლოს სადღეგრძელო, – დასძინა ავაგმა უკვე ნათქვამს, – ეტყობა, ომი აღარ აცდება ჩვენს ქვეყანას და ძნელი ომიც გვექნება.

– ვითომ ძნელი იქნება? – გაიკვირვა თორელმა და სიცილით დაუმატა, – ხვარაზმის ლტოლვილმა სულტანმა, ჯალალედინმა, საქართველოს რა უნდა

დააკლოს, ქვეყანა მაგას აღარა აქვს და სამყოფელი. თავის სამკვიდროდან აყრილი, აგერ, რა ხანია, თავქუდმოგლეჯილი მორბის, რომ მონგოლებს გადაურჩეს და სადმე დაემალოს.

– ეგ რომელ ჯალალედინზე ამბობთ? – იკითხა ვაჩემ.

– ხვარაზმელ სულტანზე, დიდი მოჰამედის შვილზე მოგახსენებთ, – მიუგო თორელმა, – ეგ უბედური იმ მონგოლებს გამოექცა, რომელთაც ჩვენ, აგერ, ოთხიოდე წლის წინათ კუდიტ ქვა ვასროლინეთ. თავისი ქვეყანა მიატოვა და მთელს საისლამოში ფეხი ვერსად მოიკიდა, მონგოლ მდევერებს ერთხელ ძლიერად ვერსად შეებრძოლა, დედაწულიანა ილტვის აყრილი, ხან აქეთ აწყდება და ხან იქით. ძაღლებდადევნებულ ნადირსავით, მონგოლები ფეხდაფეხ მოსდევენ. იმოდენა ქვეყანა ისე ჩააბარა მტერს, ერთი სახელოვანი ომიც ვერ გადაიხადა.

– სულ ეგრე არ უნდა იყოს, – შეჰკადრა ვაჩემ. – ხლათში ბევრს ლაპარაკობდნენ ჯალალედინზე, დიდად გულოვანსა და უშიშარ ვაჟკაცს ამბობენ, მონგოლთა ლაშქარს არა ერთხელ შეება და ბევრჯერაც სძლიაო. იმ წყეულთაგან თუ ვინმე იხსნის სამაჰმადიანოს, მხოლოდ ჯალალედინიო.

– მერე როდისდა, შე კაცო. მთელი ხვარაზმი და ნახევარ სპარსეთზე მეტი მტერს დაუტოვა და თუ ვაჟკაცი იყო, თავი იქ უნდა გამოეჩინა. ახლა მაგ უბედურს აღარც ჯარი ჰყავს და აღარც საჭურჭლე ახადია, რომ ძლიერი მტრის წინააღმდეგობა განაგრძოს. გაუგონია, საქართველო მდიდარი ქვეყანააო, ალბათ, ფიქრობს, ერთი ხელის დაკვრით დავიპყრობ, ოქრო-ვერცხლს ვიშოვი, სულს მოვითქვამ და მთავარ მტერს მერე მივუბრუნდებიო, მაგრამ სტყუვდება საცოდავი. რაც ჩვენგან წაიღოს, ხვარაზმში დაიკვებოს, ისეთ დღეს დავაყრით, მონგოლებთან ომი ლხინად ეჩვენოს!

– ღმერთმა ქნას, მაგრამ საქმე ეგრე იოლად არ უნდა იყოს, ავავ ბატონო, – მძიმედ თქვა მუხასძემ, – ჯალალედინს მთელი საისლამო შეუკრებია და საქართველოზე ურიცხვი ლაშქრით მოდის თურმე.

– სადღა აქვს საისლამო! ირანი თითქმის ხელიდან წაუვიდა და ერაყიც მისი მორჩილებიდან გამოვიდა. ნადავლს დახარბებულ, მაწანწალა თურქმანებს შეჰყრიდა, ალბათ, და იმათ იმედად თუ არი, კაი დღე დაადგება.

– ოთხასი ათასზე მეტი ლაშქრით მოდისო, სარწმუნოდ ამბობენ, – ხმადაბლა თქვა მუხასძემ.

– აჰ, ეგ შეუძლებელია! – შეჰყვირა ავავმა, – მაგოდენა ლაშქარს ახლა თავისი სამკვიდროდან აბურაგანაკრული ჯალალედინი კი არა, ბაღდადის ხალიფი ვერ შეჰკრებს, ეგ რიცხვი გაზვიადებულია და, ალბათ, ხვარაზმელების მსტოვრები ავრცელებენ, რომ ქართველთა შორის შიში დასთესონ, მაგრამ მთავარი ეგ კი არ არი, ცუდ დროს გვიხდება ომი, მეფის კარი არეულია და ქვეყნის მეთაურებს ერთიმეორეში უთანხმოება აქვთ.

– მართალია, შვილო? მთელი ქვეყანა ლაპარაკობს, მეფე-დედოფალს უსიამოვნება აქვთო, – ჩაერია საუბარში გოჩის დედა.

გოჩი მუხასძე ამ სიტყვებზე უცებ წამოწითლდა, ჭამას თავი ანება და თავი ჩალუნა.

– მართალია, ეს ერთი ხანია, უმძრახად არიან გვირგვინოსნები. რუსუდან მეფეს მოლასედინის მოშორება უნდა, მამაჩემი და ზოგიერთი დიდი ვაჭირი თითქმის დაიყოლია, მაგრამ თურმანის ბიძაშვილები, შალვა და ივანე არ ეთანხმებიან, მოლასედინის გაშვება არზრუმის სულტანს მტრად გადაგვიკიდებს, სამხრეთ საზღვარზე მოყვრებს მოსისხლედ გაგვიხდის და ქვეყნის შიგნითაც ბევრ უსიამოვნებას შეგვამთხვევსო.

– მემკვიდრის მამას რატომ იშორებს ღვთივგვირგვინოსანი დედოფალი, აკი თავათ გამოირჩია თანამეცხედრედ და მეფედ?! სახიერად კარგი ვაჟკაცია და ზნითა და ქვევითაც კეთილი. ქრისტეს სჯული მიიღო და ქართველები თავისიანებით შეიტკბო და შეიყვარა.

– ქართულიც მშვენიერად ისწავლა და საქართველო თავის სამშობლოზე მეტად უყვარს, – დასძინა თურმანმა.

– ეგ მაშინ გამოჩნდება, ღმერთმა ნუ ქნას და, ჩვენს ქვეყანას რომ გაუჭირდეს. სპარსელებსა და თურქებს ჩვენ მანამდე ვუყვარვართ, სანამ ჩვენი ეშინიათ, მოლასედინი რუსუდანის ქმრობის ღირსი არ არი და კარგს იზამენ, თუ დროზე მოაშორებენ თავიდან – გაცხარებით თქვა მუხასძემ და სახე უფრო წამოენთო.

ავაგმა შეკავებული ღიმილით გახედა გოჩის. გაახსენდა რუსუდანისადმი მისი უიმედო მიჯნურობის ამბავი. როცა რუსუდანს შირვანშაზე ათხოვებდნენ, რუსუდანის ამაღლაში იყო მაშინ გოჩი მუხასძე. ლაშამ ბაგავანში მიიყვანა და საქორწინოდ ამზადებდა შირვანის სასძლოს. რუსუდანი თავს იკლავდა, არ უნდოდა მასზე ბევრად უფროსის, მამის ტოლი კაცის ქმრობა, რომელიც გარდა იმისა, რომ სახიერებით არ გამოირჩეოდა, თავისი სისასტიკითაც ცნობილი იყო, რის გამოც საკუთარი შვილებიც კი მტრად ჰყავდა გადაკიდებული. ტიროდა რუსუდანი, არ უნდოდა საქართველოდან გადახვეწა და ურჯულო ქმრის თანამეცხედრობა, მაგრამ მეფისა და დარბაზის წინააღმდეგობა არ შეეძლო. ხსნას აღარსაიდან ელოდა რუსუდანი და, უბედურ იღბალს შერიგებული, უცდიდა ქორწინების დღესა და სამულველი სიძის მოსვლას. ამ მოლოდინსა და სასოწარკვეთის ჟამს ეახლა რუსუდანს მისი ერთგული რაინდი, კარის ხუროთმოძღვარი გოჩი მუხასძე, მეფის დის ფერხთქვემ განერთხო, ეთაყვანა და პატიება სთხოვა კადნიერებისათვის. უზომოდ და უიმედოდ შეყვარებულმა რაინდმა გაპარვა შესთავაზა შირვანშას სასძლოს, ცხენები მზადა მყავს და საითაც გინდა, ამაღამ იქით გაგაქროლებ, ერთხანს მთებში დაიმალები, ვიდრე ქორწილის პირი დაიშლება და მეფეს გული მოუბრუნდება, მერე ლაშა თვითონ მოგძებნის და მოყვარული ძმა ყოველივეს გაპატიებსო. რუსუდანი კინაღამ დაჰყვა ესოდენ მაცდუნებელსა და მიმზიდველ წინადადებას, მაგრამ, როგორც კი წამიერ ცდუნებას სძლია, მაშინვე წარმოიდგინა, რა დიდი სირცხვილი და უსიამოვნება მიადგებოდა მეფესა და მთელ ქვეყანას. გოჩი მუხასძეს მაღლი გადაუხადა ასეთი

თავდადებული სამსახურის შეთავაზებისათვის, მეფის უიღბლო დის ბედზე ზრუნვისა და შეწუხებისათვის და მისთვის თავგანწირული რაინდი უარით გაისტუმრა.

თვალცრემლიანი, ფეხებმოცელილივით გამოვიდა თურმე მუხასძე რუსუდანის სამყოფელიდან. მეფეთა პალატებში კედლებსაც თვალი და ყური აქვთ. ხელმწიფემ ყოველივე შეიტყო და არამკითხე ხუროთმოძღვარი საპყრობილეში შეაგდეს. დღე-დღეზე შირვანშა უნდა მოსულიყო და ვინ იცის, იქნებ ვერც კი შეეტყო რუსუდანს მისთვის ეგრე თავგადადებული ვაჟკაცის პატიმრობა, განგებას სხვაგვარად რომ არ მოეწყო საქმე: ყველასათვის მოულოდნელად, ლაშა გარდაიცვალა და რუსუდანისა და მუხასძის ბედიც სხვაგვარად შეტრიალდა.

ლაშას უეცარი სიკვდილი იდუმალეობით იყო მოცული და ბევრს ეჭვიც აღეძრა საღ-სალამათი ვაჟკაცის მოულოდნელად დაღუპვის გამო. მეფის კარზე ისევ განხეთქილება ჩამოვარდა, ახალციხელები, ვარამ გაგელი და ბაკურციხელი ლაშას უკანონო ძისა და მცირეწლოვანი მემკვიდრის მეფედ კურთხევას მოითხოვდნენ, ივანე მხარგრძელი და დანარჩენი დიდებულები – რუსუდანის ტახტზე აყვანასა და გამეფებას. მხარგრძელისა და ახალციხელის ასეთ დაპირისპირებას ეგებ გამწვავება და სამეფოსათვის დიდი ვნებაც მოეტანა, რომ თავათ რუსუდანს არ გამოეჩინა დიდი გონიერება და წინდახედულება: ახალციხელები სასახლეში მიიხმო, მისი ძმისა და დედისათვის ერთგული სამსახურის გამო დიდი მადლი შესწირა, შეჰფიცა, რომ ტახტზე მხოლოდ სამეფოს სიმშვიდისა და წესრიგის შენარჩუნებისათვის ავიდოდა და როგორც კი ლაშას ვაჟი სრულწლოვანი გახდებოდა, ტახტს მას დაულოცავდა.

სხვა არჩევანი მაინც არ იყო და ახალციხელს რა ძალა ჰქონდა – რუსუდანის წინაშე დაიჩოქა და მეფეთა ღირსად ეთაყვანა. უკვე გამეფებულმა რუსუდანმა ახალციხელის სამსახური არ დაივიწყა და, ვითომ სხვათა შორის, სულ სხვა მიზეზის გამო, შალვას დვინი მიუბოძა. შალვას სხვა მომხრეებიც არ დაუტოვებია რუსუდანს უყურადღებოდ, ყველას ღირსეული მიუზღო, ყველა დააშოშმინა და სამეფოს ცხოვრებაც ჩვეულებრივ კალაპოტში ჩადგა.

ახალციხელისათვის დვინის ბოძებამ კიდევ უფრო დამაბა სამეფოს ორი უპირველესი დიდებულის ისედაც დამაბული ურთიერთობა. დვინი მხარგრძელის მამულებს ემიჯნებოდა და ივანე მის შემოერთებაზე დიდი ხნიდან ოცნებობდა. მხარგრძელი მეფის სურვილს წინ ვერ აღუდგა, მაგრამ ახალციხელის შური და მტრობა კიდევ უფრო მოემატა.

მას შემდეგ, რაც მუხასძე საპყრობილიდან გამოიყვანეს და კარის ხუროთმოძღვრობა უბოძეს, რუსუდანისადმი მისი ფარული ტრფობის ამბავი გახმაურდა. არც მუხასძე და არც თავათ რუსუდანი ამის გამო უხერხულობას არ გრძნობდნენ, რადგან ქართველ მოყმეთა და რაინდთაგან ნახევარი მაინც ულამაზეს დედოფალზე იყო ფარულად თუ ცხადად გამიჯნურებული.

მუხასძეს ოცნებაც კი არ შეეძლო დედოფლის მეტ ყურადღებაზე, იცოდა, რომ ვერასოდეს ვერ გახდებოდა რუსუდანის მხრივ საპასუხო სიყვარულის ღირსი. იქნებ ამიტომაც უფრო მეტად შურდა რუსუდანის ქმრის მოლასედიანის ბედი და მისდამი რაღაც არაადამიანური სიძულვილით იყო გამსჭვალული, თითქო ეს გადამთიელი და უფლისწული ყოფილიყოს მისი გამწარებისა და უბედურების მიზეზი.

ავაგმა კარგად იცოდა მუხასძის გულისნადები. გოჩის უმიზეზოდ წამოწითლებამ და გაცხარებამ ღიმილი მოჰგვარა, მეფე-დედოფალზე ლაპარაკის გაგრძელება უხერხულად მიიჩნია და საუბარი ისევ ომის მოლოდინზე განაგრძო.

– ადარბადაგანი რომ დაიპყრო ჯალალედინმა, ჩვენი მოსაზღვრე ემირები საჩივრით მისდგომიან, ქართველებისაგან მოსვენება აღარა გვაქვს, ლამის მაჰმადის რჯულზე ხელი აგვადებინონო. ჯალალედინს მიზგითში ყურანზე დაუფიცია, ურჯულო ქართველების ჯავრს ამოვიყრი, მართლმორწმუნე მაჰმადიანების შეწუხებას ათმაგად ვაზღვევინებო.

– იმ უბედურს რომ მუსულმანთა ჯავრი აწუხებდეს და სამაგიეროს გადახდის ძალა შესწევდეს, თავისი ხალხის შურს იძიებდა და მონგოლებს მიაგებდა სამაგიეროს იმ ენით უთქმელი ტანჯვისათვის, რასაც ჩინგიზ-ხანის ურდოები აყენებენ დაპყრობილ ხალხებს. ჯალალედინი თვალთმაქცობს, მას ჩვენი ქვეყნის სიმდიდრის ჯავრი უფრო აქვს, ვიდრე ადარბადაგანელი მოღობისა და ყადების. მაგრამ, რაც მან ჩვენგან წაიღოს, თავის მოღობსა და ყადებს გაუყოს!

– ჯალალედინი საქართველოს საზღვრებთან არი უკვე, დღე-დღეზე შეიძლება დაიძრას და თბილისისაკენ წამოვიდეს.

– მერე ჩვენები რას შვრებიან? დიდ ომს დიდი მომზადება უნდა.

– ჩვენმა სარდლობამ ხვარაზმელი სულტნის ყოველი ნაბიჯი იცის, ადარბადაგანში ჩვენი ხალხი გვყავს და ყოველივეს წვლილად გვატყობინებენ. უკვე დიდი ლაშქარი იკრიბება, ამბობენ, ოთხმოცი ათას კაცამდე იქნება, ლეკიან-ჯიქებიანაო.

– ნეტავ სად მოხდება ბრძოლა, მტერს, ალბათ, თბილისიდან სადმე შორს დახვდებიან.

– თბილისამდე ვინ მოუშვებს, სადმე საზღვართანვე შევებმით, ალბათ, მარჯვე და ძნელ მისადგომ ალაგას. ჩვენს სახელოვან სარდლებს – მხარგრძელსა და ახალციხელს სამაგისო გამოცდილება კი აქვთ, საქართველოს სამხრეთი საზღვრები ხელისგულივით იციან.

– ამ ომში, ალბათ, იოლად გავიმარჯვებთ, მაგრამ ჩვენი ქვეყნის მეთაურებს უფრო დიდი და შორეული ლაშქრობა აქვთ განზრახული.

– ეგ რომელ ლაშქრობაზე ბრძანებ, მთავარო?

– ათაბაგ უზბეგის სამფლობელო აირია და დაიშალა. ადარბადაგანი ჩვენ უნდა დავიპყროთ, ქართველებმა, გადამთიელ ჯალალედინს თავრეზზე რა ხელი აქვს. ხვარაზმელი სულტანი იქიდან უნდა გავდევნოთ და მთელი

ადარბადაგანი საქართველოს უნდა შემოვუერთოთ. თავრეხს რომ დავიპყრობთ, შემდეგ ბაღდადისკენ გზა გაგვეხსნება. ირანი და ერაყი არეულია, პატრონი არც ერთს არა ჰყავს და ბაღდადის აღება არც ისე გაგვიჭირდება. თუ ღმერთმა გვიწინამძღვრა და ხელი წარგვიმართა, ხალიფს გადავაგდებთ და მის ადგილას ქრისტეს ეკლესიის მეთაურს დავსვამთ. იერუსალიმს ურჯულოებისაგან გავათავისუფლებთ და საქართველოს ძლიერებას მთელს აღმოსავლეთსა და დასავლეთზე გავავრცელებთ.

აღტაცებული ავაგი ისეთი დაჯერებით ლაპარაკობდა, თითქო თავრეხიც აღებული ჰქონოდა და ხალიფიც დამარცხებული ჰყავდა. ვაჩეს ჭამისთვის თავი გაენებებინა, ავაგის აღფრთოვანება გადადებოდა და თვალეში აღტაცებით შეჩერებოდა.

– შევძლებთ კი ეგრე შორს ლაშქრობასა და მაგოდენა ქვეყნების დაპყრობას? – იკითხა თორელმა.

– სიშორე რა დაბრკოლებაა! ალექსანდრე მაკედონელმა ინდოეთამდე ილაშქრა და თითქმის მთელი აღმოსავლეთი დაიპყრო. რაღა მაკედონელი, ბიძაჩემმა ზაქარიამ და მამაჩემმა ივანემ ხორასანი დალაშქრეს და ყაზვინი და რომგური აიღეს. ბაღდადსაც მალე ავიღებდით, მაგრამ მონგოლების მოსვლამ და ლაშას სიკვდილმა ჩაშალა სამზადისი. ლაშას ოცნება ჩვენ უნდა აღვასრულოთ. ახლა აღმოსავლეთში ჩვენი წინააღმდეგომი აღარავინ არი, ასე ძლიერი საქართველო არასოდეს ყოფილა და არც ჩვენი მტრები ყოფილან ასე სუსტები არასოდეს.

ავაგ მხარგრძელი, თორელისა არ იყოს, კარგი თანამოსაუბრე აღმოჩნდა. პურ-ღვინოს ტკბილად შეექცეოდნენ, ქვეყნის ამბებს ჰყვებოდნენ ხუმრობითა და ხალისით, ლაღად და ენაწყლიანად.

ვაჩემ პირველი დანახვისთანავე შენიშნა, რომ ავაგი ძალიან ჰგავდა თავის გვირგვინოსან დას, ხლათის დედოფალ თამთას. ეს მსგავსება მარტო გარეგნობით როდი განისაზღვრებოდა. ავაგიც, თამთასავით უშუალო და მიმზიდველი, უბრალო და მომხიბვლელი იყო. მთავარმა მორიდებული ვაჩეც სხვებსავით ძალდაუტანებლად საუბრისათვის განაწყო. დიდი დიდებულის წინაშე კრთომა დაივიწყა მხატვარმა, ღვინოს გაუთამამდა და ბაასში ჩაერია.

– ეს ქართველთა ძლიერებას გაუმარჯოს, ასე მტერი დაეცალოს! – თქვა ავაგმა, სასმისი მოიყუდა, გამოცალა და გადმოაპირქვა, იმის საჩვენებლად, რომ შიგ წვეთი აღარ იყო დარჩენილი.

შუაღამე მოახლოებული იყო, სუფრიდან რომ წამოდგნენ. ცხელოდა, სული ეხუთებოდათ და ქალაქში გავლა მოუნდათ. თბილისს მშვიდად ეძინა, კაცის ჭაჭანება არსად იყო. აღმართს აჰყვნი და თაბორის მთაზე ავიდნენ.

კოჯრის ნიავის საამო ქროლვამ სული ჩაუბრუნათ. თბილისი ხელისგულივით მოჩანდა: მტკვრის ორივე მხარეს გრძლად გაწოლილიყო

უშველებელი ქალაქი, ვიწრო ხეობაში ვეღარ დატეულიყო და მთის ფერდობებს შეჰფენოდა.

ეძინა მთვარის შუქით ოდნავ განათებულ თბილისს. აქა-იქა ბჟუტავდა სინათლე, მხოლოდ მეტეხის კლდეზე ამართული ახალი სასახლიდან გამოდიოდა შუქი. ჩაბნელებულ ქალაქში ცადატყორცნილი სასახლე უზარმაზარი ხომალდით გაჩახჩახებულიყო. ძალაუნებურად ყველას იქით გაექცა თვალი და მუხასძემ ხმადაბლა თქვა:

– რუსუდან მეფე ახალ პალატებში გადასვლას იჩქარის. სამუშაო ცოტადა დარჩა და ხელოსნები ღამეებს სტეხენ, რომ დროზე მორჩნენ.

– თბილისში მსგავსი ჯერ არა აშენებულა რა, – აღტაცებით თქვა თორელმა, – ვეჭვობ, რომ სხვა სატახტოებში იყოს უკეთესი სასახლეები.

– სხვაგან ბევრია, თურმან, მაგრამ სხვაგან სხვაგვარია, ისინი უფრო დიდები და ბრწყინვალენი არიან, მაგრამ ჩემი უფრო მოხდენილია და ჰაეროვანი. ჩვენი მცხეთის ჯვარი სათამაშოსა ჰგავს აია სოფის ტაძართან შედარებით, მაგრამ მისი ერთი შეხედვა სულ მავიწყებს ყველა ქვეყნის უდიდეს ტაძრებსა და სალოცავებს.

– მართალი ხარ, გოჩი. როგორც ჯვარი უხდება მცხეთის მაღალ მთას, ისე ეს სასახლე ამშვენებს მეტეხის კლდეს და საოცარია, რომ აქამდე არ აუშენებიათ ამ კლდეზე ქართველებს მსგავსი შენობა. თითქო კლდე თავის ბუნებრივ დაბოლოებას თხოულობდა, მთებში ჩავარდნილი ქალაქი – თავის სანიშნოსა და უმაღლეს წერტილს, – დაუმოწმა ავაგმა.

ქვაზე ჩამოსხდნენ ოთხივენი. აქამდე მდუმარე ვაჩემ გაბრწყინებული თვალები მოავლო თბილისს და აღტაცებით თქვა:

– აბა დააცქერდით, ქალაქიც ნახატსა ჰგავს, უზარმაზარ სურათს. მის საზღვრებში ყველაფერს თავისი ადგილი და ფერი აქვს...

ერთხანს ოთხივენი სდუმდნენ, თავთავის ფიქრში წასულნი და ღამეული სილამაზით მოჯადოებულნი.

– ეტყობა, დავიღალე, – დაარღვია სიჩუმე გოჩიმ, – ამ ბოლო დროს ცუდი ძილი დამჩემდა და ავ სიზმრებს ვხედავ. ხან, ვითომ მიწა იძვრის და ეს ჩემი სასახლე ლოდებად ჩამოდის დაშლილი, ხან მტკვარი დიდდება და სასახლის სახურავზე გადადის, ხანაც ქალაქი იწვის და მეფის ახალ პალატებს ნთქავს...

– ავი სიზმრები ბევრმა ფიქრმა და მოუსვენრობამ იცის, გოჩი.

– რა ვიცი, ზოგჯერ ისე შეშფოთებულს გამეღვიძება ხოლმე, შეშინებული სარკმელთან მივრბივარ, რომ დავრწმუნდე, კიდევ დგას თუ არა ჩემი შენობა; ზოგჯერ, დილით, ფეხზე წამომდგარს, იქით გახედვისა მეშინია, ვაითუ, მართლა აღარ იდგეს-მეთქი მეფის ახალი სასახლე თავის ადგილას...

საქართველოს სარდლობა წინდახედულად მოქმედებდა. მთელ საქართველოდან ლაშქარი ჩუმად იკრიბებოდა და თბილისზე გაუვლელად სამხრეთისაკენ მიემართებოდა. საიდუმლო მაინც გამჟღავნდა და დიდი და პატარა მოსალოდნელ ომზე ლაპარაკობდა.

ქვეყნის მეთაურებმა უამრავი მსტოვრისაგან კარგად იცოდნენ ჯალალედინის ყოველი ნაბიჯი. მტერი დიდი ლაშქრით მოდიოდა და ომიც ძლიერი იყო მოსალოდნელი. მომავალი ომისათვის გაფაციცებით ემზადებოდნენ, მაგრამ თან გარეგნული სიმშვიდის შენარჩუნებასაც ცდილობდნენ.

რუსუდან მეფე საგანგებოდ მართავდა ლხინსა და მეჯლისებს, ქალაქში ხშირად გამოდიოდა ბრწყინვალე ამაღლის თანხლებით, რომ მოსახლეობის თვალში მოახლოებული ომის შიში გაეფანტა და სახელმწიფოს გარეგნული უზრუნველობა ეჩვენებინა.

დედოფალმა ახალი პალატების ნახვა მოისურვა და დიდი ამალით ესტუმრა. გვირგვინოსნის მოსვლას არავინ ელოდა, ოსტატებს პირდაპირ მუშაობაზე წაადგნენ თავს.

ვაჩეს მიერ მოხატულ დარბაზებში შემოვიდნენ. წინ დედოფალი მოუძლოდა. როგორც კი ფეხი შემოდგა, შეჩერდა. ბროლის იატაკის დანახვაზე შეეყოყმანდა. დარბაზის შუაში ორი შადრევანი იყო და დედოფალს მოეჩვენა, რომ სასახლეში ხელოვნური ტბა გაეკეთებინათ. ალბათ, ფეხს წყალზე ვადგამო, გაიფიქრა, ბავშვური მიამიტობით კაბის კალთა აიწია და ფეხის წვერებზე გააბიჯა. იატაკი რომ ფეხქვეშ მაგარი დახვდა, მიხვდა თავის შეცდომას. ამაღას მოხედა, გაღიმებულნი და გაოცებულნი შეჰყურებდნენ.

– ეს რა ოინი მოგიგონიათ, ხუროთმოძღვარო?! – შეკავებული ღიმილით მიმართა მუხასძეს.

– ბროლის იატაკი გახლავთ, დედოფალო! – თავდახრით მოახსენა ხუროთმოძღვარმა.

– მე კი ასე მეგონა, ტბაზე ვადგამდი ფეხს, ჰა... ჰა... ჰა... – გადაიკისკისა რუსუდანმა.

დედოფლის მხლებელ დიდებულებსაც კაბის კალთები აეწიათ და ახლა ისინიც გაოცებულნი იცინოდნენ.

ვაჩეს სამუშაო დაემთავრებინა. მხოლოდ იმ კედელსდა აკლდა დასრულება, რომელზედაც სასახლისაკენ ზეიმით მომავალნი, ახლად მეფედ ნაკურთხი რუსუდანი და მისი ამაღა ჰყავდა გამოხატული. ამ კედელზედაც ყველაფერი მოთავებული იყო, მხოლოდ იმ კუთხეს აკლდა გამოკვეთა და დამუშავება, სადაც თორელისკენ სახემიბრუნებული ცაგო უნდა ყოფილიყო. ვაჩე ნახატის ამ ნაწილის დასრულებას რატომღაც აგვიანებდა და ბოლოსთვის ინახავდა.

დედოფალმა და დიდებულებმა ისე გაიარეს ვაჩეს დარბაზი, მხატვრის ნამუშევრის დაუსრულებლობისათვის ყურადღებაც არ მიუქცევიათ. ფრიად მოუწონეს, მაღლი გადაუხადეს და ათასგვარი ჯილდოც აღუთქვეს.

რუსუდანი ჩიტივით შემოფრინდა და გაფრინდა დარბაზიდან. დიდებულებიც უკან მიჰყვნენ, მხოლოდ თორელი შეჩერდა თავისი გამოხატულების წინ, მერე მზერა სახედართან მდგარ გოგონას დაუმთავრებელ სახეზე გადაიტანა. დიდხანს უცქირა, მერე უცებ შემოტრიალდა, მის უკან

მდგარ ვაჩეს ხელი მაგრად ჩამოართვა, გადაეხვია და უსიტყვოდ, სწრაფად გავიდა დარბაზიდან.

ორი დღის შემდეგ ქართველთა ლაშქრის კიდევ ერთი რაზმი გავიდა თბილისიდან. გოჩი და ვაჩე ქალაქში რჩებოდნენ სასახლის სამუშაოების დასამთავრებლად. ცხენზე ამხედრებული, ომში მიმავალი თურმანი თბილისს სტოვებდა. გარეუბანს რომ გასცდა, რატომღაც მუხასძის საშინელი სიზმარი გაახსენდა, – ვაითუ, დაბრუნებულს მეფის სასახლე იქ აღარ დამხვდესო, – გაიფიქრა, ელდანაცემივით მოიხედა და უმაღვე დამშვიდდა.

მეტეხის ტინზე ამაყად და მშვიდად იდგა ცადატყორცნილი, სვეტებითა და ბანებით დამშვენებული, თვალშეუდგამი შენობა. – ალბათ, უკუნითი უკუნისამდე ასე მკვიდრად და ლამაზად იდგება ეს შენობაც, ისე, როგორც ჩემი ქვეყანაო, – გაიფიქრა თორელმა და მშვიდად განაგრძო გზა.

თავი მესამე

«ამ გამარჯვებას ჰქონდა უდიდესი მნიშვნელობა მუსულმანური ქვეყნებისა და მუსულმანთათვის, რადგანაც ქართველები მანამდე სულ სჯაბნიდნენ მათ და თავიანთი ნება-სურვილის მიხედვით ექცეოდნენ. ისინი, ადარბადაგანის რომელ ნაწილსაც სურდათ, შეესოდნენ ხოლმე და არავის მხრით წინააღმდეგობას არ ხვდებოდნენ... რუქნადინმა ვერ შესძლო მათთვის ხელი შეეშალა... მართალია, მან შეკრიბა ჯარი 1125 წელს და ქართველთა წინააღმდეგ გაილაშქრა, როცა არჰეში აიღეს, მაგრამ ვერაფერს გახდა. მის შემდეგ მისი ძმა, სულტანი მუსუდი მეფობდა, მაგრამ ვერც იმან გააწყო ვერაფერი. უფრო გვიან ილდეგიზმა... გაილაშქრა ქართველებზე და თუმცა დიდძალი ჯარი ჰყავდა, გაქცევით ძლივს უშველა თავს. იგივე მდგომარეობა იყო მისი შვილის, ფაჰლავანის დროს. მაშინ, როცა ამ ხელმწიფეთა მეფობის დროს მათი ქვეყანა მდიდარი იყო ფულითა და ხალხით, ისინი ქართველთა გამკლავებაზე ვერც კი ოცნებობდნენ, სანამ არ მოეველინათ ეს სულტანი, რომლის დროსაც ქვეყანა დანგრეული, მოოხრებული და გადატაკებული იყო ჯერ ქართველებისა და შემდეგ თათართა შემოსევებით...»

იბნ ალ ასირი

«ერთი ერის ბედნიერება გარდუვლად მეორის უბედურებაზე შენდება»...

მოჰამედ ენ ნესევი

საქართველო რომ ამ ყოფაში იყო, ქვეყნის სამხრეთით დიდი ამბები ხდებოდა. მონგოლთაგან ლტოლვილმა ხვარაზმშას შვილმა სულტანმა ჯალალედინმა ირანი განვლო და ადარბადაგანში შემოვიდა. ჯალალედინი ირანსა და ადარბადაგანში გამაგრებას, დიდი სამხედრო ძალის შეკრებასა და მონგოლთა წინააღმდეგ გადამწყვეტი ბრძოლის გამართვას აპირებდა.

ადარბადაგანი განთქმული იყო თავისი სიმდიდრით და სულტანს იმედი ჰქონდა, იქ დიდძალ ოქროსა და საქონელს შეჰკრებდა. მაგრამ ადარბადაგანში შემოსვლისთანავე იმედი გაუცრუვდა. ქვეყნის მფლობელი უზბეგი, ჯალალედინის გამოჩენისთანავე, თავრეზიდან განძაში გადავიდა. სულტანმა ელჩები გაუგზავნა უზბეგს. ჯალალედინი ათაბაგს ავალეზდა: ამიერიდან ადარბადაგანზე სულტნის უზენაესობა ეცნო, მიზგიტებში მისი ხოტბა დაეწესებინა და ფული სულტნის სახელით მოეჭრა. ამას გარდა, ჯალალედინი უზბეგისაგან მის სალაროში ყოველწლიურად გარკვეული რაოდენობის ხარაჯის შეტანას მოითხოვდა.

ათაბაგმა უზბეგმა ხვარაზმელი სულტნის მფარველობა ცნო, ძვირფასი ძღვენი გაუგზავნა და მისი ყველა პირობა მიიღო, უმთავრესის გარდა – ათაბაგი ხარაჯაზე უარს ამბობდა იმ მიზეზით, რომ მისი ქვეყანა აოხრებული იყო და სალარო დაცარიელებული – ქართველებთან მუდმივი ბრძოლების გამო.

ჯალალედინს პირველი წყენა მიაყენეს და ეს წყენა ქართველთა მძლავრობით იყო დასაბუთებული.

სულტანს ადრეც გაეგონა საქართველოს სახელმწიფოს სახელი, მაგრამ მამამისის უნაპირო სამფლობელოსა და იმის იქითაც სხვაც უამრავი სამეფო იყო, რომელთანაც სულტანს საქმე არასოდეს ექნებოდა, ბედს რომ აქ არ მოეგდო, ხვარაზმელთა უზარმაზარი სამფლობელოს კიდეში და უცნობი ქართველების პირისპირ არ დაეყენებინა.

ადარბადაგანში შემოსულ სულტანს ქალაქ მარადის მცხოვრებთაგან მოციქულები მოუვიდა. სულტნის ვაზირის შერეველმოლკის შუამდგომლობით მარაღელები მათ ქალაქში მობრძანებას სთხოვდნენ. სულტანი დასთანხმდა და არც უნანია. მარაღელები ძღვენით შეხვდნენ და ქალაქი სიხარულით დაუმორჩილეს.

სულტანს ძლიერ მოეწონა ქალაქის მდებარეობა, დანგრეული ციხის აღდგენა ბრძანა და ისიც გამოიკითხა, თუ რად და ვის დაექცია ქალაქის სიმაგრეები. მაშინ მარაღელები მუხლზე დავარდნენ, დიდებულ სულტანს ეთაყვანენ და ცრემლითა და თავში ცემით მოახსენეს თავიანთი შეჭირვება. ადარბადაგანის მფლობელ უზბეგს ღვინის სმისა და შექცევის მეტი არა ახსოვს რა, ქვეყანას პატრონი არა ჰყავს და ამით სარგებლობენ ურწმუნო ქართველები, ძველის სამაგიეროს გვიხდიან, გვლაშქრავენ და მართლმორწმუნე მუსულმანებზე არწივებივით ნადირობენ. ქართველებს ჩვენი ვეღარც ჯარი უდგება წინ და ვეღარც ციხე-სიმაგრე, ჩვენი ქალაქის ზღუდეც მათ დააქციესო.

ჯალალედინი გაოცდა. ქართველები იქიდან შორს, ჩრდილოეთით ეგულებოდა. ამ სიშორეზე ლაშქრობას როგორ ბედავენო, გაიკვირვა და რუკები მოატანინა. რუკას რომ დახედა, კიდევ უფრო გაოცდა. ეგ რა არიო, მოახსენეს მარაღელებმა, მარადის ქვევითაც არაერთხელ ილაშქრეს ურწმუნო გურჯებმა, თვით ყაზვინამდე და რომგურამდეც მივიდნენ და თითქმის ნახევარ ირანს ხარკი დაადესო.

რუკაზე რომ ყაზვინი და რომგური მონახა, სულ გადაირია ჯალალედინი:

– ნუთუ ამოდენა ქვეყანაში კაცი არ გამოჩნდა, რომ ურჯულოებს წინ აღდგომოდა და მორწმუნე მუსულმანები მტრისაგან დაეცვა.

– პატრონი არა გვყავს, ხელმწიფე, და თუ შენ არ დაგვიფარე ქართველთა მძლავრობისაგან, მეტი აღარა დაგვრჩენია რა, ან აქედან უნდა ავიყარნეთ, შორს სადმე გადავიხვეწოთ, ან საძულველ ქრისტეს სჯულზე მოვიქცეთ და წყეულ ჯვარს ვეთაყვანოთ.

ჯალალედინი სასტიკად გაბრაზდა.

საქვეყნოდ დაიქადა და მიზგითში ყურანზე ფიცი დასდო, რომ ურჯულო ქართველებს კლანჭებს დააცლიდა, მუსულმანთა შეწუხებისათვის სამაგიეროს ათგზის მიუზღავდა და ქართველთა ამპარტავნობას სამუდამოდ დაამხოდა.

ადარბადაგანის რომელ ქალაქსაც არ მიადგა ჯალალედინი, ყველგან ქართველთა მძლავრობის კვალს წააწყდა, ყველგან ერთსა და იმავეს ეუბნებოდნენ, ქართველებთან ვერას გავხდით, მათთან ბრძოლის ღონე არა გვაქვსო.

ჯალალედინმა ყოველივე წვრილად გამოიკითხა.

თურმე ას წელზე მეტ ხანს გრძელდებოდა ქართველთა მძლავრობა ახლო საისლამოში.

მომსწრეების დაკითხვითა და სახელმწიფო დავთრების მოწმობით გამოიძია, თუ რომელი ქალაქი როდის და რამდენჯერ დაელაშქრათ ქართველებს.

სავარაუდო, არასრული ანგარიშიც კი ცხადად ადასტურებდა საქართველოში ნამყოფ მუსულმანთა ნაამბობს გურჯთა ქვეყნის ზღაპრულ სიმდიდრეზე.

ჯალალედინმა გადაწყვიტა მოულოდნელი დარტყმით საქართველოს სამეფოს განადგურება და ამ ქვეყნის უთვალავი სიმდიდრის დაპატრონება. თავის ამ მთავარ მიზანს იგი მაჰმადის სარწმუნოებისათვის თავისგამოდებით ნიღბავდა და მუსულმანებს ურჯულო ქართველთა მძლავრობისაგან დახსნას აღუთქვამდა.

ადარბადაგანში რომ დამკვიდრდა, რუმისა და შამის სულტნებთან ელჩები გაგზავნა. ჯალალედინი ერთმორწმუნე სულტნებს ატყობინებდა, რომ მან მამამისის კუთვნილი ადარბადაგანი დაიპყრო და რომ სახლმა ჰპოვა თავისი პატრონი. ამიერიდან იგი დაიფარავს ადარბადაგანელ მორწმუნეებს ურჯულო ქართველთა რბევისა და ძალმომრეობისაგან.

ამასთანავე, სულტანი ატყობინებდა, რომ მან განიზრახა ქართველების სასტიკი დასჯა ადარბადაგანელთა ესოდენი შეჭირვებისათვის და, რომ იგი აპირებს ცეცხლითა და მახვილით საქართველოს დალაშქვრას.

დასასრულს, ჯალალედინი დასძენდა, რომ ადარბადაგანის დაპყრობისას მას ამოქმედებს სურვილი, კეთილმეზობლური ურთიერთობა დაამყაროს რუმისა და შამის ერთმორწმუნე სულტნებთან.

შამსა და რუმისაკენ რომ ელჩი გაისტუმრა, ჯალალედინი ქართველთა წინააღმდეგ ლაშქრობის სამზადისს შეუდგა.

ქართველთა თვალისასახვევად რუსუდან მეფეს ელჩი გაუგზავნა. ხვარაზმის სულტანი ქართველებს ატყობინებდა, რომ ამიერიდან იგი მოველინა ადარბადაგანს მფარველად და, თუ უზბეგის სამფლობელოს რბევას არ დაეხსნებოდნენ, ქართველებს საქმე ჯალალედინთან ექნებოდათ. იგი ქართველ მეფეს არწმუნებდა, რომ სხვა მხრივ ჯალალედინი გურჯებს არას ერჩოდა და მათთან მხოლოდ კარგი მეზობლობის დამყარება სურდა.

ქართველები ცუდად ერკვეოდნენ იმ ამბებში, რაც საქართველოს სამხრეთითა და მთელს აღმოსავლეთში ხდებოდა. მონგოლთა პირველი გამოჩენა, მათთან ძლიერი ომი და თათართაგან თავიანთი ნებით საქართველოსაგან გაცლა ქართველებს თავის უდიდეს გამარჯვებად მიაჩნდათ. ბევრი, საქართველოზე მძლავრი ქვეყანა დაიპყრეს და მოაოხრეს მონგოლებმა. თავათ მორჭმულსა და აღმატებულ ხვარაზმშას მთელი სამკვიდრო დაატოვებინეს, კასპიის რომელიღაც კუნძულზე შეაგდეს და სული ძალღივით დააღვეინეს მიუსაფარს. ქართველებს კი ვერ სძლიეს და იძულებული გახდნენ, გასცლოდნენ!

ეს შეხედულება საქართველოს სამეფოს მესვეურთა შორის იმდენად ფეხმოკიდებული იყო, რომ აღარავინ უკვირდებოდა საქმის ნამდვილ არსს. საქმე კი იმაში იყო, რომ საქართველოს ლაშა გიორგის მეფობის დროს მონგოლთა მხოლოდ ერთი, მეწინავე ლაშქარი მოადგა, რომელსაც ჩინგიზ-ხანისაგან დავალებული ჰქონდა დევნილი ხვარაზმშა მუჰამედის კვალის პოვნა, ირანისა და რუსეთის სამხრეთის დაზვერვა და კავკასიის გზით, კასპიის ჩრდილოეთზე გავლით, ისევ ყაენის სამეოფელში დაბრუნება.

სუბუდაისა და ჯებე ნოინს საქართველოსა და კავკასიის მთლიანად დაპყრობა და მონგოლთა ბატონობის დამყარება არც უფიქრიათ და თუ ქართველთა ლაშქარს მეორედ პირისპირ შეხვედრისას თათრები უბრძოლველად გაეცალნენ, ეს არც მათი სისუსტით აიხსნებოდა და არც მარტოოდენ ქართველთა ძლიერებით.

ქართველები მონგოლებზე თავიანთ გამარჯვებას აზვიადებდნენ. სებე და ჯებე ბალათურების წასვლას გაქცევად თვლიდნენ და მონგოლთა ამ მეწინავე ლაშქრის უკან კი აღარ იხედებოდნენ.

სუბუდაისა და ჯებეს უკან კი, შორს, ჯერჯერობით ძალიან შორს, დიდი და საშინელი ამბები ტრიალებდა: მონგოლთა მთავარი ლაშქარი შავი ღრუბელივით იძროდა, გრიგალივით მოდიოდა და გზადაგზა ყველაფერს მიწასთან ასწორებდა. მრავალრიცხოვანი ლაშქრით დაცული უმდიდრესი და უმაგრესი ქალაქები ზედიზედ ეცემოდნენ და ნებით ან ძალით კარს უღებდნენ თათარ დამპყრობლებს. მოდიოდა უდაბნოს საშინელი ქარი თუ სისხლის ადიდებული მდინარე და ყველაფერს ნთქავდა და ამსხვრევდა, ციხეთა სიმტკიცესა და მიუდგომლობასაც, ქვეყნის დამცველთა გმირობასა და თავგანწირვასაც.

უდაბნოს ამ გრიგალის თუ სისხლის საშინელი ტალღისაგან ივლტოდა მამაცი ჯალალედინი და რაკი მან თავისი მამის უნაპირო სამფლობელო დასტოვა, ქართველები ამას მხოლოდ ხვარაზმშას სისუსტით ხსნიდნენ და იმას კი არ ანგარიშობდნენ, თუ რა ძალისა და საშინელების წინაშე ივლტოდა თავზეხელაღებული სულტანი.

ჯალალედინის კვალს თავათ წყეული ჩინგიზი მოსდევდა თავისი სისხლიანი ლეკვებით, ოთხი ვაჟითა და აურაცხელი ლაშქრით. წინ დაპყრობილი ქვეყნებიდან გამორეკილ უთვალავ ტყვეს მოერეკებოდა, ციხესიმაგრეების საიერიშოდ პირველად მათ უშვებდა და ზურგში თავის მშვილდოსნებს უყენებდა, რომ ისრის სეტყვით გადაელობათ გზა, უკანდახევას თუ განიზრახავდნენ; ამოდენა ლაშქარს თან ჩინური მანქანები მოჰქონდა ქალაქის გამაგრებული ზღუდეებისათვის უშველებელი ლოდების დასაშენად. სადაც ქვა არ იყო, იქ თუთისა და ჭადრის ხეებს სჭრიდნენ და იმ მანქანებიდან უზარმაზარ მორებს სტყორცნიდნენ მტკიცე დულაბით ნაშენ ციხეთა გოდლებს.

სადაც არხები იყო, იქ რაბებს ხსნიდნენ და უთვალავ ქალაქებსა და სოფლებს წყალში სძირავდნენ.

აი, ასეთი ვერაგი და ძლიერი მტრისაგან, შეჩვენებული ჩინგიზისა და მისი აურაცხელი ლაშქრისაგან ივლტოდა ჯალალედინი. ქართველები კი მონგოლთა მთელ ძალას სუბუდაისა და ჯებეს ლაშქრის ძლიერებით ზომავდნენ და წარმოდგენაც არ ჰქონდათ თათართა და იმ ნამდვილ ძალაზე, რომლის გამკლავებასაც ასე თავგანწირვით, მაგრამ ჯერჯერობით ასევე წარუმატებლად ცდილობდა ხვარაზმელი სულტანი.

ჯალალედინის მუქარა ქართველებმა ამაო კვებნად ჩათვალეს. ასი წლის ძლევამოსილებითა და მარცხის უნახაობით განებივრებული ქართველები ჯალალედინის მოსვლასა და ადარბადაგანის დამკვიდრებაში თავიანთი სამეფოსათვის დიდ საფრთხეს არა ხედავდნენ. მაგის მძლეველმა მონგოლებმა ვერაფერი გვიყვეს და მაგან რა უნდა დაგვაკლოსო, _ ერთხმად იმეორებდნენ ქვეყნის მესვეურები.

მაგრამ ადარბადაგანში ქართველებს ბევრი მზვერავი ჰყავდათ და თბილისში ერთიმეორეზე ცუდი ამბები მოდიოდა. ჯაშუშები, ხვარაზმელთა ლაშქრის მრავალრიცხოვნებისა და კარგი შეიარაღების გარდა, იმასაც იუწყებოდნენ, რომ ჯალალედინი საქართველოს წინააღმდეგ საღვთო ომს აპირებდა, მეზობელი სამუსულმანო ქვეყნების სულტნებს თავის მხარეს იბირებდა და დიდი ძალით საქართველოზე მოულოდნელ თავდასხმას ფარულად ამზადებდა.

ქართველებს ჯალალედინის მუქარა აგრერიგად არ აშინებდათ, მაგრამ მისი ჯარის სიმრავლესა და ომისათვის სამზადისს მაინც ანგარიშს უწევდნენ.

ჯალალედინს, სიფხიზლის მისამინებლად, ელჩების ხელით მვირფასი ძღვენი გაუგზავნეს და თან ადარბადაგანის უვნებლობის აღთქმა შეუთვალეს.

ქართველები, ერთის მხრივ, ჯალალედინს მეგობრობას და კეთილ მეზობლობას რომ პირდებოდნენ, მეორეს მხრივ, მთელს ქვეყანაში მალემსრბოლებს გზავნიდნენ და სასწრაფოდ ჯარს იწვევდნენ მტრის დასახვედრად.

ჯალალედინი ჩუმად ომისათვის ემზადებოდა, მაგრამ გარეგნულად თავს ისე აჩვენებდა, თითქო ადარბადაგანის საქმეებით იყო გართული. უზბეგისაგან მორჩილების გამოცხადებას არ დასჯერდა და ქვეყნის ნამდვილ ბატონ-პატრონად გახდომა მოისურვა. ერთ დღეს ლაშქრიანად აიყარა და უზბეგის სატახტოს მიადგა.

ქალაქი ნებით არ დამორჩილდა. იერიშით რომ ვერაფერი დააკლო, მაშინ ალყა შემოარტყა. თავგანწირულად იბრძოდნენ თავრეხელები. ხუთ დღეს გაუძლეს ხვარაზმელთა ალყას, მაგრამ მეექვსე დღეს წინააღმდეგობის უიმედობაში დარწმუნდნენ და დამორჩილდნენ. თავრეხის დაცვას უზბეგის ცოლი სელჯუკიანი ტოღრულშას ასული მელიქე-ხათუნი ხელმძღვანელობდა. იმის გამო, რომ უზბეგს სმისა და დროსტარების მეტი არა ახსოვდა რა, ქვეყანას დედოფალი მელიქე-ხათუნი განაგებდა. ადარბადაგანში ჯალალედინის მისვლისთანავე უზბეგი თავრეხს გაეცალა და დედაქალაქი დედოფლის ანაბარა დააგდო. თავრეხელთა ერთგულებასა და ვაჟკაცობას მინდობილი მელიქე-ხათუნი ქალაქის დამცველთა შორის იდგა და მტრის წინააღმდეგ თავგანწირვით მეზრძოლ მეციხოვნეებს ამხნევებდა. ბოლოს, როცა გარედან შველის იმედიც გადაიწყვიტა და შიგნითაც წინააღმდეგობის გაწევის შესაძლებლობა ამოიწურა, დედოფალმა ქალაქის მორჩილების ფასად თავისი და ახლობლების უვნებლად გაშვება, მისთვის სამყოფელად ჰოის ციხისა და მისი მიმდგომი ქვეყნის მიცემა ითხოვა. ჯალალედინი თავრეხელთა პირობებს დათანხმდა, დედოფალი და მისი ამაღლა ჰოის ციხემდე თავისი მცველებით გაისტუმრა და თავრეხში შევიდა.

თავრეხში რამდენიმე დღე დაჰყო ჯალალედინმა. იქიდან, საიდუმლოდ, ემირები დაგზავნა ჯარის შესაკრებად, ლაშქრის თავშესაყრელი ადგილი დაუთქვა და მორჩილ ათაბაგებსა და მელიქებს ჯარის გამოყვანა მოსთხოვა.

თავათ ხმა დაჰყარა, მარალაში მივდივარო და თვალის ასახვევად ჰარემი დიდის ამბით სამხრეთისაკენ გაისტუმრა.

შემდეგ შირვანისაკენ მიმავალი ქარავნები მოიკითხა ჩუმად. სანდო კაცის პირით თავისი ძველი ნაცნობი, დიდვაჭარი ჰაჯი ჯიჰანი დაიბარა. დიდხანს პირისპირ მარტო ელაპარაკა. საიდუმლო კარით ისე მოვიდა და წავიდა სპარსელი დიდვაჭარი, არც სულტნის კარზე მისი ყოფნა შეუტყვია ვისმეს, არც მასთან საუბრის შინაარსი.

რამდენიმე დღე კიდევ ფარულ, საიდუმლო საქმიანობაში გაატარა. ყველაფერი რომ მოაწესრიგა, თავრეხიდან ღამით წავიდა. გეზი ჩრდილოეთისაკენ აიღო და ჯარის თავშესაყრელად დათქმული ადგილისაკენ გაეშურა.

სულტანი ჩქარობდა.

სწრაფი ნაბიჯით მოჰყავდა ლაშქარი. წინ შეხვედრილ საეკვო მგზავრებს აკავებდა და ზურგში გზავნიდა, რომ მტერს მისი ლაშქრის მოძრაობის ამბავი არ მისვლოდა.

«დასვენება მხოლოდ თბილისშიო», – გამოუცხადა ჯარის მეთაურებს და თან საოცნებოდ დაუხატა ეს დასვენება: სამ დღეს გაიურების სატახტო თქვენს ხელთ იქნება, თავისი ულამაზესი ქალებით, საუკეთესო ღვინით და აურაცხელი სიმდიდრითო. საქართველოს საზღაპრო სიმდიდრის ხმა შორს იყო გავარდნილი და თითოეული ჯარისკაცი იმ სამ დღეს იმდენის შოვნას ელოდა, რომ მის სიცოცხლეში ჰყოფნოდა მასაც და მის შვილებსაც.

ჯალალედინის ამ დაპირებამ მის ლაშქარს უამრავი ბედისმამიებელი შეჰმატა, თურქი და სპარსი, ქურთი და არაბი, ადარბადაგანელი და სურმარელი. სიტყვით ყველა თავს სდებდა მაჰმადის რჯულის დასაცავად და ურწმუნო გურჯების თავხედობის დასასჯელად, ნამდვილად კი ყველას საქართველოს მთებსა და კლდეებში დამალული მისი უთვალავი ოქრო და ვერცხლი იზიდავდა, რომელიც ვითომ გურჯებმა მუსულმანებს მისტაცეს, ამ უკანასკნელთა სისუსტის დროს, როცა მათ არც ერთი პირი ჰქონდათ და არც ჯალალედინით ძლიერი მეთაური ჰყავდათ.

ახლა, როცა ალაჰმა სამაჰმადიანოს ესოდენ ძლიერი და შემმართველი, შთამომავლობით ზეადმატებული და სარწმუნოებით მტკიცე, ბრძენი მმართველი და მიუთხრობელი მეომარი მოუვლინა წინამძღოლად, მუსულმანებს სხვა რაღა უნდოდათ, ურწმუნო ქართველების ჯავრი უნდა ეყარათ და ერთიანად მიეზღათ შფოთისა და თარეშისათვის, რბევისა და აკლებისათვის, რომლითაც აგერ, საუკუნეზე მეტი ხანია, შიშის ზარს სცემდნენ არა მარტო ხლათსა და არზრუმს, არამედ ადარბადაგანსა და თვით შორეულ ხორასანსაც კი.

ასე ფიქრობდა ბევრი მათგანი.

გზადაგზა, დაქანებული ზვავივით გაივსო და გაიზარდა ჯალალედინის ლაშქარი. გამოცდილმა სარდალმა კარგად იცოდა, რომ სანამ ეს ზვავი სწრაფად მიექანებოდა, მას წინ ვერაფერი დაუდგებოდა, მაგრამ ზვავიც მალე დადნებოდა და დაიშლებოდა, თუ მისი სისწრაფე და დაქანების ძალა შენელებოდა.

ამიტომ ჩქარობდა ჯალალედინი საქართველოში შეჭრასა და ქართველებისათვის გადამწყვეტი დარტყმის მანამ მიყენებას, სანამ საქართველო ღონის მოკრებასა და საომრად დარაზმვას მოასწრებდა.

არეზთან მისულ სულტანს დასაზვერავად წინ გამოგზავნილი თავისი რაზმები შეეგებნენ. მზვერავები ცუდ გუნებაზე იყვნენ, შეშინებულებმა აცნობეს სულტანს, რომ ქართველების დიდი ლაშქარი ახლო, მიუვალ მთებზე იყო დაბანაკებული.

– მაინც რამდენი იქნებიან ქართველები? – იკითხა შუბლშეკრულმა ჯალალედინმა.

_ რიცხვი არა აქვს მათ სიმრავლეს, არც გზა და მისადგომი _ მათ მიუვალ ბანაკს.

ცახცახით მოახსენა ემირმა.

ჯალალედინმა შეშინებულ ემირს შუბი შიგ გულში აძგერა და ლაშქარში რომ მტრის უძლეველობის ხმა არ გავრცელებულიყო, მზვერავეების რაზმი დააპატიმრა, შორეულ ზურგში გაგზავნა.

მერე, ვითომც არაფერი მომხდარიყოს, ცხენი არეზის ტალღებში შეაგდო და ლაშქარს უშიშრად წაუძღვა.

ცოტა რომ გაიარეს, ქართველთა მზვერავეებს წააწყდნენ. ქართველებმა ერთხანს უცქირეს ვაკეზე მოძრავ მტრის უზარმაზარ ლაშქარს, ნელა, მდორედ რომ მოიწევდა წინ საავდრო ღრუბელივით, ისრის მოსაწვდომზე ცხენები შეაბრუნეს და ჭენებით გაქრნენ.

ცოტა კიდევ გაიარეს ხვარაზმელებმა და სულტანმა შეჩერება ბრძანა.

ქართველთა ბანაკი უკვე ახლო იყო. გარნისის მიუვალ მთებზე განლაგებულიყვნენ ქართველები.

ცადაწვდენილი ქარაფოვანი მთების თავზე ღრუბლებში ატყორცნილივით ჩანდა ბანაკი. იქიდან ციცაბო, თითქმის მიუვალი კლდეები ეშვებოდნენ დაბლა ხეობაში.

თავისი ბანაკი მთებიდან კარგა შორს დასწია ჯალალედინმა. ცხენით იქაურობას შემოუარა, მაღლობზე ავიდა და ადგილმდებარეობას დააკვირდა.

ტყუილად როდი შეშინებულან მისი მზვერავეები! ქართველები მართლაც ბევრნი ჩანდნენ და ბანაკიც მარჯვედ მოეწყოთ. იქიდან, ალბათ, ხელისგულივით ჩანდა მთელი ხეობა და ქართველებს მტრის მცირე მოძრაობაც არ გამოეპარებოდათ. ხეობას ისე მარჯვედ კეტავდა ქართველთა გამაგრებული ბანაკი, რომ მისი გვერდის ავლა შეუძლებელი იყო. საქართველოსკენ წამოსასვლელად ერთადერთი გზა იმ მიუვალი მთების გადალახვა და იმ უზარმაზარი ბანაკის მოშლა იყო.

თითქო ერთიც და მეორეც შეუძლებელი ჩანდა.

ჯალალედინის სიფრთხილეს ვერავითარი ნაყოფი ვერ მოეტანა, ქართველებს მანამ შეუტყვიათ მისი საიდუმლო, ვიდრე სულტანი თავის უახლოეს მხედართმთავრებს გაანდობდა საქართველოზე ლაშქრობის გეგმას. შეუტყვიათ და თადარიგის დაჭერაც მოუსწრიათ: დაზვერვის ცნობებით, ქართველთა ლაშქარი სამოციდან ოთხმოცი ათასამდე მეომარს უნდა ითვლიდეს; ქართველთა სარდლობა რომ ადრე ყოფილა გაფრთხილებული, ეს იქიდანაც ჩანს, მათ, საკუთრივ ქართველების გარდა, ლეკებისა და ოსების, ჯიქებისა და ძურძუკების გადმოყვანაც მოუსწრიათ, ამას მზვერავეების მიერ შეპყრობილი მოენეები ირწმუნებოდნენ, მაგრამ ისედაც ყველაფერი ნათლად ჩანდა: ბანაკი დიდი იყო და ლაშქარი უთვალავი.

ბუნებრივად ისედაც მიუდგომელსა და ქართველთაგან კიდევ უფრო მეტად გამაგრებულ ბანაკს ხვარაზმელები პირდაპირი იერიშით ვერ აიღებდნენ,

ჯალალედინს ან სასწაულის იმედი უნდა ჰქონოდა, ან რამე ხერხი უნდა მოეგონა და ციხე როგორმე შიგნიდან გაეტეხნა.

ჯალალედინი ვაკეზე დაბანაკდა და ჯარი ისე განალაგა, რომ თუ ქართველები მთებიდან ჩამოსვლასა და შემოტევას გაბედავდნენ, ხვარაზმელთა სიმრავლეს ისე შთაენტქა შეტევაზე წამოსული ქართველობა, როგორც ზღვა ნთქავს მთიდან დაშვებულ მდინარეს.

სულტანმა ჯარები დააწყო, გუშაგები დააყენა და ბანაკი გაამაგრა.

თავის მხრივ, ვერც ქართველები დააკლებდნენ რამეს ამ ბანაკს, მაგრამ განა ჯალალედინი იმისთვის აიყარა იმოდენა ამბით საქართველოს დასალაშქრავად, რომ აქ, საქართველოს განაპირა ხეობაში დამდგარიყო და ქართველთა ბანაკისათვის ეცქირნა შორიდან?

ერთიმეორის ცქერა კი, ეტყობოდა, დიდხანს მოუხდებოდა ორივე ბანაკს: ქართველები შინ იყვნენ და არსად ეჩქარებოდათ, მიუვალ სიმაგრეს მინდობილები დაბლა არ ჩამოვიდოდნენ და არც მტერს აუშვებდნენ მალა.

ხვარაზმელები წინ ვერ წავიდოდნენ და იმ მიუვალ ბანაკს ტყუილუბრალოდ ვერ შეაწყდებოდნენ, მაგრამ ვერც უკან გაბრუნდებოდნენ, რადგან ეს ჯალალედინის შერცხვენა და დაცემა იქნებოდა ყველა იმ მუსულმანის თვალში, რომლებმაც იგი გამოჩენის დღიდანვე მთელი საისლამოს მხსნელად დასახეს და რომელთაც მან ასე დაბეჯითებით აღუთქვა ქართველების დასჯა და ჭკუის სწავლება.

ჯალალედინმა თავისი სარდლების თანხლებით ისე შემოიარა ბანაკი, რჩევა არც ერთისათვის არ უკითხავს. განკარგულებებს თვითონ იძლეოდა და ისე აკეთებდა, რომ ემირებისთვის ბჭობისა და დაფიქრების საშუალება არ მიეცა. იცოდა, გამოცდილი მხედართმთავრები გარნისის ალებას შეუძლებლად მიიჩნევდნენ; თუ ეს აზრი ჯარში გავრცელდებოდა, სიმდიდრის შოვნას დახარბებულ ბევრ მოლაშქრეს გული გაუტყდებოდა და ისევე თავის აუტკივებლად წავიდოდა ბანაკიდან, როგორც მოვიდა. ჯალალედინი კი გარნისის წინ უნდა მოთმინებით მდგარიყო, ეგებ ორი-სამი დღეც, იქნებ, ერთი კვირაც... ერთი თვეც.

ეს საიდუმლო მარტო თვითონ სულტანმა იცოდა, ვისმესთვის მისი განდობა არ შეიძლებოდა.

მხოლოდ მოთმინებით უნდა ელოდნა სულტანს და ლაშქარი ამ მოთმინებით უნდა აღეჭურვა.

როგორც კი მზვერავებმა ხვარაზმელთა გამოჩენის ამბავი მოიტანეს, ქართველები საომრად გაემზადნენ. ყველამ თავთავისი მიჩნეული ადგილი დაიჭირა და შორიდან დაუწყეს თვალისდევნება მოახლოებული მტრის მოძრაობას.

თანახმად საერთო გეგმისა, ქართველები მზად უნდა ყოფილიყვნენ მტრის შესაგებებლად მხოლოდ იმ შემთხვევაში, თუ ხვარაზმელები ქართველთა ბანაკის იერიშს გაბედავდნენ და შეუსვენებლად, პირდაპირ შეტევას დაიწყებდნენ.

ხვარაზმელთა ლაშქარი ვაკეზე შედგა, შეტბორდა და მერე ნელ-ნელა განლაგდა.

მტერი, როგორც მოსალოდნელი იყო, მიუვალ გარნისზე პირდაპირ შესკდომას არ აპირებდა, ბანაკად დგებოდა და მოლოდინს არჩევდა.

მხარგრძელმა სარდლები მოიხმო. ვარამ გაგელის, ახალციხელების, სურამელის, ბაკურციხელის, ჯაყელების, დადიანის, სვანთა ერისთავის, მარგველისა და თავისი ძმისწულის შანშე ზაქარიას-ძის თანხლებით ცხენდაცხენ გავიდა სათვალთვალო მაღლობზე.

– უჰ, რამდენი არიან წყეულები!

ხმამალა აღმოხდა შანშე მანდატურთუხუცესს.

– მამაშენს მეტიც უნახავს და არათუ გაჰკვირვებია, უშიშარს იქით შეუტევია და ცხვარივით წინ გაურეკია, – ცოტა არ იყოს, მკაცრად უთხრა ივანემ.

თითქმის ძალით წამოიყვანა საქართველოს უდიდესი სარდლისა და სახელგანთქმული ამირსპასალარის შვილი ამ ომში ივანემ. თითქმის ძალით, რადგან, მისი შვილის ავაგისა არ იყოს, ბრძოლის ველისკენ არც მის ძმისწულს უწევდა დიდად გული. დედოფლის კარზე ყოფნა, ნადიმი და შექცევა უფრო იზიდავდა ნებივრად გაზრდილ შანშეს, ვიდრე ხმლის ტრიალი და მტრის კვეთება. ზოგიერთ სხვა დიდგვაროვანთა შვილებივით, ისიც იმ აზრისა იყო, რომ მათმა მამებმა და პაპებმა მათი წილი სისხლიც დაღვარეს, ქვეყნის წინაშე იმდენი სამსახური გადიხადეს, რომ ახლა მათ შვილებს უფლება აქვთ, ხმლისა და ქვეყნის ვალისაგან მოსვენებული იყვნენ, წინაპრების დათესილი მოიმკონ და ამ სოფლის სიკეთით გაიხარონ.

სანამ მამები არიან და ხმაღს იქნევენ, ასეთ შვილებს არ გაუჭირდებათ, ცხოვრებას გემოს ჩაატანენ და თავს არაფრისთვის შეიწუხებენ, მაგრამ მერე... მერე, როცა მამები წავლენ (აკი აღარ არი ზაქარია ამირსპასალარი!), როცა მათი სისხლით მორწყული მიწა გაშრება? მერე ვინღა ჰყოფს უზრუნველს მათ უდარდელ ცხოვრებასა და შექცევას?!

ვაი, რომ მარტო შანშე არა ფიქრობს ასე. ვაზირთა და დიდებულთა შთამომავლები ერთიმეორეს ეჯიბრებიან განცხრომასა და ფუფუნებაში, ერთმანეთს ეცილებიან და ასწრებენ ულამაზესი ხარჭებისა და ჯიშინი ცხენების შეძენას, ფულსაც დაუფიქრებლად სწირავენ ერთი ბედნიერი წამისათვის, მამულსაც და სახელსაც.

მამების ბრალია, რომ ასე განებივრდნენ და გაზულუქდნენ შვილები. დიდი ხანია ამას გრძნობს და ხვდება ივანე, მაგრამ დაგვიანებულ საქმეს რაღა ეშველება. თავიანთ თავგასულ შვილებს ისინი უკვე ვეღარ გაასწორებენ, მათ მხოლოდ ცხოვრება გაასწორებს, როგორც კუზიანს ასწორებს სამარე. და ეს ახალი ცხოვრება – კუზიანების გამასწორებელი სამარე, ეტყობა, არც ისე შორსაა, ქნევაში გაცვეთილი მამების ხმალი მალე ვეღარ გასჭრის და ის, ცხოვრება თავისთავად მოვა ჯაჭვებითა და ბორკილებით, რკინის ულლითა და მათრახებით. მოვა და გამოაფხიზლებს, ადრე თუ გვიან, ამ ცხოვრებამოყირკებულ, სიცოცხლემოწყენილ ნებივრებს, შანშესა და ავაგის

მსგავს ვაჟბატონებს. შანშეს კიდევ რა უშავს, ბრძოლის ველზე მაინც უდგას მხარში თავის ბიძას, ავაგი აქამდისაც ვერ გამოიტყუა, დიდის ვაი-ვაგლახით ბიჯნისამდე მოჰყვა. ბიჯნისში ფეხი აითრია და ხელიდან დაუსხლტა. ტოლებში მხოლოდ თავისი მშვიდი ზნითა და თვინიერი ქცევით იცნობენ ავაგს. ზის, ალბათ, ახლაც თავისთვის სადმე მყუდროდ, ლამაზ ქალებთან და ჩუმად, არხეინად სვამს ის უბედური.

კლდის ნაპირს მიადგა ივანეს ცხენი და შეჩერდა. მხარგრძელი ახლავდა გამოერკვა ფიქრებიდან. უზანგებზე აღიმართა და მტრის ბანაკს დააცქერდა.

– ჩვენ თუ იქ არ ჩავალთ, ისინი აქ ამომსვლელები არ არიან.

ღიმილით თქვა სვანთა ერისთავმა.

– ამოვლენ და თავ-პირს დაიმტვრევენ, – დასძინა ვარამ გაგელმა.

– ჩვენ დაბლა ჩასვლას ნუ ვცდით, მათ ინებონ და სცადონ მაღლა ამოსვლა. მე ეს გადაწყვეტილება სწორად და ურყევად მიმაჩნია, – მიუბრუნდა მხარგრძელი სარდლებს.

– სწორი გადაწყვეტილებაა, ჩვენც მაგ აზრს ვადგავართ, – დაუდასტურეს ერთხმად.

– თუ მართლა მულალები მოსდევენ უკან ხვარაზმელ სულტანს, აქ დიდხანს ვერ დაუცდის დარის დადგომას, ან წამოვა და კლდეებს შეაჟლეტს ლაშქარს, ან აიყრება და ისევ მის კვალზე დადევნებულ მგლებს შეაჭმევს თავს.

– საქართველოს ერთიც გაახარებს და მეორეც, – ჩაურთო ბაკურციხელმა, – ეგ უბედური იმ მულალებს რომ გამოექცა, ვერ ჰკითხა, ვისკენ მოდიოდა? მაგისა და მამამაგისის დამაქცევარ და დამამხოველ მონგოლებს ჩვენ ზურგზე ბოლი ვადინეთ და კუდიით ქვა ვასროლინეთ ამ სამიოდე წლის წინ. ეკითხა ჩვენი ამბავი სეზე და ჯებე ნოინებისათვის და იქნებ არ ერჩიათ საქართველოზე გამოლაშქრება!

– ეტყობა, თავგზააბნეულია ამდენი მარცხისაგან ხვარაზმმა, – მძიმედ თქვა სურამელმა, – იმიტომ აწყდება ქვეყნის ერთი კუთხიდან მეორეს ასე გამეტებით, რომ სამკვიდრო აღარა აქვს და თავშესაფარი.

– გემინოდეს კაცისა, რომელსაც აღარც სახლი აქვს და აღარც თავშესაფარი! – ისე თქვა შალვა ახალციხელმა, ფიქრში წასულივით, თითქო რომელიღაც წიგნიდან იმოწმებდა წაკითხულ ადგილს.

– ეზო-კარიდან გაგდებული ძალლი ცოფდება და მისი ნაკბენი საშიშია ხოლმე, – დაუმატა დადიანმა.

– მაგის დასაკბენი ლასგურა ვის აქვს, ახლოსაც არ მოვასუნებთ! – როხროხით თქვა სვანთა ერისთავმა და კაბის კალთები ისე მოიკეცა, თითქო მართლა ვინმე უპირებდა უკანალზე კბენას.

ბუმბერაზი ვაჟკაცის ამ გულუბრყვილო ხუმრობაზე ყველას სიცილი აუტყდა.

– კაბის კალთა ვერ გიშველის, ერისთავთერისთავო, მაგას მონგოლებისაგან ექნება ნასწავლი კბენა, აგერ, რა ხანია, მოსდევენ და კბენენ ის წყეულები. ეს

უბედური თავის გამოსწრებას ახერხებს მუდამ, მაგრამ უკანასკნელს მათ უტოვებს დასაკბენად.

ქართველთა სარდლები ხორხოცობდნენ, სიცილისაგან იჭაჭებოდნენ და ცხენებზე თავს ძლივს იმაგრებდნენ.

დაბლა, ხვარაზმელთა ბანაკში, სამკვიდროდან აყრილი და ბედისაგან გამწარებული სულტანი ახლა სწორედ იმაზე ფიქრობდა, როგორ უკეთ გამოეყენებინა ქართველების წინააღმდეგ ბრძოლაში ყველა ის ხერხი, რომლებიც მონგოლებთან უიღბლო ომებში ესწავლა და რომლებსაც მისი მოსისხლე ჩინგიზი ასე ოსტატურად იყენებდა მტრის მარჯვედ დასაკბენად და სისხლისაგან დასაცლელად.

ჯალალედინი იმ ღამესვე ელოდა მტრის შემოტევას. თუ ქართველებს მართლა დიდი ლაშქარი ჰყავდათ, სავარაუდო იყო, რომ დაღლილი ხვარაზმელებისათვის არ დაეცლიათ, ერთხელ მაინც ქორებივით დასცემოდნენ, აეწიოკებინათ და აეშალათ. ასეთი მოულოდნელი თავდასხმა ქართველებს ბევრ უპირატესობას მისცემდა. თუ წარმატება მნიშვნელოვანი იქნებოდა, ხვარაზმელთა ბანაკი აირეოდა და საქმე იქნებ გაქცევაზეც მიმდგარიყო, ხოლო, თუ მტერი მაგრად დაუხვდებოდა, იმდენს მაინც ავნებდნენ, რომ შემდეგ მოსვენება დაჰკარგოდა, ან აყრასა და უკან გაბრუნებაზე ეფიქრა, ან იძულებული გამხდარიყო, თავათ გადასულიყო შეტევაზე და გარნისის მიუვალ სიმაგრეს შელეწოდა, ტალღასავით დაფშვნილიყო მის სალ კლდეებზე.

დადამდა თუ არა, სულტანმა სიბნელეში მტრის საპირისპიროდ გააწყო ლაშქარი: შუაში ცხენოსანი ჯარი დააყენა, აქ მეტწილად თავით ფეხებამდე შეიარაღებული ხვარაზმელები იყვნენ; მარცხენა ფრთაზე ქვეითნი განაწყო, ხოლო მარჯვენა ფრთა მოისრეებმა დაიკავეს.

იმ ღამეს დიდხანს არ დაუძინია ჯალალედინს. მტრის ბანაკს თვალმოუცილებლად გაჰყურებდა და ცდილობდა ქართველთა განზრახვის ამოცნობას.

ქართველები ისევ ძველებურად იდგნენ თავიანთ მიუვალ სიმაგრეებზე, უამრავი კოცონი დაენთოთ და ბანაკი საქორწილო სუფრასავით გაეჩაღებინათ.

ცაში ატყორცნილი ბანაკი დიდი იყო. ბნელ ღამეში კოცონების შუქზე უთვალავი ლანდი მოძრაობდა. გურჯებს თავიანთი ყიჟინითა და ჟრიაძულით ცა დაბლა ჩამოჰქონდათ და ჯალალედინს მაშინვე ენიშნა: ბანაკის სიმაგრესა და მიუდგომლობას მინდობილი ქართველები სრულიადაც არ ფრთხილობდნენ, მტრის სიახლოვეს არაფრად აგდებდნენ და გულდაარხებინებულებს ისე ეჭირათ თავი, თითქო ბრძოლის ველზე კი არა, ხატობაში ყოფილიყვნენ ღამისსათევად.

მტრის ეს უზრუნველობა ბევრს რამეს ეუბნებოდა გამოცდილ მეომარსა და სარდალს. ეჭვი არ იყო, ქართველები ძირს ჩამოსვლასა და მტრის შებრძოლებით თავის შეწუხებას არ ფიქრობდნენ, თავი იმდენად მიუვალ და

მიუდგომელ სიმაგრეში ეგულებოდათ, რომ მტრის იქ ასვლაც წარმოუდგენლად ეჩვენებოდათ და ამიტომ ბრძოლის პირობებისათვის საჭირო და აუცილებელ სიფხიზლესაც არაფრად დაგიდევდნენ.

მაგრამ მართლა ასე მიუვალა იყო გარნისის სიმაგრე? განა გარნისზე უფრო მიუდგომელი სიმაგრეები არ აუღია ჯალალედინსა და მის მოსახლეს მტერს, წყეულ ჩინგიზ-ხანს? ან რა მნიშვნელობა აქვს ბანაკის სიმაგრეს, თუ შიგ მყოფნი არ მაგრობენ და ფრთხილობენ დღედაღამ?

ქართველები არ ფრთხილობენ, არ ფხიზლობენ და, ალბათ, ვერც მტერს დახვდებიან მაგრად და ფხიზლად, თუ სულტანი გამოიჩენს თავის ჩვეულ გამჭირახობას და თან მონგოლთა სამხედრო ცბიერებასაც მოიშველიებს.

მეორე დღემაც მშვიდად და უშფოთველად ჩაიარა, ის დღეც ისე დაღამდა, რომ სულტანს და მის ემირებს ტანთ არ გაუხდიათ. ცეცხლი წუხანდელივით ყველგან ჩააქრეს და ჯარმაც მორიგეობით გამოიძინა.

ქართველთა ბანაკში ხმაური წუხანდელივით გვიანამდე გაგრძელდა, მერე კოცონები ნელ-ნელა ჩაქრა, ყველაფერი დადუმდა და ჩაკვდა, აქა-იქლა ბჟუტავდა წინა ხაზებზე ცეცხლი თუ სინათლე; ეტყობოდა, წინამბრძოლები ფხიზლობდნენ, დანარჩენ ბანაკს კი მძიმე ძილით ეძინა.

კიდევ ერთი დღე გათენდა ამ სიჩუმესა და ერთიმეორის გამომცდელ მოლოდინში.

ჯალალედინმა იცოდა, რომ ხვარაზმელთა ლაშქარში უკმაყოფილონი გაჩნდნენ; ამ თვალუწვდენელ ველზე უქმად დგომა ბევრს აღარ მოსწონდა, ზოგი გურჯებზე შეტევას ჩქარობდა, ზოგიც, იმედგაცრუებული, შინ გაპარვას ფიქრობდა. ესენი უმთავრესად დავლისათვის გზადაგზა შემოერთებული თურქმანები და ადარბადაგანელები იყვნენ. მათი აყრა და ბანაკიდან წასვლა ხვარაზმელთა მთავარ ლაშქარსაც სიმტკიცეს შეურყევდა და გამარჯვების რწმენას დაუკარგავდა. საქმე უნდა გაუჩინოს საშოვარზე დახარბებულ ამ უკმაყოფილო მოლაშქრეებს ჯალალედინმა, მთავარ ლაშქარს უნდა მოაცილოს და ნადავლზე მიუშვას.

აგერ, გვერდით არის მდიდარი და გაუმაგრებელი ქალაქი დვინი. როგორც მზვერავეები ამბობენ, დვინში ქართველთა ჯარი არა დგას და მისი აღება ძნელი არ უნდა იყოს. ჯალალედინი თავის სულწასულ მოლაშქრეებს დვინს მიუსევს, ამით ლაშქარში უკმაყოფილებას მოსპობს და ალაფსაც იშოვის, ქართველებს დვინის აკლების ამბავი შეაწუხებს და ეგებ მის მოსაშველებლად გარნისის კლდეებიდან მათი ჯარიც გამოიტყუოს.

სულტანმა თავისი გადაწყვეტილება ემირებს გააცნო და ჯარის ნაწილი დვინისაკენ დასძრა.

მეორე დღეც მიიწურა. ქართველთა ამირსპასალარმა თავის კარავში სამხედრო საბჭო გამართა. სარდლების უმრავლესობა იმ აზრისა იყო, გარნისის სიმაგრიდან ფეხი არ მოეცვალათ და მტრისათვის მოთმინებით დაეცადნათ. თითქო სამხედრო ბჭობა ამით უნდა დამთავრებულიყო, მაგრამ

მოულოდნელად სიტყვა ივანე ახალციხელმა ითხოვა და სარდალთა ერთსულოვნება დაირღვა.

– ჩვენი სარდლები სწორად სჯიან, – დაიწყო კარის ამირამ, – გარნისი მიუდგომელი სიმაგრეა და იერიშით მისი ალება სამნელო საქმეა. ამიტომ მტრის ლოდინი ამ მიუვალ მთებზე ჩვენთვის ხელსაყრელია, რადგანაც ჩვენ ჩვენს სახლში ვართ, ხოლო მტერი შორი გზითაა მოსული. ჩვენ ლოდინი შეგვიძლია, მტერს ეჩქარება და მოთმინება არ ეყოფა აქ დიდხანს დასარჩენად. დიდხანს კი მტერი ასე უმოქმედოდ ვერ დადგება გარნისთან. როცა იქნება, უნდა შემოგვიტიოს. ჯალალედინი მხოლოდ შესაფერის დროს უცდის და როგორც ის დრო დადგება, ხვარაზმელები გარნისის იერიშს დაიწყებენ. ჯალალედინს დიდძალი ჯარი ჰყავს და როგორც მსტოვრებისაგან ვიცით, კიდევ ელის ახალ-ახალი ლაშქრის მოსვლას. საბოლოოდ აუღებელი სიმაგრე არ არსებობს და გარნისის ალება არ არის შეუძლებელი. ბოლოს და ბოლოს, ხვარაზმელი სულტანი ასი ათას კაცს გასწირავს, გარნისის კლდეებს შემოაწყვეტს და ამით დანარჩენ ასიათასებს გაუხსნის გზას. ჯალალედინის ურიცხვი ლაშქრისათვის ასი ათასი კაცის გაწირვა არც ისე დიდი დანაკლისია. ხვარაზმელი სულტანი საქართველოს დაპყრობით დიდისა და შორეული მიწების მიღწევას აპირებს და საფიქრებელია, რომ იგი ამ მსხვერპლს უყოყმანოდ გაიღებს. ასე იქნება თუ ისე, დღეს იქნება თუ ხვალ, ხვარაზმელებთან ომი აუცილებელია და გარდუვალი. ამიტომ ჩვენც არ უნდა ვიყოთ გულხელდაკრეფილნი და მარტოოდენ ჩვენი ზანაკის მიუდგომლობას მინდობილნი.

მხარგრძელმა წარბი შეიკრა და იქ მყოფთ ქვეშ-ქვეშ გახედა.

– ხვარაზმელთა ლაშქართან შედარებით, ჩვენი სუსტია და მცირერიცხოვანი, – განაგრძო კარის ამირამ.

– ქართველთა ლაშქრის სისუსტე ჯერ არსად თქმულა, ხოლო ამისთანა სიმაგრეზე, როგორც გარნისია, ათი ათასი კაცითაც შევძლებდი ჯალალედინის ლაშქრის უკუგდებას, – ამაყად თქვა მხარგრძელმა და სარდლებს თვალი მოავლო.

– არც მე მიჩნს საეჭვოდ სიმხნე და სიქველე ქართველთა ამირსპასალარისა, მაგრამ მარტო მეომართა გულოვნებას მინდობილნი არ უნდა ვიყვნეთ, თავათ ათაბაგს უთქვამს მრავალგზის, ვიდრე დრო გვაქვს და ლაშქრის წვევა კიდევ შეიძლება, მოვირთნათ ახალი მხედრობა, ლაშქარი რომ მრავალრიცხოვანი იქნება, გულიც უფრო საგულეს გვექნება.

– მე ახლაც საგულესა მაქვს გული, – არხეინად თქვა მხარგრძელმა და სახეზე გესლიანი ღიმილი გადაეფინა.

ივანე ახალციხელმა ამირსპასალარის შენიშვნაზე არაფერი თქვა და ისევ თავისი განაგრძო.

– სანამ ახალი მხედრობა მოგვემატება, მთებზე ალალი გავშალოთ, კოცონები შორიშორს, დიდ მანძილზე დავანთოთ და ამით მტერს თავი მრავალრიცხოვნად მოვაჩვენოთ.

_ ეს მართლაც კარგი იქნება! _ მოიწონა ნათქვამი დადიანმა.

_ ამასთან, დროდადრო, მცირე რაზმებით მტერს ჩავუხდეთ ხოლმე, ვნება მივაყენოთ და მოსვენება არ მივცეთ, რომ დაუცველად დარჩენილი დანარჩენი ქვეყანა არ მოაოხროს.

_ შალვას სათქმელს ამბობს ივანე! _ ისევ გესლიანად გაიღიმა მხარგრძელმა და შალვა ახალციხელს გადახედა.

_ შალვა თავათ იტყვის თავის სათქმელს! _ წამოენტო შალვა.

_ დაუცველად დარჩენილ ქვეყანაში ივანე, ალბათ, დვინს გულისხმობს, _ გამოსცრა მხარგრძელმა და თვალი ისევ შალვასაკენ გააპარა.

დვინი შალვა ახალციხელის საპატრონო იყო და მხარგრძელმა დაუცველად დარჩენილი ქვეყნისათვის უფროსი ახალციხელის ზრუნვაში ძმის მამულებისათვის თავის გამოდება დაინახა.

_ დვინსაც ვგულისხმობ და მიმდგომ ქვეყანასაც, _ აუღელვებლად დაუდასტურა ივანემ.

_ ჰოდა, ერთი დვინისათვის მთელი საქართველო დავლუპოთ, თუ რას გვირჩევ, კარის ამირავ? ძალიან ვწუხვარ შალვას მამულებისათვის, მაგრამ ჩვენი მეფისა და სრულიად საქართველოს სიყვარული მიკარნახებს, სახელმწიფოს ბედი არც შალვას მამულებს ვანაცვავო, არც ჩემსას.

_ ღმერთმა შეარცხვინოს, ვისაც შენზე ნაკლებად ან მეფე უყვარდეს და ან საქართველო, _ წამოიჭრა ფეხზე ბრაზისაგან გაფითრებული შალვა.

_ ვის უბედავ! _ წამოვარდა მხარგრძელიც და აკანკალებული ხელი ხმლისკენ წაიღო.

_ თუ ჩვენი აზრის მოსმენა არ სურდა ამირსპასალარს, აქ რაღად გვიწვევდა? _ გაცხარდა ივანე ახალციხელი.

_ ამიერიდან მე აქ მომსვლელი აღარა ვარ, ომი წინა გვაქვს და იქ ვაჩვენოთ, ვინ უფრო ერთგულია ტახტისა და სამშობლოსი, _ სულმოუთქმელად დააყარა სიბრაზისაგან სახელაღწილმა შალვამ და კარვიდან გავარდა.

ივანე ახალციხელიც უსიტყვოდ მიჰყვა უმცროს ძმას.

გაჯავრებული, სახეშეშლილი მხარგრძელი ბოღმას ვერ იოკებდა და ხელში ხმლის ვადას აწვალებდა. ის იყო, დაჯდომა დააპირა, რომ კარავში მაცნე შემოვარდა.

_ ხვარაზმელები დვინს შეესივნენ, დაიპყრეს და გამარცხეს თავათ დვინიცა და მისი მიმდგომი ქვეყანაც.

ნაწყვეტ-ნაწყვეტ თქვა აქოშინებულმა მაცნემ და მუხლზე ჩაიკეცა.

ივანე ნელა დაეშვა სკამზე. სახე დაუმშვიდდა და ოდნავ შესამჩნევი ღიმილიც გამოეხატა.

ამირსპასალარმა მრავალმნიშვნელოვანი, გესლიანი ღიმილით მოავლო თვალი შემფოთებულ სარდლებს.

_ აი, რა აწუხებდათ ახალციხელებს! ვწუხვარ, რომ დვინის მხარე ოხრდება, მაგრამ ომს თავისი კანონები აქვს. ჯალალედინი მარტო ნადავლის საშოვნელად როდი არბევს დვინს, მას ჩვენი ჯარის ჩატყუება უნდა გარნისის

სიმაღლეებიდან, მაგრამ ჩვენ მის ანკესს არ წამოვევებით. რაკი თქვენი აზრიც ეს არი, ჩვენი ლაშქარი გარნისის სიმაგრიდან ფეხს არ მოიცვლის და მოთმინებით დაელოდება მტრის შემდგომ ნაბიჯს, – დაასკვნა ამირსპასალარმა და სამხედრო ბჭობა დაასრულა.

ჯალალედინმა დვინი აიღო და ხელთ დიდი დავლაც იგდო. საქართველოს სამეფოს სანაპიროთაგან ერთ-ერთი მნიშვნელოვანი მხარე მოარბია. ქართველთა ლაშქარი იქვე იყო, სულ ახლო, მაგრამ მთებში გამაგრებულმა გურჯებმა ფეხიც არ მოიცვალეს იმ სიმაგრეებიდან და თითიც არ გაანძრიეს დვინის დასახმარებლად. ჯალალედინი დარწმუნდა, ქართველები დაბლა ჩამოსვლას, გაშლილ ადგილზე რიცხვით ბევრად ჭარბ მტერთან შებმას არამც და არამც არ აპირებდნენ, თავიანთი ბანაკის მიუვალობას იყვენენ მინდობილნი და გარნისის კლდეებთან ელოდნენ მტრის შემოტევას. ეტყობოდათ, სხვა გზა აღარ იყო, ჯალალედინი ან უკან უნდა გაბრუნებულიყო, ან გარნისის კლდეები უნდა გადაელახა.

უკან გაბრუნებაზე ფიქრიც არ შეიძლებოდა. სულტანს ისევ გარნისის მისადგომი გზები უნდა ეძებნა.

ჯალალედინმა ბრძანება გასცა: ჰარემი, ჯოგი და ალალი უკან დაეწიათ, ძალიან შორს, რომ ბანაკის აყრის შთაბეჭდილება შექმნილიყო.

საქართველოს სატახტოდან ამირსპასალარის ბანაკში მახარობელი მოვიდა: ქართველთა დედოფალს რუსუდანს უფლისწული შესძენოდა.

ათაბაგმა ივანემ ფრიად გაიხარა დედოფლის ჯანმრთელობისა და უფლისწულის დაბადების ამბით. ლაშქარი დააწყობინა, სარდლების თანხლებით ჯარს ჩამოუარა და უფლისწულის დაბადება მიულოცა.

მოდიოდა თეთრ ცხენზე ამხედრებული ბუმბერაზი და ლაშქარს ომახიანი ხმით გასძახოდა:

– მეფეს გაუმარჯოს!

– უფლისწულს გაუმარჯოს!

ამირსპასალარის ყოველ შემახილზე ლაშქარი ერთხმად გუგუნებდა გრძლად გაბმულ «ვამას». ეს გუგუნე მწყობრიდან მწყობრში გადადიოდა, ტალღას მიმყოფ ტალღასავით ძლიერდებოდა და მთებს აზანზარებდა.

ჯარის უფროსებმა მაშინვე შენიშნეს: ამირსპასალარს, სხვა გამოჩენილ სარდლებთან ერთად, მეომართათვის ყველაზე მეტად საყვარელი სარდლები – შალვა და ივანე ახალციხელები არ მოჰყვებოდნენ.

შალვა და ივანე უშუალოდ მათ ხელქვეით ლაშქარს დადგომოდნენ წინ და ამირსპასალარს მწყობრთან ერთად შეხვდნენ.

წინამბრძოლებს რომ მიულოცა და მათ მწყობრს ჩაუარა, ახალციხელები წესის მიხედვით მიჰყვნენ ამირსპასალარს.

– დღევანდელ სიხარულს უმძრახობა არ შეჰფერის, შევრიგდეთ, ახალციხელებო! – მიმართა ათაბაგმა შალვას და ივანეს და პირველმა თავათ გაუწოდა მარჯვენა.

ახალციხელებმა უსიტყვოდ ჩამოართვეს ხელი.

ქართველთა ბანაკიდან რომ დაფდაფების ცემა და ჯარის გუგუნი გაისმა, ჯალალედინს პირველად საომარი განგაში ეგონა. ნამდვილად გასჭრა ჩემმა ეშმაკობამო, – გაიფიქრა, ცხენზე შეჯდა და ემირების თანხლებით თავის ბანაკს შემოუარა. ჰარემი უკვე აეყარათ, კარვები აეკეცათ, სულტნის ცოლები ცხენებზე შეესვათ და ისეთი ზარ-ზეიმით, ხმაურითა და გამოჩინებით მიჰყავდათ, კაცს ეგონებოდა, მთელი ბანაკი კი არა, სამეფო აყრილაო. აურაცხელი ჯოგი ჯერ განგებ გაეფანტათ, მერე თავის მოსაყრელად ცხენოსანი მწყემსები გაემვათ და ისეთი ბუკის ძახილი იდგა, იქაურობა გაეყრუებინათ.

ჯოგს ადალი მიჰყვა უთვალავი ურმითა და ფორნით, სანოვაგითა და დედაწულით.

თბილისიდან მოსულმა მალემსრბოლებმა სხვა ახალ ამბავთან ერთად ისიც მოიტანეს, ხმა გავრცელდა, მონგოლები თავრეზს მოადგნენო.

ეს ხმა ჰაჯი ჯიჰანის მექარავნებისაგან იყო დაყრილი თბილისში და ახლა თავად ჯალალედინისაგან საქართველოს სატახტოში საიდუმლო დავალებით შეგზავნილი ჰაჯი ჯიჰანი გარნისის ქართველთა ბანაკში იმ ჭორთან ერთად მოსულიყო.

ჰაჯი ჯიჰანმა ამირსპასალარის ცალკე, განმარტოებით ნახვა ისურვა და მაშინვე წარუდგინეს მთავარსარდალს კარავში.

ჰაჯი ჯიჰანის სახელი თავისი მექარავნებისაგან იცოდა მხარგრძელმა, პატიოსან და სახელოვან დიდვაჭრად იცნობდა და მასთან საქმის დაჭერა სარგებლიანად ეჩვენებოდა.

ირანელმა დიდვაჭარმა სალამისა და მოკითხვის შემდეგ ამირსპასალარს მტრედის კვერცხისოდენა მარგალიტი მიართვა. მხარგრძელმა მარგალიტის ფასი კარგად იცოდა. ხელისგულზე დასდო თუ არა, მარგალიტი გადაგორდა და მაშინვე მიხვდა პატიოსანი თვლების მცნობი ათაბაგი, რომ მარგალიტი ობოლი იყო.

– დიახ, იშვიათი მარგალიტია, ობოლს ეტყვიან, თქვენ უკეთ მოგეხსენებათ.

– კიდევ სხვა სახელსაც უწოდებენ, თუ არა ვცდები.

– ხელისგულზე სატარებელს, თუ საგორებელს...

– ხელის-ხელ საგოგმანებს, ჩვენში ხელის-ხელ საგოგმანებს ეტყვიან, – თქვა ივანემ და წამღერებით დააყოლა:

– ვით მარგალიტი ობოლი, ხელის-ხელ საგოგმანები...

ივანეს ამ ძვირფასი ძღვენის მორთმევაში განსაკუთრებული არაფერი დაუნახავს, რადგან ადრეც იყო დაჩვეული დიდვაჭართა თუ უცხოელ

დესპანთაგან გარიგებასა თუ სახელმწიფო საქმეებზე მოლაპარაკების დროს მსგავსი საჩუქრების მიღებას.

– კარგ ფეხზე გეახელით, ივანე ბატონო, განძიდან მოსული ვაჭრები ირწმუნებიან, მონგოლები თავრეზს მოადგენო და ხვარაზმელი სულტანი, ალბათ, ვედარ დაიციდის, მალე აიკრავს აქედან გუდა-ნაზადს.

– მანამ იცადოს, სანამ არ მოსწყინდება! – ჩაიცინა ივანემ და ჭადარა წვერზე ხელი კმაყოფილებით ჩამოისვა.

კართან შანშე მანდატურთუხუცესი მოდგა. ბოდიშიც არ მოუხდია, კარვის კალთა ასწია და ხმამაღლა დაიძახა:

– გარეთ გამოდი, ბიძაჩემო, ხვარაზმელები გარბიან.

– ათაბაგო, მტერი ბანაკს სტოვებს და იყრება! – შემოჰყო თავი სვანთა ერისთავმაც.

ივანე ფეხზე სწრაფად წამოდგა, ხმაღს ხელი დაავლო, ხელის-ხელ საგოგმანები მარგალიტიც არ დაივიწყა, უბეში იგდო და გარეთ გამოვიდა. ამირსპასალარის კართან სარდლები შეგროვილიყვნენ, ყველანი გახარებული ჩანდნენ, ღელავდნენ და ერთიმეორეს ასწრებდნენ:

– უკვე დაიდრნენ ხვარაზმელები...

– კარვები აკეცეს და ჯოგი გაირეკეს.

ცხენებზე ამხედრებული ქართველთა სარდლები სათვალთვალ მალლობზე გავიდნენ და გოცებულნი დააცქერდნენ დაბლა გადაჭიმულ თვალუწვდენელ ველს.

ფეხის მტვრის სვეტი მალლა ასულიყო და ნელ-ნელა მიირწეოდა. გრძლად გაჭიმული ალალი და ჯოგი კარგა შორს გასულიყო. ბანაკში ცეცხლს აქრობდნენ და კარვებს კეცავდნენ.

– ვითომ მიდიან?.. – იჭვნეულად იკითხა ამირსპასალარმა.

– ჯანდაბის გზაც ჰქონიათ! შინ დაბრუნება და აბანოში ტანის დაბანა მელირსება, ლამის ჭუჭყმა შემჭამოს! – წამოიძახა შანშე მანდატურთუხუცესმა.

ივანემ უკმაყოფილოდ გადახედა ძმისწულს, რაღაც მკვახედ უნდოდა ეთქვა, მაგრამ თავი შეიკავა.

– ალბათ, დადევნებისა ეშინიათ და ჯარი ჯერჯერობით მიტომ არ იყრება, – დაასკვნა ბაკურციხელმა.

– ჯარი, ალბათ, ლამის სიბნელეში აიყრება. არ უნდა დავედევნოთ? – იკითხა დადიანმა.

– რისთვის დავედევნოთ, სიმდიდრე მაგათ არ ექნებათ და ქონება, არც არა მოუტანიათ და არც არა მიაქვთ რა! – ბრძანა ივანემ.

– ჯოგი ჰყავთ ურიცხვი... – შეჰბედა სვანმა ერისთავმა.

– იმ ჯოგს უფრო ურიცხვი ჯარი მისდევს და ვაითუ, არც ისე იოლად დაგვანებონ. ჯოგი შენც ბევრი გყავს, ერისთავო, გირჩევნია, ის მოიხმარო ბედნიერებაში და სიკვდილ-სიცოცხლე სასწორზე სათუოდ არ შეაგდო.

– მართალს ბრძანებს ამირსპასალარი, ჯოგისათვის ძნელი და სათუოდ ომის აკიდება არა ღირს, ღვთივ, რაკი უომრად გვეხსნებიან.

_ არა ღირს! _ თქვა ივანემ და სარდლებს გასძახა, _ ჩემს კარავში გიწვევთ ყველას, დედოფლისა და უფლისწულის სადღეგრძელოს დასალევად. ჰაჯი ჯიჰანის მორთმეული ღვინო მაქვს და ერთად დავლიოთ.

ყველანი სიამოვნებით დაეთანხმნენ. მხოლოდ ახალციხელებმა გადაულაპარაკეს რაღაც ერთიმეორეს და ამირსპასალარს სთხოვეს:

_ თუ ნებას მოგვცემს ამირსპასალარი, ჩვენ აქ დავრჩებით, მტრის მოძრაობის თვალის სადევნებლად.

_ მტრის თვალის მდევნებელი თქვენს გარდა სხვაც ბევრია, მაგრამ რაკი ჩვენთან ლხინი არა გსურთ, დარჩით, რა გაეწყობა, _ დაეთანხმა ათაბაგი. ივანემ უკმაყოფილოდ შემოაბრუნა ცხენი, დანარჩენ სარდლებს გაუძღვა და თავის კარვისაკენ გაქანდა.

სარდლები სიცილითა და მხიარული ხორხოცით მიჰყვნენ ამირსპასალარს, მხოლოდ ძმები ახალციხელები დარჩნენ სათვალთვალო მაღლობზე, მტრის საექვო მოძრაობით შინაგანად როგორღაც შემფოთებულები და დაეჭვებულები.

დაღამდა.

ბნელი, უმთვარო ღამე დადგა.

ძმები ახალციხელები მტრის ბანაკს თვალს არ აშორებდნენ, ამოდ ცდილობდნენ წყვილიადში რაიმეს გარჩევას. სიბნელეში არაფერი ჩანდა, მაგრამ ხმაურისა და ჩოჩოლის, ცხენების ჭიხვინისა და ცეცხლის მიხედვით უფრო იმის ფიქრი შეიძლებოდა, რომ მტრის ბანაკს კი არ აკლდებოდა, ემატებოდა, ჯარი კი არსად მიდიოდა, წინა ხაზისაკენ მოძრაობდა.

შალვამ სიფრთხილისათვის ცეცხლი ყველგან ჩააქრობინა, წინა ხაზზე დარაჯად მდგარი გუმაგების სიფხიზლე შეამოწმა და კარავში მაინც შემფოთებული დაბრუნდა.

_ მეეჭვება, რომ ხვარაზმელები მიდიოდნენ, _ ხმამალა გაამხილა თავისი ეჭვი შალვამ.

_ წამსვლელები ჩუმად გაიპარებოდნენ, ბოლოს წინა ხაზიდანაც მოხსნიდნენ ჯარს, ეგენი კი, როგორც ეტყობა, ჯარს წინ სწევენ და უმატებენ.

_ როგორა გგონია, მოსაჩვენრად, თვალის ასახვევად და ჩვენს შესაცდენად აჰყარა სულტანმა ბანაკი?

_ სარწმუნოდ ვერ ვიტყვი, მაგრამ უფრო ეგრეა.

_ თუ ასეა, დილით შემოგვიტევენ ხვარაზმელები. მაგრამ ვნახოთ... დილაამდე ცოტა მაინც გამოვიძინოთ. მთავარსარდალი რომ დამიჯერებდეს, ხვალ დილას ერთი თვითონ ჩავუხტებოდი, ავშლიდი და გავფანტავდი, მაგრამ მხარგრძელთან ჩემი სათქმელი ვერ მითქვამს. ვიცი, მაშინვე იმას წამომძახებს, მტრის შეტევას მიტომ იჩქარი, შენს საპატრონო დვინს არბევნო. დვინი ჯანდაბას, მაგრამ ამდენ ხანს უმოქმედოდ დგომით ხვარაზმელებს ჩვენს ძლიერებაში ეჭვს აღვუძრავთ, ნახავთ, თუ თვითონ არ დაგვასწრებენ და არ შემოგვიტევენ.

- _ გუმაგები ფხიზლობენ?
 - _ ფხიზლად არიან, ზოგი დაღლილი გამოვაცვლევიე...
 - _ ჩვენი მიუსვლელობა ეწყინებოდა ივანეს, ზვიადია და ეჭვიანი.
 - _ არა უშავს, ხვალ გავსწორდებით, ახლა კი წავიძინოთ... ძილი ნებისა.
 - _ ძილი ნებისა...
- ძმებმა თავი მისდეს და მაშინვე დაეძინათ.

ჯალალედინი ჯარის დაწყობასა და საომარ მომზადებას ხელმძღვანელობდა, თან თვალი და ყური ქართველთა ბანაკისაკენ ჰქონდა. ერთხანს კოცონები ენთო ქართველთა მთავარ ბანაკში. სიმღერისა და ტაშის ხმა ცას სწვდებოდა. როგორც მოენეებისაგან შეიტყო, ჰაჯი ჯიჰანი მტრის ბანაკშია, სულტნის ჯაშუში, ჩანს, საქმეს აკეთებს. ჯალალედინის ცბიერებამაც გასჭრა, მტერს, ეტყობა, სჯერა, რომ ხვარაზმელები ნამდვილად იყრებიან და უომრად ტოვებენ გურჯების ქვეყანას. ალბათ, სულტნის გაქცევას ზეიმობენ ახლა ქართველები, მაგრამ აჩქარებულან და ხვალ ნახავენ, ვინ გაიქცევა და ვინ იზეიმებს გამარჯვებას.

მალე მტრის ბანაკიც დაწყნარდა, კოცონები ჩაქრა და სიმღერა მიწყდა. სულტანი თადარიგს მორჩა, თავისი კარავი შუაში დაადგმევინა, ცხენოსანი ჯარის განლაგებაში. ემირებს უბრძანა, მორიგეობით ეფხიზლათ გათენებამდე.

შემდეგ ილოცა და დაიძინა.

ემირებმა ბრძანება შეასრულეს.

ღამე რომ მიიწურა და სულტანი ფეხზე წამოდგა, ყველა ფხიზლად დახვდა.

ჯალალედინმა ემირები მოიხმო და სიტყვით მიმართა: _ ეტყობა, მტერს ომი არა სურს და გადამწყვეტი ბრძოლის დაწყებას აჭიანურებს. ეს მათთვის ხელსაყრელია, რადგან თავიანთ სახლში სხედან, ჩვენ, ურწმუნო გურჯებს გარდა, სხვაც ბევრი საქმე გვაქვს და ამიტომ უქმად აქ დგომა ხელს არ მოგვცემს. მტერი ჩვენს იერიშს არ მოელის. ამიტომ, ჩვენ გადავწყვიტეთ, ვისარგებლოთ მათი უზრუნველობით, მოულოდნელად შევუტოთ და მეხივით დავატყდეთ თავს ყოველი მხრიდან. თუ ქართველებიც თავის მხრივ ეცდებიან შემოგვიტიონ, ისრის სეტყვით შეაჩერეთ მათი შემოტევა. გახსოვდეთ მაჰმადის სიტყვები: «ოცმა ძალოვანმა კაცმა ორასი ურჯულო დასცეს. ასმა ათასი გააქციოს, რადგანაც ურჯულოები თვითონ ღმერთს მოუცია ჩვენთვის შესამუსრავად». მაშ, ვეკვეთოთ ურწმუნოებს, ალაჰი ჩვენთან არის, იგი ბრძენია და უძლეველი!..

ცა მტრედისფრად იცრიცებოდა.

ცივმა ქარმა დაუბერა. მძინარ თორელს ტანზე ბუსუსები აეშალა, კბილი კბილს დააცემინა და თითქო წელში გადატეხაო, ერთი გააზმორა. გააზმორა და გამოეღვიძა.

ხეირიანად თვალის გახელა ვერც მოასწრო, რომ დაგუდული გმინვა ჩაესმა:

_ ვაი-იი-მეე!..

თურმანი წამოხტა, ყური მიუგდო, ხმლის ჩახაჩუხი და დაგორებული ქვების ზრიალი მოესმა. უცებ ბუკ-ნადარის ხმამ გააყრუა იქაურობა. თორელმა ახალციხელების კარვისკენ გაიხედა. ივანე ცხენზე ჯდებოდა და თან განკარგულებას იძლეოდა. შალვა ცხენს მოაქროლებდა, ხმაღს ჰაერში იქნევდა და ზარიანი ხმით რაღაცას გაჰკვიოდა.

ერთ წამში წინამბრძოლთა მთელი ბანაკი ფეხზე იდგა.

– ალაჰ! ილ ალაჰ!

გაჰკვიოდნენ ხვარაზმელები და მთებისკენ მოიწევდნენ გინებითა და წყევლა-კრულვით. ქარაფებზე ფეხს ძლივს იკიდებდნენ, ბუჩქებსა და კლდეებს ეპოტინებოდნენ და თან ხმაღს იქნევდნენ.

როგორც ეტყობოდა, აღმართის დიდი ნაწილი უჩუმრად, მტრისთვის შეუმჩნევლად ამოევლოთ და ახლა ისრის სეტყვის საფარქვეშ მალლობზე ამოდიოდნენ. ცხვრის ფარასავით შეჰფენოდნენ და მთლიანად დაეფარათ ციცაბო ფერდობები.

ხვარაზმელთა მარცხენა ფრთა ჯალალედინის ძმის ყიასედინისა და ორხანის მეთაურობით გააფთრებით აწვებოდა ახლადაშლილ, ჯერ კიდევ ძილისაგან გამოუფხიზლებელ ქართველებს.

მარჯვენა ფრთა ისარს აყრიდა და ისრის ეს ტყორცნა გაუვალი კედელი იყო, ისრის წვიმისა თუ სეტყვის მთლიანი კედელი, სადაც ერთი წერტილიც არ რჩებოდა დაუცხრილავი და ისარმოუხვედრელი.

ქართველებიც მარჯვედ აყრიდნენ ისარს. მაგრამ ბევრნი იყვნენ ხვარაზმელები და მათი ისარი გაუვალ საფრად მიუძღოდათ წინ ორხანისა და ყიასედინის ქვეით ჯარისკაცებს.

ახალციხელების მოვარდნა და მთაზე ხვარაზმელების შეჩერება ერთი იყო. ბრძოლა შენივთდა და ხელჩართულ კვეთებაში ქართველებმა თანდათან დასწიეს მთის ნაპირისაკენ ამდენი ვაი-ვაგლახით ამოსული ხვარაზმელები. შალვას გამოცდილ თვალს არ გამოჰარვია მტრის უეცარი შედრეკა, «ჰკა მაგასო!» – შესძახა და მთელი ძალით იქით მიაწვა, სადაც მტრის კედელი შეირყა, შექანდა და უკან გადაიხარა.

ყიასედინი და ორხანი ამაოდ უყვიროდნენ მეომრებს. ხვარაზმელთა მარჯვენა წვერი თანდათან მოშორდა მალლობს, დამოკლდა და ფერდობებზე დაცურება იწყო.

მაშინ მარცხენა ფრთა ამოიმართა მალლობზე და ახლა თითქმის ზურგში დაუშინეს ქართველებს ისრის სეტყვა.

შალვამ ივანეს გასძახა. უფროსი ძმა ქართველთა მოზრდილი რაზმით მარცხნივ შემობრუნდა და შეტევაზე გადმოსულებს ეკვთა. აქაც ხელჩართული ბრძოლა გაიმართა და აქაც შეყოვნდა მტრის მოწოლა. ორივე წვერი მალლობზე ფეხის მოსაკიდებლად იბრძოდა. ქართველები ცოტანი იყვნენ, მაგრამ კარგად იყენებდნენ თავიანთი განლაგების უპირატესობას, ზემოდან აწვებოდნენ და ადვილად უძკლავდებოდნენ ქვემოდან დიდი წვალეებით ამოსულ ხვარაზმელებს.

მაგრამ აი, მტრის შუაგული, უმთავრესი ჯარი დაიძრა თავათ ჯალალედინის წინამძღოლობით. თავით ფეხებამდე შეიარაღებული ცხენოსანი ლაშქარი ზათქითა და ყურისწამლები გრიალით წამოვიდა. შალვამ უკან გაიხედა. ქართველთა მთავარი ბანაკიდან ჩამიჩუმი არ ისმოდა, მშველელი არ ჩანდა. მერამდენეჯერ აფრინა კაცი მხარგრძელთან ამბის შესატყობინებლად და სასწრაფოდ მოშველების სათხოვნელად!

მთავარი იყო, ეს მძიმედ შეიარაღებული, მქროლავ რამებზე ამხედრებული მტერი არ ამოსულიყო მაღლობზე, თორემ მერე მისი გამკლავება ძნელი იქნებოდა. თავისი ისედაც მცირერიცხოვანი ჯარიდან საუკეთესო ნაწილი შუაში დააყენა შალვამ და ახლა დაბლა დაემვა ისრისა და დაგორებული ქვების სეტყვა.

ერთხანს გაუძლეს ქართველებმა დასვენებული, მრავალრიცხოვანი მტრის მოძალეხას, მაგრამ მტრის ცხენოსანი ლაშქარი ყოველმხრივ გაიშალა, შუაგულს მოაწყდა და ფრთებიდანაც შემოუარა.

მეტი გზა აღარ იყო, ქართველებს უკან უნდა დაეხიათ, რომ მტრის გარემოცვაში არ მოხვედრილიყვნენ. ბრძოლით, ფარ-ხმლის ჩახაჩუხით დაიწყეს ნელ-ნელა, მაგრამ მწყობრად უკანდახევა მესხებმა.

ივანე გაცეცხლებული მიეჭრა შალვას:

– რას გვიპირებენ ჩვენები, რამდენი კაცი გავუგზავნე მხარგრძელს და ჯერ ბაიბურიც არ ისმის!

– მეც კაცზე კაცს ვუგზავნი, მაგრამ ჯერ არაფერი ჩანს! – ხმლის ქნევით გამოსძახა შალვამ.

– ასე ჩვენ გავგჟღელტენ! ჩვენი თავი ჯანდაბას, მაგრამ თუ ამ მაღლობზე ფეხი მოიკიდეს, მერე ომი წაგებულება. მე თვითონ მივუხტები მხარგრძელს და შეტევაზე ძალით წამოვიყვან! – ესა თქვა ივანე ახალციხელმა, ცხენი უკან მიატრიალა და მთავარი ბანაკისაკენ გაფრინდა.

მტერი კი აწვებოდა მესხებს, უფრო მეტი დაჟინებითა და გააფთრებით. მაღლობი თანდათან ივსებოდა მტრის ქვეითითა და ცხენოსნით და ისედაც ერთი მუჟა ქართველობა ნელ-ნელა იძირებოდა, იკარგებოდა ხვარაზმელთა სიმრავლეში.

შალვა ახალციხელს ჯერ გული კიდევ მაგრად ჰქონდა. ქართველთა მამველის შეგვიანებას ივანე მხარგრძელის სამხედრო ხერხით ხსნიდა, – ალბათ, ამირსპასალარს უნდა, რაც შეიძლება მეტი მტერი ამოიტყუოს მაღლობზე, რომ შემდეგ ერთბაშად დაარტყას და ჩვენც მაშინ გვიხსნის დაღუპვისაგან, იმედი რომ დაკარგული გვექნებაო. განა ასე არ ჰქნეს ქართველებმა თამარის დროს, შამქორის სახელოვან ბრძოლაში? იქაც ხომ კინაღამ მოსპო მტერმა ქართველთა მეწინავე ჯარი და სწორედ მაშინ მოუსწრო მამველმა ლაშქარმა, როცა ბრძოლის ბედი ბეწვზე ეკიდა.

ალბათ, ასე ანგარიშობს მხარგრძელიც, მაგრამ...

მაგრამ უკვე ყველაფერი თავდება, მტერი მაღლობზე გაიშალა და გაბატონდა, ერთ მუჟა ქართველებს ღონივრად უჭერს მარწუხებს და ნელ-

ნელა თოვლივით დნება, ილევა ქართველთა წინამბრძოლი ჯარი. უკანასკნელ ამოსუნთქვამდე იქნევენ ხმალს და გმირულად ეცემიან მესხეთის რჩეული ვაჟკაცები.

ივანე მაინც სადღა დაიკარგა, შალვას ძმა, კარის ამირა, ნუთუ მთავარ ბანაკამდე ვერც მან მიაღწია? იმან ხომ იცის წინამბრძოლთა განსაცდელი. მხარგრძელი რომ არც წამოყვეს, დანარჩენ ქართველობას აშლის და მტერზე საიერიშოდ გამოუძღვება...

შალვას ცხენს შუბი ამგერეს ფაშვში. ცხენი წაიქცა და მხედარმა ძლივს მოასწრო გადმოხტომა. ქვეითად განაგრძობს შალვა ბრძოლას, მთვრალივით იქნევს მარჯვნივ და მარცხნივ ხმალს და საითაც ის მიბრუნდება, მტერი უკან იწევს. არც ხედავს შალვა, ვისა კლავს, ვის ხვდება მის მიერ მოქმედი ხმალი, რეტდასხმულივით ტრიალებს სისხლისაგან გაბრუებული ახალციხელი, ხმალს გამეტებით ურტყამს და თან ფიქრი არ ეშვება.

– ნუთუ, გაგვწირა მხარგრძელმა?! ნუთუ, ახალციხელების შურით და მტრობით ჩაიდენს ათაბაგი ამოდენა დანაშაულს ქვეყნისა და ხალხის წინაშე?! მაგრამ სხვა სარდლები? შალვას მამიდაშვილი ვარამ გაგელი, მისი ძველი თანამებრძოლი, მისი ჭირისა და ლხინის მოზიარე ვარამ გაგელი როგორღა გასწირავს?! ან ეგარსლან ბაკურციხელი, მისი ერთგული და მინდობილი ვაჟკაცი, ან დადიანი ცოტნე – კაცი ქველი და პატიოსანი, ან... – შალვას თვალები აუბრჭყვიალდა. მოიხედა, გვერდით თურმან თორელი ედგა, ისიც გააფთრებით იქნევდა ხმალს.

– შალვა, გაფრინდი მთავარ ბანაკში! ან მოჰკალი ათაბაგი, ან ჯარი მოაშველებინე! – შესძახა თორელმა.

მთავარი ბანაკისკენ გაფრენა უკვე აღარ შეიძლება, ვინმე ზურგში სტყორცნის ისარს და მერე იტყვიან, შალვა ახალციხელი ბრძოლის ველიდან გაიქცაო. შალვა ჯერ არც ბრძოლის ველიდან გაქცეულა და არც ზურგში ყოფილა დაჭრილი არასოდეს...

– შალვა! თავს უშველე! – განწირულად შეჰყვირა თურმან თორელმა და ახალციხელი წამით გამოფხიზლდა.

ცოცხლად დარჩენილმა მესხების მცირე რაზმმა მტერს ზურგი აქცია, გაქცევა თუ რკალიდან გასვლა სცადა. მტერმა დაინახა, რომ დროშა უკან მიიქცა, ყველას თავი ანება და მას მიჰყვა ჩეხვითა და კაფვით.

ცოტა ხნის მერე დროშა შეტორტმანდა, დაეცა.

შალვამ მარცხენა მკლავზე წაივლო ხელი. მკლავიდან სისხლი სქლად მოჟონავდა.

სისხლიანი ხელი სახეზე მოისვა ახალციხელმა და თორელს საშინელი სახით მოხედა:

– სისხლი წაისვი სახეზე, მტერს მკვდარი ეგონები! – შესძახა თორელს და თავათ მოცელილივით დაეშვა მკვდრებს შორის.

თორელი დაიხარა, დაუფიქრებლად ჩაჰყო ხელი სისხლის ტბორში და სახე მანაც ერთიანად სისხლით მოისვარა. ისიც მკვდარივით დაწვა მკვდრებს შორის.

მირბიან მტრის ქვეითები, ყიჟინითა და ყივილით, მიჰქრიან ცხენოსნები, ზარითა და კივილით, მკვდარსა და ცოცხალს აღარავინ არჩევს. აგერ, ვიღაცამ ფეხით გადაუარა თორელს და ხმაჩახლეჩილი ყვირილით გაექანა წინ. აგერ, ცხენის ფლოქვებმა გაიელვა, ხორცის ნაფლეთები აჰყარა და სისხლის შხეფები ნაპერწკლებივით ბლუჯად გაჰფანტა, კიდევ კარგი ზედ არ გადაუარა. მირბიან სულმოუთქმელად, ხმაჩახლეჩილი ყვირილით, ვაშას გრიალითა და ალაჰის ყივილით.

მიჰქრიან... მიჰქრიან ხმლების ქნევით, უზანგების ჟღარუნით, გაბმული კივილითა და გამაყრუებელი ყიჟინით. კაცთა ქლოშინი და ცხენთა ქმენა ერთმანეთში არეულა. როდის შეჩერდებიან, როდემდის უნდა ირბინონ და იქროლონ? ამდენ ხანს ქართველთა მთავარ ბანაკს გასცდებოდნენ კიდევაც, ჩანს, იქ არ შეჩერებულან, ბრძოლა არ ყოფილა, თორემ ეს ყიჟინა და ხმაური ასე შორს არ იქნებოდა.

ახალციხელი ხმაურის ძალით საზღვრავს მტრის სიშორეს: იქ რომ ბრძოლა ყოფილიყო, სხვა ხმა მოვიდოდა მის ყურამდე, ომის ყიჟინა, ხელჩართული ბრძოლის გუგუნნი სხვა არის, დაგუდული და შეგუბებული.

ეს ხმა გამარჯვებულთა ყიჟინასა ჰგავს, მტერსდადევენებული ჯარის ვაშასა და ზარდამცემ კივილს.

მაშ, რაღაც მოხდა ქართველთა მთავარ ბანაკში, რაღაც აუხსნელი, დიდი უბედურება დატრიალდა და ეს უბედურება მარტო ოთხი ათასი მესხის სიცოცხლედ კი არ დაუჯდება საქართველოს, იგი უფრო დიდი და საშინელი უბედურების დასაწყისი იქნება.

მზე სულ მაღლა ასულა ცის შუაგულზე. საშინლად ახურებს აგვისტოს ცხელი მზე, სხივებით ჩხვლეტს თორელსა და დახუჭულ თვალებში უღიტინებს.

ხმაური მისწყდა, მხოლოდ დაჭრილების კვნესაღა ისმის.

– რისთვის გადავირჩინეთ თავი, შალვა, ვაი, ამისთანა სიცოცხლეს! – ამოიჩურჩულა თვალდახუჭულმა თორელმა.

– არა, თურმან, ახლა გადარჩენა ისე მინდოდა, როგორც არც ერთ ომში, როგორც არასდროს! ისე არ მინდა მოვმკვდარიყავი, ჩვენი განწირვის მიზეზი არ გამეგო, თუ როგორმე სიკვდილს ან ტყვეობას გადავურჩი, მიწაში რომ ჩაძვრეს, იქ მოვძებნი მოღალატესა და ქვეყნის გამყიდველს, კბილებით დავკლავ ჩვენს დამღუპველს, ვინც უნდა იყოს იგი, სულერთია, მხარგრძელი იქნება თუ...

ახალციხელმა ბრაზისაგან ტუჩებზე იკბინა, ერთი ისე ამოიოხრა, თითქო ქვეყნის ჯავრი ამოაყოლაო და გაყუჩდა.

წინამბრძოლების სიმტკიცე რომ გასტეხეს, ხვარაზმელებმა მაშინვე ქართველთა მთავარ ბანაკს შეუტყეს. ბანაკი აიშალა, აირია და ერთბაშად ზურგი აჩვენა მტერს. მეთაურები ამაოდ ცდილობდნენ გაქცეული ლაშქრის შეკავებასა და შემობრუნებას.

მეხდამტყდარივით გარბოდნენ შეშინებულები, ერთიმეორეს ასწრებდნენ და ხნარცვებსა და უფსკრულებში ცვიოდნენ გულგახეთქილები. ხვარაზმელი ცხენოსნები ყიჟინითა და ზარით მისდევდნენ გაფანტულსა და დამფრთხალ ქართველებს, უწყალოდ კაფავდნენ ხმლით, ხევში ყრიდნენ და ზოგსაც ტყვედ მოერეკებოდნენ.

ჯალალედინმა ბრძანა, დევნა მანამ გაეგრძელებინათ, ვიდრე ქართველების ჭაჭანება სადმე შეხვდებოდათ.

ოთხი ათასზე მეტი ქართველი იწვა ბრძოლის ველზე, ხრამებში ჩახოცილებსა და გზაში აკაფულებს ხომ ანგარიში აღარ ჰქონდა. მტერმა უამრავი ტყვე იგდო ხელთ და ნადავლიც ურიცხვი დარჩა.

ჯალალედინმა ბრძოლის ველს ცხენით შემოუარა, აწ უკვე დაშლილ ქართველთა გამაგრებულ ბანაკს დააცქერდა და თავი გადააქნია:

– ამგვარი გამარჯვება მხოლოდ განგებას შეეძლო მოენიჭებინა. ამოდენა მტრის დამარცხება და ასეთი სიმაგრის აღება ადამიანის ძალ-ღონეს აღემატება.

ბრძანა სულტანმა და ალაჰს მადლობა შესწირა ძღვევის მინიჭებისათვის.

მერე მალლობზე კარავი გაამართვინა და ალაფისა და ტყვეების მისათვლელად დაბრძანდა.

ნაშუადღევს მზე თონესავით ახურებდა. ბუზები ეხვეოდნენ თორელს სახეზე, უწყალოდ კბენდნენ. ხელი რა არი, უბრალოდ ხელსაც ვერ იქნევდა მოსაგერიებლად, ვერც სახის ნაკვთებს არხევდა და იტანჯებოდა ვაჟკაცი.

აგერ, ერთი ბუზი უღვაშზე დააფრინდა, დასეირნობს და უღიტინებს. რად უღირს ახლა თორელს ერთი ხელის აქნევა ან მაგრად დაცემინება, მაგრამ მას შემდეგ, რაც ომის ყიჟინა მისწყდა, ბრძოლის ველზე ხვარაზმელები გამოეფინენ, მკვდრებს ძარცვავდნენ და ცოცხლებს ატყვევებდნენ. თორელის ხელის ერთი აქნევა კი არა, უბრალო შერხევაც ამ მძარცველების ყურადღებას მიიპყრობს, თავათაც დაიღუპება და შალვასაც განსაცდელში ჩააგდებს.

თორელზე ნაკლებად როდი იტანჯება ახალციხელი. მასაც ისე დახვევია ბუზი, თითქო თაფლი ეცხოს პირ-სახეზე. უწყალოდ კბენენ და აწამებენ, მაგრამ შალვა უდრტვინველად იტანს და უძლებს. მოჭრილ ხესავით წევს ამოდენა ვაჟკაცი მკვდრებს შორის და მართლა მკვდარივით გამოტოლი, არათუ ინძრევა, ისე შეკავებულად სუნთქავს, თითქო სულაც არ ითქვამდეს სულს.

მძარცველებმა აუარ-ჩაუარეს. აგერ, ვიღაცას სატევარი ააგლიჯეს, რომელიღაცას ტანთ გახადეს და ფეხთ გააძრეს.

ის იყო უნდა შებრუნებულიყვნენ და გაცლოდნენ, რომ ერთ მათგანს ფეხი წამოედო, წინ გაიწია და დაეცა. დაცემულის თავი ზედ ახალციხელის მკერდზე აღმოჩნდა, სანამ წამოიწევდა, გაოცებით დაალო პირი: მის ყურქვეშ მძლავრ მკერდს აჩქარებით გაჰქონდა ბაგაბუგი.

თორელმა ოდნავ გამოიჭყიტა ძლივს გახსნილ წამწამებიდან: ახალციხელის მკერდზე პირტიტველა ბიჭი გატრუნულიყო, ყურს უგდებდა ქართველი ვაჟკაცის გულისმგერას და თან ხელით ანიშნებდა თავისიანებს, მასთან მისულიყვნენ.

– რა იყო, ცოცხალია, განა?

ჰკითხა მოახლოებულმა ხვარაზმელმა, პასუხს არ დაელოდა, ახალციხელის ბრგე სხეული თავით ფეხებამდე შეათვალიერა და თავის ქნევით თქვა:

– რამოდენა მხეცია! დიდებული უნდა იყოს, ჩაცმულობაზე ეტყობა.

– ცოცხალია! ნამდვილად დიდი დიდებულია! – დაასკვნა პირტიტველამაც, მუხლებზე წამოიწია და ახალციხელს დააკვირდა.

– სადღაც შემხვედრია ეს კაცი... სადღაც მინახავს... ეს ნახმლევიც მეცნობა მარცხენა ლოყაზე... – თავისთავს ელაპარაკება პირტიტველა, შავგვრემანი ბიჭი, თავისი კალთით გადასწმინდა ბიჭმა სისხლი სახიდან და რომ დახედა, გველნაკბენივით შეხტა, შემინებულმა უკან დაიწია.

– შალვა ახალციხელი! ალაჰის მადლმა, ის არი, შალვა ახალციხელი!

წამოიყვირა შემინებულმა, მაგრამ უზომოდ გახარებულმა.

– ვინ არიო? – ჩაუგდებლად იკითხა მეორემ.

– ქართველთა უდიდესი სარდალი და დიდებული, მათი მეფის მარჯვენა ხელი – შალვა ახალციხელია!

– გამიგონია, – თქვა მეორემ, – გამიგონია, მაგრამ ვითომ არ ცდები? ნამდვილად ის არი?

– არ ვცდები, ალაჰის მადლმა, როგორ შემეშლება, მაგან გააპო შუაზე მამაჩემი ნახჩევანში, ციხის აღებისას.

– მერე შენ იქ რა გინდოდა?

– მთელი ჩვენი ოჯახი იქ იყო, მტერს ისე მალე არ ელოდა და მამამ გახიზვნა ვერ მოასწრო. ჩემი თვალით ვხედავდი, როგორ მოუქნია მამაჩემმა ხმალი, მაგრამ ამ რჯულმადლმა დაასწრო, თავში დაჰკრა და შუაზე გაჰკვეთა.

– ძვირფასი ქამარი არტყია, მაგრამ ქარქაში რომ ცარიელია? – დანანებით ამბობს ხვარაზმელი, რომელიც ტყვის ტანსაცმელსა და იარაღს უკვე მუშტრის თვალთ ათვალიერებს.

– ხმალი აგერ გდია, ვადაში გადამტყდარი, – თვალთ ანიშნებს ნახჩევანელი ბიჭი. – გამიგონია, ეგ ისეთი მეომარი ყოფილა, ომიდან ისე არ გამოვიდოდა, ორი ხმალი მაინც რომ არ გასტეხოდა, თურმე.

ნახჩევანელი ბიჭი გრძელ ბაწარს თუ ღვედს იღებს და ხვარაზმელს თვალთ ანიშნებს. ხვარაზმელი რაღაცას არ ეთანხმება, ხელებით ედავება, მაგრამ ეტყობა, ნახჩევანელმა დაარწმუნა, რომ ქართველთა ესოდენ სახელოვანი სარდლის სულტანთან ტყვედ მიყვანა გაცილებით მეტ სარგებელს მოუტანდა ორთავეს, ვიდრე მისი გამარცხვა და მოკვლა.

ხვარაზმელი დაჰყვა ნახჩევანელის ნება-სურვილს, და შალვამ იგრძნო, რომ ხელებზე რაღაც მჭიდროდ ეხვევა და თანდათან უჭერს. ერთი რომ წამოიწიოს, იმ ბუხებივით გაჰფანტავს საცოდავ მმარცველებს, მაგრამ რა აზრი აქვს მათგან

დასხლტომას, სულ ერთია, აქედან მაინც ვედარსად წავა და ხვარაზმელთა ტყვეობას ვერ გადაურჩება ახალციხელი.

ისე შეკრეს, ერთიც არ განძრეულა შალვა. ის იყო, უნდა წამოეყენებინათ და წინ გაეგდოთ, რომ იქვე გვერდით ვიღაცას ოხვრა აღმოხდა. მოიხედეს, სისხლით სახემოსვრილი მეორე ქართველი ტკივილისა თუ გამწარებისაგან ტუჩებს იკვნეტდა.

მძარცველები უსიტყვოდ, ისევ თვალებით გამოელაპარაკნენ ერთიმეორეს და უსიტყვოდ მორიდდნენ.

ცოტა ხნის შემდეგ ორივე თორელი ხელგაბაწრული მიჰყავდათ სულტნის კარვისკენ.

სულტნის კარვის წინ უამრავმა ტყვემ ჩაიარა. ჯალალედინი დიდებულებს თითო-ოროლა სიტყვას ეუბნებოდა, მათ ვინაობას კითხულობდა და საპყრობილეში გასაგზავნად ცალკე უყრიდა თავს. უბრალო მეომრებს, უგვაროებსა და მდაბიო ღარიბებს, ადარბადაგანის ბაზრებისაკენ გზავნიდა გასასყიდად.

სულტანთან მისი ძმა ყიასედინი მივიდა.

– ქართველთა უდიდესი დიდებული და მეფის მარჯვენა ხელი შეუპყრია ჩემს მიძიშვილს, – მოახსენა ხმადაბლა.

– რომელი დიდებული? – გამოცოცხლდა ჯალალედინი.

– შალვა ახალციხელი, ქართველთა მეფის ვაზირი და უპირველესი სარდალი.

ახალციხელის გაგონებაზე ჯალალედინის ამაღაში მყოფმა ადარბადაგანელებმა ხელები ცისკენ ალაპყრეს.

– დიდება ალაჰს!

– ალაჰი დიდია და მუდამ ასე სამართლიანად მიაგებს სამაგიეროს ბოროტსა და ურჯულოს!

აღმოხდათ გახარებულებს.

ათაბაგ უზბეგის ერთი ვაზირყოფილთაგანი სულტანს მიეახლა, მუხლზე დავარდა და შეევედრა:

– სამაგიერო მიაგე, ხელმწიფევ, ახალციხელს. ეგ იყო ურწმუნოთა შორის უსასტიკესი, მუსულმანთა შემჭირვებელი და გამმწარებელი!

– ძლიერი მეომარი იყო, განა?

იკითხა ჯალალედინმა.

– ძლიერი, უძლეველი მეომარი! – დაუმოწმა ნავაზირალმა, – მაგრამ მარტო ბრძოლის ველზე როდი იყო ეგ გიაური სასტიკი და ულმობელი! ერთხელ ჩემმა პატრონმა, ათაბაგმა უზბეგმა წარმგზავნა ქართველების წინაშე ელჩად. მეფესთან არ შემიშვეს და შალვამ მიმიღო, როგორც მეფის ვაზირმა. მე თავაზიანად გადავეცი ათაბაგის თხოვნა, ხელი აეღოთ ადარბადაგანის რბევასა და მუსულმანების შევიწროებაზე, რადგან მორწმუნეთა მეუფე ალი ამ ხალხის შვილი იყო. ახალციხელმა სიტყვის დასრულებაც არ მაცალა, წვერში ხელი წამავლო და მიყვირა, თავათ ალისაც ასევე დავაგლეჯდი წვერს, ხელთ რომ

ჩამვარდნოდა, თქვენ ყველანი ურჯულოები ხართ, უწმინდურები და ღვთისმგმობლები, თქვენი სინსილა უნდა გაწყდეს, თორემ საქართველო ვერ მოისვენებს.

ჯალალედინმა შუბლი შეიჭმუნა, ეტყობოდა, გააბრაზა ვაზირის ნაამბობმა.

– მოდის!..

– მოჰყავთ...

შეიქნა ჩურჩული და სულტანმა იქით გაიხედა, საიდანაც ტყვეები მოედინებოდნენ.

გახედვისთანავე გაეღიმა და შუბლი გაეხსნა: პირტიტველა ბიქს წინ ტანბრგე ბუმბერაზი გაეგდო; ახოვანი ტყვე თავდახრილი მოაბიჯებდა, ხელები ზურგზე ჰქონდა ბაწრით გაკრული და იმ ბაწრის ბოლო ყიასედინის ნახჩევანელ ძიძიშვილს, პირტიტველა ბიქს ჩაებლუჯა ხელში.

მართლაც, სასაცილო სანახაობა იყო, დევისოდენა კაცი თითისტოლა ბიქს მოჰყავდა შეპყრობილი.

მათ უკან თორელი მოაბიჯებდა, ისიც ხელგაბაწრული.

თორელს ახმახი ხვარაზმელი მოსდევდა, თვალს აქეთ-იქით აცეცებდა და ბაწრის ბოლოს ორივე ხელით ისე მაგრად ჩაფრენოდა, ეტყობოდა, მთელ თავის მომავალს იმ ტყვის ფასზე ამყარებდა.

ახალციხელი სულტანს მიუახლოვდა. შეჩერდა.

– სად არი შენი უძლეველობა, რომლითაც ასე ამაყობდი? სად არი შენი ბასრი ხმალი, რომელსაც ცეცხლს აყრევიანებდი, ან მახვილი რა უყავ, რომლითაც კლდეს აპობდი თურმე?!

მიმართა ჯალალედინმა შალვას და სახეზე ღიმილი აუთამაშდა. ამ ღიმილით ბედის სიმუხთლესა და სოფლის დიდების ამაოებას უფრო დასცინოდა სულტანი, ვიდრე დამარცხებული გმირის უღონობას. თავათ უბადლო მეომარი ჯალალედინი ღირსეულად აფასებდა მტრის ვაჟკაცობას და ახლაც, როცა ამ სახელოვანსა და დიდებულ მებრძოლს ხედავდა პატივაყრილსა და დამცირებულს, სადღაც თავისთავზედაც ფიქრობდა: რამდენჯერ შეიძლებოდა თავათაც ამ ყოფაში ჩავარდნილიყო, რამდენჯერ გადარჩენია ბეწვზე ტყვეობასა და მტრისაგან დამცირებას!

– ომი ნარდის მღერასა ჰგავს, დიდებულო ხელმწიფევ! – თავდახრით მოახსენა მწარედ გაღიმებულმა ახალციხელმა. – ხან მოიგებ და ხან წააგებ, ხან ერთის ბედი სჭრის, ხან მეორესი. გუშინ ჩვენი ვარსკვლავი ბრწყინავდა, დღეს შენ მოგცა განგებამ ძლევა და შენი ვარსკვლავი გააბრწყინა ბედნიერად.

სულტანს მოეწონა ახალციხელის ნათქვამი. უბედურების ჟამს შალვას სულიერი წონასწორობა არ დაეკარგა და გულგრილად უყურებდა მას, რისი თავიდან აცილებისთვისაც ასე თავგანწირვით იბრძოლა, მაგრამ რისი გამოსწორებაც უკვე აღარ შეიძლებოდა.

აი, ასეთი მტკიცე ხასიათის ვაჟკაცები ახდენენ სასწაულებს, ხასიათის ამგვარმა სიმტკიცემ ააღებინა ხელახლა ხმალი ჯალალედინსაც, როცა მტერს

სინდის ტალღებში დაუსხლტა და ყველაფერი თითქო საბოლოოდ წაგებული ჩანდა. და განა მარტო სინდთან?

ჯალალედინი დაფიქრდა: ქართველებს მხოლოდ ერთ დიდ ბრძოლაში სძლია და მათი ძლიერება, ალბათ, საფუძვლიანად შეარყია. მაგრამ ქართველთა სატახტომდე, დედაქალაქ თბილისამდე ჯერ კიდევ გრძელი და ძნელი გზა არის, გურჯების ქვეყანა ღონიერი და მდიდარია, ისინი კიდევ შეკრებენ დიდ ლაშქარს და სულტანსაც არა ერთი მძიმე ომის გადახდა დასჭირდება მათი წინააღმდეგობის გასატეხად ვიწრო ხეობებსა და მიუვალ მთებში.

მიზნის მისაღწევად ხომ მარტო ხმალი არ მოუცია ღმერთს და სადაც ალაჰის მახვილი არა სჭრის, იქნებ იქ ეშმაკის ჭკუამ გასჭრას! ორივე შემთხვევაში ქართველთა უპირველესი სარდლისა და ვაზირის სამსახური და თანდგომა ფასდაუდებელი იქნება ჯალალედინისათვის და...

სულტანმა გადაწყვიტა, ახალციხელისათვის სიცოცხლე ეჩუქებინა. შესაფერისი პატივი მიეგო და თავის სამსახურში გადაებირებინა.

– გაუხსენით ხელები! – ბრძანა სულტანმა.

მაშინვე რამდენიმე კაცი მიცვივდა და ახალციხელს ხელები გაუხსნეს.

ახალციხელმა ხელები გაშალა და ერთი გრძლად ამოისუნთქა.

– მონგოლებთან ომში გიბრძოლია, თავადო?

ჰკითხა ჯალალედინმა.

– ორგზის პირისპირ ვმდგარვარ მუღალთა წინაშე და სასტიკ ბრძოლაში მძიმედაც დავჭრილვარ.

– როგორი მეომრები არიან მონგოლები, შეიძლება თუ არა მათი დამარცხება?

– დამარცხება ყოველი მტრისა შეიძლება, ხელმწიფევ, თუ მაღალი ღმერთი მოგცემს ძლევას.

– მართალია, თავადო, ძლევის მოცემა მხოლოდ მაღალ ღმერთს შეუძლია, გამარჯვება მხოლოდ ალაჰის ხელით არი! – დაეთანხმა სულტანი, ფეხზე წამოდგა, თვალები ეშმაკურად მოჭუტა და ახალციხელს ღიმილით უთხრა:

– დღეიდან ხვარაზმის სულტნის ემირი იქნები. მამულსა და ყმას უმეტესს გიბოძებთ, ვიდრე შენს ქვეყანაში გქონდა. ერთგული სამსახურისათვის კვლავაც არ მოგაკლებთ ჩვენს ნიჭსა და წყალობას და თავათ გამოცდი, რომ ალაჰი დიდია და მოწყალე მათთვის, ვინც ავის შეცდომას შეინანებს.

ახალციხელმა დაიჩოქა და მაღლი შესწირა დიდსულოვან სულტანს.

– მოასვენეთ კარავში, ვითარცა ღირსეული ემირი და მიუჩინეთ მსახურნი და ყმანი, როგორც მის კეთილშობილებას შეჰფერის! – ბრძანა სულტანმა და ახალციხელი ფეხზე წამოაყენა.

სულტნის ორი კარისკაცი კარვისკენ წაუძღვა ახალციხელს.

შალვამ წამით უკან მოიხედა: ახმახ ხვარაზმელს თორელი სულტნისკენ მიჰყავდა.

ჯალალედინს თვალი ახალციხელისკენ ჰქონდა და ემირებს რაღაცას ჩუმიად ეთათბირებოდა.

შალვა შემობრუნდა სულტნისკენ და მუხლზე დავარდა:

– მოწყალეო ხელმწიფევ, აჩუქე ამ ტყვესაც სიცოცხლე, – ხელი თორელისაკენ გაიწოდა, – იგი ბიძაშვილია ჩემი, ქვეყნის საქმეებში არასოდეს გარეულა და არავითარი ბრალი არ მიუძღვის მუსულმანთა შეჭირვებაში, რადგან ქართველთა მეფის კარის მგოსანია მხოლოდ.

ჯალალედინმა შუბლი შეიკრა და მკაცრად გახედა ახალციხელს. შალვამ შეატყო, სულტანს არ ესიამოვნა მისი თავგამოდება, მიხვდა, რომ მისი თხოვნით არა გამოვიდოდა რა, თავი დახარა, ნელა წამოდგა და ფეხის თრევიტ მიჰყვა თავის გამცილებლებს.

ჯალალედინის წინ მაღალი, სანდომიანი შესახედაობის ვაჟკაცი გაჩერდა. წვრილი წელი გაწყვეტაზე ჰქონდა, თუმცა მხარ-ბეჭის სიფართოვე არ აკლდა, მაინც სუსტი და ნაზი ჩანდა.

– გაუხსენით ხელები! – გულცივად ბრძანა სულტანმა.

იმწამსვე თოკი შეხსნეს და ხელები გაუთავისუფლეს.

ჯალალედინი თორელის ხელებს მიაჩერდა: თხელი, ნატიფი თითები თოკის ნაჭდევებისაგან დაწითლებოდა თურმანს. თითები რამდენჯერმე გაშალა და მოღუნა. ხელები თეთრი ჰქონდა თორელს და სულტანს ენიშნა, ასეთი ხელები მხოლოდ წიგნისა და კალმის ხალხს აქვს, მათ, ვინც დღის მეტ ნაწილს ოთახში ატარებს მაგიდასთან. მეომრებისა და მიწისმუშების ხელები მზითაა ხოლმე გაშავებული და გატლანქებული.

– ცუდად ყოფილა ქართველთა მეფის საქმე, რაკი ომში კარის მგოსნებიც გამოჰყავს. შეხსენით ქამარ-ხანჯალი, მაგისტვის მაინც ზედმეტი ტვირთია! – სიცილით თქვა სულტანმა.

ქამარი შეხსნეს თორელს და მაშინვე უბესნადები წიგნი დავარდა ძირს.

სულტნის უკან მჯდარი, მაღალ-მაღალი, ხმელ-ხმელი კაცი, დავთარში რომ ტყვეებსა და ალაფს იწერდა, ფეხზე წამოდგა, კისერი წაიგრძელა და წიგნს დააცქერდა. მერე წინ გამოვიდა, მბრძანებლისაგან ნებართვა ითხოვა და ძირს დავარდნილ წიგნს დასწვდა. გოცებითა და აღტაცებით ფურცლავდა წიგნს. ლამაზი ხელით წვრილად ნაწერს ხარზად დასცქეროდა და მოწონებით თუ აღფრთოვანებით თავს აქნევდა.

– რა წიგნია, მოჰამედ?

იკითხა სულტანმა.

– არაბი და სპარსელი მგოსნების დივანია, დიდის ცოდნითა და გემოვნებით შერჩეული! – მოახსენა სულტანს მისი კარის დივანის უფროსმა მოჰამედ ნესევიმ და წიგნი მოწიწებით გადასცა.

სულტანმა დაუდევრად გადაფურცლა წიგნი, არაბულ ასოებს თვალი ზერელედ გააყოლა და ისევ ნესევის დაუბრუნა.

– სპარსული იცი? – ჰკითხა ტყვეს სულტანმა.

– ვიცი, ხელმწიფევ, – სპარსულადვე მიუგო თორელმა.

_ არაბული? _ ისევ გულგრილად ჰკითხა სულტანმა.
 _ არაბულიც, აგრეთვე, ვკითხულობ და მესმის, _ მიუგო თორელმა.
 სულტანმა ცოტა არ იყოს, გაოცებით გადახედა ნესევის.
 _ თუ არაბული იცი, რატომ ყურანი არ წაგიკითხავს?
 _ წამიკითხავს და არა ერთხელაც, ხელმწიფევ.
 _ მერე რატომ მაჰმადის რჯული არ იწამე, ან მორწმუნეებზე ხმალი როგორ ამართე?
 შეუტია სულტანმა.
 თორელმა, ბრაზი რომ დაეოკებინა, ამოიოხრა და დადუმდა.
 ნესევი ჩოქვით მიუახლოვდა სულტანს, რაღაც ჩურჩულით უთხრა.
 _ თურქული იცი? _ ისევ შეუდრინა სულტანმა თორელს.
 _ არა, თურქული არ ვიცი, _ გააქნია თავი უარის ნიშნად თორელმა.
 _ თავათ რა ენაზე სწერ ლექსებს, სპარსულად თუ არაბულად? _ ჰკითხა სულტანმა.
 _ მე ქართველი ვარ და მხოლოდ ქართულად ვწერ, _ ცივად მიუგო თორელმა.
 _ როგორ? _ გაოცდა სულტანი, _ სპარსულისა და არაბულის გარდა სხვა ენაზეც შეიძლება ლექსის წერა? მერე ვინ კითხულობს შენს ლექსებს?
 _ ქართველები კითხულობენ. _ მშვიდად წარმოსთქვა თორელმა.
 _ ჰმ! ქართველები! რამდენი ხართ ეგ ქართველები! რაღაც ერთი მუჭა, ზღვაში წვეთი არა ხართ და თავი კი დიდად მოგაქვთ. ვინ გაიგებს შენს დაწერილს, შენი ქართველების მეტი! აი, შენ სპარსული და არაბული გცოდნია, ჰკუა რომ გქონოდა, ამ ენებზე უნდა გეწერა, სპარსულად ან არაბულად.
 _ სპარსულად და არაბულად სპარსელები და არაბები წერენ, მე კი ქართველი ვარ და ქართულად ვწერ, _ მედიდურად თქვა თორელმა.
 სულტანმა გაკვირვებითა და თანაც, ცოტა არ იყოს, გაჯავრებით შეხედა თორელს.
 _ კარგი... კარგი... გეყოფა! შენი ბედი რომ ჩვენს მდივანს, _ ხელით ნესევიზე ანიშნა, _ ლექსები ყველაფერს ურჩევნია და ჩვენც მისი დიდი ხათრი გვაქვს თავდადებისა და ერთგული სამსახურის გამო. მან შენი თავი გვთხოვა და, სიცოცხლე რომ გაჩუქეთ, მას უნდა უმაღლოდე.
 ნესევიმ სულტანს თავი მდაბლად დაუკრა, კალთაზე ემთხვია და მსახურების თანხლებით თორელი თავის კარვისკენ გაგზავნა.
 ალაფისა და ტყვეების მითვლასა და გაწესრიგებას რომ მორჩა, სულტანმა სუფრა გააშლევინა და ამ უჩვეულო ბრძოლაში განსაკუთრებით თავგამოჩენილ ემირებთან ერთად შეექცა. სულტანი კარგ გუნებაზე იყო, ბრძოლის სიცხარესა და ხვარაზმელთა ვაჟკაცობაზე დაუსრულებლად ლაპარაკობდა და ქებას ასხამდა იმ ემირებს, რომელთაც მტრის სიმტკიცე საკუთარი მკერდით გასტეხეს.

პურობაზე მარჯვენა ფრთის მეთაური ემირები არ იყვნენ. ჯალალედინს მაშინვე შეემჩნია, რომ ისინი უგულოდ, უცეცხლოდ იბრძოდნენ და ქართველთა ერთი მოძალებისას კინაღამ ზურგი აჩვენეს მტერს.

ჯალალედინის ნათქვამი სხვა ემირებმაც დაადასტურეს, სხვა დროს, ალბათ, მკაცრად გაუსწორდებოდა მათ ჯალალედინი, მაგრამ ახლა, როცა ესოდენ მნიშვნელოვანი გამარჯვება მათი საეჭვო მოქმედების მიუხედავად მიღწეული იყო, სულტანმა დიდსულოვნება გამოიჩინა და დამნაშავეებს დანაშაულის გამოსყიდვის საშუალება მისცა. ორხანი მიუგზავნა და ეს პირობა შეუთვალა:

– ჩვენ გვაქვს თქვენი ტრელობისა და უმოქმედობის ნამდვილი დამამტკიცებელი საბუთები, ჩვენ ისიც ვიცით, რომ ამ უკანასკნელ ბრძოლაში თქვენ გადაწყვეტილი გქონდათ, ცხენები უკან შემოგებრუნებინათ მაშინ, როცა ქართველებმა თქვენზე იერიში მოიტანეს. მაგრამ რაკი ალაჰმა ჩვენ მოგვცა ძლევა და ურწმუნოების სასტიკი დასჯა დაგვაკისრა, ჩვენ დიდსულოვნებას გამოვიჩინეთ და ამ სიმუხთლეს მოგიტევებთ იმ პირობით, თუ თქვენ ქართველთა ქვეყანას ძირფესვიანად მოაოხრებთ და იქ ჩემს მოსვლამდე ფეხს მტკიცედ მოიკიდებთ.

შეშინებული დამნაშავე ემირები პატიებას შემოეხვეწნენ და დანაშაულის გამოსყიდვისათვის მზადყოფნა ფიცით შემოუთვალეს სულტანს.

ჯალალედინმა საქართველოს ასაკლებად გაგზავნილ მხედრობას თავისი ძმა ყიასედინი უსარდლა, ლაშქრის ერთი ნაწილი ისევ დვინის მხარეს შეუსია და თავათ სასწრაფოდ თავრიზისკენ გაემურა.

საქართველოსკენ წამოსული ჯალალედინი ჯერ კიდევ ადარბადაგანს არ იყო გაშორებული, როცა თავისი ვაზირის, თავრეზის გამგებლად დატოვებული შერეფელმოლკის მალემსრობლი დაეწია.

თავრეზის მმართველი ვაზირი მეტად დამაფიქრებელ საიდუმლოს ატყობინებდა: ქალაქის მოურავი და თავრეზის პირველკაცთაგანი ეტ-ტორღაი შეთქმულიყვნენ, ხვარაზმელთა განდევნა და ათაბაგ უზბეგისათვის თავრეზის დაბრუნება გადაეწყვიტათ; შეთქმულებს უზბეგისათვის მოციქულები გაეგზავნათ, რათა ჯალალედინის წინააღმდეგ გამოსულიყო. აქ იმედი ჰქონდათ, რომ საქართველოზე გამოლაშქრებული სულტანი ქართველთა და ადარბადაგანელთა გაერთიანებულ ძალას ვერ გაუმკლავდებოდა, თუ ზურგში უზბეგი დაჰკრავდა, დამარცხებული სულტანი იძულებული იქნებოდა, ადარბადაგანიდან გაქცეულიყო.

შერეფელმოლკის ეს ცნობა რომ მიიღო სულტანმა, საიდუმლო დაიმარხა და კაცს არ გაანდო, რადგან ქართველებთან დიდ ომს ელოდა და ამ ამბის გამჟღავნება მის ლაშქარს გამარჯვების რწმენას შეურყევდა.

ახლა, როცა ქართველებს სძლია, ჯალალედინს ისღა რჩებოდა, თავრეზელი შეთქმულები დაესაჯა და ადარბადაგანელებისათვისაც ლომის ბრჭყალები ეჩვენებინა.

სულტანმა გამარჯვების მახარობელს თავრიზისკენ ქართველ ტყვეთა გრძელი ქარავანი გააყოლა და თან დახოცილი მტრების მოჭრილი თავებიც გაატანა.

მალე თავათ სულტანიც მივიდა თავრეზს და მაშინვე შეთქმულთა საქმის გამოძიებას შეუდგა.

საქართველოს სატახტოში უფლისწულის დაბადებისა და დედოფლის ბედნიერად მორჩენის გამო ზეიმი გრძელდებოდა. სასახლის წინ უამრავი ხალხი იყრიდა თავს, დედოფლისა და უფლისწულის ჯანმრთელობას კითხულობდნენ, კარგი ამბით გახარებულნი ქუჩებს ევინებოდნენ, ქეიფობდნენ და ღრეობდნენ.

ღვინო და პური სირაჯხანებსა და თონეებში უფასოდ რიგდებოდა, გამვლელ-გამომვლელი გვირგვინოსანთა ძეობას ლოცავდა, სახიობნი და მემუსიკენი მოედნებზე ხალხს სანახაობითა და მუსიკით ართობდნენ. უბან-უბან ბერიკები დადიოდნენ და შუადამემდე არ წყდებოდა ანთებული ქინჯილებით მოარულთა სიმღერა.

სახელოსნოები და ქულბაქები, ბაზრები და სავაჭროები დაკეტილი იყო. დედაქალაქში ყოველგვარი საქმიანობა შეეწყვიტათ და დაევიწყებინათ. ეკლესიებში

მლოცველები ღმერთს დედოფლისა და უფლისწულის ბედნიერებას ავედრებდნენ, ძელს განუწყვეტლივ სცემდნენ და სატახტოს დიდი თუ პატარა ზარები ერთიმეორეს შეწყობილად აძლევდნენ ზანს.

ორ დღეს გაგრძელდა ძეობის ზეიმი, მთელი საქართველო სიხარულსა და ლხინს მისცემოდა და ეს უზრუნველი განცხრომა, ალბათ, კიდევ დიდხანს გასტანდა, რომ მესამე დღეს თბილისში ცხენხეთქებით არ შემოვარდნილიყო პირველი ლტოლვილი გარნისის ომიდან.

მტვერში ამოგანგლული, გაოფლილი ცხენი ქანცგაწყვეტილმა ლტოლვილმა პირდაპირ სასახლესთან მიაგდო.

პირველ ლტოლვილს კანტიკუნტად მიჰყვნენ სხვებიც და ქალაქში თითქო უზარმაზარმა გველმა გაირბინა საშინელი სისინით. მოზეიმეებს სახეებზე ღიმილი წაეშალათ, სიმღერა და ძელისცემა მისწყდა და ათასი ხმით მოგუგუნე ქალაქი მომაკვდავივით ნელ-ნელა გაცივდა, დადუმდა და სისხლი გაეყინა.

სასახლისაკენ ყოველ წუთს მიჰქროდნენ მაცნეები, სასახლიდანაც განუწყვეტლად გამორბოდნენ შიკრიკები და ქვეყნის ყველა მხრისკენ მიჰქონდათ გარნისის უბედურების ამბავი.

ამირსპასალარი მხარგრძელი ჯერ კიდევ არსად ჩანდა, ვერც სხვა გამოჩენილ სარდლებს მოეღწიათ ჯერ სატახტომდე. მეფემ და მისმა ვაზირებმა ჯერ კიდევ არ იცოდნენ სახელმწიფოს თავზე დამტყდარი უბედურების მთელი სიმძიმე. არც ის იყო ცნობილი, თუ ქართველთა ლაშქრიდან რამდენი დაიღუპა, არც ის იცოდა ვინმემ, თუ ტყვედ ვინ იყო ჩავარდნილი ან სარდალთა და მთავართაგან ვინ გადარჩა სიკვდილსა და ტყვეობას.

ლტოლვილთა ნათქვამით, საქართველოს მთელი ლაშქარი ერთიანად დაღუპული უნდა ყოფილიყო. სახელმწიფოს მცირე მხედრობაც აღარ ჰყავდა და თუ გამარჯვებული მტერი თბილისისაკენ დაიდრებოდა, სატახტოსაკენ გზის გადამლობავი აღარავინ იყო.

ახლადმოლოგინებული დედოფალი შეუძლოდ იყო და გასახიზნავად მისი დამპრა არ შეიძლებოდა.

საჭირო იყო სასწრაფოდ, მთელს საქართველოში ახალი ლაშქრის მოკრება, სატახტოს გამაგრება და დიდი ჯარის მოშველებამდე დედაქალქის დაცვა.

ისევ ატყდა ძელისცემა, ისევ გაბმით იწყეს ყველა ზარებმა რეკვა, მაგრამ ახლა ზეიმისკენ როდილა უხმობდნენ ეს ზარები. ქალაქის ქუჩებსა და უბნებში ცხენოსანი მანდატურები დაჰქროდნენ და ქუდზე კაცს იწვევდნენ. გაწვეულები მოედნებზე იკრიბებოდნენ, მომხდარი უბედურების ამბავს იტყობდნენ და მეფისა და სამშობლოს გადასარჩენად იარაღს ისხამდნენ.

მამუკა ოქრომჭედელს უფლისწულის დაბადებამ ბევრი საჩქარო და გადაუდებელი საქმე გაუჩინა. დიდებულები და მდიდრები ისევ მის სახელოსნოს მიაწყდნენ, დედოფლის ღირსი მისალოცის სწრაფად დამზადებას სთხოვდნენ და ავალეზდნენ.

ოსტატი თავაუღებლად მუშაობდა, გარეთ არ გამოდიოდა და მის სახელოსნოს იქით რა ხდებოდა, არ იცოდა.

არც მოქალაქეთა ზეიმის უეცარი შეწყვეტისათვის მიუქცევია ყურადღება, არც სიმღერისა და ზარის რეკვის მიჩუმებისათვის. ოსტატს ქვეყნის ამბებისათვის არ ეცალა, არც არაფერს კითხულობდა და არც არაფერი ადარდებდა, მაგრამ სახელმწიფოს თავზე დამტყდარი საშინელების ამბავი თავათ მოვიდა მამუკასთან. იმ დღეს, ზარების რეკვა რომ მისწყდა, ოქრომჭედლის სახელოსნოში ჯერ თითო-თითოდ იწყეს მოსვლა, მერე იხუვლეს და მამუკას ყველა მუშტარი ერთბაშად მოაწყდა სახელოსნოს: შემკვეთლები, ოქრო-ვერცხლისა და პატიოსანი თვლების პატრონები მიბარებულის დაბრუნებას სთხოვდნენ სხვადასხვა მიზეზით, სამუშაოს დასრულებასა და დათქმულ ვადას აღარ უყურებდნენ, თავიანთი განძი სასწრაფოდ მიჰქონდათ და სახელოსნოდან უკანმოუხედავად გარბოდნენ.

მამუკას ვერ გაეგო, რა ცეცხლი მოეკიდა ასე ყველას, რატომ მიჰქონდათ თავიანთი ქონება ასე დაფეთებულებს. პატრონებს თავიანთ საკუთრებას ვერ უჭერდა და საღამოს, როცა მისი სახელოსნო თითქმის სრულიად დაცარიელდა, ოქრომჭედელი მიხვდა, რომ ისიცა და მისი ოსტატ-შეგირდებიც უსაქმოდ დარჩენილიყვნენ და ხვალისათვის უკვე სამუშაო აღარ ექნებოდათ.

ამ საგონებელში რომ იყო, სახელოსნოს ცხენოსანმა მანდატურმა ჩამოუქროლა და მამუკაცა და მისი ოსტატ-შეგირდებიც მეფის სახელით ქალაქის მოედანზე იხმო.

მოედანზე უამრავი ხალხი შეყრილიყო. აქა-იქ ჩურჩულს მოჰკრა ყური მამუკამ, რაღაც დიდ მარცხზე, გარნისთან ქართველთა ლაშქრის

განადგურებაზე ხმადაბლა ლაპარაკობდნენ შეშინებული მოქალაქეები. დანამდვილებით ვერავისგან ვერაფერი შეიტყო, მაგრამ ოქრომჭედელი გუმანით მიხვდა, რაღაც დიდი უბედურება უნდა მომხდარიყო. მაშინვე თორელის ბედზე გაიფიქრა და ცაგოსთან წასვლა გადაწყვიტა, რომ მეფის რომელიღაც ვაზირის ხმა ჩაესმა.

შემალლებულზე მდგარ ვაზირს გვერდით მეფის სხვა მსახურებიც ედგნენ. კარისკაცთაგან აღარცერთს კაცის ფერი აღარ ჰქონდა.

ვაზირი გადაკრულად ლაპარაკობდა რაღაც შეუმოწმებელ ცნობებზე, ქართველთა ლაშქრის შესაძლებელ მარცხსა და მტრის სიმრავლეზე. თბილისის მოსახლეობა მზად უნდა იყოს ყველა მოულოდნელობისათვის, დიდმა და პატარამ სატახტოს დაცვისათვის უნდა გადადოს თავი. თუ ღმერთი გაწყრა და მტერი თბილისს მოადგა, მაგრად უნდა ჩავკეტოთ ქალაქის კარი. ყველამ, ვისაც ხმლის მოქნევა შეუძლია, იარაღი უნდა აისხას და სატახტოს ზღუდეებთან დადგეს. გახსოვდეთ, რომ ჩვენი სათაყვანებელი დედოფალი ჯერ კიდევ მელოგინეა და ქალაქიდან ვერ გავა, მისი ჯანმრთელობა და ჩვენი სატახტოს ბედიც თქვენს მკლავსა და ღონეზე იქნება მინდობილი, ვიდრე დანარჩენი საქართველოდან დიდი მაშველი ჯარი მოვიდოდესო, _ დაასრულა ვაზირმა და ხალხის ზღვა შეიძრა, აგუგუნდა:

– დღეგრძელობა ჩვენს მეფეს!

– გაუმარჯოს მეფესა და საქართველოს!

– გავწყდებით და მტერს კი ფეხს არ შემოვადგმევინებთ სატახტოში!

ჰყვიროდნენ, ქუდებს ცაში ისროდნენ და მუშტებს მალლა იქნევდნენ.

მამუკაც საერთო აღტყინებამ აიყოლია, ისიც ვიღაცას მუშტს უქნევდა და ემუქრებოდა, ხმამაღლა გაჰყვიროდა და მთვრალივით აქეთ-იქით აწყდებოდა.

ხალხის ტალღას მიჰყვა და სხვებთან ერთად იარაღი მიიღო მეფის მსახურთაგან. ფარ-ხმალს რომ ისხამდა, შეამჩნია, ქალაქის სომეხი მოსახლეობა ქართველებს ასწრებდა იარაღის მიღებას. ოქრომჭედელს ეს არ გაკვირვებია, თბილისელი სომეხები ქართველებისაგან თითქმის არაფრით განირჩეოდნენ და საქართველოს დედაქალაქიც ქართველებზე ნაკლებ არ უყვარდათ. მაგრამ მამუკას, ცოტა არ იყოს, ის არ ეჭაშნიკა, რომ თბილისელი სპარსელებიც მოუთმენლად აწყდებოდნენ ფარ-ხმლისა და მშვილდ-ისრის დამრიგებლებს, იარაღს ისხამდნენ, ქართველებს ძმობასა და ერთგულებას ეფიცებოდნენ და «ჩონი ქალაქის» მტრებს ლანძღვა-გინებით ემუქრებოდნენ.

ოქრომჭედელმა საბრძოლო შეკრების ადგილი და დრო გაიგო და მაშინვე ცაგოს მიაშურა.

წინაღლის ნაქეიფარი ვაჩე ლოგინში იწვა და თავის პატარა გოგონას ეალერსებოდა. პაწაწინა ცაგო ჩიტვიით ჟღურტულებდა და ბედნიერი მამის უღვაშებს ეტანებოდა. ლელა სახლს ალაგებდა და თავისთვის ჩუმად ღიღინებდა.

უცებ კარზე ღონივრად დაარახუნეს. ლელამ საქმეს ხელი უშვა და ვაჩეს ანიშნა, საბანი გადაეფარებინა.

ვაჩე ლოგინზე წამოიწია, ხალათს დასწვდა და უცებ გადაიცივა. კარი გაიღო. საწოლზე წამომჯდარმა ვაჩემ ზღურბლზე მომდგარი აფორიაქებული გოჩი დაინახა.

– უკაცრავად, უდროოდ მოსვლისათვის, მაგრამ ცუდმა ამბავმა მომიყვანა, – დაიწყო ხმაგაბზარულმა გოჩიმ, – დავიღუპეთ, მტერს ჩვენი ჯარი გაუნადგურებია...

– რომელი ჩვენი ჯარი? – შეშფოთებულმა ვაჩემ საბანი მოიშორა. სასწრაფოდ შარვლის ტოტებში უყრიდა ფეხებს და თან მუხასძეს თვალს არ აშორებდა.

– გარნისთან დიდი ბრძოლა მომხდარა გუშინწინ, ჩვენი მხედრობა ძლეულა და ერთიანად გაჟლეტილა!

– რას ამბობ, გოჩი, ეგ შეუძლებელია!

– მეც შეუძლებელი მეგონა, მაგრამ ქალაქში გარნისიდან გამოქცეულმა ლტოლვილებმა მოაღწიეს და სარწმუნოდ ამბობენ.

– თორელი? თორელი თუ გადარჩა? – იკითხა ვაჩემ და თვითონვე გაუკვირდა, რომ პირველი ცაგოს ქმრის სახელი მოადგა ენაზე.

– თორელი და ახალციხელები დანარჩენ მესხებთან ერთად პირველნი დაცემულან. ისინი წინამბრძოლები იყვნენ და მტერს პირველნი შეხვდებოდნენ.

ვაჩე გაშრა და ენა ჩაუვარდა. რამდენჯერ წარმოუდგენია ოცნებაში უქმროდ დარჩენილი ცაგო, ზოგჯერ, განწირულების წუთებში, უნატრია კიდევ თორელის გზიდან ჩამოშორება, მაგრამ ახლა, მისი დაღუპვის ამბავი რომ შეიტყო, სიხარულის მაგივრად გულისტკივილი და მწუხარება დაეუფლა.

– ჯალალედინს დღე-დღეზე თბილისში მოელიან. ვიდრე მეფე ახალ ლაშქარს შეჰყრის, ქალაქი ჩვენ უნდა დავიცვათ მტრისაგან. მთელი მოსახლეობა იარაღს ისხამს და საომრად ემზადება.

ვაჩემ ფაციფუცით ჩაიცივა. მერე კედლიდან დემეტრეს ფარ-ხმალი ჩამოიღო.

– ბარემ წვრილთვალა და ბეგთარიც ჩაიცივი, უკან მობრუნების დრო აღარ იქნება, – უთხრა გოჩიმ და პატარა ცაგოსკენ დაიხარა.

ბალღი ორივე ხელით ჩააფრინდა შეჩვეული კაცის თმებს და დარდისაგან შეშლილი სახე უცებ დაუწყნარდა ბუმბერაზს, ჩაცვნილმა თვალებმა წამით ისევ შუქიანად გამოიხედეს და ალაღმა ღიმილმა გაანათა ერთბაშად ამოდენა კაცი.

ვაჩემ ჯაჭვის პერანგი ჩაიცივა და გოჩი რომ წამოიძარტა წასასვლელად, ისევ თავისდაუნებურად იკითხა:

– ცაგომ თუ იცის ქმრის დაღუპვა?

– ვერ გეტყვი, შევიაროთ და გავიგოთ.

კართან ისევ შეჩერდა ვაჩე.

– ომი თუ იქნა, გახიზვნა დროზე უნდა მოვასწროთ.

– ახლა ქალაქის ყველა კარი დახშულია, არც ქალაქში უშვებენ ვისმეს და არც ქალაქიდან ატარებენ კაციშვილს, მაგრამ როგორმე გიშველი, ოჯახს გაგახიზნინებ.

ვაჩემ ცოლ-შვილი გადაჰკოცნა და ორივენი სწრაფად გავიდნენ.

თორელის სახლს მიუახლოვდნენ.

შორიდანვე შენიშნეს: ეზო სავსე იყო ხალხით.

სახლიდან გოდების ხმა გამოდიოდა. ვაჩეს გული ჩასწყდა და წინ ნაბიჯი ვეღარ გადგა.

– შენ შედი, მე აქ დაგელოდები, – უთხრა მუხასძეს და ჭიშკართან შეჩერდა.

გოჩიმ გაკვირვებული მოხედა, მაგრამ არაფერი ჰკითხა, ჭიშკარში შევიდა და ხალხით სავსე ეზოში კიბისკენ გაიკვლია გზა.

ვაჩე ჭიშკართან ჩამოჯდა ქვაზე და იქ მყოფებს დააკვირდა. სამძიმარზე მოსულები ჯგუფ-ჯგუფად იდგნენ და დამწუხრებულები ხმადაბლა ლაპარაკობდნენ.

– ხუთასი ათასი კაცით შემოუტევია ხვარაზმელ სულტანს, – ამბობდა ერთი.

– ხუთასი გაზვიადებულია, ოთხას ათასს ამბობენ უფრო სარწმუნოდ, – გაუსწორა მეორემ.

– თუნდაც ოთხასი ათასი იყოს, ცოტაა?! ჩვენები ორმოცდაათი ათასიც არ იყვნენ, იძლეოდნენ, მა რა იქნებოდა! – ხმას აუწია პირველმა.

ვაჩემ მათგან პირი იბრუნა და ახლა იქვე, მის გვერდით ჩამომსხდართ მიუგდო ყური.

– აფსუს, რა ქალი დაქვრივდა! – თქვა თავის ქნევით ერთმა.

– რა ეშველება საწყალს, კარის მგოსანი რა ქონებას დაუტოვებდა, რით უნდა გაზარდოს ბაღლი! – იბრალებდა მეორე თორელის ცოლ-შვილს.

– ბრალი მისი, ვინც მოკვდა, თორემ ცოცხლად დარჩენილი ჯერ შიმშილით არავინ მომკვდარა. მაგასაც პატრონი გამოუჩნდება. ეგრეთ ქალს დიდხანს არავინ დატოვებს უნუგემოდ, ჯერ კიდევ ახალგაზრდაა და ბევრ გასათხოვარსა სჯობს. აგერ, ჩემი სიტყვა დაიხსომეთ, თუ სულ მალე თავს ახალი გვირგვინი არ დაიდგას და უკეთეს კაცს არ გაჰყვეს, – დასძინა მესამემ.

ვაჩეს სახე წამოერთო და გულმა ბაგაბუგით დაუწყო ცემა.

ბედად, მუხასძე მობრუნდა. ვაჩე წამოდგა და უკან მიჰყვა წინანდელზე კიდევ უფრო მეტად შეწუხებულ მეგობარს.

– შეუტყვია? – დაარღვია სიჩუმე ვაჩემ.

– ლტოლვილებისაგან შეუტყვია. არ სცოდნიათ, თორელის ცოლი რომ იყო და პირდაპირ მიუხლიათ, მესხთაგან ერთიც არავინ გადარჩენილაო.

– მერე?

– მერე, იქვე გულს შემოჰყრია. გონს რომ მოსულა, თმა გაუშლია და სახე დაუკაწრავს.

– სახეზე ძალიან ეტყობა? – გულუბრყვილოდ იკითხა ვაჩემ და თავათვე შერცხვა ამ სულელური კითხვის.

– ერთიანად დახოკილი აქვს, დასისხლიანებული. ცრემლი გამრობია უბედურს და ხმაც ჩახლეჩია. კი ვეღარ ტირის, ხავის საცოდავი, – ხელისჩაქნევით თქვა გოჩიმ და თავათაც გული აუჩუყდა.

– რა ვქნათ, რა ვუშველოთ? – იკითხა ისევ გულუბრყვილოდ ვაჩემ.

– ჩვენ რას ვუშველით, ნუგემის მეტი რა შეგვიძლია, – ამოიოხრა მუხასძემ, – რატომ არ შემყვევი, სიტყვას ეტყოდი, გაამხნევებდი.

– არ შემიძლია, გოჩი, მტირალი ცაგოს დანახვა არ შემიძლია, – ძლივსგასაგონად თქვა ვაჩემ, ხმა აუკანკალდა და გული ყელში მოეხვინა.

ორივე დადუმდა. დამგლოვიარებული ქალაქის ქუჩებიც სდუმდნენ, ძველებურად აღარ ხმაურობდნენ.

გარნისის გამარჯვების შემდეგ, ჯალალედინი რომ მთელი ლაშქრით თბილისისკენ წამოსულიყო, საქართველოს სატახტო, ალბათ, უბრძოლველად ჩაბარდებოდა. ხვარაზმელმა სულტანმა არ იცოდა, რომ იმჟამად ქართველებს მეტი ჯარი არ ჰყავდათ და თბილისი თითქმის დაუცველი იყო. სულტანს საქართველოს ძლიერებისა სჯეროდა და გურჯების დედაქალაქის დაპყრობას საგანგებოდ მომზადების შემდეგაც სამხელოდ თვლიდა. მაშინ, შეთქმულთა დასასჯელად თავრეზს წასვლა ჯალალედინს უფრო გადაუდებელ საქმედ ეჩვენა, ლაშქრის ნაწილით ადარბადაგანს გაბრუნდა და ქართველებს გონს მოსვლის საშუალება მისცა.

მეფის მალემსრბოლებმა მთელი საქართველო ფეხზე დააყენეს. ქვეყნის ოთხივე კუთხიდან იწყო დენა სახელდახელოდ შეკრებილმა რაზმებმა და თბილისში ყველაზე ადრე ორი ათასი მესხი შემოვიდა ორთა ძმათა ჯაყელთა მეთაურობით. ჯარის მოსვლამ ქალაქის დასაცავად იარაღსხმულ თბილისელებს სიმხნე შემატა და მტერზე გამარჯვების რწმენა განუმტკიცა.

გარნისიდან ლტოლვილი, თანდათან გონსმოსული სარდლებიც გამოჩნდნენ, ახლადშეკრებილ ჯარს გაუძღვნენ და საქართველოს ასაკლებად წამოსული ყიასედინის ლაშქრის პირისპირ გაემართნენ.

ამასობაში მეფის დესპანებმა სულტნის ვაზირთან მოლაპარაკება გამართეს. ქართველებმა ტყვედ წაყვანილთა გამოსყიდვა ითხოვეს. ჯალალედინის ხარბმა ვაზირმა იმავე დესპანების ხელით ქართველთა მეფეს გარნისთან დატყვევებული გურჯების გრძელი სია აახლა და თან თითოეულის გამოსასყიდი ფასი აცნობა.

ეს ფასი საარაკოდ დიდი იყო, ვაზირი უშრომლად და უომრად ამოდენა ოქროს შოვნით, ჯალალედინის გულის მოგებასთან ერთად, საკუთარი სარგებლის ნახვასაც ფიქრობდა.

შალვა ახალციხელისა და რამდენიმე სხვა დიდებულის გამოსასყიდი თანხის გაღება სახელმწიფო სალაროს დაეკისრა, დანარჩენების დასახსნელად ისევ მათ ოჯახებს უნდა ეზრუნათ.

ქმრის გადარჩენისა და ტყვედ ყოფნის ამბავი რომ შეიტყო, ცაგო სიხარულით ცას ეწია. ძველებურზე მეტად ბედნიერად იგრძნო თავი, საპატარძლოსავით მოიკაზმა, გალამაზდა და ამღერდა.

ცოცხლად გადარჩენილი თურმანი უკვე თავის გვერდით ეგულეობდა, ბალღივით შეჭფოფინებდა და ჩიტივით ექლურტულეობდა.

პირველი სიხარულით გაბრუებამ რომ გაუარა და ქმრის გამოხსნის პირობაზე დაფიქრდა, თანდათან შიში დაეუფლა და სასო წაერთვა.

ხვარაზმშას ვაზირი ოცდაათი ათას ოქროს თხოულობდა თორელის გამოსასყიდლად. ამოდენა ოქროს შოვნა კარის მგოსნის ღარიბ ოჯახს კი არა, უფრო შეძლებული კარისკაცებისა და დიდვაჭრების ოჯახებსაც გაუჭირდებოდა ასე სასწრაფოდ. საგონებელში ჩავარდნილმა ცაგომ მაშინვე მამუკას მიატანა.

– სულ არაფერი გაქვს? – იკითხა მამუკამ, თუმცა ცაგოზე კარგად იცოდა, რომ დარდიმანდა და უანგარიშო კარის მგოსანს შავი დღისთვის შენახული არაფერი ექნებოდა.

– არაფერი. ჯვრისწერის ბეჭედი და ეს საყურეები მაქვს, თურმანისაგან ნაჩუქარი.

– ეგ რას გიშველის, ზღვაში წვეთია! – ამოიოხრა მამუკამ.

– სახლს გაგყიდი. თურმანი თუ არ დაბრუნდა, მაინც რაღა ოხრად მინდა!

– სახლს ასე უცებ ვერ გაჰყიდი, – ჩაუფარცხა ეს იმედიც მამუკამ, – რომ გაჰყიდო კიდევ, ჩალის ფასს მოგცემენ, დღე-დღეზე თბილისში ხვარაზმელების მოსვლას ელიან და ფულიან ხალხს თავისი სახლიც ოხრად რჩება.

– მაშ, რა ვიღონო?! – ამოიკვნესა ცაგომ და მუდარით სავსე თვალები მიაპყრო ძმას.

– რაღაც უნდა ვიღონოთ... მე რაც მაბადია შენი ჭირის სანაცვლო იყოს, პავლიასაც შევატყობინოთ, სხვა ახლობლებსაც, – თქვა შეწუხებულმა მამუკამ. მერე ფეხზე წამოდგა და თავისი სალარო მოიტანა.

ღის წინ დააპირქვავა წლობით ნაგროვები, ღამეების ტეხვითა და არაადამიანური შრომით მოქუჩებული ოქრო. ამ ფულს სახლის სასყიდლად და ცოლის შესართავად აგროვებდა უკვე ჭალარაშერეული მამუკა. ადრე, სანამ და გასაზრდელი ჰყავდა და მამის ოჯახი შესანახი, ცოლის შერთვაზე ფიქრიც არ შეეძლო. ახლა, როცა ცაგო ბედნიერად დაბინავებული ეგულეობდა და მოხუცი დედაც აქეთ უფრო ეხმარებოდა, ოქრომჭედელი საკუთარი კერის დანთებაზე, სახლ-კარის მოწყობასა და ოჯახის შექმნაზე ოცნებობდა.

მაგრამ გარნისის მარცხის უთვალავ მსხვერპლს მამუკას ოცნებაც მიემატა. როცა სახელოვანი სიძე განსაცდელში იყო, ხოლო საყვარელი დაი ყოვლგნით ხელაღუპრობელი და უნუგეშო, პირად ბედნიერებაზე ფიქრი როგორღა შეეძლო მამუკას.

მრავალი წლის ალალი შრომით ნაშოვნ ალალი გულითვე გამობერტყა სალაროდან და ამდენი ოქროს დანახვით თვალეზგაბრწყინებული ცაგო მუხლებზე დაეცა ძმის წინაშე, მოეხვია და ცრემლით დაუღბო კალთა.

– რა კეთილი ხარ, მამუკა! ნუთუ სულ იმეტებ ამდენ ოქროს?

– ვაი, რომ ეგეც ცოტაა!

– როგორ? – გაიკვირვა ანგარიშს მიუჩვეველმა ცაგომ, – ნუთუ ამაზე მეტია საჭირო.

– მეტი, უზომოდ მეტი!.. – თავის ქნევით დაუდასტურა მამუკამ.

– მაშ, არ ყოფილა საშველი!

– საშველი უნდა გამოვნახოთ, უნდა ვეცადოთ, ცაგო, პავლიას შვეატყობინოთ, აქაც ნაცნობ-მეგობრებს ვთხოვოთ...

მეორე დღეს გოჩი მუხასძე მოვიდა ცაგოსთან, მამუკასაგან გაეგო მათი შეჭირვება.

თურმანის მეგობარმა ცაგოს წინაშე დაცალა ქისა და ბოდში მოიხადა, რომ მეტი არა ჰქონდა.

– როგორ უნდა გამოგართვა, ვინ იცის, როდის დაგიბრუნებ?! – შეწუხდა ცაგო.

– დაბრუნება რა სათქმელია! – წარბი შეიკრა მუხასძემ. – თურმანისთვის ფულს კი არა, სულს არ დავიშურებდი, მაგრამ, ვაგლახ, რომ მეტი ვერსად ვიშოვე. თუმცა კიდევ მაქვს იმედი, დღე-დღეზე ავაგს ელიან სასახლეში, ივანე მხარგრძელის ძეს. თორელი მასაც ძლიერ უყვარს და, ვფიქრობ, მის გამოსახსნელად ფულს არ დაინანებს. ამას გარდა, ერთი მეგობარი მყავს, თქვენბური მხატვარი, ვაჩე გრძელიშვილი.

– ვაჩე გრძელიშვილი? – გაიოცა ცაგომ.

– ჰო, ვაჩე გრძელიშვილი, შეიძლება იმას ჰქონდეს ფული, თურმანს ისე ახლო არ იცნობდა, მაგრამ თუ რამ გააჩნია, მე არ დამიჭერს. ისე რომ, ჯერ გქონდეს ჩემი იმედი, – ანუგეშა გოჩიმ ცაგო და გამოემშვიდობა.

ცაგო ჭიშკრამდე მიჰყვა კარის ხუროთმოძღვარს ლოცვითა და მადლობით.

პავლია კუტმა ბერის ხელით გამოუგზავნა განსაცდელში ჩავარდნილ დას თავისი წილი. მასაც სალარო გამოეფხიკა და თავისთვის აღარაფერი დაეტოვებინა. საპყარი ძმა ღმერთს ავედრებდა ტყვედჩავარდნილ სიძეს და ცაგოს პატიებას სთხოვდა, რომ უცალობის გამო იმ გაჭირვების ჟამს მის გვერდით ყოფნა არ შეეძლო.

სახლის მუშტარი მართლაც არავინ გამოჩნდა. შეძლებულები ქალაქიდან ჩუმად გახიზვნაზე ზრუნავდნენ მტრის მოსალოდნელი თავდასხმის შიშით, თავიანთი სახლებიც ოხრად რჩებოდათ და თორელისა ვისღა უნდოდა.

გოჩი მუხასძე უეცრად, მეფის დავალებით, ქალაქიდან სადღაც წავიდა. ავაგ მხარგრძელი არსად გამოჩნდა. ცაგოს საჭირო ოქროს ნახევარიც არ ჰქონდა. დრო კი აღარ ითმენდა. დღე-დღეზე მეფის დესპანები ჯალალედინის ვაზირს უნდა ხლებოდნენ და ტყვეების გამოსასყიდი ოქრო უნდა მიეთვალათ.

ცაგო შემწეს ადარსაიდან ელოდა. დღედაღამ იმის ფიქრში იყო, თუ რა ელონა, სად ეშონა დანარჩენი ფული, რომ ქმრისთვის ეშველა.

ამ ფიქრსა და საგონებელში გოჩის ნათქვამი გაახსენდა, ეგებ ვაჩე გრძელიშვილს ჰქონდეს ფულიო. ამ ერთადერთ იმედს ჩაებლაუჭა და აღარ მოეშვა. მერე რა ვუყოთ, რომ ვაჩე თურმანთან დაახლოებული არ არის, სამაგიეროდ ცაგოსთან ერთად შეზრდილია და მისი განუყრელი მეგობარი. თუმცა რალა განუყრელი მეგობარი, რაც ახალდაბაში დასტოვა, მერე ერთხელაც აღარ უნახავს. მთელი ქვეყანა მის ქებაშია და თავათ თურმანიც დიდად აფასებს ვაჩეს ხელოვნებას, მაგრამ როგორღაც ისე მოეწყო, რომ ერთხელ ველარსად შეხვდა, ვერც თავისას იწვია ყრმობის მეგობარი, ამბობენ, კარგი ქალი შეურთავს და სიმამრსაც მდიდარი მემკვიდრეობა დაუტოვებიაო. ისიც თქვეს, რუსუდან მეფემ უხვად დააჯილდოვა სასახლის მოხატვისათვისო (ალბათ, ამიტომ ფიქრობს მუხასძე, ვაჩეს ფული ექნებაო). ნეტავ ენახა ვაჩეს მხატვრობა! დიდი და პატარა აღფრთოვანებულია ვაჩეს ნამუშევრით, მას კი, ვაჩეს სიყრმის მეგობარს, ცაგოს ერთხელაც არ შეუხედნია რუსუდანის ახალ პალატებში. რას იტყვის ახლა ვაჩე, ცაგო რომ თავისი ფეხით მიადგება კარზე და სახელოვანი მგოსნის ამაყი ცოლი ოქროს სთხოვს ქმრის გამოსახსნელად. თავმოყვარეობა სხვა დროს ნებას არ მისცემდა ცაგოს ასეთი ნაბიჯის გადასადგმელად, მაგრამ ახლა თავმოყვარეობა რა სახსენებელია, როცა თორელის სიცოცხლე ბეწვზე ჰკიდია და იმაზეა დამოკიდებული, თუ ვინ შეეწევა ცაგოს. რაკი თავათ არა აბადია რა ცაგოს, ვისგანაც იქნება, ფული უნდა ისესხოს და განა სხვაგან, ვიგინდარისაგან სესხებაზე ადვილი ის არ იქნება, ტოლსა და ახლობელს მიმართოს, აუხსნას თავისი გასაჭირი, განა სხვაზე უკეთ ის არ გაუგებს და შეიბრალებს?

ამ ფიქრით დაიმედებულმა ცაგომ გაბედა და ვაჩეს სახლს მიადგა.

ცაგოს დანახვაზე ვაჩე გაფითრდა, ენა ჩაუვარდა და შინ შეპატიჟებაც ვერ მოახერხა.

ცაგო ძველებურად უშუალოდ და თამამად მიესალმა. ლელას თვითონვე გაეცნო, ვაჩეს დაუხმარებლად, და შინაც შეუპატიჟებლად შევიდა. სახლს რომ თვალი მოავლო, მოეწონა.

– აი, თურმე როგორ კარგად ცხოვრობ! – მიმართა ვაჩეს, ლელას შესცინა და დედის კალთას აკრულ პატარა გოგონას მიეალერსა.

საოცარი სილამაზით მოხიბლული ლელა სტუმარს თვალს ვერ აშორებდა. ხანდახან დაბნეულსა და ერთიანად სახეაწითლებულ ქმარს შეხედავდა და თავათაც იბნეოდა მის სახლში იმ უცნობ ქალთან ერთად შემოსული იდუმალეებით.

– დაბრძანდით! – მოუწია სელი სტუმარს ლელამ და სიმხურვალით იგრძნო, რომ თვითონაც სახე აელეწა.

ცაგო სელზე ჩამოჯდა.

ლელამ ბავშვს ხელი დასტაცა და ოთახიდან სწრაფად გავიდა.

– დაჯექი, ვაჩე, ჩემი სტუმრობა ხომ არ გეწყინა?! – გაუღიმა ცაგომ და სელზე მიუთითა.

ვაჩესაც გაუღიმა და მორცხვად ჩამოჯდა ცაგოს პირისპირ.

– ჩემს განსაცდელს გაიგებდი, ალბათ... – წამოიწყო ცაგომ ოხვრით.

– გავიგე და ძალიანაც შევწუხდი. – თავდახრით თქვა ვაჩემ.

– იმასაც გაიგებდი, თორელის გამოსახსნელად რა დიდ სასყიდელს გვთხოვენ ხვარაზმელები.

– არა, ეგ არ ვიცი! – თავი გააქნია ვაჩემ.

ცაგომ უკვე გაბედა და უკანდასახევი გზა აღარ იყო. ჯერ იმას მოჰყვა, როგორ გლოვობდა ქმარს, როცა დაღუპული ეგონა, მერე ისიც უამბო, როგორ გაიხარა თურმანის ცოცხლად გადარჩენის ამბით და ბოლოს მთავარ სათქმელზე ისე შეყოვნდა. აქეთური და იქითური მოიმიზება, უცებ მარტოხელა ქალმა ვერაფერი ვიღონე, ჰავლია შორს არის და როდის მივაწვდენ ხმასაო; მამუკას რაც გააჩნდა, მომიტანა, მაგრამ არც ეს კმარაო; თურმანს ფული გასესხებული აქვს, მაგრამ არ ვიცი, ვის უნდა მივაკითხოო.

ამას რომ ამბობდა, წითლდებოდა, რადგან დამცირებული სიამაყე თითქმის დაუჯერებელს ალაპარაკებდა.

– შენზე ახლობელი ქალაქში არავინ მეგულებოდა და ისევ შენი შეწუხება გადავწყვიტე, – თქვა ცაგომ და თვალი თვალში გაუყარა ვაჩეს.

ვაჩემ ვერ გაუძლო ცაგოს ცქერას და თავი დალუნა. იგი უზომოდ ბედნიერი იყო ახლა, ისევე, როგორც ყრმობის ჟამს, როცა ცაგოს სათხოვრის ასრულების საშუალება ეძლეოდა ხოლმე.

სახე ღიმილმა გაუნათა და თავი აიღო.

– რამდენი გჭირდებათ?

– თხუთმეტი ათასი! – თქვა ცაგომ და უცებ შვება იგრძნო, მთავარი სათქმელი რომ ითქვა.

ვაჩე უხმოდ წამოდგა და ოთახიდან გავიდა.

მარტოდდარჩენილ ცაგოს გული ამოვარდნაზე ჰქონდა. ახლა იმაზე კი არ ფიქრობდა, როდის უნდა დავუბრუნო ვაჩეს სესხიო; ერთადერთი ის აწუხებდა, ვაითუ, არც ვაჩეს ექნეს ამოდენა ოქრო და რაღა წყალში უნდა ჩავვარდე, ვის მივადგე სათხოვნელადო.

ოთახში ვაჩეს პატარა გოგონა შემოვიდა. კართან დადგა და ცაგოს მიაჩერდა.

– მოდი ჩემთან, გენაცვალე! – დაუყვავა ცაგომ, ფეხზე წამოდგა და ბავშვთან მივიდა. ხელში აიყვანა და აკოცა. ბალღი მიენდო უცნობ ქალს. უღიმოდა და თვალს არ აშორებდა.

უცებ ლელამ შემოაღო კარი. წედანდელზე მეტად გაწითლებული ეჩვენა ცაგოს ვაჩეს მეუღლე. მეორე კარიდან ვაჩე შემოვიდა, სავსე ქისას თავი მოხსნა და ცაგოს მაგიდაზე ოქრო დახვავდა.

ხარბად დააცქერდა ოქროს ხვავს ცაგო და წამით რომ თვალი მოსწყვიტა, ლელას შეხედა, ლელაც მონუსხულივით მიშტერებოდა იმ ოქროს და ცაგომ შენიშნა, რომ ვაჩეს ცოლს წამწამზე ცრემლი დაჰკიდებოდა.

ლელამ იგრძნო ცაგოს ცქერა, მიტრიალდა და ბაღს წაეპოტინა:

– ცაგო, დეიდას აწუხებ, წავიდეთ, – ცივად თქვა, ბავშვს ხელი დაავლო და სწრაფად გავიდა.

ლელას თვალზე დანახულმა ცრემლმა ააფორიაქა ცაგო.

სხვა დროს, ალბათ, ყურადღებას მიაქცევდა მისი სახელით რომ უხმობდნენ ვაჩეს პატარა გოგონას, მაგრამ ახლა აღარაფრის თავი აღარ ჰქონდა. ლელას წამოწითლებული სახე და ფარული ცრემლი იმას მეტყველებდა, თუ რა დიდსა და უაზრო მსხვერპლს იღებდა ვაჩეს ოჯახი მისთვის შორეული, თითქმის უცნობი კარის მგოსნისთვის. ახლად დაფიქრდა ცაგო, რა დიდსა და გადაუხდელ ვალში ვარდებოდა, როგორ უქცევდა თავის სიყრმის მეგობარს ბედნიერ ოჯახს. მიხვდა ცაგო, რა უსამართლობასაც სჩადიოდა, მაგრამ სხვა გზა არა ჰქონდა და მასაც ცრემლები წასკდა მშვენიერ თვალთაგან.

– სრულად მოგართვი, ღმერთმა ბედნიერად მოგახმაროს! – თქვა ვაჩემ და ოქროს სათითაოდ დაუწყო ჩაყრა ქისაში.

ვაჩე ოქროს ნელ-ნელა ჰყრიდა ქისაში და ახლა იმაზე ფიქრობდა, თუ როგორ თავისი ხელითვე ამსხვრევდა ამხდარ ოცნებას, რამდენჯერ უნატრია უქმროდ დარჩენა ცაგოსი და ახლა, როცა ეს უიმისოდ იყო მომხდარი, თვითონვე უმართავდა ხელს ცაგოს, რათა ქმარი დაებრუნებინა. უგუნურებას ჰგავდა ვაჩეს მოქმედება, მაგრამ რა ექნა, როცა სხვაგვარად არ შეეძლო. რა გულით უნდა ეთქვა დახმარებაზე უარი, როცა ცაგომაც იცოდა, რომ მისი ბედი სწორედ ვაჩეს ხელთ იყო.

ცაგო ნელა წამოდგა, ვაჩეს ქისა ჩამოართვა და წავიდა.

კარის ზღურბლთან მოტრიალდა, ხელი გაუწოდა გამოსამშვიდობებლად და თვალი რომ გაუსწორა, გაფითრდა: ვაჟკაცს თვალზე ცრემლი მოდგომოდა.

მუხლებმა უსუსტეს ცაგოს და კინაღამ დაეცა. წამით გაიფიქრა, ამ ცრემლით თავის საბადებელს მოსტირის ვაჩეო და ქისა უკან გაუწოდა. ვაჩემ შუბლი შეიკრა. ცაგო მიხვდა, რომ დაუმსახურებელი ტკივილი მიაყენა. დაბნეულმა თავი დახარა და ნელა, ლასლასით გავიდა.

ამბავი ადარბადაგანის ათაბაგის უზბეგისა და დედოფალ მელიქე-ხათუნისა

ჰოის ციხეში განმარტოებით მყოფ ათაბაგ უზბეგის ცოლს ქვეყნისაგან განაპირება მალე მოსწყენოდა. ხელისუფლებასა და მბრძანებლობას შეჩვეულ მელიქე-ხათუნს ჰოიში საქმე აღარა ჰქონდა რა.

ღვინოსა და დროსტარებას გადაგებულ ათაბაგს ახალგაზრდა ცოლისთვის ადრეც არ ეცალა და ახლა ხომ სულ აღარ ახსოვდა იგი.

მელიქე-ხათუნს კი ცხოვრება უნდოდა. ბედნიერი და სიხარულით სავსე ცხოვრება. ჰოის განმარტოებულ ციხეში მას ყველაფერი ჰქონდა, მისი

მაღალკეთილშობილების ღირსად და შესაფერისად. ერთგული ვაზირები და მამლუქებიც ეხვივნენ გარს და მის მყუდროებას დარაჯობდნენ. მაგრამ სიცოცხლით სავსე ახალგაზრდა ქალისათვის სწორედ ეს მონასტრული მყუდროება იყო ყველაზე მეტად დამღონებელი და სასოწარმკვეთი.

მას ისევ დიდი სატახტოსკენ მიუწევდა გული, ათაბაგის კარისკენ, სადაც ქვეყნის საუკეთესო რაინდები ტრიალებდნენ. იმ კეთილშობილი რაინდებისთვის მისი ყოველი სიტყვა სიხარულით აღსასრულებელი კანონი იყო, ყოველდღე სხვადასხვა სამეფოებიდან დედოფლის სათაყვანებლად ძვირფასი ძღვენით დატვირთული ელჩები მოდიოდნენ და ადარბადაგანის ნამდვილი მმართველი მელიქე-ხათუნი ღვინოში ჩამხრჩვალნი ქმრის, ქვეყნის საქმეთაგან თავისივე ნებით გამდგარი ათაბაგის სახელით განკარგულებებს იძლეოდა.

დედოფალს მოცალების ჟამს სახიობა და მუსიკა ატკობდა, ხოლო მისი სამფლობელოს რჩეული მოყმეები ერთმანეთს ეცილებოდნენ ბურთსა და ცხენოსნობაში, რათა თავი გამოეჩინათ, მშვენიერი დედოფლის ყურადღება მიეპყროთ და მეტი თუ არა, მოწონების ღიმლი მაინც დაემსახურებინათ.

დედოფალი სწუხდა, რომ თავისივე სურვილით ითხოვა ხვარაზმელი სულტანისაგან უვნებლად გაცლა, ცხოვრებისაგან მოწყვეტა, თავრეზის დატოვება და მაღალ მთებში გახიზვნა.

მერედა, ვითომ რად უნდა გასცლოდა იმ კეთილშობილ სულტანს, რომლის ვაჟკაცობასა და სიმდიდრეზე, ქველობასა და რაინდობაზე მთელი ქვეყანა აღტაცებით ლაპარაკობს და ზღაპრებს ჰყვებიან?!

ჯალალედინი თურმე ქალების დიდი მოტრფიალაც არის და მათი მშვენიერების ფასიც სხვებზე კარგად იცის.

მელიქე-ხათუნი ჯერ კიდევ ნორჩია და ახალგაზრდა, მან სწორედ ახლა იწყო ქალობაში შესვლა და მისი სილამაზეც სწორედ ახლა იფურჩქნება მთელი თავისი ძალითა და მიმზიდველობით.

ჯალალედინი, ალბათ, თვითონ თავრეზს უფრო დათმობდა, ვიდრე მელიქე-ხათუნს გაუშვებდა ხელიდან, ერთხელ რომ მაინც ჩაეხედა შავი წარბ-წამწამის ჩრდილით დაბურულ მის მწველ თვალებში.

თვითონ მელიქე-ხათუნმა, ერთხელ, მაგრამ ისიც შორიდან დაინახა სულტანი. ტანდაბალი, მაგრამ მკვრივად ჩადგმული ჯალალედინი საოცრად მკვირცხლი და მოძრავი ეჩვენა. შავ მკაცრ სახეს უცნაური ცეცხლით მოგიზგიზე თვალები უნათებდა სულტანს და იმ თვალებისაგან დანაკვეთი ნაპერწკალი შიგ გულში მოხვდა ადარბადაგანის დედოფალს.

უკვე პირობა დადებული იყო და დედოფალს უკან დაბრუნება აღარ შეეძლო, თორემ მელიქე-ხათუნი ისევ თავრეზის ციხეში შევიდოდა და თავის საყვარელ ქალაქთან ერთად ჩაბარდებოდა მამაც სულტანს.

შემდეგ ის გულში ჩავარდნილი პატარა ნაპერწკალი გადიდდა და გაღვივდა, ცეცხლად აღეგზნო და დედოფალს მოსვენება დაუკარგა.

მელიქე-ხათუნი ისედაც არ უწყევდა ანგარიშს თავის ვაზირებს და ახლა, როცა სიმშვიდე დაკარგა, მზად იყო, ყველაფერი გაეკეთებინა, რათა საწადელს სწეოდა.

ჯალალედინის თავრეხს მობრუნება რომ შეიტყო, დედოფალი მთლად აფორიაქდა. ასე განდგომილად ცხოვრება აღარ შეეძლო, მელიქე-ხათუნს თავრეხი უნდა დაებრუნებინა, ოღონდ უნებისყოფო და უზრუნველი უზბეგის თავრეხი კი არა, მოუსვენარი და ძლიერი ჯალალედინის თავრეხი, ხვარაზმელი სულტნის თავრეხი, რომელიც, ალბათ, ბევრ სიამესთან ერთად, დიდ სულიერ შფოთსა და მღელვარებასაც მოუტანდა. თავრეხისაკენ ლამაზსა და სიცოცხლით სავსე ქალს, მელიქე-ხათუნს, სიყვარული, სასურველი მამაკაცის განცდისა და დაუფლების სურვილი ეძახდა, ხოლო დედოფალს – ადარბადაგანის დედოფალს – იმავე მელიქე-ხათუნს – პატივმოყვარეობა, ხელისუფლების ჩვეული წყურვილი და დიდებისაკენ ლტოლვა უხმობდა.

დედოფალმა თავისი ვაზირები და მრჩევლები მოიწვია. ცრემლითა და ვაებით გაიხსენა მათგან მიტოვებული სატახტო, უპატრონოდ დაგდებული, მტრისაგან აკლებული და შევიწროებული თავისი ერთგული ქვეშევრდომები. მაღალსა და კეთილშობილ უზბეგს თავისი ხალხი და მეუღლე დედოფალი რომ ჰყვარებოდა, არც ერთს ჩააგდებდა ამ დღეში და არც მეორეს, თავის ქვეყანაში ურიცხვ ჯარს შეკრებდა და ადარბადაგანს ხვარაზმელების მძლავრობისაგან გამოიხსნიდა. საუბედუროდ, ათაბაგმა ქვეყნის საქმეებსა და დედოფლის კეთილდღეობაზე ზრუნვა დიდი ხანია დაივიწყა და სახელმწიფო ბედის ანაზარად დააგდო. ამიტომ არის დედოფალი ვალდებული და იძულებულიც, იზრუნოს თავისი ქვეყნისა და ხალხის შველაზე, ტახტისა და თავის პირად ბედზე. დედოფალმა გადაწყვიტა, გაეყაროს ათაბაგს, რომელიც დიდი ხანია თავისივე სურვილით გაშორებია დედოფალს და ქმრობის უღელს აღარ უწყევს. უზბეგისაგან გაყრის შემდეგ, იგი შეეუღლება ერთმორწმუნე ხვარაზმელ სულტანს, ამით დედოფალი მტერს მოყვარედ მოაქცევს, ადარბადაგანს ღირსეულ პატრონს უშოვის და მტრის ძალმომრეობისაგან სამუდამოდ იხსნის.

დედოფლის მრჩევლებმა მოიწონეს მელიქე-ხათუნის გადაწყვეტილება, დიდად დააფასეს ხალხისა და ქვეყნის კეთილდღეობისათვის მისი ესოდენი თავგანწირვა და ჯალალედინს ელჩები გაუგზავნეს.

სულტანს გაგონილი ჰქონდა ადარბადაგანელი დედოფლის სიტურფე და გონიერება. მასთან შეუღლება ადარბადაგანზე ჯალალედინის ბატონობას კანონიერს გახდიდა და დაპყრობილ ქვეყანას გაუერთგულებდა. ამას გარდა, მელიქე-ხათუნის შერთვით ჯალალედინი ათაბაგ უზბეგსაც დასჯიდა და დაამცირებდა იმათ თვალში, ვისაც კიდევ ჰქონდა მისი იმედი, ვინც ადარბადაგანის კანონიერ პატრონად ჯერ კიდევ მას მიიჩნევდა.

ჯალალედინმა სიამოვნებით მიიღო ელჩების წინადადება. დედოფლისა და ათაბაგის გაყრა კანონიერად აღასრულა და ადარბადაგანის დედოფალი ხვარაზმელმა სულტანმა შეირთო ცოლად.

სახიობისა და მუსიკის, ლექსებისა და ლხინის მოყვარულ უზბეგს სადაც დაულამდებოდა, იქ უთენდებოდა, დიდი და სახელოვანი ფალავნების უკანასკნელ შთამომავალს იმ ირანელი მგოსნების რჩევა გაეხადა სახელმძღვანელოდ, რომლებიც ამქვეყნად ლხინის გარდა ყოველივეს ამაოებად თვლიდნენ.

ჩვენ ყველანი მიწისაგან ვართ და მიწადვე უნდა მივიქცეთ. ულამაზესი ასული, რომელსაც ახლა ეხვევით, ხვალ მიწად იქცევა და იმ მიწისაგან, რომელსაც დაუფიქრებლად ადგამენ ფეხს, მექოთნე ყელმოღერებულ სურას გააკეთებს. იმ სურიდან სხვები ისევე დალევენ ღვინოს, როგორც შენა სვამ ახლა ამ ყელ-ყელა სურიდან. დალევენ და არც დაფიქრდებიან, რომ ოდესღაც ის თიხაც უტურფესი ასული იყო, ხოლო ღვინის ეს ჯამი – უძლეველი ვაჟკაცის თავის ქალა.

რალა აზრი აქვს ადამიანურ ზრუნვას, თუ განგებისაგან დადგენილ ამ ყველაზე საშინელ წესს ვერ შეცვლი, რად უნდა ადამიანს ცნობა და გონება, თუკი იგი უძლურია, ახსნას და დასძლიოს სოფლის ამაოება. ადამიანი განწირულია გაჩენის დღიდანვე. მას ისლა დარჩენია, ღვინის სმასა და ლამაზ ხათუნებთან ალერსში დაჰკარგოს დღისა და ღამის ანგარიში და ყელმოღერებული სურიდან სვას გონებისწამრთმევი ღვთაებრივი სასმელი.

წუთისოფლის ამაოების და ღვინით თავდავიწყების ამ რწმენაზე მტკიცედ მდგარ უზბეგს ბედის აღარავითარი დარტყმა და წიხლი აღარ აკვირვებდა და აშფოთებდა.

მას ჯერ ქართველები მიდგნენ და სულს არ ათქმევინებდნენ. ახლა კიდევ ხვარაზმელი სულტანი გამოჩნდა, ქვეყნის უდიდესი ნაწილი გამოსტაცა და ადარბადაგანის ნამდვილ პატრონად თავისი თავი გამოაცხადა.

რა საცოდავები არიან ეს დიდებისმოყვარული ადამიანები! როგორ ხარბად ეწაფებიან წამიერსა და წარმავალს ამ წუთისოფელში და წინ ან უკან ერთხელაც არ იხედებიან. წინ კი არარაობაა, ხოლო უკან, მათ კვალზე, სიკვდილი მოდის, გარდუვალი და უძლეველი სიკვდილი, რომელიც ამ ქვეყნის ყველა მოსაჩვენარ დიდებასა და ბრწყინვალეობას ანგრევს და ანადგურებს. როგორ არ იციან ბედშავებმა, რომ ამქვეყნად დროებითა ვართ და სიცოცხლის ამ ერთი წუთის დაკარგვა უნაყოფო ზრუნვისა და ფუსფუსისათვის სიგიჟეა და მეტი არაფერი!

წაიღონ ყოველივე, სამეფოცა და სამკვიდროც, წარსტაცონ სიმდიდრეცა და დიდებაც, ერთ ჯამ ღვინოსა და მასავით უდარდელ მეინახეს ყოველთვის იშოვის უზბეგი და მასაც მეტი არა უნდა რა, სიცოცხლის არარაობის ჯავრით გახურებულ გულსა და ტვინს ღვინო გაუგრილებს და წამიერად მაინც მისცემს თავდავიწყების შვებას.

ამგვარად მოაზროვნესა და ცხოვრების ამ წესზე გადასულ უზბეგის გულს ამქვეყნიური აღარა ეკარებოდა რა. მას არც მის სამფლობელოში მომხდარი

დიდი ცვლილებები აღელვებდა, არც თავს დატრიალებული უბედურება ამფოთებდა.

ყველას, მის ნაცნობსა თუ უცნობს, ერთნაირად სჯეროდა, რომ წონასწორობიდან ათაბაგს ბედის ვერავითარი მუჯღუგუნი ვერ გამოიყვანდა, ამ ქვეყნისაკენ გულს ვერ მოუბრუნებდა და მისი ავ-კარგით ვერ ააღელვებდა.

ასე ეგონა თავათ უზბეგსაც, მაგრამ... ერთ მშვენიერ დღეს თავრეზიდან ამბის მთხრობელი მოვიდა, ახალგამოდვიძებულ, ჯერ კიდევ ფხიზელ ათაბაგს ეახლა და მძიმე ამბის მოსახსენებლად ნებართვა სთხოვა.

ათაბაგმა დამცინავი ღიმილით ჩაიქნია ხელი. თითქო ამბობდა, იმაზე უარესი რა უნდა მითხრა, რაც დიდი ხანია ვიცი: ხვალ თუ ზეგ მიწად უნდა ვიქცე და არარაობას შევუერთდეთ.

უზბეგმა ღვინო დაისხა და ფიალა რომ ასწია, მოამბეს შეხედა. ამბის მომტანი უცნაურად გოცეებული თუ შეშინებული შეჰყურებდა და ენის მობრუნებას ვერ ახერხებდა.

უზბეგს სასამისიანი ხელი გაუშეშდა, მოამბის გამოხედვაზე შედრკა, შეკრთა და როგორღაც დაიბნა.

– სულტანმა ჯალალედინმა თითქმის მთელი ადარბადაგანის მიწა-წყალი დაიპყრო... – ხმადაბლა დაიწყო მოამბემ მთავარი სათქმელის შემზადება.

– მიწაც და წყალიც ღვთისაა და ვისაც სურს, მას მისცემს უფალი, – აუღელვებლად თქვა ათაბაგმა, მოამბეს თვალი თვალში გაუყარა და გუბანით იგრძნო, რომ მაცნე მისთვის ამ კარგახნის ნაცნობი ამბის შესატყობინებლად არ იყო მოსული და სხვა უფრო მნიშვნელოვანი სათქმელი უნდა ეთქვა.

– დედოფალი მელიქე-ხათუნი ხვარაზმის სულტანს ჯალალედინს შეეუღლა.

კიდევ უფრო ხმადაბლა, ძლივს გასაგონად თქვა ფარდაგზე დაჩოქებულმა, იატაკამდე თავდახრილმა მოამბემ და სული განაბა.

ათაბაგს ხმალი გვერდით ედო და სუნთქვაშეკრული ამბის მომტანი ჩუმი ჟრჟოლვით ელოდა კისერზე იმ ხმლის დარტყმას.

ხმალმა დააგვიანა და მოამბემ ნელ-ნელა ასწია თავი.

ათაბაგს ფერი წართმეოდა, ხელი კანკალს მოეტაცნა, სავსე ფიალის დადგმა ვერ მოეხერხებინა და ღვინო ძირს იღვრებოდა.

– თავისი სურვილით ინება დედოფალმა, თუ ძალით შერთეს იგი სულტანს?

იკითხა მიმწყდარი, ხრინწიანი ხმით უზბეგმა.

– თავისი ნებითა და სურვილით, მაჰმადის სჯულითა და წესით შეეუღლა დედოფალი სულტანს.

დაუდასტურა ამბის მცნობელმა და ახლა უკვე თავი შიშით აღარ დაუხრია.

იგი გაოგნებული შეჰყურებდა მის თვალწინ ერთ წამში მომხდარ საოცრებას: უზბეგს ცახცახი ხელიდან უცებ მთელ სხეულზე გადაუვიდა, ციებიანივით ტანის ყოველი ასო და ნაკვთი აუკანკალდა და წაერთვა. მერე

მორჩილად ლოგინზე დასდო თავი, ერთი უაზროდ მოავლო თვალი იქაურობას და ცახცახიცა და სუნთქვაც ერთად შეწყვიტა, ერთბაშად...

როგორც კი ადარბადაგანის საქმეებს მორჩა, ჯალალედინი ისევ საქართველოსკენ გამოემართა. მთავარ ბანაკში მოსვლისას ქართველი ტყვეების ამბავი გამოიკითხა. ვაზირმა ტყვეების გამოსყიდვის თაობაზე ქართველებთან მიღწეული გარიგების ამბავი ისე ამაყად მოახსენა, ეტყობოდა, მბრძანებლისაგან დიდ ჯილდოსა და მადლობას ელოდა.

ჯალალედინი მის ნებადაურთველად ასეთი ნაბიჯის გადადგმამ საშინლად გააბრაზა.

ქართველთა ელჩების თანდასწრებით ვაზირს სასტიკად გაუჯავრდა;

– როგორ გაბედე ურწმუნო გურჯებთან მოლაპარაკების გამართვა, მე აქ ტყვეებით სავაჭროდ კი არ ვარ მოსული, არამედ ისლამის მტრების დასასჯელად და სრულიად მოსასპობად! ახლავე ეს ელჩები უკან გააბრუნე და ამ საქმეზე მეორედ აღარავინ გაბედოს ჩემი შეწყუბება.

ქართველთა ელჩებმა უსიტყვოდ დასტოვეს ხვარაზმელი სულტნის კარავი.

ცოტა ხნის შემდეგ ჯალალედინმა ვაზირი იხმო და დამშვიდებით გამოჰკითხა ქართველთა მიერ შემოდღეული ოქროს რაოდენობა. ვაზირმა უზარმაზარი რიცხვი დაუსახელა და სულტანი ჩაფიქრდა.

– ჯერ ხომ არ წასულან ქართველთა ელჩები? – იკითხა ჯალალედინმა.

– ჯერ არა, მბრძანებელო, მაგრამ სადაცაა წავლენ.

– სადამომდე დაიჭირე რაიმე მიზეზით! – ბრძანა სულტანმა და ვაზირმა შეამჩნია, როგორ აუთამაშდა მრისხანე მბრძანებელს ემმაკური ღიმილი მოკუმულ ბაგეზე.

მონასტრის ვიწრო სენაკში თაფლის დიდი სანთელი თითქმის ბოლომდე ჩამოღვენილიყო. ნაშუადამევი იყო, ყველას ეძინა. მონასტრის სამარისებურ სიჩუმეს მხოლოდ კალმის ხმაური არღვევდა. კალამი შეუჩერებლად გადიგადმოდიოდა ხბოს ტყავზე, ხანდახან წრიპინის მსგავს ხმას გამოსცემდა და კაცს ეგონებოდა, კუთხეში მიმალული თავი ფხაჭნის წიგნებით გამოტენილ უზარმაზარ სკივრსო.

მაგიდასთან ძილგატეხილი პავლია კუტი იჯდა პერანგისამარა. წვრილად და ჩქარა წერდა. ხანდახან შეჩერდებოდა, დაღლილ მკლავს გამართავდა, დაფიქრდებოდა და მერე ისევ აუშვებდა წამით შეყოვნებულ კალამს.

სანთელი იწვოდა და დნებოდა. იმ დღეების საქართველოს მატთან იწერებოდა, პერგამენტის გრძელი ფურცლები ჭრელდებოდა და ივსებოდა, ამბავი არ თავდებოდა და საწერი არ ილეოდა.

უცებ გარედან ხმაური მოისმა. კუტმა წერას თავი ანება, ყური მიუგდო. ხმაურმა იმატა. მონასტრის ჭიშკრიდან დარაჯების გადამახილი ისმოდა.

ომიანობის შიშით, მაგრად დახშულ ჭიშკართან დღედაღამ გუშაგები იდგნენ და მონასტერში უნებართვოდ არავის უშვებდნენ. პავლიამ ტანსაცმლის გადაცმა ძლივს მოასწრო, სენაკის კარზე დააკაკუნეს.

– ვინა ხართ, შემოდით! – გასძახა კუტმა.

კარი გაიღო და გუშაგმა ბერებმა აქოშინებული, სისხლით და ტალახით გასვრილი კაცი შემოიყვანეს.

– ვინ არი, აქ საიდან გაჩნდა? – იკითხა შეშფოთებულმა კუტმა.

– საქართველოს მეფის ელჩი ვარ, სულტან ჯალალედინის ბანაკიდან მოვრბივარ.

– ჯალალედინის ბანაკში რა გინდოდა? – გაიკვირვა პავლია კუტმა.

ელჩი ქვის იატაკზე ჩაიკეცა, სული მოითქვა და ნაწყვეტ-ნაწყვეტ განაგრძო.

– სულტანის ვაზირს ქართველ ტყვეთა გამოსასყიდი ოქრო ვაახლეთ...

ელჩს გული ამოვარდნაზე ჰქონდა, სულის მოსაბრუნებლად შეეყოვნდა.

– მერე? – ველარ მოითმინა უცებ სმენადქცეულმა კუტმა.

– ყველაფერი გათავებული იყო, ვაზირს ოქრო უნდა მიეთვალა და ჩვენ – მათი ტყვეები, მაგრამ, საუბედუროდ, უცებ სულტანი გაჩნდა საიდანღაც, ვაზირსაც სასტიკად გაურისხდა და ჩვენც ხელცარიელები დაგვიფრინა.

– ტყვეები არ დაგანებათ? – იკითხა ფერდაკარგულმა პავლიამ.

– არც ტყვეები დაგვანება და არც ჩვენი ოქრო ინდომა...

პავლია კუტი აფორიაქდა, თვალწინ ცაგო დაუდგა. ვინ იცის, რა იმედით ელოდა ამ ელჩებთან ერთად თორელის მობრუნებას მისი დაი. ეს იმედიც გამქრალიყო და რაღა ეშველება.

– სამნი ვიყავით ელჩად, თან მცირე რაზმიც გვახლდა მცველად. გუდანაზადი ავიკარით და საღამოს პირში ჩალაგამოვლებულნი დავბრუნდით. კარგა გზა რომ გამოვიარეთ და კარგადაც დაღამდა, ყაჩაღები დაგვესხნენ თავს და ტყვეების გამოსასყიდად წაღებული ოქრო წაგვართვეს. ჩვენ ხმლები ვიშიშვლეთ, მაგრამ ისინი ბევრნი იყვნენ და რას გავაწყობდით, ზოგი დახოცეს და ზოგნიც დაგვიჭრეს.

– მარტო ის ოქრო წაიღეს? – იკითხა ფიქრში წასულმა კუტმა.

– მხოლოდ ოქრო, სხვას ხელი არაფერს ახლეს.

– ის მძარცველები შარაგზის ყაჩაღები არ ყოფილან, თორემ სხვა რამესაც წაგართმევდნენ.

– მეც ეგრე ვფიქრობ, ისინი საგანგებოდ ოქროსათვის დაგვესხნენ თავს. ეჭვი მაქვს, ხვარაზმელები უნდა ყოფილიყვნენ.

– აგრე იქნებოდა, – დაუდასტურა პავლიამ. – ის, ვინც დღისით ძარცვავს ქვეყანას, არც ღამე ყაჩაღობისაგან დაიხვეს უკან...

დაკოდელ ელჩს ბერებმა ჭრილობა შეუხვიეს და მოასვენეს.

პავლია კუტს მთელი ღამე არ ეძინა თორელისა და ცაგოს დარდით.

დილით, როგორც გათენდა, ჯორზე შეჯდა, თან მორჩილი გაიყოლა და თბილისისკენ წავიდა.

პავლია კუტმა ისე განვლო გრძელი გზა, სატახტოდან სამხრეთისაკენ მიმავალი კაცი არ შეხვედრია. გზიდან ხედავდა: ახლომახლო სოფლებიდან ქორისაგან დაწიოკებული წიწილებივით გარბოდნენ ქალები და ბალები, მოხუცები და ხეიბრები. დაფეთებულები სტოვებდნენ სახლ-კარს და სარჩო-საბადებელს და მაღალი მთებისა, დაბურული ტყეებისა და მიუდგომელი გამოქვაბულებისაკენ მირბოდნენ უკანმოუხედავად.

დროდადრო ქართველი მხედრები გაიქროლებდნენ ცხენხეთქებით. ალბათ, მზვერავები იყვნენ და სატახტოსაკენ მტრის მოძრაობის ამბავი მიჰქონდათ.

ცხენის ფეხის მტვერი ჩადგებოდა, ფლოქვების ცემის შორეული ხმა მიწყდებოდა და ირგვლივ ისევ შიშისმომგვრელი სიჩუმე დგებოდა.

პავლია ჯორს მათრახს სცემდა და აჩქარებდა. უნდოდა, როგორმე თბილისში მტრის მოსვლამდე შეესწრო, თორემ მერე გვიან იქნებოდა, ხვარაზმელები ქალაქს ალყას შემოარტყამდნენ და საქართველოს სატახტოში საპყარი ბერი კი არა, ალბათ, ჩიტიც ვეღარ შეფრინდებოდა.

ზურგზე აბგააკიდებული მორჩილი სირბილით მოსდევდა, ჯორს უსწრებდა და ზოგჯერ თვითონაც სცემდა წკეპლას ფეხმოდგმულ, ოჩან პირუტყვს.

როდის-როდის ქალაქს მიატანეს, მაგრამ შიგ შესვლა გამწელდა. თბილისის ყველა კარი მაგრად იყო დახშული, ქალაქი საომარ ბანაკად ქცეულიყო, არც შიგ უშვებდნენ ვისმე და არც გარეთ ატარებდნენ კაციშვილს.

დიდხანს ატრიალა ჯორი პავლიამ დახშულ რკინის კართან. გუშაგები უყურებდნენ ზღუდის ქონგურებიდან ჯორზე ამხედრებულ ბერს და ხელის ქნევით ანიშნებდნენ, აქაურობას გაეცალეო.

მაგრამ უცნაური ბერი რკინის კარს არ ეხსნებოდა, ზედ ვერცხლისთავიან არგანს სცემდა და თან განწირულად იხვეწებოდა ქალაქში შეშვებას.

ბოლოს ბერის მოძალებამ და სიჯიუტემ თავისი გაიტანა, გუშაგებმა ციხისთავს გადასცეს ჯოროსანი ბერის სათხოვარი.

თბილისის ციხისთავად დადგენილი გოჩი მუხასძე კომკზე გადმოდგა. შორიდანვე იცნო თორელის ცოლის ძმა, კარის გაღება უბრძანა და პავლია კუტის ჯორი თბილისის ქუჩებში შეჩაქჩაქდა.

სულტან ჯალალედინის მდივანმა, მოჰამედ ენ ნესევიმ თავისი თვალით ნახა მთელი ის უბედურება, რაც ჩინგიზის ურდოებმა დაატეხეს თავს ხვარაზმშას უზარმაზარ სამფლობელოს.

მის თვალწინ დაემხო აყვავებული დიდი ქალაქები, მიწასთან გასწორდა მიუვალი ციხე-სიმაგრეები და ულმოზღად გაიჟლიტა ასიათასობით უდანაშაულო ადამიანი.

ყველაზე დიდი გულისტკივილით მოჰამედმა თავისი მშობლიური ქალაქის, ნესას დანგრევისა და აოხრების გამო განიცადა. ბევრი ახლობელი დაეღუპა ნესაში მოჰამედს, მთელი თავისი სიმდიდრეც იქ დაკარგა, მაგრამ ყველა დანაკლისზე მეტად განათლებულსა და წიგნის მოყვარულ მოჰამედს

გული იმ წიგნსაცავის განადგურებამ დასწყვიტა, რომელსაც წლების განმავლობაში ასეთი ზრუნვითა და რუდუნებით აგროვებდა.

სულტნის სამსახურში თავის ნებით შესული ნესევი მონგოლთა მძლავრობისაგან დახსნის მთელ იმედს ჯალალედინზე ამყარებდა. ხვარაზმმა მუჰამედის შვილთაგან, მხოლოდ მას თვლიდა ტახტის ერთადერთ ღირსეულ მემკვიდრედ. ნესევის რწმენით, საშინელი მტრის დამარცხებას, მამის უნაპირო სამფლობელოს პატრონობასა და მთელი საისლამოს მფარველობას მხოლოდ ჯალალედინი შესძლებდა.

იგი სასოებით შეჰყურებდა გაბედულსა და თავზეხელაღებულ სულტანს, მისი ძლიერი ნებისყოფითა და გაუტეხლობით მოხიბლულს სჯეროდა, რომ ჯალალედინი თავათ ალაჰისაგან იყო მოვლენილი მონგოლთათვის სამაგიეროს გადასახდელად და რომ იგი მთელს სამაჰმადიანო სამყაროში ერთადერთი კაცი იყო, რომელსაც შეეძლო წყეული ჩინგიზის გამკლავება და განადგურება. ნესევს სწამდა, რომ მიუხედავად ბევრი მარცხისა და უიღბლობისა, ჯალალედინის გამარჯვების ვარსკვლავი ბოლოს მაინც აღმოზრწყინდებოდა და მუსულმანთათვის ახალი, ბედნიერი ხანა დაიწყებოდა.

ამ რწმენით დაბრმავებულ ნესევის სულტნის ყოველი ნაბიჯი ღვთისაგან ნაკარნახევად ეჩვენებოდა და მის ყოველ გადაწყვეტილებას განგებისაგან შთაგონებულად თვლიდა.

მოჰამედი ერთგულად ემსახურებოდა თავის მბრძანებელს, სანიმუშოდ უძღვებოდა მისთვის მინდობილ საქმეს და სულტნის დივანში სამაგალითო წესრიგი ჰქონდა დამყარებული.

მაგრამ თავის მთავარ საქმედ და მოწოდებად სხვა მიაჩნდა ნესევის. იგი სულტან ჯალალედინის ცხოვრების მატთანეს წერდა და არა მარტო თავის წმინდა ვალდებულებად თვლიდა ამ საპატიო საქმეს, არამედ თავისი არსებობის გამართლებად და უპირველეს დანიშნულებადაც ეს მიაჩნდა.

თავათ უხვი და პატივმოყვარე სულტანი ყოველნაირად ხელს უწყობდა მოჰამედს ამ ამოცანის ღირსეულად შესრულებაში, თავის მდივანთან საუბრისათვის დროს არ იშურებდა და ფულითა და სხვა წყალობითაც უხვად აჯილდოებდა.

ნესევის თავისი შრომა ისე ჰქონდა მოფიქრებული, რომ მასში არა მარტო ხვარაზმისა და მისი ხელმწიფეების ისტორია უნდა მოეთხრო. შფოთითა და ფათერაკებით სავსე თავგადასავალი ჯალალედინისა მდიდარსა და უხვ მასალას იძლეოდა იმისათვის, რომ მისი ცხოვრების მემატთანეს აღეწერა და მოეთხრო ყველა იმ ხალხისა და ქვეყნის ისტორია თუ გეოგრაფია, რომლებთანაც ბედმა საქმის დაჭერა არგუნა დიდსა და აღმატებულ სულტანს.

ამ ხალხებიდან და ქვეყნებიდან ზოგი მტერი იყო ჯალალედინისა, ზოგიც – მოყვარე და ხელისგამმართველი, მათი მტრობაცა და მოყვრობაც გარკვეულ დაღს ასვამდა სულტნის მოქმედებასა და ცხოვრებას. ამიტომ, მონგოლთა უღლისაგან დამხსნელი სულტნის ცხოვრების შემსწავლელ შთამომავლობას იმ

ხალხების ცხოვრებაც უნდა სცოდნოდა, რომლებთანაც მას ურთიერთობა ჰქონდა.

ამ ამოცანის განსახორციელებლად ნესევის სულტნის სამდივნოსთან საგანგებო დანიშნულების სახელო ჰქონდა, სადაც იმ ხალხის მწიგნობრები ისხდნენ და მუშაობდნენ, რომელთა ისტორიის გაცნობა შთამომავლობისათვის საჭიროდ მიაჩნდა ნესევის.

აქ იყვნენ მონგოლი და უილური, სინდელი და ადარბადაგანელი და კიდევ ვინ მოთვლის – რომელი ქვეყნისა და რჯულის მწიგნობრები... ისინი ტყვედ ჩავარდნოდნენ ჯალალედინს ამ ხალხებთან შეტაკებისას და ახლა, ნესევის დავალებითა და ზედამხედველობით, მისივე მატთანის შესავსებად წერდნენ თავიანთი ქვეყნების ისტორიასა და გეოგრაფიას.

ნესევის ამ თანაშემწეებს სულტნის მდივნისაგან ყურადღება და ზრუნვა არ აკლდათ, მაგრამ ისინი მაინც ტყვეები იყვნენ და სულტნის ბანაკი რომ არ გაემსტოვრათ ან იქიდან არ გაქცეულიყვნენ, გუშაგები ჰყავდათ მიჩენილი, რომელთაც მკაცრად ჰქონდათ ნაბრძანები, დღედაღამ თვალი ედევნებინათ მათი ქცევისა და ყოველი ნაბიჯისათვის.

მწიგნობართა ამ კრებულს მიემატა საქართველოს მეფის კარის მგოსანი თურმან თორელი.

ნესევი დიდხანს ესაუბრა სულტნისაგან მისთვის მონად ბოძებულ ქართველ მგოსანს:

– ბედის ტრიალი აგრეა, მგოსანო! მისი ჩარხი ზოგისთვის წალმა ბრუნავს და ზოგისთვის – უკუღმა. ისიც უნდა გახსოვდეს, რომ ეს ჩარხი სულ ერთი მიმართულებით არავისთვის არ ტრიალებს. გუშინ რომ წალმა ბრუნავდა და მის შემყურეს თავი უბედნიერესი ეგონა, დღეს ჩარხი უკუღმა დაუტრიალებია და მისი მინდობილი ენით უთქმელ განსაცდელში ვარდება. ქვეყანა დღესდღეობით ისეა მოწყობილი, რომ ყველა ერთნაირად ბედნიერი არასოდეს არ არი და არც იქნება, ერთის ბედნიერება მეორის უბედურებას იწვევს და გულისხმობს, ერთი ერის ბედნიერება მეორის უბედურებას ნიშნავს და ერთა შორის მტრობასაც ისევე არა აქვს დასასრული, როგორც ცალკეულ ადამიანთა შორის შუღლსა და მოსისხლეობას.

გუშინ საქართველო ძლიერი და ბედნიერი ქვეყანა იყო, შენ მისი თავისუფალი, ბედით კმაყოფილი შვილი იყავი. დღეს შენი ქვეყნის ჩარხი უკუღმა დაბრუნდა და შენ ხვარაზმელი სულტნის მდივნის ტყვე ხარ.

ერთ დროს მეც სხვა ვიყავი, ჩემი სამფლობელო ქალაქი და ციხეები მქონდა ხორასანში. მაშინ ჩემი ახლანდელი პატრონის მამას, ხვარაზმმა მუჰამედს, თითქმის მთელი საისლამო ეკუთვნოდა. ბედნიერად, მოსვენებულად ცხოვრობდა მთელი იმოდენა ქვეყანაცა და მეც ბედნიერად ვიყავი; უზარმაზარი წიგნთსაცავი მქონდა, სულ იშვიათი და რჩეული წიგნებით სავსე, სიმდიდრე ჩემს ხელთ იყო და მოცალეა. გამოჩენილ მგოსნებთან და სწავლულებთან საუბარსა და კამათში, ღრმამინაარსიანი წიგნების კითხვაში ვაღამებდი და ვათენებდი და ჩემი ასეთი ცხოვრება სრულიადაც არ

მეჩვენებოდა მათ დროსტარებაზე ნაკლებ მიმზიდველად, ვინც თავის დღესა და წუთისოფელს ნადირობასა და შექცევას, ღვინოსა და ქალებს ანდომებდა.

მაგრამ, წელანაც გეუბნებოდი, ბედი მუხთალია და დაუნდობელი. ალბათ, მოსწყინდა სულ ჩვენთვის წალმა ტრიალი, უცებ შებრუნდა და უკუღმა გადატრიალდა. მონგოლეთის შორეულ უდაბნოში უცნობი ხალხი გამოჩნდა, გაძლიერდა და ჩვენს წასალეკად დაიძრა. ბედმა თავის ამ ახალი ნებიერისკენ იბრუნა პირი და ჩვენ ზურგი შეგვაქცია. ერთი ერის ბედნიერება, როგორც უკვე გითხარი, გარდუვალად მეორის უბედურებაზე შენდება და მონგოლეთის ვარსკვლავმა რომ ამობრწყინება იწყო, ხვარაზმის მნათობს ბინდი გადაეფარა.

ჩემი ბედნიერებაც იქ გათავდა. მაშინ, როცა ჩემი სამფლობელო და მშობელი ხორასანი მტრის ფეხთქვეშ დაეცა და მე, მაწანწალასავით ხალთამოკიდებული, გაუთავებელ გზას დავადექი...

თორელი ყურადღებით ისმენდა თავისი უცნაური პატრონის დარიგებასა და შეგონებას.

უკანასკნელ სიტყვებზე ნესევის ხმა აუკანკალდა და ცრემლი მოერია.

– მაგას რატომ ბრძანებთ, ბატონო, თქვენ ისევ სვებედნიერი და ძლიერი ბრძანდებით, – შეჰბედა თორელმა.

– სვებედნიერი და ძლიერი! იქნებ ასეც იყოს, მაგრამ ესეც შედარებითია, შენთან შედარებით, შეიძლება, ამჟამად მე აგრე ვჩანდე, მაგრამ ჩემი დღევანდელი ბედნიერება ხომ იმას ვერ შეედრება, რომელიც ჩემს ნესასა და ხორანდერში მქონდა.

ნესევიმ ცრემლი შეიმაგრა და განაგრძო:

– ჩვენი სულტანი, რომლის გმირობა და გულმოწყალება შენ თვითონ ნახე, დიდია და უძლიერესი. მართალია, აქამდე მასზე ძლევა წყეულ ჩინგიზ-ხანს ჰქონდა, მაგრამ ეს სულტნის უღონობით ან უგუნურებით როდი აიხსნებოდა. ალაჰმა ჩვენს დასასჯელად წარმოგზავნა შეჩვენებული ჩინგიზი, ჩვენთა ცოდვათათვის სამაგიეროს მოსაზღვევად. ამიტომ, ამო იყო ჯალალედინის ყველა ცდა და ღონე, გმირობა და თავგანწირვა. ახლა, როცა ალაჰამდე მიაღწია მორწმუნეთა სინანულმა და ვედრებამ, უფალმა ჩვენს სულტანს წყალობით მოხედა, რადგან იგი არი მუსულმანთა ერთადერთი იმედი და ქომაგი. უფალმა ჯალალედინის ბედის ჩარხუკულმა ტრიალი შეწყვიტა და სულტანს მტერზე გამარჯვება მისცა.

ამიერიდან ძლევა ჯალალედინის ხელთ იქნება, იგი დაამხოვს თათართა მძლავრობას, დაიბრუნებს თავისი მამის უზარმაზარ სამკვიდროს და მშვიდობასა და მოსვენებას მიანიჭებს მორწმუნეებს.

გურჯისტანის დაპყრობა სულტნის დიდი გამარჯვებაა. ამის გამო ჩვენ ალაჰს დიდ მადლობას ვწირავთ და ლოცვას აღვუვლენთ.

საქართველოს ძლევა სულტნის ცხოვრების მატიანეში ერთ-ერთ უბრწყინვალეს ფურცლად შევა, შთამომავლობამ უნდა იცოდეს, თუ ვინ იყვნენ ქართველები, სადა და როგორ ცხოვრობდნენ, ან როგორ მიაღწიეს ესოდენ ძლიერებას.

ყოველივე ამის მცოდნე შენა ხარ და შენ უნდა აგვიწერო შენი ქვეყნის ავ-
კარგი, ხალხის წესი და ზნე-ჩვეულება, წარსული და დღევანდელი. ბედი
გქონია, რომ მწიგნობარი ყოფილხარ და ამ საქმისთვის გამოდგები.

ამ მიზნით გიხსენი სულტნის რისხვისაგან და ჩვენ რომ არ
გვეშუამდგომლა, ახლა შენი მოჭრილი თავი თავრეზის ზღუდეზე იქნებოდა
მარგილზე წამოცმული. ვინძლო, სულტნის დიდსულოვნება და
გულმოწყალება დააფასო და ამ შენთვის მინდობილ საქმეში მუყაითობა
გამოიჩინო, დაჯექ და შეუდექ საქართველოს აღწერას. ჩვენგან წყალობასა და
ყურადღებას ელოდე, თუ რამ დაგჭირდეს, მოგვმართე და დაგეხმარებით
რჩევით და გამოცდილებით. ჩვენი სულტანი, უფალი იყოს მისი შემწე, უხვია
და მოწყალე. შენ შრომას ღირსეულად დააფასებს და ნიჭსა და ჯილდოსაც არ
მოგაკლებს.

ნესევის ტყვე საქართველოს ისტორიის წერას შეუდგა. ბევრი რამ ახსოვდა,
ბევრი რამ კიდევ ნესევის წიგნებით, არაბული და სპარსული, ბიზანტიური და
სომხური წყაროებით, მოგზაურობისა და მემატიაწიანების ცნობებით შეამოწმა
და შეავსო. დასაბამიდან მოჰყვა და დაწვრილებით აღწერა, როგორც
ქართველთა ადგილ-სამყოფელი, ისე მათი ზნე და ცხოვრების წესი.

საქართველოს ისტორიის მნიშვნელოვანი მოვლენების თხრობას რომ
შეუდგა, მოჰამედ ნესევის ნათქვამი აეკვიატა: ნუთუ, ერთი ერის ბედნიერება
მართლა მეორის უბედურებას მოასწავებს! ნუთუ, ეს მგლური კანონი
ბატონობს ისტორიის განვითარებაზე და იგი ყველა დროისა და ხალხისათვის
მართლა გარდუვალი და აუცილებელია! მაშ, რისთვისღა არის სარწმუნოება,
ღვთის შიში და მოყვასის სიყვარული? ან იქნებ ეს კანონი ერთისაგან მეორის
მოსპობისა, მხოლოდ წყეული მაჰმადის მიერაა მოგონილი, რომელიც, მოსეს
მსგავსად, შურისგებასა და სამაგიეროს გადახდას ჩააგონებს მორწმუნეებს
საშინელი სიტყვებით: «კბილი კბილისა წილ და თვალი თვალისა წილ!»

თუ ეს კანონი მაჰმადის მოგონილია, მაშ ქრისტიანები რად ომობენ, რად
ჟლეტენ უდანაშაულო ადამიანებს, რად იპყრობენ ქვეყნებსა და მუსრავენ
ხალხებს მართლმორწმუნე ბიზანტიელები და ქართველები, რუსები და
დასავლეთის ქრისტიანები?! განა ჯვარცმულმა არ უქადაგათ: «არა კაც კლა!»,
«რომელმან გცეს ყვრიმალსა მარჯვენასა, მიუჰყარ მარცხენეც!»

ასე ჟლეტდნენ ხალხები ერთიმეორეს მოსემდე და მაჰმადამდე, ბუდამდე
და ქრისტემდე. აგერ, მონგოლი ტყვე ზის თორელის გვერდით. მონგოლებს
ჯერ კიდევ თავიანთი ანბანი არა აქვთ და უიღურების დახმარებით
უიღურებისავე დამწერლობით სარგებლობენ. მოჰამედ ნესევის მიერ
გამოგონილ ამ უცნაურ დაწესებულებაში მონგოლი ტყვის გვერდით უიღური
ზის, ისიც ჯალალედინის ტყვე. მონგოლი ველურია, ნამდვილი
პირველყოფილი. იგი ჩინგიზის მალემსრბოლი ყოფილა. გრძელ გზებზე
ჩინგიზს იამები აქვს თურმე დაწესებული, მალემსრბოლი აქ დადლილ ცხენს
იცვლის და გზას განაგრძობს. მაგრამ თუ მანძილი ძალიან დიდია და

მაღემსრბოლიც ძლიერ დაღლილი, იგი გადასაცემ ამბავს სიმღერით ეუბნება თურმე მეორე მაღემსრბოლს, რომელმაც მისი გზა უნდა განაგრძოს და ამბავი, დანიშნულებისამებრ, სიმღერითვე უნდა მიიტანოს.

როცა სინდელი ტყვე და თორელი მუშაობას ამთავრებენ, ნესევის ეს ველური «მემატიანე» უიღურ მწიგნობართან რჩება, რაღაცას თავისებურად სიმღერით გაჰკვივის – «მოუთხრობს». და უიღური თავის ენაზე იწერს მის «ნაამბობს». ნაამბობი თურმე მონგოლთა ხალხური თქმულებებია. ეს თქმულებები და გადმოცემები ჩინგიზ-ყაენის წინაპრებს ასხამს ქებას და თავათ ჩინგიზსაც ღვთაებასავით ადიდებენ იმ გმირობის გამო, რომელსაც ის იჩენს უდანაშაულო ხალხის ჟლეტასა და განადგურებაში.

თუკი ეს ველური ხალხიც ასევე უყურებს კაცობრიობის განვითარებას და ისიც შეუგნებლად იმავე მგლური კანონით მოქმედებს, როგორითაც სხვა დაწინაურებული ხალხები, ეს კანონი მართლაც საყოველთაო და აუცილებელი ყოფილა, ყველა ხალხისათვის სავალდებულო და გარდუვალი.

მაშ რისთვისღა ჰყავდათ ხალხებს წინასწარმეტყველები, რისთვისღა თქვა საკუთარ არსებაზე უარი ბუდამ, ან ქრისტე რად ეწამა ჯვარზე, ან მაჰმადმა რაღად იქადაგა ახალი სარწმუნოება, თუ ადამიანების მოქმედების განმსაზღვრელად ისევ და მაინც ერთიმეორის კვლა და მტრობა, ერთი ერის მიერ მეორეზე ბატონობა დარჩებოდა?! თუ ერების ურთიერთობა საბოლოოდ ძალმომრეობაზეა დაფუძნებული და ერთი ერის ბედნიერება მეორე ერის უბედურებას ნიშნავს, მაშინ სამართლიანობა საერთოდ არა ყოფილა და სიკეთე არ არსებულა, ეს ქვეყანა ძლიერების საბატონოდ გაჩენილა, ხოლო სუსტებისათვის თავიდანვე მონის უღელი ყოფილა გამზადებული, ერთს სამუდამოდ ბატონობა დაჰყოლია გაჩენის დღიდან, ხოლო მეორეს – საუკუნო მონობა. ძლიერები ამქვეყნიური სიკეთით ტკბებიან, უღონონი კი გაჯახირებულ სიცოცხლეს მხოლოდ იმად ინარჩუნებენ, რომ სული ედგათ და იარსებონ.

ასე არსებობდა საქართველოც დიდხანს, თითქმის დავით აღმაშენებლის გამოჩენამდე. იმ დიდებული მეფის შემდეგ ქართველმა ხალხმაც ასწია თავი, წელში გაიმართა, და ამ ცხოვრების სიკეთის გემო, თავისუფალი არსებობის გემო და ეშხი გაიგო. სულ ახლახან დაიწყო ქართველობამ ადამიანური ცხოვრება, ლაღი, ბედნიერი სიცოცხლე და ნუთუ ასე ხანმოკლე უნდა იყოს მისი ბედნიერება, ნუთუ, ისევ მონის უღელში უნდა გაჰყოს თავი საქართველომ, იმ უჩინარი კანონის ძალით, რომ ქვეყნად მასზე ძლიერი გამოჩნდა და იმ ძლიერის ბედნიერება აუცილებლად თხოულობს მასზე სუსტი საქართველოს კვლავ გაუბედურებას. ნუთუ, ეს კანონი მართლა დაუძლეველია და საქართველოს ბედის ჩარხუკუღმა შეტრიალება კვლავ გარდუვალია და აუცილებელი?!

წერდა თორელი და ფიქრობდა დაუსრულებლივ. იგი ღრმად აკვირდებოდა თავისი ქვეყნის ისტორიას, წარსულის ამბებს დღევანდელს ადარებდა და

თეთრად გაფრენილ ღამეებში ამაოდ ცდილობდა ადამიანთა და ხალხთა ურთიერთობის ბნელსა და აუხსნელ კანონებში გარკვევას.

თავი მეოთხე

თავრებს წასულმა სულტანმა თავისი ძმის ყიასედინის ხელქვეით ორასიათასიანი ლაშქარი დასტოვა.

გარნისის გამარჯვების შემდეგ, არჭემის მელიქი და სურმარის პატრონი ეახლნენ ჯალალედინს, მორჩილება გამოუცხადეს და თავიანთი სამსახური შესთავაზეს. სულტანმა მათი ჯარებიც ყიასედინის ლაშქარს შეუერთა და საქართველოს სარბევად გაუსია.

ყიასედინის ლაშქარი კალიასავით მოედო სომხეთსა და ქვემო ქართლს, კახეთს, ჰერეთსა და მესხეთს არსიანის მთებამდე. საქართველოს სამეფოს დიდი ნაწილი არნახულ განსაცდელში ჩავარდა. თურქობისა და არაბობის შავბნელი დრო დავიწყებული ჰქონდა ასი წლის მოსვენებული ცხოვრებით განებივრებულ ქართველობას. ქვეყნის გულში შემოსული ლაშქარი მარცვაკდა და იკლებდა, სწვავდა და აოხრებდა, მუსრავდა და სპობდა ყველაფერს.

ხვარაზმელები ცხენებით თელავდნენ აყვავებულ ბაღნარებს, ხმლით ჩეხავდნენ ვენახებსა და მშვიერი მგლებივით დათარეშობდნენ ქვეყნის ერთი კუთხიდან მეორეში.

მოსახლეობას ბარში აღარ ედგომებოდა. სოფლები აიყარნენ. საცხოვრებელი მიატოვეს, მთებსა და ტყეებში, გამოქვაბულებსა და დარანებში გაიხიზნენ.

სასტიკი დამპყრობლები არავის ინდობდნენ, დიდსა და პატარას ერთნაირად უსწორდებოდნენ. ტყვეთა ქარავნებმა, ჯოგმა და ფარამ სამხრეთისაკენ ჰქნა პირი და ადარბადაგანისკენ დაიძრა.

ქართველთა სიმრავლემ ბაზრებზე ტყვის ფასი დასცა და საუკეთესო გურჯი ვაჟკაცი სამ-ოთხ დინარად ძლივსლა იყიდებოდა.

ხალხი თანდათან მიხვდა, თუ რა დიდი უბედურება მომხდარიყო გარნისთან.

გარნისის ჟღეტასა და ტყვეობას გადარჩენილი ერის მთავრებიც გონს მოდიოდნენ, თავის საგამგეო ქვეყნებში მაგრდებოდნენ და მტრის წინააღმდეგობის გაწევას ცდილობდნენ. გამწარებული ხალხი მთავრების გარშემო იკრიბებოდა. ყველა, ვისაც ხელში ხმლის აღება შეეძლო, იარაღს ისხამდა და ქუდზე კაცი საბრძოლველად გამოდიოდა.

ქართველთა მცირე რაზმები მოულოდნელი თავდასხმებით აწუხებდნენ დამპყრობლებს, ხვარაზმელთა დიდ ლაშქართან პირისპირ შებმას ვერ ბედავდნენ, მაგრამ ვიწროებსა და ძნელად გასაშლელ ადგილებში, სადაც კი მოახელთებდნენ, მტერს დაუნდობლად მუსრავდნენ.

ხვარაზმელთა მარბიელები დაშინდნენ, მთებსა და ვიწროებში მტრის დევნას დაეხსნენ. ყოველი ხისა და კლდის უკან ჩასაფრებული ქართველი ეგულებოდათ, ამიტომ სიფრთხილეს უმატეს, ცალ-ცალკე საშოვარზე სიარულს მოეშვნენ და ქვეყნის რბევას დიდ-დიდ რაზმებად განაგრძობდნენ.

ქართველთა მეფის კარი და უმაღლესი სარდლობა ჯერ კიდევ დაბნეული იყო. გარნისის მარცხის შემდეგ მთავარსარდლებს შორის უთანხმოება ჩამოვარდნილიყო და ერთნებაობა დარღვეულიყო. ზოგნი საჩქაროდ ახალი დიდი ლაშქრის შეყრას, თბილისის გამაგრებასა და ხვარაზმელებთან გადამწყვეტ ბრძოლას მოითხოვდნენ; ზოგი ასე უცებ დიდი ლაშქრის შეკრებას შეუძლებლად თვლიდა, თბილისის დაცვა წინასწარ განწირულად მიაჩნდა და ამიტომ ჯალალედინთან მოლაპარაკების გამართვას სთავაზობდა მეფეს.

ახლად მოლოგინებული, მისუსტებული დედოფალი ხან ერთს ეთანხმებოდა და ხან მეორეს, საბოლოოდ ვერც ერთ გადაწყვეტილებაზე ვერ დამდგარიყო და ქვეყნის საშველად გაბედული ნაბიჯი ვერ გადაედგა.

დრო კი არ ითმენდა. მტერი გაბედულად, სწრაფი და ფიცხელი მოქმედებით ახორციელებდა თავის განზრახვას.

ჯალალედინმა კარგად იცოდა, რომ გარნისის მარცხითა და ყიასედინის ლაშქრის თარეშით გატეხილი ქართველებისათვის სულისმოთქმისა და გონზე მოსვლის დრო არ უნდა მიეცა და საქართველოს სამეფოს საბოლოო დაპყრობისათვის სწრაფად და ანგარიშიანად ემზადებოდა.

შალვა ახალციხელმა თავიდანვე კარგად აწონ-დაწონა გარნისის დამარცხების შემდეგ შექმნილი მდგომარეობა. თავის სამკვიდროდან აყრილი ხვარაზმის სულტანი ადარბადაგანში ფეხს დიდხანს ვერ მოიკიდებდა, დღეს თუ არა, ხვალ მაინც გამოჩნდებოდნენ მისი გემის მძებნელი მონგოლები, ხვარაზმელებს ზურგიდან დაჰკრავდნენ, ან საბოლოოდ გაანადგურებდნენ, ან იძულებულს გახდიდნენ ადარბადაგანიდანაც აყრილიყვნენ და სხვაგან გადახვეწილიყვნენ.

შალვა ახალციხელს ჯალალედინის გამარჯვებაცა და ადარბადაგანში ყოფნაც დროებითად ეჩვენებოდა, სულტნის მოსაჩვენარი ძლიერების იქით მისი დაღუპვის გარდუვალობას ხედავდა.

ტყვედ ჩავარდნილ ახალციხელს თავისი სიცოცხლე ჩალადაც არ უღირდა, მაგრამ სიცოცხლის შენარჩუნება მხოლოდ იმისთვის უნდოდა, რომ ივანე მხარგრძელს ერთხელ პირისპირ კიდევ შეხვედროდა, მეფისა და ღვთის წინაშე გარნისის მარცხის გამო მისთვის პასუხი მოეთხოვა და საბოლოოდ გასწორებოდა.

მხარგრძელის ღალატში თავადაც არ იყო დარწმუნებული ახალციხელი, მაგრამ ბრძოლის ველზე მტრის პირისპირ დგომისას ამირსპასალარის ესოდენ უზრუნველობა და გაუფრთხილებლობა თავისთავად ღალატის სწორად ეჩვენებოდა და მხარგრძელს პასუხი უნდა ეგო. შურისძიებისკენ მოუწოდებდა ახალციხელს გარნისის კლდეებთან დაცემული ოთხი ათასი მესხი ვაჟკაცის

თავგანწირვა, საქართველოს ძლიერების გატეხილი და შეგინებული სახელი, სამშობლოს სიყვარული და მეფის ერთგულება.

რაკი ამ ფიქრს დაადგა და რახან ჯალალედინის ბატონობის დღეები მაინც დათვლილად ეჩვენებოდა, შალვამ გადაწყვიტა, რადაც უნდა დასჯდომოდა, სიცოცხლე შეენარჩუნებინა. ამიტომ მოიდრიკა ამაყი ქედი ამ ბრგე ვაჟკაცმა დროებითი გამარჯვებით გაამპარტავებული ჯალალედინის წინაშე.

ჯალალედინსაც თავისი ანგარიში ჰქონდა შალვას მიმართ: მან გარეგნული სიმშვიდე და დიდსულოვნება გამოიჩინა, ქართველ დიდებულს ღირსეული მხედრული პატივი მიაგო და არა მარტო სიცოცხლე, არამედ მამულები და ყმებიც აჩუქა და სამფლობელოდ მარანდი, სალმისი, ურმია და შუშნუია მიუბოძა.

სიცოცხლის შენარჩუნებაზე მზრუნველი ახალციხელი სულტნის მზეს ფიცულობდა და თავს ჯალალედინის მიერ გაბედნიერებულ კაცად აჩვენებდა. ამოდენა სამფლობელოს დაპატრონებული დიდებული დროს ნადირობასა და შექცევაში ატარებდა და თავი ისე ეჭირა, ვითომ აღარც სამშობლო ახსოვდა, აღარც თავისი ცოლ-შვილი და ახლობლები.

ჯალალედინისაგან საგანგებოდ მიჩენილი მოენეები, მსახურები და მზირები მის ყოველ ნაბიჯს ადევნებდნენ თვალს, ყოველნაირად უზვიადებდნენ გარნისში მომხდარ მარცხს, ამირსპასალარის ღალატში ათასგვარად არწმუნებდნენ და თანაც ამ ღალატს მისდამი შურითა და მტრობით უსაბუთებდნენ.

ჯალალედინმა ორჯერ ინახულა ახალციხელი. მასთან ნადირობით გაერთო და სუფრაზეც ეწვია. მოეწონა სულტანს ქართველთა უპირველესი მეომარი. შალვას ნასროლი ისარი აუცდენლად ხვდებოდა მიზანს, ხოლო მისი დარბაისლური ქცევა და სიტყვა-პასუხი ხელმწიფეების ღირსად ეჩვენა.

საუბარში სულტანმა მაჰმადის რჯულზე ჩამოუგდო სიტყვა. შალვა განზრახვას მიუხვდა და თავად დაასწრო:

– მაჰმადის სარწმუნოების უმეცარი ვარ, გთხოვ, ყურანის მეცნიერი ვინმე მომცე, რომ თქვენი რჯული მიქადაგოს, განმიმარტოს და მისი უპირატესობა შემაგნებინოს.

ჯალალედინმა ახალციხელის თხოვნა სიამოვნებით აღასრულა და შალვას მეორე დღესვე ყურანის მეცნიერი ყადები და შეიხები გაუგზავნა. შალვა მაჰმადის რჯულის ქადაგებას მოთმინებით უსმენდა და თავს ისე აჩვენებდა, ვითომ სიბრძნის წყაროს ეწაფებოდა და ყურანის ყოველი სურა გულში სწვდებოდა.

ჯალალედინთან საუბარში შალვა განზრახ აზვიადებდა თავის აღმფოთებას გარნისის ომში «ქართველთა ღალატის» გამო. მხარგრძელსა და მის თანაშემწეებს აგინებდა და იმ დღეს ნატრობდა, როცა სამაგიეროს გადახდის შემთხვევა მიეცემოდა. თავის მხრივ, ჯალალედინიც შხამს შხამზე აწვევებდა.

– ქართველებს დიდძალი ოქრო შეუკრებიათ და ტყვეების გამოსახსნელად მოგვმართეს, – უთხრა სულტანმა.

ახალციხელი გაიღურსა, ატყობდა, სულტანი რაღაც ქსელსა ქსელავდა.

– ყველაზე დიდ თანხას შენს გამოსასყიდად ველოდი, – განაგრძო ჯალალედინმა, – მაგრამ ქართველებმა უცნაური გულმავიწყობა გამოიჩინეს, გრძელი სია გვაახლეს. იმ სიაში უბრალო აზნაურებიც არ გამორჩენიათ, მხოლოდ ჩვენი ყველაზე ძვირფასი ტყვე დაავიწყდათ ქართველებს, მეფის ვაზირი და უპირველესი სარდალი. ახალციხელის გამოსასყიდად ქართველთა მეფე ერთ დინარსაც არ იმეტებს...

ჯალალედინმა ქვეშ-ქვეშ გახედა ახალციხელს, ნათქვამით მოხდენილი შთაბეჭდილების ამოკითხვას ცდილობდა მის სახეზე ძლიერი სულტანი.

ახალციხელი მიუხვდა სულტანს და თავი აღშფოთებულად მოაჩვენა.

– ერთხელ გაყიდულს უკან აღარ გამომისყიდიან! – დაიგმინა ახალციხელმა და ცისკენ ხელი აღაპყრო. – მაგრამ თუ ღმერთმა წყალობის თვალით მომხედა და სამაგიერო მაზღვევინა, მაშინ ნახონ, როგორ გადავუხდი ქართველებს.

– იძიებდი შურს ქართველებზე? – ისევ ცბიერად გახედა ჯალალედინმა, – იბრძოლებდი მხარგრძელის წინააღმდეგ?

– ვიბრძოლებდიო? მაგ დღის დადგომის იმედიტლა ვცოცხლობ, დიდებულო ხელმწიფევ, ოღონდ იმას მოვესწრო, მხარგრძელსა და ჩემს გამწირველ ქართველებზე შური ვიძიო, ქვას ქვაზე არ დავტოვებდი, დიდსა და პატარას ყველას ერთნაირად გავუსწორებოდი და ღალატსა და ორგულობას მწარედ ვანანებდი.

– მაგ დღეს მალე მოესწრები, – ბრძანა ახალციხელის ნათქვამით ნასიამოვნებმა სულტანმა და შალვა სმენად იქცა, – მაგ დღეს მალე მოესწრები, დღეს თუ ხვალ ქართველებს შევესევი და იმ მთებსაც დავიპყრობ, სადაც თქვენი გახიზნული დედოფალი იმალება. შენ იმ მთებში მისასვლელი გზები გეცოდინება და თუ კარგ მეგზურობას გაგვიწევ, ჩვენგან დიდ პატივსა და წყალობას დაიმსახურებ.

ახალციხელი მუხლზე დავარდა და სულტნის კალთას ემთხვია.

– ოღონდ ჯარი მომეცი, ხელმწიფევ, და მიუვალ, ჯერ უცხოთაგან ფეხდაუდგამ მთებში შეგიყვან, ერთ მტკაველ მიწას არ დავტოვებ საქართველოში, სადაც თქვენი ძლიერების დროშა არ იფრიალებს.

– თუ ქართველთა წინააღმდეგ ომში ჩვენს ერთგულებას გამოიჩენ და გვიწინამძღვრებ, დაპყრობილ საქართველოს შენ დაგიმორჩილებ და ქვეყნის პირველ კაცად გაგხდი, – ბრძანა სულტანმა და ახალციხელი ისევ მუხლზე დავარდა მისი კალთის სამთხვევად.

ჯალალედინმა თავისი ბიძის, ორხანის მეთაურობით ლაშქარი განძის დასაპყრობად გაგზავნა. იმ ლაშქარს შალვა ახალციხელიც გააყოლა და თავის უპირველეს ემირს დაავალა ქართველ ტყვეს დაკვირვებოდა, მისი ერთგულება და გულწრფელობა გამოეცადა.

ახალციხელს ორხანი ტოლივით ექცეოდა, პატივს არ აკლებდა და რჩევას ეკითხებოდა.

შალვამ იცოდა, განძაზე ლაშქრობა მისთვის გამოცდა იყო და რომ მის ყოველ ნაბიჯს სულტნის ჯაშუშები ადევნებდნენ თვალყურს. ახალციხელი ყველგან სულტნის ქება-დიდებას ამბობდა და თავი ყველასთან ჯალალედინის ნდობითა და დიდსულოვნებით მოჰქონდა.

შალვას არაერთხელ ჰქონდა განძა აღებული და დალაშქრული, ქალაქის მისადგომები და სიმაგრის სუსტი ადგილები კარგად იცოდა. ახლაც, განძის აღებისას, შალვამ მისთვის ჩვეული გამირობა გამოიჩინა, ხვარაზმელებს მართლაც განსაცვიფრებელი ბრძოლა აჩვენა და განძის შელევწილ კარში პირველი შევარდა და ორხანის გული კიდევ მეტად მოიგო.

სულტანი ორხანისა და თავისი მსტოვრების ნაამბობმა საბოლოოდ დაარწმუნა ქართველი დიდებულის ერთგულებაში.

ამბავი ყრუ-მუნჯისა და მისი ლამაზი ცოლისა

ათაბაგ უზბეგს ერთი გაუბედურებული ვაჟი დარჩა. ეს ვაჟი დაბადებით ყრუ-მუნჯი იყო და სახელად ქამუშს უხმობდნენ.

უზბეგს მის მეტი ვაჟი არ ჰყავდა. ხუთ წლამდე კიდევ ჰქონდა იმედი, ეგებ ენა ამოიდგასო, მაგრამ უფლისწული სამუდამოდ მუნჯი დარჩა, გარესამყაროსი არა ესმოდა რა და თავადაც ვერაფერს აგებინებდა. ერთადერთი ადამიანი, რომელსაც ქამუშის ესმოდა, მისი აღმზრდელი იყო. ხელის მოძრაობით, თვალის და სახის გამომეტყველებით ესაუბრებოდა იმ უცნაურ კაცს, რომელიც ყველასათვის აუხსნელსა და გაუგებარ ენაზე ლაპარაკს ღვთის ჩაგონებით მისჩვეოდა. ებრალებოდა უზბეგს განგებისაგან დაჩაგრული ერთადერთი მემკვიდრე. თავისი მემთვრალეობისა და უზრუნველობის გამო არც ცოლების, არც სხვა შვილებისა და არც ქვეყნის წინაშე თავს დამნაშავედ და შემცოდედ არ გრძნობდა. ქამუშის წინაშე კი უღონო იყო ათაბაგი, მემკვიდრის უბედურების მიზეზად რატომღაც თავისთავს თვლიდა, მისი ჰკვიანი თვალების ნაღვლიან ცქერას ვერ უძლებდა და საცოდაობით იწვოდა.

უზომოდ ანებივრებდა, ყოველგვარ სურვილს სიხარულით უსრულებდა და საარაკო ფუფუნებაში ზრდიდა უზბეგი თავის ვაჟს. სარწმუნოებაზე მაშინ აიღო ხელი ათაბაგმა, როცა მის უბედურ შვილს არც ლოცვა-ვედრებამ უშველა, არც წმინდა ადგილების მოვლამ და არც სასწაულთმოქმედი მიზგიტებისათვის უთვალავი სიმდიდრის შეწირვამ, ღვინოსა და მემთვრალეობასაც ქამუშის ჯავრითა და საცოდაობით მიეძალა და გამოფხიზლებისა უფრო იმიტომ ემინოდა, რომ უენობითა და სიყრუით დატანჯული შვილისათვის უნდა ეცქირა.

უზბეგმა მემკვიდრეს ცალკე სასახლე აუშენა და საცხოვრებლად იქ გადაიყვანა. ქამუშის კარი მსახურთა სიმრავლით, სიმდიდრითა და

ფუფუნებით უზბეგისას აღმატებოდა, მაგრამ უფლისწული მაინც საპყარი და უბედური რჩებო-და.

სმენადახშულსა და უენო უფლისწულს წიგნი ვერ ასწავლეს, ისეც გაწამებული ბავშვი სწავლითა და წვრთნით აღარ გააწვალეს და ქამუში გონებრივად განუვითარებელი დარჩა.

სამაგიეროდ, სხეული გაეზარდა ქამუშს, ტანი აიყარა, ახოვანი და ძალუმი ვაჟკაცი დადგა. მხარბეჭიან, ღონიერ ჭაბუკს ჭკუა ისევ ბავშვისა დარჩა, სუსტი და განუვითარებელი.

ეგებ ცოლის შერთვამ და შვილების გაჩენის სიხარულმა მაინც გაახალისოს სულ მუდამ მოწყენილი და დაღონებული უფლისწულიო, – იფიქრა უზბეგმა და სასძლოს ძებნას შეუდგა.

ადარბადაგანის ათაბაგის მოყვრობაზე უარს ვინ იტყოდა და უზბეგმა სასძლოდ მარადის ბატონის ულამაზესი შვილიშვილი მოიყვანა.

დიდი ქორწილი გადაუხადა მემკვიდრეს და თავს უძვირფასესი საჩუქარი გადააგდო. ეს იყო სპარსეთის ზღაპრული მეფის ქეიქაუსის ოქროს ქამარი. ეს ქამარი ქეიქაუსის შემდეგ მის შვილებსა და შვილიშვილებზე გადადიოდა მემკვიდრეობით და ბოლოს ილდეგიზიდ ფაჰლავნებს რგებოდათ. ამიერიდან ილდეგიზიდების უკანასკნელ შთამომავალს, ყრუ-მუნჯ ქამუშს უნდა რტყმოდა წელზე ქეიქაუსის ოქროს ზღაპრული სარტყელი. სარტყელი შემკული იყო მრავალი პატიოსანი თვლით, რომელთა შორის ხელისგულისოდენა, მრგვალი ლალი იყო ჩასმული. ეს იყო ყველაზე საკვირველი და ყველაზე ბრწყინვალე ლალი. ლალზე წარწერილი იყო სარტყლის ყველა მფლობელის სახელი, ქეიქაუსიდან მოყოლებული და ქამუშით გათავებული.

ქვეყნისაგან მოწყვეტილმა ქამუშმა ლამაზი ცოლი ნივთივით დაისაკუთრა. ადამიანთა ახლო ყოფნასა და ურთიერთობას მოწყურებული ჭაბუკი ქალს წუთით არ იშორებდა, გარეთ არ უშვებდა და ახლო არავის აკარებდა.

ყრუსა და უენოსათვის სხვებთან ყოფნა წამება იყო, ცოლთან თავისი ნაკლისა რატომღაც არა რცხვენოდა, მზის ჩასვლასა და დაღამებას ხსნასავით ელოდა: ღამე ვერავის ხედავდა, მოსასმენის მოუსმენლობითა და სათქმელის უთქმელობით არ იტანჯებოდა. ცოლთან უსიტყვო აღერსის ბედნიერებას ეძლეოდა და გათენებას, მზის ამოსვლას ისევ თავმომძულელებული ხვდებოდა.

ქამუშის ცოლი ნორჩი და გამოუცდელი ქალი იყო. პირველ დღეებში ისე მტკივნეულად ვერ გრძნობდა ქმრის უბედურებას, ვაჟკაცის ღონიერი მკლავები და სარეცლის სიამენი უყურებდნენ, ავიწყებდნენ დღისით მიყენებულ გულისტკენას, მაგრამ შემდეგ, როცა ლოგინსაც შეეჩვია, საარაკო სიმდიდრისა და ფუფუნების ყველა უპირატესობასაც, ქამუშის ცოლმა თანდათან იგრძნო, რომ ქვეყნად ყველაზე უბედური ქალი იყო. აყლაყუდა, გოლიათი ვაჟკაცი გონებასუსტი და ბავშვის ჭკუისა აღმოჩნდა. მისი ქცევა, ყოველი ნაბიჯი ბალღური და ჰასაკისათვის შეუფერებელი ჩანდა. მსახურები და კარისკაცები უფლისწულის ყოველ სისულელეზე სიცილს ძლივს

იმაგრებდნენ და პატარა დედოფლისაგან შეკავებული ღიმილის დაფარვას ცდილობდნენ.

პირველ ხანს ამ სატანჯველისაგან ერთადერთ ხსნად დედოფალსაც მზის ჩასვლა და დაღამება ესახებოდა; იქ, ცოლ-ქმრულ სარეცელზე ქამუში კაცი იყო, ღამეში მისი ცოლი ვედარც სიმუნჯით გაწამებულ ქმრის სახეს ხედავდა, აღარც ქმარი იქცეოდა ყმაწვილურად.

მაგრამ ღამეებმაც დაჰკარგეს თავისი სიამე, რადგან ქამუშის ცოლი ულამაზესი ქალი იყო და მისი სიტურფე მარტო ღამის საკუთრებად როდი იყო გაჩენილი. მოსწყინდა ახალგაზრდა ქალს ღამურასა თუ ჭოტივით ღამის სიბნელით ტკბობა; დღის სინათლეზე გასვლა, თავისი მშვენიერებით სხვათა თვალის გახარება და ამით საკუთარი გულის გახარებაც უზომოდ მოუნდა.

ქალს ხალხისკენ, სამზეოსკენ ეძახდა გული, ქმარი მარტოობისკენ, სიბნელისაკენ ეწეოდა, ქალი გასაქცევს ეძებდა, ქმარი უფრო ჰკეტავდა და გარეთ არ უშვებდა.

უბედურ ქამუშს მამა გარდაეცვალა. ადარბადაგანის უდიდესი ნაწილი უკვე ხვარაზმელ სულტანს დაეპყრო, ქვეყანა აწეწილი იყო და უპატრონოდ დარჩენილ უმწეო ქამუშს ღვთისა და თავისი მეუღლის მეტი იმედად აღარავინ ჰყავდა. ჯალალედინის ვაზირი ქამუშის სამკვიდროს მოადგა. ალყაშემორტყმული უზბეგის ძის ავ-კარგი გამოიკითხა. ქამუშის ცოლის უბადლო სილამაზე და ათაბაგის მემკვიდრის საარაკო სიმდიდრე რომ აღუწერეს, გადაწყვიტა, ერთსაც დაპატრონებოდა და მეორესაც, სულტნის ვაზირს ჩუმად, ჯალალედინის შეუტყობლად, უნდოდა ქამუშის ცოლისა და ავლა-დიდების ხელში ჩაგდება. საგონებელსა და ხერხის ძებნაში რომ იყო, სწორედ მაშინ მოუვიდა ქამუშის ცოლისგან საიდუმლო მოციქული. დედოფალი თავის ნებით დანებებას აღუთქვამდა, თუ ვაზირი ცოლად შეირთავდა. ვაზირმა ცოლად შერთვის ფიცი შეუთვალა და ქამუშის თანამეცხედრე ღამით შერეფელმოლკის ბანაკში გაიპარა.

სწორედ იმ დღეს, სრულიად მოულოდნელად, დაბარებულივით გაჩნდა შორს მყოფი ჯალალედინიც, ვაზირის უმშვენიერეს ნადავლს ქორივით დააცხრა, ქამუშის ცოლი ხელიდან გამოგლიჯა და მისი ალერსითაც თვითონ გაძღა.

მარტოდდარჩენილმა ქამუშმა ცოლი მოიკითხა, ვერსად იპოვა. ბოლოს გაუმხილეს, მტერს ეახლა და დანებდაო. ქამუშმა ღრიალი მორთო, ტანსაცმელი შემოიხია და ყველაფერი დალეწა. მერე ხვარაზმელების ბანაკში შევარდა ღმუილით. სულტნის სამყოფელისკენ გაიჭრა, მაგრამ მცველებმა ხელი სტაცეს. არ ნებდებოდა, ხელითა და ფეხით, თავითა და კბილებით იბრძოდა და უძალიანდებოდა ქამუში შესაპყრობად დახვეულ სულტნის მამლუკებს, როგორც იყო, შეიპყრეს და საპყრობილეში ჩააგდეს.

ბნელ საპყრობილეში დატუსაღებული ქამუში რომ ჯავრითა და უჭმელობით ილეოდა, მისი ცოლი ქვეყნის მპყრობელი სულტნისა და უებრო ვაჟკაცის ალერსით ტკბებოდა. კაცთან ლაპარაკს თითქმის გადაჩვეული

ქამუშის ცოლი ბედნიერი იყო: ჯალალედინს მისი ჩურჩული კი არა, გულისფეთქვაც ესმოდა და ვაჟკაცის საალერსო სიტყვას დანატრებულ ქალს ნაზად, გამორჩეული სიტყვით ეფერებოდა.

რამდენიმე დღის შემდეგ ჯალალედინს მოახსენეს: ათაბაგის ყრუ-მუნჯი მემკვიდრე სულტნის ნახვას თხოულობს და სასმელ-საჭმელს პირს არ აკარებსო. მხოლოდ მაშინ გაახსენდა ჯალალედინს ქამუშის არსებობა.

საპყრობილიდან გამოაყვანილა და მაღალი შთამომავლობის ღირსი პატივით დაუხვდა.

ქამუში სულტნის წინაშე დაემხო. ხალათქვეშ დაფარული ოქროს ძვირფასი სარტყელი მოიხსნა, ჯალალედინს გაუწოდა და თვალცრემლიანმა შეზმუვლა, სულტანმა იმ გაურკვეველი ზმუილისაგან ვერაფერი გამოიტანა, მაგრამ ოქროს ვეებერთელა სარტყლისკენ კი გაექცა თვალი. მაშინ ქამუში თავის გამზრდელს მიუბრუნდა, მისთვის ნაცნობ ხელისა და თვალის ენაზე რაღაც უთხრა. გამზრდელმა სულტანს მოახსენა: ათაბაგის ძე ქამუში დიდებული სულტნის ფერხთ ემთხვევა, მის დღეგრძელობას შესთხოვს ალაჰს და თავს მის მონად აცხადებს. უზბეგის ძე უარს ამბობს თავის სამკვიდროზეც, მამისაგან ნაანდერძევ სიმდიდრესა და ქონებაზეც და დიდსა და აღმატებულ სულტანს საჩუქრად უძღვნის ამ ფასდაუდებელ ოქროს სარტყელს, რომელიც ქეიქაუსს ეკუთვნოდა პირველად და შემდეგ მემკვიდრეობით გადადიოდა სპარსეთის მეფიდან მეფეზე. ამ სარტყლის მსგავსი ჯერ არაფერი შეუქმნია კაცის ხელს და მას ქვეყნად ვერაფერი შეედრება, ვერც პატიოსანი თვლების ფასითა და ვერც ხელოვნებით. ათაბაგის მემკვიდრეს ერთადერთი სათხოვარი აქვს დიდი სულტნის წინაშე – უბოძოს უკანვე თავისი მეუღლე. ხვარაზმის მორჩმულ სულტანს ცოლიც ბევრი ჰყავს და ამ ქვეყნის სხვა მრავალი სიკეთითაც ტკბება, ქამუშს ეს ერთადერთი ქალი ჰყავს – იგი არის მისი საპყრობის ნუგეში, ამ ქვეყნის ერთადერთი სიამე და სიცოცხლის სიხარული.

ჯალალედინს შეებრაღა უენო, სმენადახშული ვაჟკაცი. ცოლისაგან ღალატით მიტოვებული ქამუში სიცოცხლის ერთადერთ სიხარულად ისევ იმ ცოლს სახავდა, იგი ყველაფერი იყო მისთვის, ხოლო ჯალალედინისთვის – უკვე აღარაფერი. რა უცნაურად არის მოწყობილი წუთისოფელი, ადამიანი იმისგან ივლტის, ვისთვისაც იგი სიცოცხლის ერთადერთ აზრად ქცეულა და მისკენ გარბის, ვისთვისაც იგი ჩალადაც არ ღირს.

– წუთისოფელი და დედაკაცი ორივე ერთნაირად უმადური და გაუტანელია. ჩვენ, ვაჟკაცები, მიტომა ვართ ამქვეყნად, რომ დედაკაცის უმადურობა დავთრგუნოთ და წუთისოფლის გაუტანლობას ვებრძოლოთ! – ბრძანა ჯალალედინმა, ქამუში ფეხზე წამოაყენა და გვერდით დაისვა. მერე ვაზირს უბრძანა, ათაბაგის მისათვის სასახლე და სამკვიდრო მამული ხელუხლებლად დაებრუნებინათ, მისი ცოლი ახლავ მოეყვანათ და ქმრისთვის ჩაებარებინათ.

ჯალალედინმა ქეიქაუსის სარტყელი წელზე შემოირტყა და იქაურობა დასტოვა, რადგან ქამუშის ცოლის უბედურებისათვის ცქერა არ უნდოდა.

მეორე დილით ქამუში და მისი ცოლი საწოლში მკვდრები ნახეს. ორთავეს მძინარეებივით მშვიდი, უშფოთველი გამომეტყველება შერჩენოდათ, ძალდატანების ნიშნები არცერთს არ ეტყობოდა.

საწოლთან საწამლავის დაცარიელებული შუშა ეგდო და ვერავინ მიხვდა, თუ ვის ვინ მოეკლა.

ჯალალედინმა ქეიქაუსის სარტყელს თავისი ძვირფასი თვლებიც მიუმატა და ლალის დიდი თვალი შუაში მოათავსებინა.

ოქრომჭედელმა სარტყელზე წვრილად ამოყვანილი ქეიქაუსის ანდერძი ამოიკითხა: «იყოს წერა ჩემი, ვინც უკანონოდ შემირტყას».

სულტანმა წარწერის აზრი და მნიშვნელობა გამოიკითხა; მოახსენეს: ეს სარტყელი ქეიქაუსის ტახტისა და გვირგვინის კანონიერ მემკვიდრეებზე გადადიოდა, თუ ძალით ან რაიმე შემთხვევის გამო ისეთი პატრონის ხელთ ჩავარდებოდა, რომლის ძარღვებშიაც ქეიქაუსის კეთილშობილი სისხლი არ ჩქეფდა, ანდერძი უცილობლად სრულდებოდა, ოქროს სარტყელის მიმთვისებელი იღუპებოდა და სარტყელი ისევ ქეიქაუსის კანონიერ შთამომავალს უბრუნდებოდა.

ჯალალედინს გაეცინა. ეჭვი აიღო, ალბათ, წინასწარ არიან მოლაპარაკებული, რომ ესოდენ ძვირფას სარტყელზე ხელი ამაღებინონო.

სულტანმა მის წინაშე თავდახრილ ვაზირს გამომცდელად შეხედა.

შერეფელმოლკი კიდევ უფრო მოიხარა და მბრძანებელს შეჰბედა:

– წელზე ნუ შეირტყამ, საჭურჭლეში შევიწინახოთ ეგ სარტყელი, ხელმწიფევ, ამით ანდერძიც დაურღვეველი დარჩება, სარტყელის პატრონიც შენ იქნება და ქეიქაუსის წყევლასაც ძალა აღარ ექნება...

ანგარი და ხარბი ვაზირის ზრუნვამ და თავგამოდებამ კიდევ უფრო დაარწმუნა სულტანი, რომ ყველანი, ოქრომჭედელიც, წარწერის განმმარტავიცა და ვაზირიც წინასწარ იყვნენ მოლაპარაკებულნი.

ჯალალედინმა ერთი მგელივით მოხედა ვაზირს.

– ქამუშის სიკვდილის შემდეგ, ქეიქაუსის შორეული ნათესავიც აღარავინ დარჩა ცოცხლებს შორის. თუ ვინმეს თავისი კეთილშობილებით უფლება აქვს ქეიქაუსის ტახტისა და ქვეყნის კანონიერ მემკვიდრედ ჩასთვალოს თავი, პირველი მე ვარ და სხვაზე უფრო მე მეკუთვნის ამ სარტყელის შერტყმა. დე, ჩემზე აღსრულდეს ქეიქაუსის წყევლა, – ჩაიცინა სულტანმა და მსახურებს ანიშნა, სარტყელი წელზე შემოერთყათ.

– ასრულდეს ნება შენი! – თაყვანი სცა გაწბილებულმა ვაზირმა და უკან მუხლზე ხოხვით წავიდა.

მოჰამედ ნესევი ყურადღებით კითხულობდა თორელის შრომას. ქართველების სახელი მხოლოდ ირანში მოსვლისას გაიგონა პირველად, მათ ველურ მომთაბარეებად თვლიდა, რომელთაც არც წარსული ჰქონდათ, არც სარწმუნოება გააჩნდათ და არც წიგნი და დამწერლობა.

როგორ გაცდა ნესევი, როცა გაიგო, რომ მათი ისტორია თითქმის ქვეყნის დასაბამიდან იწყებოდა, მათი მწერლობა უძველესი და უმდიდრესი ყოფილა თურმე, ხოლო დამწერლობა _ ძველთაძველი.

ქართველთა მეფეები, ზოგ-ზოგებივით, მეჯოგე ტომების ვიგინდარა ბელადები კი არ ყოფილან, დავით წინასწარმეტყველისა და სოლომონ ბრძენის შთამომავლებად იყვნენ აღიარებულნი თურმე მთელს წინა აზიაში და იმ დროისათვის პალესტინის წმინდა ადგილების თითქმის ნახევარს ფლობდნენ.

დავით აღმაშენებლისა და დემეტრეს, გიორგი მესამისა და თამარის, ლაშასა და რუსუდანის მეფობის ხანაში საქართველო თურმე დიდებულ ხვარაზმსაც არ ჩამოუვარდებოდა თავისი ბრწყინვალეობით.

თორელის შრომაში ბევრი ფილოსოფოსი და ღვთისმეტყველი, ხუროთმოძღვარი და ოქრომჭედელი, მხატვარი და მგოსანი იყო ჩამოთვლილი, რომელთა სახელი მთელს განათლებულ ახლო აღმოსავლეთსა და ბიზანტიაში ყოფილა ცნობილი. თორელს თავის ისტორიაში დიდი ადგილი დაეთმო საქართველოს უდიდესი მგოსნის შოთა რუსთველისათვის, მისი უკვდავი ქმნილების შინაარსი გადმოეცა და ცალკე ადგილების თარგმნაც ეცადა.

შაირობის მოყვარულმა და დამფასებელმა ნესევამ ზეპირად იცოდა აღმოსავლეთის პოეზიის ნიმუშები, ამ მხრივ, ხვარაზმში ტოლს არავის უდებდა და, თუმცა ტრაზახი არ უყვარდა, თავი მაინც მოჰქონდა იმით, რომ ასი ათასამდე ლექსის ტაეჰს ზეპირად იტყოდა.

ჩაკვირვებული და გემოგახსნილი ხორასნელი მცირე ნიმუშების გაცნობით მიხვდა, თუ რა დიდი მგოსანი ყოფილა რუსთველი, თორელი თავისთან მოაყვანინა, ნაშრომი ფრიად მოუწონა და ახალი დავალება მისცა:

_ დიდად მეკეთა და მომეწონა თქვენი უპირველესი მგოსნის ლექსები. მარტო შენ, დაუხმარებლად, მის თარგმნას, ალბათ, ვერ შესძლებ, რადგან სპარსული შენთვის მაინც უცხო ენაა; ცოდვას ესოდენ ღრმასა და ტკბილხმოვან მგოსანს მარტო ქართველები კითხულობდნენ. სიამოვნებით ვთარგმნიდი რუსთველის ქმნილებას, თუ შენც შემეწეოდი შენი განმარტებითა და ყოველი სიტყვის ახსნით.

_ ამაზე სასიამოვნო და სასახელო რა უნდა დამავალოს ჩემმა პატრონმა! _ აღმოხდა გახარებულ თორელს. _ ღამეებს გავტეხავ თეთრად, ყოველ სიტყვას სათითაოდ ავხსნი და განვმარტავ, ლექსის ხმოვანებასა და მუსიკას კითხვითა და სიმღერით გავხდი შენი ყურისთვის მისაწვდომს, ყოველ ღონესა და ნიჭს ვიხმარ, რათა ჩემს პატრონსა და მწყალობელს ამ ჩემთვის საამაყო დავალების აღსრულებით დავეხმარო.

_ ნეტავ არ წამეკითხა შენი დაწერილი ისტორია! მანამდე უბირ, მეჯოგე ტომის ხალხურ მთქმელად მეჩვენებოდი, მიუხედავად შენი განათლებისა. ახლა, როცა შენი წიგნით თქვენს ქვეყანას გავეცანი და გავიგე, თუ რა დიდსა და სახელოვან სამეფოს დასდგომია უბედურება, გული მეტკინა. ჩემი უბედური სამშობლოს დარდი ისევ ამეშალა და გულწრფელად შემეცოდე. შენ მგოსანი ხარ და, ალბათ, სხვაზე მეტად განიცდი სამშობლოს უბედურებას.

თორელმა ღრმად ამოიოხრა და თვალები მოუწყლიანდა.

– თქვენს დიდ მგოსანს უთქვამს, ჭირსა შიგან გამაგრება გვმართებსო. უნდა შეურიგდე ძნელად შესარიგებელს – შენი ქვეყნის დიდების დამხოვას, რადგან, როგორც ერთხელ გითხარი, ახლა ჩვენი მზე იწყებს ამობრწყინებას, ხვარაზმის დიდების მზე; ბედმა ჩვენი ერის ბედი თქვენსას დაუპირისპირა და ერთ-ერთი უნდა დაღუპულიყო, რადგან თავათ უფლისაგან ოდითგანვე აგრეა დაწესებული: კაცი კაცს იმორჩილებს, ცხოველი – ცხოველსა და ფრინველი – ფრინველს. ხე რომ ხეა, ისიც თავის ახლომახლო სხვა ხეს არ ახარებს, ჩაგრავს და ზრდას უშლის; კაცი კაცს ჩაგრავს და ერი – ერს. მე რომ ვუკვირდები, ადამიანთა ურთიერთობა, საბოლოოდ მაინც უკეთ ცხოვრებისათვის ბრძოლაა; ეს დედამიწა ყველას არ ჰყოფნის კარგი ცხოვრებისათვის და ამიტომ მტრობს ერთი კაცი მეორეს. ამ მტრობასა და ბრძოლაში უძლიერესი იმარჯვებს, ხოლო სუსტი და უღონო მარცხდება და ეცემა.

– იღბალი არა ჰქონია ჩემს ქვეყანას, – ოხვრით თქვა თორელმა, – ახლა, როცა აღმოსავლეთი ასე აირია და საშინელი გრიგალები დაიდრნენ საქართველოს დასაღწად, ჩვენს სამეფოს მტკიცე და ძლიერი, მამაცი და ნებისყოფიანი მეთაურის მაგიერ აზიზად აღზრდილი, სუსტი და უნებისყოფო ქალი უდგას სათავეში. მას არც თავისი თავგასული მთავრების ალაგმვის ძალა შესწევს, არც ქვეყნის მთელი ძალ-ღონის შემოკრება შეუძლია მტრის წინააღმდეგ ასამოქმედებლად.

– ასე სცოდნია ბედისწერას, თურმან. როცა განგება რომელიმე ხალხს გასწირავს, მას მეთაურად სწორედ გაუბედავსა და უნებისყოფო გვირგვინოსანს მოუვლენს. დიდსა და უძლიერეს ხვარაზმს არასოდეს ისე არ სჭირდებოდა მამაცი და გაბედული, მტკიცენებისყოფიანი და შეუდრეკელი მეთაური, როგორც ჩინგიზ-ხანის შემოსევისას. განგებამ ისე მოაწყო, რომ სწორედ მონგოლთა ურდოებთან შეჯახებისას ხვარაზმს ყველაზე ნაზი და აზიზი, გაუბედავი და უნებისყოფო გვირგვინოსანი მოუვლინა ხელმწიფედ. ხვარაზმში მუჰამედი ფიცხელსა და გამჭრიახს, უაღრესად გაბედულს, ცბიერსა და სასტიკ ჩინგიზს წინ ვერ აღუდგა, უზარმაზარი ქვეყანა მტრის დასახვედრად ვერ აამოძრავა, ლაშქარს მონგოლებზე ვერ წარუძღვა და განგების განაჩენს თითქმის უდრტვინველად დაემორჩილა: ესოდენ მდიდარი და ძლიერი ქვეყანა მტერს დაუტოვა და თავათ სადღაც, უკაცურ კუნძულზე მიაბარა უფალს გამწარებული სული. რაკი განგებამ ძლევა ჩინგიზს მისცა ჩვენთა ცოდვათათვის ჩვენსავე დასასჯელად, იმავე განგებამ ისე მოაწყო, რომ მუჰამედს ვერც თვითონ გაეწია მტრისთვის წინააღმდეგობა, ვერც თავის შვილებში გამოერჩია ღირსეული მემკვიდრე, რომელიც ქვეყნის მართვის სადავეებს ხელთ აიღებდა და მონგოლებს ვაჟკაცურად გაუმკლავდებოდა. თავის შვილთაგან უბედურმა ხვარაზმმამ მემკვიდრედ ყველაზე სუსტი და უღონო ოგლაზხანი გამოარჩია, მამაცი და შეუდრეკელი სულტანი ჯალალედინი გაინაპირა და სახელმწიფოს საჭესთან არ მიუშვა, ვიდრე თავათ არ დაიღუპა და სამეფოც არ დააქცია. როგორცა ჩანს, განგების ეს კანონი

გარდუვალა და ახლა მისი მსხვერპლი თქვენი სამეფო ხდება. თქვენს ქვეყანას, ამ უდიდესი განსაცდელის ჟამს, გულოვანი და გონიერი მეფე ისე სჭირდებოდა, როგორც, ალბათ, არასდროს. მაგრამ ხომ ხედავ, სწორედ ამ უძნელეს ჟამს იმავე განგებამ გვირგვინოსნად სუსტი და უზრუნველი ქალი მოგცათ. ყურანში სწერია, ვაი იმ ხალხს, რომელსაც ქალი ჰყავს მეთაურადო. ახლა, როცა ისტორიის სარბიელზე ისეთი ძლიერი მამაკაცები იბრძვიან, როგორც ჩინგიზ-ყაენი და სულტანი ჯალალედინია, სუსტ ქალს რა მოეთხოვება, ან რა შეუძლია.

– ეგრე ნუ იტყვი, მოჰამედ ბატონო, საქართველოს არც ისე დიდიხნის წინათ ჰყავდა მეფედ ქალი, ღვთივგვირგვინოსანი თამარი. სწორედ მისი მეფობის დროს მიაღწია საქართველოს სამეფომ უდიდეს ძლიერებასა და აყვავებას.

– შენ თავათ სწერ შენს შრომაში, თორელო, თამარი გონიერი და ბრძენი, ნაზი, მაგრამ ვაჟკაცივით ნებისყოფიანი და გამბედავი იყო. თამარის დროს ქვეყანა ასე აფორიაქებული არ იყო და ხალხები ერთიმეორის წინააღმდეგ გასანადგურებლად აშლილი. მაშინ არც ჩინგიზ-ხანივით სასტიკი და ძლიერი მბრძანებელი იყო სადმე, არც ჯალალედინივით თავზეხელაღებული და უძლეველი ხელმწიფე. ესეც უნდა იცოდე, ერის ცხოვრებას განმეორებანი არ უყვარს და გამონაკლისების იმედით ქვეყანა არსად აშენებულა.

თორელმა ველარაფერი თქვა. ერთხანს ორივე სდუმდა, ეტყობოდა, ორივე თავთავისას ფიქრობდა.

– ერთი აზრი მომივიდა, – დაიწყო ისევ ნესევიმ, – ერთი აზრი მომივიდა და სულტანიც რომ ყურს მომიპყრობდეს და ქართველებიც გონიერებას გამოიჩინდნენ, თქვენი ქვეყანა რბევასა და აოხრებას გადარჩებოდა, ომი და სისხლისღვრა შესწყდებოდა, ჯალალედინიც გაძლიერდებოდა და თქვენი ქვეყანაც მოისვენებდა.

თორელი გაოცებული შეჰყურებდა სულტნის მდივანს, ვერ გაეგო, თუ ეგეთი რა აზრი უნდა მოსვლოდა მოჰამედ ნესევის.

– თქვენი დედოფალი, როგორც ამბობენ, ახალგაზრდაა, – განაგრძო ნესევიმ, – ჩვენი სულტანი კი ჯერ კიდევ ჭაბუკია და ჯან-ღონით სავსე; შთამომავლობა ორივეს მაღალი აქვს და კეთილშობილი. სულტანმა რომ თქვენი დედოფალი შეირთოს, თქვენს ქვეყანას ძლიერი და გონიერი პატრონი გაუჩნდება. ურთიერთჟლეტის ნაცვლად, ქართველები და ხვარაზმელები თავიანთ ლაშქარს შეაერთებენ და საერთო მტერს – მონგოლებს წინ აღუდგებიან.

– კარგი იქნებოდა, მაგრამ ეგ არ მოხდება.

– რათა, თუკი დიდი სულტანი ინებებს?!

– ქართველთა დედოფლის ქმარი მხოლოდ ქრისტიანი შეიძლება იყოს. სულტანი ჯალალედინი კი თავს საისლამოს მხსნელად თვლის და ქრისტიანულად როგორ მოინათლება!

ნესევიმ წარბი შეიკრა და მოიღუშა.

– თუ დიდი და აღმატებული სულტანი თავისი ქმრობით ბედნიერს გახდის თქვენს დედოფალს, თავათ უნდა შემოეხვეწოს და მაჰმადის რჯულიც მიიღოს.

– ეგ არ მოხდება. – მტკიცედ თქვა თორელმა და თავის გაქნევით დაამოწმა უარი.

– ქართველებს მხოლოდ ჩვენი სულტნისა და თქვენი დედოფლის შეუღლება თუ იხსნის მოსპობისა და განადგურებისაგან. თუ საქართველოს მესვეურებს გონიერება არ დაკარგვიათ, თავათ უნდა შემოევედრონ დიდებულ სულტანს.

– სწორედ რომ გონიერება უკარნახებს ქართველებს, ეგ არა ჰქნან და ორივე ცხოვრება, ამქვეყნიურიც და იმქვეყნიურიც, არ წააგონ. ჩვენი ხალხი არც ისე მრავალრიცხოვანია, ქვეყნად ნათესავი არა ჰყავს, ირგვლივ მაჰმადიანური ზღვა გვაკრავს და თუ საჭე სწორად არ მივმართეთ, ამ ზღვაში ჩავიძირებით. ქართველები კარგა ხანია მეზობელი მუსულმანების ქრისტეს რჯულზე მოქცევისა და გაქართველებისთვის ზრუნავენ და ფიქრადაც როგორ გაიფიქრებენ, რომ მათ ტახტზე მუსულმანი მეფე დაჯდეს და საქართველოს დედოფალმა მაჰმადის რჯული იწამოს. ეს მარტო დედოფლის განწირვა როდი იქნებოდა, ამას ქართველობაზე ხელის აღება და საქართველოს სამუსულმანო ზღვასთან შეერთება-გათქვეფაც მალე მოჰყვებოდა.

– იქნებ სრულიად მოსპობასა და განადგურებას მაჰმადის ჭემმარიტი რჯულის მიღება და ამით ქვეყნის გადარჩენა ემჯობინებოდა.

– ეგ არ მოხდება, მოჰამედ ბატონო. ქართველები უმალ დედიან-ბუდიანად გაიჟლიტებიან, ვიდრე ქრისტეს რჯულზე, თავიანთ ენაზე და სამკვიდრებელზე ნებით ხელს აიღებენ.

თორელთან საუბრის შემდეგაც ვერ მოიშორა ნესევიმ ხვარაზმის სულტნისა და საქართველოს დედოფლის შეუღლებაზე ფიქრი. საქართველო მტრისათვის ძნელად მისადგომი ქვეყანა იყო. თუ ქართველთა და ხვარაზმელთა შეერთებული მხედრობა მონგოლებს ვერ სძლევდა, სულტანს ირანის ტრამალებზე სულმოუთქმელი რბენა და თავშესაფრის ძებნა მაინც არ დასჭირდებოდა. საქართველოს მიუვალ მთებში მონგოლების წასვლამდე კი არა, მათ გადაშენებამდე შეიძლებოდა გახიზვნა და ჩაკეტვა. საქართველო მდიდარი ქვეყანა იყო და მისი საჭურჭლის დაპატრონება ჯალალედინს სამუდამოდ უზრუნველს გახდიდა. ყოველივე ამას ფასი მხოლოდ მაშინ ექნებოდა, თუ ჯალალედინის საქართველოში დამკვიდრება ქართველთა ნებითა და თანხმობით მოხდებოდა, ძალით კი...

საქართველო ჯერ კიდევ ძლიერი იყო, მას კიდევ შეეძლო დიდი ლაშქრის გამოყვანა და ვინ იცის, ომის ღმერთი ვის მხარეზე გადახრიდა სასწორს. ომში რომ კიდევაც ეძლიათ ქართველები, ჯალალედინი მათი საჭურჭლის დაპატრონებას ვერ შესძლებდა, გურჯები თავიანთ განძს იმ მიუვალ მთებში გადამაღლავდნენ, რომლებშიაც თავათ შეივლტოდნენ. დაპყრობილ ქვეყანაში

ჯალალედინი ფეხს ვერ მოიკიდებდა, ქართველთაგან მუდამ თავდასხმის შიშში იქნებოდა, შფოთი და ამბოხი არ მოასვენებდა.

ამიტომ, ორივე მხარისათვის მიზანშეწონილად და ერთადერთ ხსნად ნესევის დაზავება და გვირგვინოსნების შეუღლება ესახებოდა. თორელის გადაჭრით ნათქვამი, – ეგ არასოდეს მოხდებაო, – მგოსნურ გაზვიადებად მიიჩნია, გადამწყვეტ ბრძოლაში დამარცხებული ქართველები, მისი ვარაუდით, სულიერადაც შემდრკალნი და გატეხილნი უნდა ყოფილიყვნენ და ასეთ დროს სამოყვროდ გაწვდილ ჯალალედინის ხელს სასოებით უნდა მთხვეოდნენ.

ამ აზრზე რომ მტკიცედ დადგა ნესევი, სულტანს ეახლა და თავისი ეს შეხედულება საიდუმლოდ გაანდო. მდივანმა ჩაგონების ყველა ღონე მოიშველია, მჭევრმეტყველებაცა და ცივი ანგარიშიც, არსებულიც წინ გადმოუშალა და შესაძლებელიც მიმზიდველად დაუხატა.

ჯალალედინს ერთგული მდივნის რჩევა ჭკუაში დაუჯდა და მაშინვე საქართველოს ხელისუფლებასთან გასაგზავნი წერილის დაწერა უბრძანა.

ჯალალედინი სიფრთხილეს იჩენდა. საქართველოში რომ დაზავებისა და რუსუდან დედოფალთან შეუღლების წინადადებით ელჩები გამოგზავნა, თავათ ურიცხვი ლაშქრით უჩუმრად საქართველოსაკენ გამოემართა.

სულტანი ქართველებს დამოყვრებას სთავაზობდა, სინანულს გამოსთქვამდა ქართველებთან ომის გამო და ირწმუნებოდა, რომ აღარასოდეს მათ წინააღმდეგ ხმალს აღარ აღმართავდა. ამით ჯალალედინი ქართველთა სიფხიზლეს ადუნებდა, თორემ ჩუმად საქართველოს დასაპყრობად მოემართებოდა და თუ მოყვრობის უარს მიიღებდა, თავის საწადელს ძალით აისრულებდა.

ჯალალედინს შალვა ახალციხელიც თან მოჰყავდა. ქართველთა წინააღმდეგ შურის საძიებლად ამხედრებული ახალციხელი ისე გახარებული ჩანდა, თითქო ქორწილში მიდიოდა საქეიფოდ. ქართველებს ხმამაღლა აგინებდა და იმუქრებოდა, რომ ქვას ქვაზე არ დასტოვებდა გამყიდველი მხარგრძელისა და უმადური დედოფლის სამფლობელოში.

საქართველოს სამეფოს მიუვალ კუთხეებში უნდა წაძლოლოდა სულტანს მეგზურად ქართველი დიდებული. მარანდისა და ურმიის მხარის პატრონს უკვე დაემსახურებინა ჯალალედინის ნდობა და სულტანი მომავალ ბრძოლებში მის ერთგულებაზე დიდ იმედს ამყარებდა.

მაგრამ მოულოდნელად სულტანს თვალი აეხილა და ახალციხელის თამაშიც დაწყების უმაღვე დასრულდა.

ჯალალედინის წერილმა საქართველოში დიდი ალიაქოთი გამოიწვია. დარბაზი დაუყოვნებლივ შეიკრიბა.

რუსუდან დედოფალს თბილისში ჰყავდა მძევლად შირვანშას ერთ-ერთი შვილი, ვაჟკაცობითა და სილამაზით განთქმული სულტანშა. დედოფალს

თავდავიწყებით უყვარდა ეს ზრდილი და მოხდენილი ჭაბუკი. დარბაზისაგან პირველი ქმრის, მოლასედიინის გაყრის დასტური უკვე ჰქონდა და ჯალალედინი რომ არ გამოჩენილიყო, სულტანშას ამდენხანს შეუუღლებოდა.

ახლა, ჯალალედინი რომ ქმრობას სთხოვდა, ყველაფერი ყირამალა დგებოდა. თავათ რა ჭირად უნდოდა უკვე ხანშიშესული ხვარაზმელი სულტნის, იმ «კრუხი პალოსა და ქონდრიკაცის» თანამეცხედრეობა, როცა აგერ ვარსკვლავივით მიჯნური ჰყავდა, მაგრამ დარბაზი ხომ დედოფლის პირადი სურვილით არ იხელმძღვანელებდა სახელმწიფოსათვის ესოდენ ძნელბედობის ჟამს, ასე მნიშვნელოვანი საკითხის გადაწყვეტისას.

ჯალალედინი გამარჯვებული იყო და რაკი დამარცხებულ ქართველებს ხელს სამოყვროდ უწოდებდა და დაზავებას სთავაზობდა, ძნელი საფიქრალი იყო, რას უფრო მალა დააყენებდა დარბაზი, დედოფლის სურვილსა და პირად ბედნიერებას თუ ერის კეთილდღეობასა და მომავალს.

მოსალოდნელი იყო, რომ ქვეყნის მეთაურები პირველის წინაშე მეორეს მისცემდნენ უპირატესობას და ამიტომ არ აშრებოდა რუსუდან დედოფალს თვალზე ცრემლი.

მაგრამ მოხდა ის, რასაც არც რუსუდანი ელოდა და არც თვით ჯალალედინი.

ქართველმა დიდებულებმა უფრო შორს განსჭვრიტეს: ჯალალედინი არც უჯარო და უნებისყოფო მოლასედინი იყო, არც სათნო და კეთილი დავით სოსლანი. ქართველ დიდებულთა ანგარიშით, უზარმაზარი ქვეყნის მართვას დაჩვეული სულტანი, დიდი თამარის პირველი ქმრის, გიორგი რუსის მსგავსად, საქართველოს დედოფლის უბრალო თანამეცხედრეობას არ დაჯერებოდა, სკიპტრას წაეპოტინებოდა, მთელ ხელისუფლებას თავათ იგდებდა ხელთ და ქართველებს თავიანთ ქვეყანაში აღარაფერს ჰკითხავდა. ეს ყველაზე დიდი უბედურება იქნებოდა რუსუდან დედოფლის სისუსტით განებივრებული, თავაშვებული ქართველი დიდებულებისათვის.

მაგრამ ქართველ დიდებულთაგან ჯალალედინის მეფედ დაჯდომას ყველა თავისი სარგებლითა და ზარალით როდი ზომავდა, უმრავლესობა ერის კეთილდღეობისათვის უკეთესს არჩევდა და ხვარაზმელთა მოსვლას საქართველოსათვის უდიდეს საფრთხედ თვლიდა: ჯალალედინს სამასი თუ ოთხასიათასიანი ლაშქარი ახლდა დედაწულითურთ, საქართველოს მიწა-წყალზე ასეთი სიმრავლით უცხო ხალხის ჩამოთესლება და დასახლება ქვეყნისათვის დიდ უბედურებად მიაჩნდა და ამაში ერის გადაგვარების საშიშროებას ხედავდა. თანაც, ჯალალედინი მაჰმადის რჯულის თავგამოდებული აღმსარებელი იყო და არათუ ქრისტიანობაზე მოქცევის სურვილს გამოსთქვამდა, საერთო, მუსულმანთა მეთაურად და ქომაგად მოჰქონდა თავი. ასეთი კაცი არათუ გაქართველდებოდა და გაქრისტიანდებოდა, თვითონ მოუნდომებდა ქართველთა დედოფალსა და

მთელ საქართველოს გამუსულმანებასა და წყეული მაჰმადის რჯულზე ძალით მოქცევას.

დარბაზმა ერთხმად უარყო ხვარაზმელი სულტნის წინადადება და ელჩები ცივი უარით გამოისტუმრა.

ადარბადაგანში ჯალალედინის დამკვიდრებამ მეზობელი მუსულმანური სამეფოები იმთავითვე შეაშფოთა. ხვარაზმელმა სულტანმა თავისი მოსვლისთანავე ხლათისა და იკონიის სამეფოებს მეგობრობა და კეთილმეზობლობა შესთავაზა, მუსულმანების მფარველად გამოაცხადა თავი და მათი შემწეუბნელი ურჯულო ქართველების ალაგმვა თავის უპირველეს მოწოდებად და ამოცანად დასახა.

ხლათის, იკონიისა და არზრუმის მუსულმან მფლობელებს ქართველთა ფრთების შეკვეცის აღთქმა ესიამოვნათ, მაგრამ ისინი საკუთარი ქვეყნებისა და გვირგვინების ბედზე უფრო ფიქრობდნენ, ვიდრე მაჰმადის სარწმუნოების ქომაგობაზე. ადარბადაგანში ესოდენ მტკიცე და გაბედული მმართველის, უფლებისმოყვარე და ზვიადის, ომისა და შფოთის მძებნელი სულტნის დამკვიდრება, რომელსაც თან დიდძალი მხედრობაც ჰყავდა, ვინ იცის, რას უქადდა მეზობელ სამუსულმანო სამეფოებს.

ჯალალედინი თავისი მამის მემკვიდრედ აცხადებდა თავს. მუჰამედის უზარმაზარი სამეფოსაგან ხვარაზმელ სულტანს ეს განაპირა ადარბადაგანილა შერჩენოდა, რომელსაც სინამდვილეში ხვარაზმმა არასოდეს არ განაგებდა. ხარბი და პატივმოყვარე ჯალალედინი ადარბადაგანის დაპყრობას არ დაჯერდებოდა, მადა გაეზრდებოდა და ხლათსა და იკონიასაც მოინდომებდა. მაშინ ელ აშრაფსა და ქეი ქობადსაც იქნებ ათაბაგ უზბეგის ბედი სწეოდათ.

ამ საფრთხის თავიდან ასაცილებლად ეგვიპტეს აქეთა სამუსულმანო სამეფოებს ერთმანეთთან საიდუმლო მოლაპარაკება გაემართათ და ჩუმ სამზადისს შესდგომოდნენ. გარეგნულად მათაც ისე ეჭირათ თავი, თითქო ჯალალედინის დამეზობლებას მათთვის ბედნიერება მოეტანოს. ძღვენითა და საჩუქრებით დატვირთულ ელჩებს ხშირ-ხშირად უგზავნიდნენ, მეგობრობას ეფიცებოდნენ და თანაც საიდუმლოდ იმის შეტყობას ცდილობდნენ, თუ ნამდვილად რა ფარული გეგმები ჰქონდა გადამთიელ სულტანს ერთმორწმუნე მეზობლების მიმართ.

არეზთან დაბანაკებულ სულტანს ხლათის დედოფალი თამთა ესტუმრა დიდი ამალითა და ძღვენით დატვირთული ქარავნებით. ხლათის მბრძანებელი თამთა დედოფალი ჯალალედინის გულის მონადირებას მარტოოდენ ძვირფასი საჩუქრებით როდი ფიქრობდა, მას თავისი სიტურფისა და მომხიბვლელობის იმედი უფრო ჰქონდა, რომლის წინაშე ჯერ კიდევ უღონონი იყვნენ ყველაზე მტკიცე ხასიათისა და ცივისხლიანი ვაჟკაცებიც.

ქართველი მთავრის ასულს, ხლათის გარდა, საქართველოს ბედიც დიდად აწუხებდა. იგი იმ მიზნით უფრო ესტუმრა ჯალალედინს, რათა საქართველოსთან ზავის შესაძლებლობასა და პირობებზე მოლაპარაკებოდა.

თამთას სხვა იდუმალი განზრახვაც ამოქმედებდა. მას ჯალალედინის დიდებული ტყვის, თავისი პირველი მიჯნურის შალვა ახალციხელის ამბის მიკვლევაც უნდოდა. დედოფალს გადაწყვეტილი ჰქონდა, სულტნის ტყვე გამოესყიდა, თუ ამის შესაძლებლობა მიეცემოდა.

ბანაკიდან შორს, ქვეითად გაეგება თამთას ჯალალედინი. დედოფლის დანახვაზე დაიბნა, არ ელოდა, თუ ესოდენ ლამაზი იქნებოდა.

იმ დღეს დიდი ნადიმი გაუმართა. თვითონ აწოდებდა რჩეულ კერძებსა და სასმელებს. ხლათის დედოფალი სწორივით ესაუბრებოდა სახელოვან სულტანს, თავი ღირსეულად ეჭირა, იშვიათი ზრდილობითა და თავაზით პასუხობდა ჯალალედინის სიტყვასა და ქცევას და თან ზომიერად აფრქვევდა თავის შეუდარებელ, ვაჟკაცის მომაჯადოებელ ღიმბილს.

მეორე დღეს თამთამ მიიწვია ვახშმად სულტანი თავის კარავში. გულოვანი და ბუნებით გამბედავი ჯალალედინი ხლათის დედოფლის წინაშე თავისდაუნებურად უჩვეულო კრძალვას და რიდს იჩენდა. მის წარმტაც სახეს ხატივით შეჰყურებდა და მიუხედავად ესოდენ სიახლოვისა, ისეთ სიშორეს გრძნობდა, თითქო თამთა მისგან მიუწვდომლად მალა მდგარიყოს.

დედოფალი სახელმწიფო საქმეებზე განზრახ არაფერს ამბობდა, სალაპარაკო არ ელეოდა და საუბარს ისეთ გეხს აძლევდა, რომ ჯალალედინს შთაბეჭდილება შექმნოდა – ხლათის დედოფალი მხოლოდ ჩემს გასაცნობად, ჩემს მოსახიბლავად არის მოსულიო.

დედოფალმა და სულტანმა თავიანთი მხლებლები დაითხოვეს და მარტონი დარჩნენ.

არც ამ მარტოობით ისარგებლა დედოფალმა, საქმეებზე სიტყვაც არ დასძრა, თითქო ქვეყნის ჭირ-ვარამი არც აწუხებდა. ღვინომოკიდებულ სულტანს ბუნდოვანი, მაგრამ მიმზიდველი საუბრით აბრუებდა და თავდავიწყების იდუმალ ქსელში აბამდა.

მაგრამ საოცარი ის იყო, რომ მანძილი სულტანსა და დედოფალს შორის არ მოკლდებოდა, თამთას შეუვალობა და ჯალალედინის გაუბედაობა კიდევ უფრო იზრდებოდა. ჯალალედინს გული მოსდიოდა თავის ამ კრთომაზე და დედოფლის შეუვალობაზე. ვერც თავის თავს უხერხებდა ვერაფერს, არც დედოფალი იცვლიდა ერთხელ აღებულ გეხს.

ბოლოს, რაკი დარწმუნდა, რომ უღონო იყო დაემლია თავისი გაუბედაობა და დედოფლის მიუკარებლობა, სულტანი ფეხზე წამოდგა, თამთას ძილი ნებისა უსურვა, დაემშვიდობა და მისი კარავი დასტოვა.

საქართველოს საბოლოოდ დასაპყრობად გალაშქრებულ ჯალალედინს შალვა ახალციხელიც თან მიჰყავდა.

გამოცდილი სარდალი ჯარის მოძრაობას და მეთაურების სიფრთხილეს აკვირდებოდა და რწმუნდებოდა, რომ სულტანი თავის განზრახვას არავის

უმხელდა. საქართველოზე თავდასხმის სამზადისს ყოველნაირად ნიღბავდა. ეტყობოდა, ჯალალედინი საქართველოში მოულოდნელი შეჭრითა და თბილისზე უეცარი იერიშით ფიქრობდა ქართველთა წინააღმდეგობის გატეხვასა და მათი ძლიერების განადგურებას.

თუ ქართველთა სარდლობა ახლავე შეიტყობდა ჯალალედინის გამოლაშქრებას, კიდევ შეიძლებოდა ჯარის შეკრება, თბილისის გამაგრება, მტრისთვის გზის გადაღობვა.

ჯერ კიდევ იყო დრო, ქართველებს როგორმე უნდა შეეტყოთ ხვარაზმელი სულტანის განზრახვა. შალვა ახალციხელი ჯალალედინის გულის მოგებასა და მისი ნდობის დამსახურებას სწორედ ამ დღისათვის ცდილობდა. სულტანი ქართველ ტყვეს უკვე თავის ერთგულად და გურჯების მტრად თვლიდა, საქართველოს დასაპყრობად მიჰყავდა და უცნობ ქვეყანაში ლაშქრის მეგზურობას ანდობდა. ახალციხელს შეუძლია ამ ნდობით ისარგებლოს და ჯალალედინი თავისი ჯარით ისეთ ადგილას შეიტყუოს, სადაც ქართველებს მისი დამარცხება და განადგურება არ გაუჭირდებათ. ოღონდ ამისთვის ქართველთა სარდლობის გაფრთხილებაა საჭირო, რათა ქართველები საიდუმლოდ წარმოემართონ დათქმულ ადგილას, რომელიმე ვიწრო ხეობაში ჩასაფრდნენ და იქ შალვას მიერ შეტყუებულ მტერს მოულოდნელად თავს დაესხან.

ახლა ყველაფერი ახალციხელის გამჭირახობასა და მოხერხებაზე ჰკიდია. თუ როგორმე ამბის წამლები კაცი იშოვა, მერე საქმე კარგად წავა, ქართველები არ დააყოვნებენ ჯარის შეკრებას და ხვარაზმელების დახვედრას, მტერს უეცარი დარტყმით გაანადგურებენ და შალვას სამშობლოში დაბრუნება ეღირსება.

ახალციხელს არც ჯალალედინისაგან აკლია პატივი, მისი ახლანდელი სამფლობელო ბევრად აღემატება მისსავე მამულებს საქართველოში, ქონებაც მეტი აქვს და ყმაც ბევრი ჰყავს, მაგრამ იცის შალვამ, რის ფასადაც უბოძეს ყოველივე ეს ქართველ ტყვეს. გარნისის მარცხით გამწარებული ახალციხელის შეურაცხყოფილი ღირსებისა და შელახული პატივმოყვარეობის იმედით ენდო სულტანი შალვას. შალვას მოღალატე ქართველებზე შურისძიების წყურვილი ჰკლავს და აი, სულტანმა იგი უზარმაზარი ლაშქრის მეგზურად დააყენა, რათა ხვარაზმელთა მახვილით იყაროს ქართველებზე გულისჯავრი, მოსპოს და იავარჰყოს მისი გამყიდველი თანამემამულენი.

თავათ უზომოდ პატივმოყვარესა და ფიცხ ჯალალედინს ყველა თავისავით ავი და გამწარებისას დაუფიქრებელი ჰგონია. ახალციხელი ეგრე გულნამცეცა როდია, რომ საკუთარ გაბოროტებას სამშობლოს სიკეთე ანაცვალოს. შალვას ყველა ქართველთან ერთად ჯერ მთავარი მტერი ჰყავს მოსაშორებელი და ეს მტერი ხვარაზმელი სულტანია. როცა ჯალალედინი დამარცხდება და საქართველოს საზღვრებს გაეცლება, მერე შალვა თვითონ გაუსწორდება თავის მტრებს თავისსავე ქვეყანაში, ვაჟკაცურად და ნამუსიანად, მისი პატიოსანი სახელისა და ღირსების შესაფერისად.

მაგრამ ეს დღე არასოდეს დადგება, თუ ახლა არ იმოქმედებს ახალციხელი სწრაფად და წინდახედულად. ახლანდელ მის ყოველ ნაბიჯზე არა მარტო მისი ბედი, არამედ საქართველოს ყოფნა-არყოფნა, სამშობლოს აწმყო და მომავალია დამოკიდებული.

შალვას თავისი ხმლითა და ვაჟკაცობით ბევრი სამსახური გაუწევია სამშობლოსათვის, მაგრამ მისი თავდადება საქართველოს ისე არასოდეს დასჭირვებია, როგორც ახლა სჭირდება. საქართველოს ძლიერებისა და ეგებ – არსებობის ბედიც ბეწვზე ჰკიდია და თუ შალვა დროზე არ იღონებს რასმე, თვითონაც სულითა და ხორციტ წაწყმდება და მისი სათაყვანებელი სამშობლოც დაიღუპება.

ძილი გაუტყდა შალვას და მოსვენება დაეკარგა, აწრიალებული, ხან რას მიაწყდა და ხან რას. ირგვლივ მზირებსა და ჯამუშებს ხედავდა, გრძნობდა, რომ მის ყოველ ნაბიჯს ფხიზლად ადევნებდნენ თვალს, მის კარავში არავის ატარებდნენ და არც ქართველ ემირს უშვებდნენ სადმე, რომ თან რამდენიმე მცველი არ გაჰყოლოდა.

არეზთან სულტანი შეყოვნდა. ჯერ კიდევ იყო მცირე, ძალიან მცირე დრო, ჯერ კიდევ შეიძლებოდა თავის განწირვა და სამშობლოს გადარჩენა, მაგრამ როგორ და რა გზით!..

შუალამე გადასულიყო. შალვას კიდევ არ ეძინა. თავის კარავში გულადმა იწვა და ამოდ ფიქრობდა გამოსავალზე.

უცებ კარვის კალთამ გაიშრიალა. შალვა ფიქრიდან გამოერკვა, კარისკენ მოიხედა.

კარავში შავით დაბურული უცნობი შემოვიდა. შალვამ უმაღ ის გაიფიქრა, ნამდვილად ჯალალედინის მიერ მოგზავნილი მკვლელი იქნებაო. უცებ წამოხტა და ხმაღს წაეტანა.

– ჩუმაღ, არავინ გაიგონოს, – უთხრა მოსულმა ქართულად და ტუჩზე ხელი მიიდო.

შალვა გაოცებისაგან საწოლზე ჩაიკეცა.

– თამთა დედოფლისგან ვარ, ქართველი ყმა, – ჩურჩულით უთხრა უცნობმა, მიუახლოვდა და პირიდან საბურავი გადიძრო.

ახალციხელის წინაშე ახალგაზრდა, ჯერ უწვერული ქართველი იდგა.

– თამთა სად არი, ან შენ რა გინდა აქ? – იკითხა ჩურჩულითვე შალვამ.

– ხლათის დედოფალი სულტან ჯალალედინის სტუმარია. შენი აქ ყოფნა შეიტყო და მე გამომგზავნა იმის სათქმელად, რომ დედოფალი შენს გამოსახსნელად არი აქ და უთუოდ გიშველის.

– მე შველა არ მინდა, არც გამოხსნა, მაგრამ თუ შენ მართლა ქართველი ხარ და შენი დედოფალი და სამშობლო გიყვარს, ერთ დიდ საქმეში უნდა დამეხმარო... ეს საქმე თავდადებას მოითხოვს და შეიძლება ორივე შევეწიროთ. შენ ჯერ ახალგაზრდა ხარ და სიცოცხლე გეყვარება, მაგრამ სამშობლოსათვის სიკვდილი გმირობაა და ჩემთან ერთად ეგებ შენც მოგვლან.

_ ჩემთვის მაგაზე დიდი დიდება რა უნდა იყოს, მთავარო?!

_ ახლა სხვა გზა არ არი, ან სამშობლო უნდა ვიხსნათ მე და შენ, ან ორივე უნდა დავიღუპოთ და სამშობლოც დავღუპოთ...

აღელვებული, ადგნებული ჭაბუკი გაფართოებული თვალებით შეჰყურებდა სახელოვან სარდალს.

_ მეფეს და ჩვენს სარდლობას მტრის გალაშქრების ამბავი უნდა შევატყობინოთ. მე აქედან ცოცხალს არ გამიშვებენ. შენ რაკი ხლათის დედოფლის მხლებელი ხარ, ხელს არ გახლებენ. საქართველოსკენ სწრაფად უნდა გაფრინდე და ჩემი წერილი მეფეს მიუტანო.

_ ამაღამვე წავალ, სულ ფრენით ვივლი... _ აღფრთოვანდა ჭაბუკი.

შალვა დაჯდა, კალამი აიღო და სწრაფად შეუდგა წერას. წამით ეჭვმა გაჰკრა, ვაითუ, ეს უცნობი ჯალალედინის მიერ მოგზავნილი ჯამშუშიაო, _ მაგრამ სხვა გზა მაინც აღარ იყო, ისედაც ყველაფერი იღუპებოდა და წყალში იყრებოდა. თუ ჭაბუკი მართლა თამთას ქართველი მხლებელი იყო, ხომ ეშველებოდა მათაც და საქართველოსაც, თუ არა და, ქვეყანა უიმისოდაც იღუპებოდა, საშველი აღარც საქართველოსთვის იქნებოდა და აღარც შალვასთვის.

შალვამ წერილი დაწერა, ჭაბუკისკენ მობრუნდა და თვალი თვალში გაუყარა.

_ შემომფიცე, რომ სამშობლოს არ უღალატებ და ამ წერილს საქართველოში მიიტან.

_ ვფიცავ ჩემს დედასა და მამას, გორიჯვრის წმინდა გიორგის! _ აღმოხდა ჭაბუკს და მუხლებზე დაეცა ხელაპყრობილი.

_ გორელი ხარ? რა გვარისა ხარ?

_ გელაშვილი გახლავარ, მთავარო, _ უთხრა ჭაბუკმა, ახალციხელის წერილს ემთხვია, ხელსახოცში მაგრად გამოჰკრა და უბეში ჩაიღო.

შალვა გადაეხვია უცნობ ქართველს და კარვის კარამდე მიჰყვა.

_ გახსოვდეს, საქართველოს ბედი მაგ წერილზეა! _ ერთხელ კიდევ უთხრა ჩურჩულით და კარვის კალთა ასწია.

ჭაბუკმა უსიტყვოდ შეანათა დიდრონი, თაფლისფერი თვალები და კარვიდან ქურდივით გაიპარა.

უგუნებოდ გამოვიდა თამთას კარვიდან თავის თავზე და დედოფალზე გაბრაზებული სულტანი. ამდენხანს მიყურებული პატივმოყვარეობის გრძნობა გაედვიდა და ბოლმა ყელში მოაწვა. ეს ბოლმა ვინმეზე ან რამეზე უნდა გადმოენთხია, თორემ მოსვენებას არ მისცემდა, გაასიებდა და გაგუდავდა.

კარვის კართან მდგარი მამლუკები უხმოდ მიჰყვნენ მბრძანებელს. კარგა გზა რომ გაიარეს, ჯალალედინი უცებ შეჩერდა, რომელიღაც კარვის კედელს აეკრა და მცველებს ხელით ანიშნა.

სულტნის მცველებიც კედლებს აეკრნენ და იმათაც თვალი იმ კარვისკენ მიაპყრეს, რომელსაც ჯალალედინი ასე დაჟინებით უცქერდა: კარვის კალთა დაეშვა და უმაღვე დაფარა ტანბრგე ვაჟკაცის ლანდი. სამაგიეროდ, მეორე

ლანდი მოშორდა კარავს, წელში მოხრილი, ფეხაკრეფით წამოვიდა და თან აქეთ-იქით ქურდივით იხედებოდა, ხომ არავინ მიყურებსო.

ლანდი ჯალალედინს გაუსწორდა და გასცდა. სულტანმა მამლუკებს ანიშნა, უცნობს ჩუმად მიჰყოლოდნენ. ჯალალედინი წელში მოიხარა, შვილდზე ისარი გამართა და თავათაც შორიახლო მიჰყვა უცნობს.

ლანდი კარვებს გასცდა და არეზისკენ სირბილით წავიდა. მდევრები ფრთხილობდნენ, ფეხის ხმა არ მისწვდომოდა გაქცეულს, ფეხაკრეფით მისდევდნენ და თვალს არ აშორებდნენ.

უცნობი მდინარესთან მივიდა, პირჯვარი გადაიწერა და ის იყო, წყალში უნდა გადაშვებულიყო, რომ ჯალალედინის ისარი დაეწია და კანჭში ჩაესო.

გელაშვილმა ერთი მწარედ დაიკვნესა და წამით ჩაიკეცა. მერე თავს ძალა დაატანა, მდინარეში შევიდა და დაყვინთა.

ჯალალედინის მამლუკებმა სეტყვასავით დააყარეს იმ ადგილს ისრები, მერე იარაღი გადაყარეს და თვითონაც წყალში გადაეშვნენ.

ცოტა ხნის შემდეგ ღონემიხდილი გელაშვილი ნაპირზე ამოათრიეს სულტნის მცველებმა.

დაჭრილი ჯალალედინის სამყოფელში მიიყვანეს. გაჩხრეკისას წერილი უპოვეს, ქართულის მცოდნე სპარსელს წააკითხეს და ათარგმნინეს.

შალვა ახალციხელი ქართველებს სწერდა, რომ ჯალალედინი თბილისისა და დანარჩენი საქართველოს დასაპყრობად მოდიოდა; ლაშქრის რიცხვს ატყობინებდა და თანამემამულეებს თავის საიდუმლოებას უმჟღავნებდა: სულტანს თავდადებული სამსახურითა და ქართველების გინებით თავი მის ერთგულად, საქართველოს უბოროტეს მტრად მოვაჩვენე, საქართველოში გზის მაჩვენებლად მოვუძღვები ხვარაზმელებს. ამა და ამ ადგილას დამხვდით თქვენი ლაშქრით ჩასაფრებულნი, მტერს მოულოდნელად თავს დაესხით და ერთიანად გავანადგუროთო.

ჯალალედინი გაცოფდა. წედანდელი ბოდმა და ახლანდელი რისხვა შეერთდნენ, შემკავებელი ჯებირები გადმოლახეს და სულტანი გიჟს დაემგვანა: ირგვლივ ყველაფერი მილეწ-მოლეწა, თავში წაიშინა და დაკლულივით აღრიალდა.

გონს რომ მოეგო, მაშინვე ახალციხელი შეაპყრობინა და ხლათის დედოფლის სამყოფელს ალყა შემოარტყა.

იმდენად ახალციხელის ვერაგობა და თამთას ცბიერება არ აბრაზებდა ჯალალედინს, უფრო მეტად თავის იმ გულუბრყვილობაზე და მიამიტობაზე მოსდიოდა გული, რომელიც ორივეს წინაშე გამოიჩინა.

როგორც გადრეკილი ხის ჩრდილი არ გასწორდება, ისე ურჯულო არ დაგინდობს და გაგიტანს!

როგორ ერწმუნა სულტანი ქართველი ტყვის ფიცსა და ლიქნს, როგორ ბრმად მიენდო და კინალამ განსაცდელში ჩააგდო თავისთავიც და მთელი ლაშქარიც.

ეს დედოფალიც საიდან გაჩნდა, სწორედ ახლა, საქართველოზე გალაშქრებისას! როგორ ამაყად და თან მომაჯადოებლად იქცეოდა, იზიდავდა, ახლო კი არ უშვებდა, თითქო მართლა უმანკო ქალწული ყოფილიყოს და ამ ქვეყნის ბიწიერების არაფერი სცოდნოდეს!

მერე ვინ ყოფილა ეს დედოფალი! თავათ სისხლით ქართველი და ქართველების ჯაშუში, სულტნის ბანაკში გასამსტოვრად შემოსული, იქნებ მის მოსაკლავადაც შემოგზავნილი, ვითარცა ივდითი, რომელმაც მოკლა ოლოფრენი – კაცი მხნე და მტრისგან უძლეველი.

რაც უფრო უკვირდებოდა თამთას ქვევასა და ახალციხელის ორგულობას, რაც უფრო მეტს ფიქრობდა თავის გულუბრყვილობაზე სულტანი, მით უფრო ცეცხლდებოდა, საკუთარ გულს ასკდებოდა და მოთმინებას კარგავდა.

ღამე წრიალსა და ბორგვაში თეთრად გაათენა.

დილით საქართველოში გაგზავნილი ელჩები დაბრუნდნენ და სულტანს ქართველთა დედოფალთან შეუღლების ცივი უარი მოუტანეს.

ესღა უნდოდა ჯალალედინს!

გამხეცებულმა შეპყრობილთა მოკვლა ბრძანა და თვითონაც ქართველთა დასჯის საყურებლად არეზის პირას გაბრძანდა.

მდინარის პირას დამკლავი ჯალათი მსხვერპლის მოყვანის მოლოდინში არხინად გადი-გამოდიოდა.

არეზი ლურჯად მიედინებოდა. მზე არ ანათებდა, ქარი ქროდა, ცა ლურჯი იყო და ცივი. ციოდა არეზის ხრიოკსა და მკაცრ ხეობაში.

შუბოსნებმა ხელებკაგრული ახალციხელი და ხლათის დედოფლის ქართველი მხლებელი მოიყვანეს.

მდინარის პირას დააყენეს და მოეცალნენ.

ჯალათი დინჯად მიუახლოვდა, სასიკვდილოდ განწირულებს თვალი მოავლო და დიდებული სულტნისკენ შემოტრიალდა.

სულტანი ამადლებლ ადგილას იჯდა ტახტზე ბრაზისა და უძილობისაგან სახეწამონთებული, შუბლშეკრული და წარბებდაქუფრული.

– ბედი არ მქონია, შენი დავალება ვერ შევასრულე... სამშობლოს ვერ ვუშველე... – ამოიგმინა გელაშვილმა.

ახალციხელმა ერთი მოჰხედა, მძიმედ ამოიოხრა და თავი გადააქნია.

– ბედი არც მე მქონია... – გამოსცრა შალვამ.

– ჩემი ბრალი არ არი, მთავარო, ეტყობა, ჯაშუშები მსდევდნენ, როგორც მდინარეს მივუახლოვდი, ისარი მტყორცნეს და დამჭრეს, – შესტირა ჭაბუკმა.

ჯალათმა სულტანს თავი დაუკრა.

– ჯერ რომელს მიბრძანებ? – ჰკითხა და ხელით სასიკვდილოდ განწირულებზე ანიშნა.

– ჯერ ეგ ღლაპი! – მკვახედ თქვა სულტანმა და ჭაბუკზე მიუთითა.

– თავი მოვკვეთო? – იკითხა ისევ ჯალათმა.

– შუაზე გაჰკვეთე! – ანჩხლად თქვა მბრძანებელმა და ხელი ისე მაგრად დაიქნია ჰაერში, თითქო უჩვენებდა, როგორ უნდა გაეკვეთა.

ჯალათი შებრუნდა და ხმალი აღმართა.

მსხვერპლმა იმ ხმალს თვალი ააყოლა და განწირულად შეჰყვირა.

ახალციხელმა თვალი დახუჭა, მაგრამ ყურებს ვერაფერი მოუხერხა. გულის სიღრმემდე ჩააღწია სიცოცხლით სავსე ჭაბუკის განწირულმა კვილმა. მაგრამ ის კვილიც ხანმოკლე იყო და ახალციხელმა გაიგონა, როგორ ჩუმად დავარდა რიყეზე რაღაც რბილი და მძიმე.

თვალი რომ გაახილა, ჯალათი უკვე სისხლიან ხმალს სწმენდდა. სულტანმა ბოლომდე უცქირა, როგორ გაჭრილი ვაშლივით დაეცა აქეთ-იქით შუა გაკვეთილი ჭაბუკის სხეული. იქ მყოფ ემირებს რაღაც გადაუჩურჩულა და მისკენ შემობრუნებულ ჯალათს ძუნწად ესროლა:

– ყოჩაღ!

ჯალათმა თავი დაუკრა და ახალ განკარგულებას დაელოდა.

– ომი ნარდის მღერასა ჰგავსო, ამბობდი, ახალციხელო, ღალატი და ორპირობა რაღას ჰგავს? – მიმართა სულტანმა.

შალვამ თვალი არ გაუსწორა, ერთი ღრმად ამოიოხრა და თავი დახარა.

– როგორც გადრეკილი ხის ჩრდილი არ გასწორდება და მორიელი კბენას არ მოიშლის, ისე ურჯულო ქრისტიანის გასწორება და ბოროტებაზე ხელის აღება არ იქნება, – თქვა ჯალალედინმა, კბილები დაადრჭიალა, ხელი ყელზე გაისვა და ამით ჯალათს ანიშნა, დამნაშავესათვის თავი მოეკვეთა.

ჯალათმა ხმალი მოიქნია. ახალციხელს წარბიც არ შეურხევია. მოჭრილი თავი ძირს დაგორდა, სისხლმა წამით შადრევანივით იფეთქა და შალვას უზარმაზარი სხეულიც მძიმედ დავარდა რიყეზე.

სულტანმა ახალციხელის მოჭრილი თავი აბრემუმში შეახვევინა და ხლათის დედოფალს გაუგზავნა.

ჯალალედინმა ციებისაგან ლოგინად ჩავარდნილი ნესევის განკარგულებაში ჯარის ის ნაწილი დასტოვა, რომელიც თამთას სამყოფელს შემოარტყა და თავის ერთგულ მდივანს უბრძანა, ხლათის დედოფალი იქიდან არ გაეშვა, ვიდრე თბილისის აღების ამბავი არ მოუვიდოდა.

თავათ აიყარა და მთელი ლაშქრით საქართველოსაკენ სწრაფად დაიძრა.

ნაშუადამევს ხლათის დედოფალს ოქროცურვილი ლანგრით ჯალალედინის მოსაკითხი მართვეს. დედოფალმა აბრემუმის ნაჭერი გადასწია და კაცის მოჭრილი თავი რომ დაინახა, გულწასული დაეცა.

როგორც იყო, მოაბრუნეს. თითქო საზარელ სიზმარს იგონებდა, თვალწინ ის მოჭრილი თავი დაუდგა, გონებაში სისხლით დასვრილი წაბლისფერი თმა და ულვაშები აღადგინა და ლოყაზე ნაჭრევიანი სახე რომ გაიხსენა, კინალამ ისევ გული შეუღონდა. მოჭრილი თავი ისევ მოატანინა, წინ დაიდო და იქ მყოფთ გასვლა უბრძანა, მარტო რომ დარჩა, ახალციხელის შუბლზე ჩამოშლილ თმებს ხელი გადაუსვა და აზრწართმეულ თვალებსა და უკვე ვერდაკარგულ, გაშავებულ ტუჩებს დაამტერდა.

რამდენი უოცნებია თამთას ამ ტუჩების შეხებაზე, რამდენი ღამე გაუტეხია ახალციხელზე ფიქრსა და ოცნებაში ხლათის მელიქის გვერდით მწოლარე დედოფალს!

თამთა ნელა დაიხარა და ახალციხელის ცივ ტუჩებს დააკვდა. მერე უცებ ქვითინი აუვარდა და მთელი ტანით ამაგმაგდა, მოკვეთილ თავს გადაეფარა და საშინელი კივილით იქაურობა შესძრა.

ქართველები სახელდახელოდ შეკრებილი ჯარით დახვდნენ ხვარაზმელებს, რამდენიმე მცირე შეტაკებაში სძლიეს კიდევ და უკუაქციეს წინამბრძოლები. ბოლოს მთავარი ლაშქრის პირისპირ განეწყვნენ და გადამწყვეტი ბრძოლაც უნდა გაემართათ, რომ ამბავი მოუვიდათ: ზურგიდან ჯალალედინის შესაერთებლად წამოსული ყიასედინი უახლოვდებოდათ თურმე საქართველოში დატოვებული მარბიელი ლაშქრით.

ორ ცეცხლშუა მოქცევას ქართველებმა გაცლა არჩიეს და ლიხთიმერეთის გადასასვლელები გაამაგრეს, რომ მტერი იქ მაინც არ შეეშვათ.

ჯალალედინმა ყიასედინის ლაშქარი შეიერთა და პირდაპირ თბილისისკენ წამოემართა.

სულტანი თბილისს მოადგა და სოღანლულის სანახებში დაბანაკდა. გრძელი გზით დაღლილ ლაშქარს უნდა კარგად დაესვენა, რომ მეორე დღეს ქალაქის იერიში დაეწყო.

ჯალალედინმა დაღამებას არ დაუცადა, სამი ათასი რჩეული ცხენოსანი იახლა და ქალაქის მისადგომების დასათვალიერებლად გაემართა.

მაღლობიდან დასცქეროდა თბილისს სულტანი. ის, რაც ნაამბობითა და აღწერილობით იცოდა და რაც გაზვიადებულად ეჩვენებოდა, მცირედ და უმნიშვნელოდ წარმოუდგა, როცა ქალაქის მისადგომები თავისი თვალთ ნახა.

ქართველთა სატახტო მთა-გორებით იყო მოზღლუდული და ეს ბუნებრივადც გამაგრებული ქალაქი ხელოვნურად მაღალი კედლებითა და საბრძოლო გოდლებით განმტკიცებული ჩანდა, ქალაქის მისასვლელთან მტკვრის ხეობა საგრძნობლად ვიწროვდებოდა და ქართველთა სატახტო მტრისათვის მაგრად იყო ჩაკეტილი. ამ ვიწროებში დიდი ლაშქარი ვერ გაიშლებოდა და რაკი ქალაქს ზღუდეც მაგარი ერტყა, სულტნის ემირებს თბილისის აღება ძნელ და თითქმის შეუძლებელ საქმედ ეჩვენათ.

სხვას, ალბათ, ჯალალედინის ადგილზე, გამარჯვებაში ეჭვი შეეპარებოდა და გული გაუტყდებოდა, მაგრამ ჯალალედინს იმ ვაჟკაცების სისხლი უდუღდა, რომელთაც სიძნელე და შეუძლებლობის დამღევა არათუ აშინებთ, კიდევ უფრო იზიდავთ და ამხნევეთ.

სულტანმა კარგად იცოდა, რომ საქართველოს დედაქალაქი ის აღარ იქნებოდა, რაც ამ სამიოდე თვის წინ ყოფილა. გარნისის ძღვევისა და ამდენი რბევის შედეგად, საქართველოს ძველი ძლიერება საფუძვლიანად იყო შერყეული.

მაგრამ ჯალალედინს ჯერ კიდევ არ ჰქონდა შეტყობილი, რომ საქართველოს მეფემ და მისმა ვაზირებმა იმ დღეს სასწრაფოდ დასტოვეს თბილისი და ქუთაისს გაიხიზნენ. სულტანმა ისიც არ იცოდა, რომ საქართველოს ხელისუფალთა შორის უთანხმოება იყო ჩამოვარდნილი: ძველი ნაცნობი სარდლებიდან, ვისმა გმირობამაც ასე შორს გაუთქვა სახელი ქართულ ხმალს, ზოგნი ცოცხლები აღარ იყვნენ, ხოლო ზოგსაც ლიხთ-იმერეთში, დედოფალთან ერთად თავის შეფარებაზე უარი ეთქვა და მიუვალ ციხეებში დარჩენა, საკუთარი ძალით თავთავიანთი სამფლობელოების დაცვა გადაეწყვიტა.

ავაგ მხარგრძელიცა და შანშე მანდატურთუხუცესიც ამათ კვალს დადგომოდნენ. ისინიც თავთავიანთი ციხეების სიმაგრეს მინდობოდნენ და სატახტო ქალაქი მეციხოვნე ჯარის ანაბარა მიეტოვებინათ.

სულტანმა ჯერჯერობით არც ქალაქის მცველთა რიცხვი იცოდა, არც საქართველოს სარდლობის მოქმედების დაზნეულობა. იგი თბილისთან ძლიერ ომს მოელოდა და საამისო თადარიგს იჭერდა.

ქალაქის დასაზვერავად გამოსული ჯალალედინი სანახაობამ მიიზიდა და მიიტყუა. ქართველთა სატახტოს დაცვაში სისუსტის ძეხვამ ისე გაიტაცა, რომ თითქმის ქალაქის კართან მივიდა.

მეციხოვნეებს არ გამოპარვიათ მტრის მოძრაობა. თავის მხრივ, ისინიც თვალს ადევნებდნენ კოშკებიდან ხვარაზმელთა რაზმის მოახლოებას: მცირერიცხოვანი მტერი კარგა შორს წამოსულიყო წინ თავისი მთავარი ბანაკიდან, მზვერავ რაზმს უკან დიდი ჯარი არ მოჰყვებოდა.

შემთხვევა მართლაც ხელსაყრელი ჩანდა და ქართველებმა გადაწყვიტეს, დაუყოვნებლივ ესარგებლათ მტრის ამ სითამამით.

ქალაქის მცველებმა მოულოდნელად გააღეს კარი, ფიცხლად გამოცვივდნენ და მტერს გახელებით მიეტივნენ.

ჯალალედინი მიხვდა, რომ ვედარც გაქცევით უშველიდა თავს, ვერც მთავარი ბანაკიდან მოუსწრებდა მაშველი ლაშქარი, სხვა გზა აღარ იყო, ბრძოლა უნდა მიეღო და უკან ნელ-ნელა დახევით მიახლოებოდა ბანაკად მდგარ თავის ლაშქარს.

ქართველებმა თავგამეტებით შეუტიეს, მაგრამ ხვარაზმელებიც კლდესავით დახვდნენ. ორივე მხრიდან რჩეული, თავზეხელაღებული ვაჟკაცები იბრძოდნენ, დამშეულებივით უტევდნენ ერთიმეორეს და თანდათან ხელჩართულ ბრძოლაში ებმებოდნენ.

რა იცოდნენ თბილისის დამცველებმა, რომ ხვარაზმელ მზვერავთა იმ სამიათასიან რაზმს თავათ დიდი და აღმატებული სულტანი უძლოდა წინ! ეს რომ სცოდნოდათ, ქალაქში აღარავინ დარჩებოდა, ქუდზე კაცი გამოვიდოდა და ბრძოლის ბედიც იქვე გადაწყდებოდა, თბილისის კართან.

ქართველებს არც მეციხოვნე ჯარი ჰყავდათ მრავალრიცხოვანი, რომ უბრალო შეტაკებისათვის ქალაქის კარიდან უფრო დიდი ლაშქარი გამოემშავათ და მტერი ერთი დარტყმით იქვე გაენადგურებინათ.

თბილისელები ხანგრძლივ ალყასა და გამწევ, გრძელ ომს ელოდნენ, ქალაქის ზღუდეები საიმედოდ იყო გამაგრებული და მეციხოვნეებს, ალბათ, მტრის ბევრი იერიშის მოგერიება მოუხდებოდათ.

ქალაქის მცველები მეფისა და ქვეყნის მესვეურებისაგან ლაშქრის მოშველიებას ელოდნენ.

ასე ანგარიშობდნენ თბილისის დაცვის მეთაურები და ეს ანგარიში სხვა პირობებში სწორიც იქნებოდა, ახლა კი, როცა ხვარაზმელთა სულტანი თავისი ფეხით მოადგა ზედ ქალაქის კართან, ამ ანგარიშს მიმყოლი ქართველები ხელიდან უშვებდნენ ისეთ ბრძასა და ბედნიერ შემთხვევას, რომელიც აღარასოდეს განმეორდებოდა და რომელიც ახლავე შეიძლებოდა ქცეულიყო ხვარაზმელთა მძლავრობის დასასრულად.

სასტიკსა და ფიცხელ ომში თავათ ჯალალედინი უხორცოსავით უშიშრად იბრძოდა, ყველაზე დიდ ცეცხლში შედიოდა და ყველაზე რჩეულ მტრებზე ცხენდაცხენ მიჰქონდა იერიში.

ღამდებოდა. ბრძოლა თანდათან შენივთდა და სულტანმა შეატყო, რომ გამარჯვების სასწორი მტრის მხარეს იხრებოდა – ქართველები მეტის ალტკინებითა და თავგამეტებით უტევდნენ, ხვარაზმელების სიმტკიცე თანდათან ღრკებოდა.

მაშინ ერთხელ კიდევ გააფთრებით ეკვეთა მტერს სულტანი, ოდნავ უკან დაახევინა და ცხენიც გასაქცევად შემოაბრუნა.

მიჰქროდნენ, თავქუდმოგლეჯილები ივლტოდნენ ხვარაზმელები.

ზარითა და ყვირილით მისდევდნენ ქართველები. სადავემიშვებული ცხენები ეცემოდნენ, ხტებოდნენ, ფრთაშესხმულივით მიფრინავდნენ. ქართველები ეწეოდნენ, კაფავდნენ, ჩეხავდნენ და ხოცავდნენ.

ბინდი ჩამოწვა, თითქმის აღარაფერი ჩანდა.

მემნა ჯაყელმა უცებ ცხენს აღვირი მოსწია. მტრის მთავარი ბანაკის მიახლოება საშიში იყო. ღამის სიბნელეში მაინც ველარაფერს არჩევდნენ და ხვარაზმელთა დევნასაც აზრი აღარ ჰქონდა.

მემნამ მტრის დევნით გატაცებული რაზმი შეაყენა, სწრაფადვე უკან შემოაბრუნა და თბილისისაკენ გამარჯვებული შემოიქცა.

ბეწვზე გადარჩენილმა სულტანმა თავის ემირებთან დიდხანს ითათბირა. ზოგმა საყვედური შეჰკადრა, საფრთხეში თავს რად იგდებ, გურჯების დედაქალაქს ლოდსატყორცნები მივუყენოთ, ალყა შემოვარტყათ, მოსვენებას ნუ მივცემთ და თავათ გაგვიღებენ ქალაქის კარსო. ქალაქზე იერიში კი არც ერთმა ემირმა არ ურჩია სულტანს. თბილისი მიუდგომელი და ძნელად ასაღებ სიმაგრედ ეჩვენებოდათ ჯალალედინის სარდლებს, ამიტომ, თითქმის ერთხმად, მოითხოვდნენ ქალაქის გარემოცვას და ალყაში მტრის გატეხვის მოთმინებით ლოდინს.

ჯალალედინს თავისი ემირების რჩევა აბრაზებდა და აღიზიანებდა. ისე ურჩევდნენ ხანგრძლივი ალყის მორტყმასა და მოთმინებით ცდას, თითქო სულტანი მამამისის ტახტზე, ხვარაზმის დედაქალაქ ურგენჩში იჯდეს

მორჭმით და ქართველთა წინააღმდეგობის გატეხვის მეტი სხვა საფიქრალი აღარაფერი ჰქონდეს. ადარბადაგანში შფოთია, განძასა და თავრეზში შეთქმულები იმასლა ელიან, ჯალალედინი დიდი ხნით შორს გაიგულონ და ახალი აჯანყება დაიწყონ, ხლათის მელიქი და რუმის სულტანი ხმალსა ლესავენ, რომ ზურგში ჩასცენ სიტყვით «საისლამოს ქომაგად» აღიარებულ სულტანს, ხოლო მონგოლები (რაც ყველაზე საშინელია) ერაყისა და ისპაჰანისკენ მოიწევენ, დაგეშილი ძალებივით ჯალალედინის კვალს დაემებენ და სადაცაა თავს წამოადგებიან.

არც ქართველებს სძინავთ. მართალია, ლიხს აქეთა ქვეყანა მოოხრებული და წელში გატეხილია, მაგრამ ნახევარი საქართველო ლიხს იქით ისევ ძლიერი და ღონიერი. ქართველების ლაშქარმა წესრიგით დაიხია უკან. ქართველთა მეფეს მთის ხალხები ისევე ძველებურად ემორჩილებიან, მას კიდევ შეუძლია დიდი ლაშქრის მოგროვება და თბილისის კარზე მოყენება, მერე ერთმა ალაჰმა იცის, ვინ აღმოჩნდება ალყაში, თბილისის დამცველი ჯარი თუ ხვარაზმელი სულტანი.

სულტნის ემირებმა ისიც კარგად იციან, რომ ჯალალედინი ქართველთა სატახტოს მართლა მათი ამპარტავნობისა და ურჯულოების დასათრგუნავად კი არ მოსდგომია, ქართველთა დედაქალაქი ახლა მთელს აღმოსავლეთში ითვლება უმდიდრესად და მისი საგანძური დროზე უნდა იგდოს ხელთ სალაროგამოცარიელებულმა სულტანმა, რომ წელში გამართვა, ახალი ლაშქრის შეკრება-შეიარაღება და მონგოლთა დასახვედრად მომზადება შესძლოს.

იციან სულტნის ემირებმა ეს, ყოველივე კარგად იციან, და მაინც თბილისის კართან უქმად ჯდომასა და ლოდინს ურჩევენ.

კარგა ხანია, ჯალალედინი ასე გაცხარებული არ ენახათ.

– თქვენთვის რომ დამეჯერებინა, არც გარნისთან უნდა შევბოდი ქართველებს, იქაც ასე ამბობდით, მიუდგომელი სიმაგრეა, ტყუილუბრალოდ შევაწყვეტთ ჯარსო, – ყვიროდა გაბრაზებული ჯალალედინი და მრისხანედ იყურებოდა იქით, სადაც მისი ძმა ყიასედინი იჯდა თავჩალუნული.

– გარნისში ალაჰმა გვიშველა, სასწაული მოგვივლინა! ეს თავათ სულტანსაც ბევრჯერ უბრძანებია... – წაიბუტბუტა ორხანმა.

– აქაც ალაჰი გვიშველის! შველა მხოლოდ ალაჰს შეუძლია!

მოსჭრა ჯალალედინმა და ხელი ცისკენ აღაპყრო.

კარავში სულტნის მამლუკი შემოვიდა. სულტანს თავდახრით მიეახლა და ჩურჩულით რაღაც უთხრა:

– შემოიყვანეთ, – ბრძანა უცებ გამოცოცხლებულმა სულტანმა და სახეზე ნათელი გადაეფინა. მერე ტახტზე მშვიდად დაბრძანდა, თვალი ამაყად მოავლო იქ მყოფებს და ერთხელ კიდევ თავდაჯერებულად წარმოთქვა:

– შველა მხოლოდ ალაჰს შეუძლია! ალაჰი დიდია და უნუგემოდ არ დასტოვებს თავის მინდობილთ!..

ორმა მცველმა თავით ფეხებამდე დასველებული, ფეხშიშველა, თმებაბურძენული სპარსელი შემოიყვანა.

წყალი წურწურით ჩამოსდიოდა ტანსაცმლიდან და სიცივისაგან კანკალებდა.

შემოსვლისთანავე ძირს განერთხო, ჩოქვითა და ფარდაგზე თავისცემით მიიწია მბრძანებლის ტახტისკენ და სულტნის ფეხებში ჩარგო თავი.

– წამოდექ! – ბრძანა სულტანმა.

სპარსელმა თავი ასწია, იქაურობას თვალი მოავლო და ჩურჩულით შესთხოვა:

– პირისპირ, მარტო ლაპარაკი მინდა ღვთისსწორ სულტანთან... დიდი საიდუმლო მაქვს სათქმელი...

– თქვი, მე ამათთან საიდუმლო არა მაქვს რა! – ბრძანა სულტანმა.

– ქართველებმა რომ გამიგონ, ცოცხლად დამწვავენ... – კანკალით თქვა ისევ სპარსელმა.

– ქართველები ჩემს წინაშე დაემხოებიან! თქვი, ნულარ აყოვნებ!

– ალაჰ აქ ბარ!* თბილისელ მორწმუნეთა დავალებით ვარ აქ მოსული.

კარავში მყოფნი შეირხნენ და ერთიმეორეს გადახედეს.

– მტკვარში ყვინთვით გამოვიპარე ქალაქიდან, თევზივით წყალქვეშ მოვცურავდი, თავი რომ წუთით სადმე ამომეყო, ქართველები ისრით გამათავებდნენ... – სპარსელმა სული მოითქვა და ისევ იქ მყოფთ მოავლო თვალი.

– თბილისის მაჰმადიანი მოსახლეობა მოუთმენლად ელის მუსულმანთა მხსნელი სულტნის შემოსვლას. დიდი და პატარა ყველა იმას ამბობს, დადგა დრო ურწმუნო გურჯების ჯავრის ამოყრისა და დამხობისო. ქართველთა მეფე თავისი ვაზირებით სატახტოდან მთებში გაიქცა...

ემირებმა მრავალმნიშვნელოვნად გადახედეს ერთიმეორეს.

– ქალაქში ქართველთა ჯარი ძალიან ცოტაა. – განაგრძობდა ისევ ჩურჩულით სპარსელი, – რომ ავჯანყდეთ, მარტო ჩვენც გავუსწორდებით გურჯებს მაჰმადის აღმსარებელნი. მაგრამ ჩვენი იმამი ბრძნულად მოიქცა, მიზგითში საქვეყნოდ ქართველთა დახმარებისათვის მოუწოდა მორწმუნეებს, საიდუმლოდ კი ქართველების წინააღმდეგ დარაზმა. იმის გამო, რომ ქართველებს მცირე მეციხოვნე ჯარი ჰყავთ და იმიტომაც, რომ თბილისელმა მორწმუნეებმა შესძლეს ურწმუნოების მოტყუება, ქართველებმა ქალაქის ერთი კარის დაცვა მაჰმადიანებს მიანდეს. ახლა თბილისის მორწმუნე მოსახლეობა შეიარაღებულია. დიდებული სულტნის პირველი შემოტევისთანავე მუსულმანები დაერევინ ურჯულო ქართველებს და კარს გაუღებენ ერთმორწმუნე ხვარაზმელებს.

თბილისელი სპარსელის ნაამბობით გახარებული სულტანი ამაყად ავლებდა თვალს იქ მყოფ ემირებს, თითქო ეუბნებოდა, მე ყოველთვის მართალი ვარ და ალაჰი მუდამ ჩემთან არისო.

ემირები თავს აქნევდნენ გაოცებულნი და თვალს ვერ უსწორებდნენ მბრძანებლის მედიდურ ცქერას.

– საბუთი რა გაქვს, რომ მტრის მოგზავნილი არა ხარ?

უცებ იკითხა ჯალალედინმა და ყველა მოლოდინად იქცა.

ჯაშუშმა ქამარი შემოიხსნა, შარვლის სათავე შემოირღვია და ნაჭრებში მაგრად გაკრული რაღაც საგანი ამოიღო. მერე იქიდან ოთხად დაკეცილი პერგამენტის პატარა ფურცელი ამოაძვრინა და სულტანს გაუწოდა.

სულტანმა პერგამენტს დახედა, ირწმუნა და მდივანს გადასცა.

– საბუთი სარწმუნოა. მოამბეს მიეცით ოქრო და ტანსაცმელი. უფრო დიდ ჯილდოს თბილისის აღების შემდეგ მივანიჭებთ! – ბრძანა სულტანმა.

ჯაშუში ისევ ფეხებში ჩაუვარდა და ეთაყვანა.

მეორე დილას ჯალალედინმა ლაშქარი საომრად დააწყო. მცირერიცხოვან ცხენოსან ჯარს თავისი ძმა ყიასედინი უთავა და თბილისის ზღუდეებისაკენ გასწია, ხოლო მათ უკანდასახევ გზაზე უმთავრესი ლაშქარი დამალა, რათა საომრად გამოტყუებული ქართველები ხაფანგში მოექცია და გაენადგურებინა. მონგოლთა ამ სამხედრო ხერხის მსხვერპლად თავის დროზე ხვარაზმელთა რჩეული ჯარები დაცემულა, შემდეგ თვითონ ჯალალედინმაც გადმოიღო თათრების ეს ცბიერება და არაერთხელ თავათ მონგოლების წინააღმდეგაც წარმატებით გამოიყენა.

ყიასედინი თავისი ცხენოსანი რაზმით თბილისის ზღუდეებთან მივიდა.

ქართველები დღესაც გაფაციცებით ადევნებდნენ თვალს მტრის მოძრაობას.

ასე შორს და წინ წამოსული ხვარაზმელთა მცირერიცხოვანი ჯარი რომ ნახეს, გუშინდელი გამარჯვებით გულმოცემულებმა, ქალაქის კარი გააღეს და მტერს გააფთრებით ეკვეთნენ.

იმ დღეს უკვე ბოცო ჯაყელი მეთაურობდა მტერზე მისულ ქართველებს. ხვარაზმელებმა ბრძოლა მიიღეს.

მტრის ჯარს საზრიან და მოფიქრებულ მოქმედებაზე ეტყობოდა, რომ ქართველების გამოხდომა მისთვის გუშინდელივით მოულოდნელი არ იყო. ყიასედინი მტერს ეკვეთა, მაგრამ ხელჩართულ ბრძოლაში როდი ჩაება, მოხერხებულად, ნელ-ნელა უკან დაიხია და წათამამებული მტერიც მდევრად წაიყოლა.

ქართველები ყიჟინითა და ვაშას ძახილით მისდევდნენ მოსაჩვენრად ლტოლვილ მტერს. წინა დღეს ხვარაზმელთა რაზმი ღამის სიბნელემ იხსნა სრული განადგურებისაგან, დღეს ქართველებს გადაწყვეტილი ჰქონდათ მტრის ბოლომდე დევნა, რათა მათგან ერთიც აღარ გაეშვათ ცოცხალი.

ვიწრო მოსახვევთან, მოულოდნელად, ხვარაზმელთა ჩასაფრებული ჯარი გამოვარდა ორხანის მეთაურობით და ქარივით მიმქროლავ ქართველ ცხენოსნებს ზურგიდან დაჰკრა.

ქართველებმა სადავეშიშვებული ცხენების უცებ შეჩერება და უკან შემობრუნება ვეღარ შესძლეს. მრავალრიცხოვანი მტერი ირგვლივ ერტყმოდა

მცირერიცხოვან ქართველობას და მახეში შეტყუებულებმა ახლა თავათ გაიმეორეს ყიასედინის წელანდელი ხერხი.

ბოცო ხვარაზმელთა რკალს გააფთრებით ეკვეთა, გარშემორტყმული მტრის სიმრავლე გასჭრა და ცხენი მიწას გააკრა. უკანდახვევისას ქართველთა ერთმა ნაწილმა თავი სასიკვდილოდ გასწირა, მტერს ბრძოლით გადაეღობა და მთავარსარდლისა და ჯარის უდიდესი ნაწილის ლტოლვა თავისი მკერდით დაიფარა.

მეციხოვნეებმა დაინახეს, რომ ქართველები გუშინდლურად გამარჯვების ყიჟინით აღარ ბრუნდებოდნენ, დაოთხილ ცხენებზე გაკრულ მებრძოლებს ზურგზე ფარები აეფარებინათ, ხმლებს კანტიკუნტად იქნევდნენ და უკანდადევნებული ურიცხვი მტრისაგან გადარჩენის მთელი იმედი თავიანთი ცხენების სისწრაფეზე დაემყარებინათ.

მემნამ რომ უკანშემოქცეული ძმა დაინახა, გაფითრდა. იმწამსვე თავისიანების საშველად გასვლა და ქალაქის კართან ბრძოლის გამართვა გადაწყვიტა. მეციხოვნეებს განკარგულება მისცა, მერე ცხენს მოახტა და ის იყო, მუზარადი უნდა დაეხურა, რომ ზღუდესთან მდგარმა სპარსელმა მეციხოვნემ თავში აფთი სცა მოულოდნელად და ცხენიდან უსულოდ გადმოაგდო.

განძის კარის მცველმა სპარსელებმა ხმლები იშიშვლეს, მეციხოვნე ქართველებს მიესივნენ და ყიჟინა დასცეს:

- _ ალაჰ! ილ ალაჰ!
- _ მემნა მოჰკლეს!
- _ ღალატია! სპარსელებმა გვიღალატეს!
- _ დასცხეთ ურჯულოებს!

შექმნეს ქართველებმა ყვირილი. მეციხოვნეები ერთმანეთს მიაწყდნენ და ქალაქის შიგნით საშინელი ხოცვა-ჟლეტა გაიმართა.

უკანშემოქცეული ქართველები ქალაქში შემოვარდნენ, მაგრამ კარის დაკეტვა ვერ მოასწრეს.

მოღალატე სპარსელები განძის კარს მისცვივდნენ და აქაც ხელჩართული ბრძოლა გაიმართა.

ვიდრე მეციხოვნე ქართველები გამცემ სპარსელებს აწყდებოდნენ განძის კარის დასაკეტად, მტერმა მოასწრო და ყიასედინი გრიგალივით შემოიჭრა ქალაქში თავისი ცხენოსნებით.

ქალაქში პირველად შემოვარდნილმა ბოცომ რომ შინა გაცემის საშინელი სურათი დაინახა, მდგომარეობაში სწრაფად გაერკვა და მტერთან უთანასწორო ბრძოლაში უსახელო დაღუპვას ისნის ციხეში გამაგრება ამჯობინა. ბოცომ ბრძოლით გზა გაიკვლია, გადარჩენილი ქართველობა თან გაიყოლა და გაღმა გავიდა.

ისნის ციხის ჩაკეტვამდე ქართველებმა მტკვრის ერთადერთი ხიდის დაწვა მოასწრეს და ციხე-სიმაგრე ქალაქის დანარჩენ ნაწილს მოსწყვიტეს.

ჯალალედინმა მეფის საჭურჭლე ხელთ იგდო, დანარჩენი ქალაქი სარბევად და სამარცვად ჯარს მისცა. კალიასავით მოედო მრავალრიცხოვანი ლაშქარი თბილისს. სისხლით გახელებული ხვარაზმელები სახლებში მხეცებივით შეცვივდნენ, კაცებსა და ბალებს იქვე კაფავდნენ და ჟლეტდნენ, ქალებს ნამუსს ხდიდნენ, ღვინით სავსე რუმბები გამოჰქონდათ, უზომოდ სვამდნენ და უანგარიშოდ ღვრიდნენ.

აქა-იქ ხანძრების პირველი ალი ავარდა. ბუჩქებში სისხლისა და დაღვრილი ღვინის რუები წავიდა.

ჯალალედინმა ბრძანება გასცა, ქალაქის ქრისტიანი მოსახლეობა აეკლოთ და გაეწყვიტათ.

გაცოფებული ჯარისკაცები სულტნის ბრძანებას სიამოვნებით ასრულებდნენ, მაგრამ არც თბილისელ მაჰმადიანებს ინდობდნენ, მათ სახლებშიაც მგლებივით შერბოდნენ, მარცვავდნენ და ძალას ხმარობდნენ.

მხოლოდ ეს იყო, რომ მათ ისე გამეტებით არ უსწორდებოდნენ, ხმაღს მარტო მაშინ იშველიებდნენ, როცა ერთმორწმუნე მუსულმანები ხელს გამოიღებდნენ და «ისლამის ქომაგებს» წინააღმდეგობას შებედავდნენ.

ქალაქში ხვარაზმელების მოულოდნელმა შეჭრამ მოსახლეობას თავზარი დასცა. თბილისელები ხანგრძლივ ალყასა და გამწევ ომს ელოდნენ. პირველად თვალს არ უჯერებდნენ, ქუჩებში რომ მტრის ლაშქარი შემოვარდა და ხელჩართული ბრძოლის ჩახაჩუხი გაისმა.

პავლია კუტმა თორელის სახლის აივნიდან ქალაქის განაპირას ავარდნილ ხანძრის ალს მოჰკრა თვალი. ბერი შემფოთდა. ცოტა ხანიც და ქუჩები ბრძოლის ხმაურმა გააყრუა. ქართველები ყოველი ქუჩისა და თითოეული სახლისათვის გააფთრებით იბრძოდნენ. მტერს უსაფრდებოდნენ, ფანჯრებიდან ისრის სეტყვას აყრიდნენ და უსიკვდილოდ ფეხს არ იცვლიდნენ. ფარ-ხმლის ჩახაჩუხი და ბრძოლის ყიჟინა თორელის უბანს უახლოვდებოდა.

შეშინებულ ცაგოს ბალდი გულზე მიეკრა და ცახცახებდა.

პავლია კუტი გარეგნულად არ კარგავდა სიმშვიდეს, თორემ ისიც საგონებელში იყო ჩავარდნილი, როგორ და რით ეშველა უმწეო დისა და დისწულისათვის.

– სარდაფში ჩადით! – ჩურჩულით უთხრა პავლიამ დას და ხელით ანიშნა, ეჩქარათ.

– იქაც მოვლენ, მოგვაგნებენ, – სასოწარკვეთით თქვა ცაგომ და ბავშვი კიდევ უფრო მაგრად მიიკრა გულზე.

– მაშ, გაიქეცით, აქედან გაასწართ! – აფუსფუსდა თავისი უმწეობით შეწუხებული საპყარი.

– სად მოვასწრებთ, მოგვეწვიან! – განწირულად შესძახა ცაგომ და ცრემლი წასკდა.

პავლიამ ხელი უღონოდ გაასავსავა.

– არც რამ სამალავი გაქვთ, არც საიდუმლო გზა, უბედურო? – მიაშტერა პავლიამ შიშჩამდგარი თვალები დაბნეულ ცაგოს.

– მტკვარზე ჩასასვლელი ხვრელი გვაქვს ეზოში! – ამოიძახა ცაგომ და მაშინვე ყველამ შვება იგრძნო.

– ხვრელი თუ გაქვს, სხვა რა გინდა! – გაიხარა პავლიამ, – ახლავე ჩადი, ბალღი ჩაიყვანე.

– მერე შენ როგორ დაგტოვოთ! – შეწუხდა ცაგო.

– მე, აგერ, კიბის ქვეშ მიმათრიეთ, – ანიშნა მორჩილს პავლიამ.

– იქ როგორ დაიძალეები, დაგინახავენ! – შემფოთდა ცაგო.

– ჩემზე ნუ ნაღვლობ, ნუ აგვიანებ... ბავშვს უშველე... – აყვირდა პავლია და ხელის ქნევით ცაგო ოთახიდან გააგდო. მერე მორჩილი იხმო და ზურგზე მოეკიდა. მორჩილმა კიბის ქვეშ შეათრია და იქ ჩამოსვა საპყარი. პავლიამ თორელის მშვილდ-ისარი და ფარ-ხმალი მოატანინა და მორჩილიც ძალით იქით გააგდო, საითაც ცაგო გაუჩინარდა.

კიბე დაბალი იყო, სულ რამდენიმე საფეხურიანი. სანახევროდ მიწას გაკრული პავლია სულს ქოშინით ითქვამდა. წინ ნანგრევი ყორე ეფარა და გარედან თუ საგანგებოდ არ დააკვირდებოდა კაცი, არ ჩანდა.

სამაგიეროდ, თვითონ ყველაფერს კარგად ხედავდა: ხელჩართულმა ბრძოლამ მათ უბანში გადმოინაცვლა. თორელის სახლის ახლო ერთ მუჭა ქართველობას ურიცხვი ხვარაზმელები აწვებოდნენ. ქართველები თავგამეტებით იცავდნენ ქუჩის ყოველ მტკაველს და მტერს მკერდით უღობავდ-ნენ გზას.

პავლია თორელის მშვილდ-ისარს დასწვდა.

ლარი მოზიდა და ზურგში ისარგარჰობილი ხვარაზმელი რომ პირქვე დამხობილი დაინახა, ბავშვივით შეხტა და აფართქალდა.

მეორე, მესამე, მეოთხე ისარიც გაფრინდა და ოთხი კაცი რომ უსულოდ დაეცა, ხვარაზმელებმა თორელის სახლისკენ იბრუნეს პირი. რაღაცას აყვირდნენ თავიანთ ენაზე, მერე რამდენიმე ჯარისკაცი ანთებული ჟინჯილებით იქით გამოიქცა. ცოტა ხნის შემდეგ დატრიალებულმა კვამლმა კიბის ქვეშ შეაღწია.

კიდევ ცოტა და, ხანძრის ალმა გაანათა კიბის ქვეშ შეყუჟული პავლიას სახე.

საპყარს ისარი გათავებოდა. კიბიდან გამოსვლა და ქუჩაში ჩასვლა რომ შეძლებოდა, თორელის ხმლით ისიც იმ ხელჩართულ ბრძოლაში გაერეოდა, მაგრამ ვაი, რომ ადგილიდან დაძვრა არ შეეძლო.

პავლიამ თავი მკლავებში ჩარგო და მიწას განერთხო. ცეცხლის ალი ცას სწვდებოდა. თორელის სახლი ტკაცატკუცით იწვოდა და სიმხურვალე თანდათან მატულობდა.

ბოლოს სუნთქვა გაუჭირდა პავლიას, კიბის ქვეშ დარჩენა აღარ შეეძლო, ცოტაც კიდევ და, კვამლი და ბული გაგუდავდა.

საპყარმა ხოხვით გაიწია და ის იყო, მხარი გამოიტანა, რომ ცეცხლმორეულმა კედელმა იხუვლა, ძირს წამოვიდა და პავლია ნანგრევებმა დამარხა.

დადამდა, ბრძოლის ხმაური მიწყნარდა. აქა-იქ ჯერ კიდევ ანათებდა ხანძრების ალი. ქალაქში ცხელოდა, კვამლისა და ლეშის სუნი იდგა.

საიდუმლო ხვრელიდან ცაგო და პავლიას მხლებელი მორჩილი ამოვიდნენ.

ხანძრისაგან დანახშირებული, ჯერ კიდევ მხრჩოლავი სახლის ნანგრევების დანახვაზე ცაგოს სახე გაუფითრდა. საითაც მიიხედა, ყველგან ფერფლი და ნაცარი, ნახშირი და ნანგრევი დახვავებულიყო. ცრემლი წასკდა ცაგოს, მაგრამ ახლა ტირილისა და მოთქმის დრო არ იყო, აქ, სადღაც მისი ძმა უნდა ყოფილიყო; იქნებ დანახშირებულ-დანაცრებულები იყო უბედური პავლია, დის ესოდენ მოყვარული და მისთვის თავდადებული.

მორჩილი კიბესთან იდგა და კიბეს დაემებდა. ნანგრევებსა და ნაცარს სრულიად დაეფარა ის ადგილი, სადაც რამდენიმე საათის წინ თავისი მოძღვარი დამალა ყმაწვილმა.

– კიბე სად არი? კიბის ქვეშ დავტოვე!.. – ბუტბუტებდა მორჩილი და თვალებს უიმედოდ აქეთ-იქით აცეცებდა.

– აგერ, კიბე, ზედა დგახარ! – უთხრა გულამომჯდარმა ცაგომ და კიბეზე დაცემული, ნახევრად დანახშირებული თავზე გადასწია.

ყმაწვილი მიხვდა, რაც მომხდარიყო.

ნანგრევებს მისდგა და ცაგოსთან ერთად კიბის განთავისუფლება დაიწყო.

დადლილობისა და ნახანძრალის სიმხურვალისაგან ორივეს წურწურით სდიოდა ოფლი.

როგორც იყო, კიბეს ნანგრევები მოაშორეს და ვეება კოჭქვეშ გართხმული პავლიას ზურგი დაინახეს, ორივეს ზღუქუნნი აუვარდა.

ბედად, მაღლიდან წამოსული კოჭი სანახევროდ დასცემოდა საპყარს. კოჭის ერთი თავი კიბის საფეხურს დაეჭირა და პავლია ამას გადაერჩინა გასრესისაგან.

უზარმაზარ კოჭს ბეჭის ძვალი დაეზიანებინა კუტისათვის, თავი ქვის ნამტვრევით გასტეხოდა; თმა და წვერი შეტრუსოდა და მიწას ჩაფრენილი ორივე ხელი ცეცხლს დაეთუთქა.

ცოცხალი აღარ ეგონათ. იმ უშველებელ კოჭს მოეჭიდნენ, მაგრამ ძვრა ვერ უყვეს. მერე ქვეშ მიწა გამოუთხარეს და უბედური საპყარი ისე გამოათრის.

მკერდზე ყური დაადეს. მისუსტებული გული კიდევ სცემდა ხამუმ-ხამუმ, უღონოდ და უნიათოდ.

წყალი ასხურეს, ჭრილობები მობანეს და შეუხვიეს.

ხანძარს გადარჩენილ ქვის სახლისკენ წაიღეს გონდაკარგული პავლია და მეზობლის დაცარიელებულ სარდაფს შეაფარეს თავი.

გამარჯვებულ სულტანს კარავში ეახლნენ დიდი ძღვენითა და ძვირფასი საჩუქრებით დატვირთული თბილისელ მაჰმადიანთა მეთაურები. მათ შორის იყვნენ რუსუდანის ქმარყოფილი, არზრუმის სულტნის ტოდრილშას შვილი მოლასედინი და შირვანელი უფლისწული სულტანშა.

პირველი კარგა ხნის გაქრისტიანებული და გაქართველებული იყო. ქართველთა დედოფალს მისგან უკვე ორი შვილი ჰყავდა, თამარი და დავითი. მოლასედინი ბოლო დროს რუსუდანს შემოსწყრა და ამაყმა დედოფალმა თითქმის განიშორა.

მოლასედინი თავიდანვე არ იწოდებოდა მეფედ და ქვეყნის მართვის საჩქესთან არავინ უშვებდა. გვირგვინოსნებს შორის უთანხმოება უკანასკნელად უკიდურესობამდე მივიდა. მოლასედინი უკვე რუსუდანის თანამეცხედრედ აღარ იყო და ქართველებს თავიანთი დედოფლის შესართავად შირვანშას უფლისწული სულტანშა მოეყვანათ.

ერთ დროს კინაღამ ამ სულტანშას მამას გაატანეს ცოლად ქართველებმა რუსუდანი. მაშინ ქვეყანას ლაშა მართავდა და რაკი სახელმწიფოს კეთილდღეობა მოითხოვდა ამ ნაბიჯის გადადგმას, რუსუდანის სურვილს ანგარიშს არავინ უწევდა.

ლაშას მოულოდნელმა სიკვდილმა რუსუდანი იხსნა სამშობლოდან გადახვეწისა და ხნიერი შირვანშას ცოლობისაგან. ახლა, როცა თავის ბედს თავათ სწყვეტდა, იმ შირვანშას შვილი მოეყვანა ქმრად შესართავად და სასახლეში ჰყავდა მძევლად.

სულტანშა მართლაც გამორჩეული იყო თავისი თვალტანადობითა და ზრდილობით. ჭაბუკი უფლისწული ახლა იწყებდა ნამდვილ ვაჟკაცობას. შავგვრემან სახეს შავი თვალ-წარბი და უღვაშები უმშვენებდა, ფართო მხარბეჭზე მაგარი ქედი ედგა. მისმა გარეგნობამ და ქცევამ ქართველი დედოფლის კარზე ყველა მოხიბლა და საქართველოს რომ ეს უბედურება არ დატყდომოდა თავს, ალბათ, სულტანშას ქრისტიანულად მონათლავდნენ და მალე რუსუდანის თანამეცხედრედ გამოაცხადებდნენ.

ჯალალედინის უცარი მოსვლა იმდენად მოულოდნელი იყო, თბილისიდან სამეფოს სალაროს წადებაც ვერ მოასწრეს. სატახტოში უამრავი სიმდიდრე დარჩა და სწრაფად გაქცევისას რუსუდანის ეს ორი მძევალი, ალბათ, არც გახსენებიათ.

ახლა ორივე უფლისწული თავმდაბლად ეახლა მთელი სამაჰმადიანოს იმედსა და ქომაგს, სახელოვანსა და აღმატებულ სულტანს.

ჯალალედინს პირველი შეხვედრისთანავე თვალში მოუვიდა ჭაბუკი უფლისწული, მოეფერა და დაუყვავა. როცა ისიც გაიგო, რომ სულტანშას ჭეშმარიტი რჯული ჯერ კიდევ არ უარეყო და არ გამოეცვალა, ფრიად გაიხარა, გვერდით დაისვა და მრავალი ნიჭი და წყალობა აღუთქვა.

სამაგიეროდ, მეორე უფლისწულს სალამიც არ აღირსა, ჭეშმარიტი სარწმუნოების დატოვების გამო გაუჯავრდა, ბავშვივით დატუქსა და იმქვეყნიური სასჯელით დაშინება არ აკმარა, ამქვეყნიურითაც დაემუქრა.

აბუჩად აიგდო და ქართველ ტყვეებთან ერთად მისი საპყრობილეში ჩაგდება ბრძანა.

თბილისელ მაჰმადიანთა თხოვნამ ვერ გასჭრა. პირიქით, უფრო გახელდა და მათაც გაუჯავრდა:

– თქვენც ყველანი ურწმუნოების ხელისშემწყობნი ხართ, ყველას სასტიკად დავსჯი! – გამოუცხადა გაკვირვებულ თბილისელ მუსულმანთა მეთაურებს და ჯილდოს მომლოდინეები პირში ჩალაგამოვლებული გაისტუმრა.

ცოტა ხნის მერე მაჰმადიანთა უბანშიც ავარდა ხანძრების ალი. მუსულმანთა სავაჭროებსა და ქარვასლებშიც ყაჩაღებით შეცვივდნენ მთვრალი ხვარაზმელები და თბილისელი მაჰმადიანები მიხვდნენ, თუ რა ქომაგიც მოევლინა უბედურ საისლამოს.

იმ დღეს საქართველოდან სამხრეთისკენ ქართველებზე ჯალალედინის გამარჯვების ამბავთან ერთად მეორე ამბავიც წავიდა, ამბავი ხვარაზმელთაგან თბილისელი მაჰმადიანების დარბევისა და აკლებისა. ამ მეორე ამბავს პირველზე ნაკლები მნიშვნელობა როდი ჰქონდა ჯალალედინის მომავლისათვის. თუ აქამდე საქართველოს მეზობელი სამუსულმანო სამეფოები მხოლოდ ფარული ეჭვით უცქერდნენ სულტნის მოქმედებას, ამიერიდან მისი ნამდვილი განზრახვა გამოძახებულ იყო: სულტანმა თბილისელი მუსულმანების გამარცვითა და დარბევით მაჰმადიანთა ქომაგის ნიღაბი აიხადა და თავისი მგლური სახე გამოაჩინა.

საქართველოს მეზობელი სამუსულმანო ქვეყნების მეთაურები მიხვდნენ, რა მტაცებელიც მოევლინა ისლამის ქომაგის ნიღბით სამაჰმადიანოს.

დღეს თუ არა, ხვალ ეს მგელი მათ ფარეხშიაც შემოვარდებოდა და მართლმორწმუნე მაჰმადიანებს აქაც ისევე აიკლებდა, როგორც თბილისში.

ხლათის მელიქმა და იკონიის სულტანმა იმ დღიდან ხმაღს ბეჯითად დაუწყეს ლესვა, რათა თავიანთი ხალხები მუსულმანთა ამ «მხსნელის» ქომაგობისაგან ეხსნათ.

ციებ-ცხელებისაგან მისუსტებულ, მაგრამ უკვე ფეხზე წამომდგარ ნესევის თბილისის ალებისა და ჯალალედინის უდიდესი გამარჯვების სიხარული იქაურ მაჰმადიანთა დარბევს ამბავმა მოუშხამა. ამ ცნობისათვის სულტნის ბევრ მეგობარსა და ახლობელს ყურადღებაც არ მიუქცევია. მხოლოდ მოჰამედ ნესევი მიხვდა, თუ რა საბედისწერო ნაბიჯი გადაედგა მის სათაყვანებელ მბრძანებელს.

მიხვდა და თავში ხელი შემოირტყა.

ჯალალედინის სისასტიკეს არაერთხელ შეუწუხებია ბუნებით მშვიდი და კაცთმოყვარე მოჰამედი, მაგრამ სისასტიკეც არის და სისასტიკეც! ულმოზლობისა და სიმკაცრის გამოჩენას მხოლოდ მტრის მიმართ აქვს გამართლება და ისიც ყოველთვის კი არა. ზოგჯერ მტრის შებრალებას და შეწყნარებას მის მოსპობაზე მეტი სარგებელი მოაქვს ხოლმე და ეს არაერთი გონიერი მეფისა და სარდლის მაგალითით იცოდა ნესევიმ. ბევრ ძლევამოსილ

სარდალს დანდობითა და პატიებით მტრის გული სამუდამოდ მოუგია და დამარცხებული მოსისხლე ერთგულ მეგობრად გაუხდია.

მით უფრო აუხსნელად და გაუგებრად ეჩვენებოდა სულტნის ახლანდელი საქციელი ნესევის: ჯალალედინმა ურწმუნო ქართველებით დაარბევინა და დაახოცინა თბილისელი მაჰმადიანებიც, რომელთაც თავისი სისხლისა და თავგანწირვის ფასად გაუღეს სულტანს ესოდენ გამაგრებული და ძნელად დასაპყრობი ქართველთა სატახტოს კარი.

ნესევის აოცებდა სულტნის სიხარბე. იმის ფასი რა სიმდიდრე და ქონება უნდა ემოვნა სულტანს თბილისელი მაჰმადიანების ძარცვით, რასაც დაჰკარგავდა, დანაკარგი – მთელი საისლამოს ნდობა – გაცილებით დიდი და აუნაზღაურებელი იქნებოდა. ამიერიდან მაჰმადიანური სამყარო ჯალალედინის არათუ მუსულმანთა მოსარჩლედ დასახავდა, არამედ მართლმორწმუნეთა მტრად ჩასთვლიდა, ხელის გამართვის სანაცვლოდ, მას ზურგს შეაქცევდა და თუ აქამდე იმედის თვალით შესცქეროდა, იმ დღიდან შიშითა და შფოთით დაუწყებდა ყურებას.

რამდენჯერ შეუდარებია ნესევის თავის წარმოდგენაში ჩინგიზ-ყაენისათვის ჯალალედინი. ადრე ფიქრობდა, რომ მონგოლთა მბრძანებელი მთელ თავის ძლიერებას შიშზე ამყარებდა, თავისი განუკითხავობითა და გაუგონარი სისასტიკით თავის ხალხსაც და დაპყრობილ ერებსაც მისდამი კრძალვასა და არაადამიანურ, თითქმის ცხოველურ შიშს უნერგავდა.

ეს ასე იყო, მაგრამ თვითონ ჩინგიზ-ხანიც კი არ უსწორდებოდა თავის მომხრეებსა და კეთილისმყოფელებს ესოდენი დაუნდობლობით, როგორც ჯალალედინი მოექცა მის ხელშემწყობ მაჰმადიანებს თბილისში.

ჩინგიზმა იცოდა, ვინ უნდა დაემინებინა და ვინ მოწყალებითა და ლმობიერებით მოენადირებინა. იგი მტრებს ეპყრობოდა განუკითხავად, დამნაშავესა და უდანაშაულო მოწინააღმდეგეს განურჩევლად ჟლეტდა, ბაღლებს მშობლების თვალწინ ხოცავდა, ქალაქებს წყალში ძირავდა და ხანძრებით ბუგავდა.

ჩინგიზის ურდოებს ხანძრები მოუძლოდა წინ, მაგრამ ხალხები ხანძრებზე მეტად იმ შიშისაგან ძრწოდნენ, რომელიც მონგოლთა ცხენოსნებზე სწრაფად მოჰქროდა, კიდით-კიდემდე ვრცელდებოდა, ჩინგიზის გზაზე ყველაფერს ღონეს ართმევდა და სიმტკიცეს უკარგავდა – ადამიანებსაც და ციხეებსაც, მეფეებსაც და მეომრებსაც. მტრები ან გაქცევით ცდილობდნენ სიკვდილისაგან თავის დახსნას, ან მორჩილების გამოცხადებით. მაგრამ ვერც ერთი შველოდათ და ვერც მეორე. გაქცეულებს ჩინგიზის ქოფაკები ეწეოდნენ და ისევ ჟუჟავდნენ, როგორც დამორჩილებულებსა და შეწყნარების მთხოვნელებს. ჩინგიზის წინააღმდეგობით განაჩენი თავიდანვე ჰქონდათ გამოტანილი. ეს განაჩენი მტრისათვის მხოლოდ სიკვდილს ითვალისწინებდა, იგი შეუვალი იყო და განუხრელი კანონზომიერებით სრულდებოდა.

მონგოლთა მბრძანებლის სისასტიკის ხმა ხალხებს მანამდე უკარგავდა ხსნისა და გადარჩენის იმედს, ვიდრე ჩინგიზი მათ მიწა-წყალზე

გამოჩნდებოდა. რაკი თათართა წინააღმდეგ ვერც ხმალი ჭრიდა და ვერც ვედრება, ხალხებმა ჩინგიზის მიერ მათ თავზე დატეხილი უბედურება ღვთის განაჩენად იწამეს, თავიანთ ცოდვათათვის ზეციერისაგან მოვლენილ სასჯელს შეურიგდნენ და დანებდნენ.

ეს ძალა ჰქონდა ჩინგიზის მიერ დათესილ შიშს – მტრებს იარაღს აყრევინებდა და დაპყრობილ ხალხებს თავს მონობის უღელში აყოფინებდა.

მაგრამ თავათ თათრებს რალა ამოქმედებდათ? ქვეყნის ერთი კიდიდან მეორემდე ნუთუ მარტო თავიანთი მბრძანებლის წინაშე შიში, სიკვდილით დასჯის შიში ერეკებოდა მონღოლთა ურიცხვსა და თავით ფეხამდე შეიარაღებულ ურდოებს?

ნესევიმ იცოდა, რომ თათრები ციხე-ქალაქების იერიშზე გადასულ თავიანთ ჯარებსაც უკან მშვილდოსნებს უყენებდნენ. შეშინებულებსა და შემდრკალებს ისრებს სეტყვასავით აყრიდნენ და გაქცევის ან უკანდახევის მსურველებს უწყალოდ ხოცავდნენ, ციხეებზე მოიერიშეებს უკანდასახევი გზა მაინც მოჭრილი ჰქონდათ და უნდოდათ თუ არა, იერიში ბოლომდე უნდა მიეყვანათ, წინააღმდეგობა უნდა დაემლიათ, მტერი გაენადგურებინათ და ამით თავისი თავიც დაღუპვის ორმაგი საფრთხისაგან ეხსნათ. ჩინგიზი არა მარტო ღალატისა და დაუმორჩილებლობისათვის სჯიდა სიკვდილით თავის მოლაშქრეებს, მისი კანონებისაგან ყოველგვარი გადახვევისათვის დამნაშავე სიცოცხლეს უნდა გამოსალმებოდა და ყველამ სარწმუნოდ იცოდა, რომ განაჩენი ერთადერთი და საბოლოო იყო, არავითარი შემამსუბუქებელი გარემოება მხედველობაში არ იქნებოდა მიღებული. ჩინგიზისათვის შებრალება და შეწყნარება არ არსებობდა, ჩინგიზის კანონს იმიტომ ჰქონდა ძალა, რომ იგი ყველასათვის კანონი იყო, უბრალო მოლაშქრისათვისაც და ჩინგიზის მემკვიდრე უფლისწულებისათვისაც.

ჩინგიზ-ყაენმა თავისი პიროვნების წინაშე შიში ღვთიურ კანონამდე აიყვანა და თავისი ქვეშევრდომების შეუმჩნეველად თანდათან მისდამი სიყვარულად აქცია. რაკი ღვთის ტოლი ჩინგიზი ქვეყნად უფლის მიერ მოვლენილი იყო მონღოლთა ბატონობის დასამყარებლად, მისი კანონიც ღვთის მიერ იყო ნაკარნახევი და მისი განაჩენი უფლის განაჩენი იყო.

მონგოლები ყაენის მიერ გადაწყვეტილ სასჯელს უყოყმანოდ ღებულობდნენ და დასჯილთა უახლოესი ნათესავები, მამები და შვილები არათუ შურისძიებისა და სამაგიეროს გადახდას ფიქრობდნენ, არამედ მზად იყვნენ საკუთარი სიცოცხლეც გაეწირათ და თავიანთი მკერდით დაეცვათ მტრის ხელყოფისაგან ღვთაებრივი მბრძანებლის საუკუნო მეფობა.

ჩინგიზი შიშთან ერთად სიყვარულსაც ავრცელებდა, თავის ხალხს მთელს მსოფლიოზე ბატონობას აღუთქვამდა, სამეფოს სამეფოზე იპყრობდა, თავის მოლაშქრეებს ალაფითა და ნადავლით ავსებდა და თან გამუდმებით, წლიდან წლამდე ყველა საშუალებით ჩააგონებდა თავის ღვთაებრიობასა და უძლეველობას.

მონგოლები ხედავდნენ, რომ სახელმწიფო სახელმწიფოზე, ციხე-ქალაქი ციხე-ქალაქზე ეცემოდა ჩინგიზ-ყაენის ფერხთქვეშ. მრისხანე მბრძანებელს მტრის ვერც ისარი აკლებდა ვერაფერს, ვერც სიმრავლე. მტერზე თავიანთი სისხლით მოპოვებულ გამარჯვებებს თათრები ჩინგიზის ღვთაებრივ გონებასა და ნიჭს აწერდნენ და მტკიცედ სწამდათ, რომ სიკვდილი მის წინაშე უძლური იყო.

თუმცა თვალთ ხედავდნენ, მაინც უხორცოსავით ჰყავდათ წარმოდგენილი მონგოლებს თავიანთი მბრძანებელი. მისი ღვთაებრივობისა და მარადიულობის რწმენა, მისდამი შიშთან ერთად, ბავშვობიდან ენერგობოდათ გულსა და გონებაში.

ჩინგიზისა ეშინოდათ, მაგრამ უყვარდათ კიდევ იგი და თუ ადრე ძნელი სათქმელი იყო, რომელი გრძნობა ჭარბობდა, ახლა ყველასათვის ამკარად ჩანდა, რომ მბრძანებლისადმი შიშსაც ხალხში მისი სიყვარული შეექმნა.

ჯალალედინმა ვერც შიში ჩაუნერგა თავის ქვეშევრდომებსა და დაპყრობილ ქვეყნებს, ვერც თავი შეაყვარა. ხვარაზმელი სულტანი ჩინგიზივით მეჯოგე ხალხის ბელადობიდან კი არ ამალღებულა, მას მართლაც დიდი და აღმატებული წინაპრები ჰყავდა, რომლებსაც თავიანთი ღვთაებრივი წარმოშობით მოჰქონდათ თავი, მაგრამ ჯალალედინის ღვთაებრივობაზე მისი ყველაზე ერთგული და ახლობელი მსახურებიც არ ლაპარაკობდნენ შინაგანი დაჯერებით. სულტანმა ქვეშევრდომებს თავისი ღვთაებრივობა ვერ ჩააგონა, ვერც ძალის გამოჩენითა და შიშის ჩანერგვით, ვერც გონიერი ქცევითა და ბრძნული მოქმედებით.

ძლიერისა და სულ მუდამ გამარჯვებულისა შეუძლებელიც სჯერათ, უღონოსა და მუდამ დამარცხებულს შესაძლებელსაც აღარ უჯერებენ: ჩინგიზი სულ იმარჯვებდა და ამიტომ სწამდათ მისი უძლეველობა და ღვთაებრივობა, ჯალალედინი სულ მარცხდებოდა და ჩინგიზისაგან ლტოლვილს რაღა უძლეველობასა და ღვთაებრივობას დაუჯერებდნენ.

ჯალალედინს მტკიცე ნებისყოფა ჰქონდა, მაგრამ ბოლომდე ურყევი არ იყო. იგი ფიცხი იყო და გაბრაზებისას უღმობელი, მაგრამ როგორც დამშვიდდებოდა, წყენას ივიწყებდა და ადრე გამოტანილი განაჩენის შერბილებას თუ ვეღარ ასწრებდა, ზოგჯერ გულწრფელად ნანობდა. ქვეყნის მპყრობელის სიტყვა კანონი უნდა იყოს და ერთხელ ნათქვამი არ უნდა გადაითქვას, მტერს სასჯელი არ უნდა შეუმსუბუქოს და მოყვარეს წყალობა არ უნდა მოაკლოს.

როგორც ჩანს, ჯალალედინს აკლია ზოგიერთი თვისება ქვეყნის მპყრობელი ძლიერი მბრძანებლისა და ეს ნაკლი სულტანმა მისი ერთგული მრჩევლების დახმარებით უნდა დასძლიოს და შეივსოს. ნესევისა და სხვა ახლობელი მრჩევლების ვალია, ჩააგონონ სულტანს მის იმედად დარჩენილი საისლამოს პატივისცემა, იქადაგონ და გაავრცელონ ხმა ჯალალედინის ღვთაებრივი წარმოშობისა, მაჰმადისაგან მორწმუნეთა მხსნელად

მოვლენილად გააცნონ ქვეყანას სულტანი და მისდამი შიში და სიყვარული ჩაუნერგონ ყველას.

ამ მიმე ფიქრებით შეპყრობილ ნესევის ეჩვენებოდა, რომ ჯალალედინის უკანასკნელი ნაბიჯი – თბილისელ მუსულმანთა დარბევა ლახვარს სცემდა თვითონ სულტნის საქმეს, მაგრამ გატეხილი აღარ გამთელდებოდა და სულტნის ერთგულ მსახურებს იმაზე უნდა ეზრუნათ, რომ დამლუპველი ხმა არ გავრცელებულიყო და ამიერიდან მაინც მუსულმანების მიმართ ჯალალედინს მტრობის ნაცვლად გულწრფელი მოყვრობა და ქომაგობა გამოეჩინა.

ისანში გამაგრებული ბოცო ჯაყელი საიდუმლოდ კაცს კაცზე გზავნიდა მეფის კარზე, ლაშქრის მოშველებას სთხოვდა და თავის მხრივაც აღუთქვამდა, რომ თუ მეფის სპა მტერს შემოუტევდა, ისნის მეციხოვნენიც ხელს გამოიღებდნენ, მტერს ზურგში დაჰკრავდნენ. თბილისის დაცვის მეთაური იმასაც ატყობინებდა, რომ ჯალალედინი უძლეველი სარდალი არ იყო, ერთხელ ბრძოლაში იგი დაამარცხეს კიდეც თბილისელებმა და თუ საკმაო ჯარს მიაშველებდა, ხვარაზმელებს დედაქალაქს დაატოვებინებდნენ.

ჯარის შეკრებისა და მოშველების მაგივრად, რუსუდან მეფე ისანში გამაგრებულ მეციხოვნეებს ბრძოლის გაგრძელების უიმედობაში არწმუნებდა და ისნის სიმაგრის დატოვებას ურჩევდა.

ბოლოს, როცა იმედი გადაიწყვიტა და მეფის არა ერთი ბრძანებაც მოუვიდა, ბოცომ სულტანთან მოლაპარაკება გამართა და ქალაქიდან უვნებლად გასვლა ითხოვა.

ჯალალედინი დათანხმდა და ისნის ციხეც შესწყვიტა უკანასკნელი წინააღმდეგობა.

ხვარაზმელები მეფის საჭურჭლეს დაეპატრონენ და ხელთნაგდები სიმდიდრის მითვლას შეუდგნენ. სულტნის მდივნები უძლურნი აღმოჩნდნენ აღეწერათ და მიეთვალათ ყველა განძი და საუნჯე. მაშინ ჯალალედინმა თავის ემირებს უბრძანა, ცოტა ხნით ხმალი გვერდზე გადაედოთ და ხელთ კალამი აეღოთ.

დღე და ღამე ითვლიდნენ და ანგარიშობდნენ, წერდნენ და აღრიცხავდნენ, უშველებელი გრაგნილების გორები დადგა, მისათვლელი სიმდიდრე და საჭურჭლე კი არ თავდებოდა.

თავათ ჯალალედინი გაკვირვებული იყო საუნჯის სიმდიდრითა და ფასდაუდებლობით. ტყუილა კი არ გასულიყო შორს თბილისის საარაკო სიმდიდრის ხმა.

– მე რომ მარტო სიმდიდრისათვის მოვსულიყავი, მეტი არა მენდომებოდა რა! თბილისის სიმდიდრე ჩემთვის სრულიად საკმარისი იქნებოდა! – განაცხადა ბედნიერმა სულტანმა.

სულტნის მდივნები რომ ღამეებს ტეხდნენ თვლასა და აღრიცხვაში, ჯალალედინი იმას ანგარიშობდა, თუ რამდენი ლაშქრის მოგროვება

შეიძლებოდა ამ სიმდიდრით. რამდენ იარაღს შეიძენდა და სად დახვდებოდა თავის მოსისხლე მტერს, მონგოლების წყეულ მბრძანებელს.

როგორც კი თბილისის აღების ამბავი შეიტყო სულტნის მდივანმა, ხლათის დედოფლის სამყოფელს ალყა მოხსნა, დედოფალს თბილისის დაცემის ამბავი შეუთვალა და თან ისიც აცნობა, საითაც გასურთ, წაბრძანდით, გზა ყველგან ხსნილიაო.

შეურაცხყოფილი და გულმოკლული დედოფალი ხლათის გზას დაადგა. სახედაბურულსა და თმებჩამოშლილ თამთას შალვას მოჭრილი თავი მიჰქონდა. სამშობლოს უპირველეს მამულიშვილს და თამთა დედოფლის ერთგულ რაინდს ერთადერთი ნატვრა ახდენოდა: მკვდრისათვის თვალები სათაყვანო თამთას ხელებს დაეხუჭა.

მოდითა ხლათის უდაბურ გრძელ გზაზე დედოფალი.

ცრემლგამშრალი თამთა ქვასავით ცივი და უგრძნობელი მზერით გაჰყურებდა გადატრუსულ, ხრიოკ ტრამალებს, ირგვლივ არაფერი იყო და ვერც ვერაფერს ხედავდა, შალვას სისხლშემხმარი ტუჩებისა და აზრგამოცლილი თვალების გარდა.

მიდიოდა დედოფალი და თან მიჰქონდა ჯალალედინის უძვირფასესი ძღვენი, თავისი პირველი სატრფოსი და საოცნებო მიჯნურის, მიუთხრობელი მეომრისა და უკეთილშობილესი მოყმის შალვა ახალციხელის მოჭრილი თავი.

თ ა ვ ი მ ე ხ უ თ ე

ისნის ციხის დამორჩილების შემდეგ საქართველოს დედაქალაქი მთლიანად მტრის ხელთ იყო და ძლევამოსილი ხვარაზმმა გამარჯვებას დღესასწაულობდა.

მას შემდეგ, რაც წყეული ჩინგიზი მუჰამედის უზარმაზარ სამეფოს შეესია, ხვარაზმელთა ხმაღს გამარჯვებით გაეღვება აღარ ღირსებია.

სისხლიან ყაენთან პირველსავე პირისპირ შეტაკებაში დამარცხებული, მონგოლთა ურდოებისაგან დევნილი ჯალალედინი, აგერ, ხუთი წელია, ნადირივით ილტვის, მტერთან შებრძოლებასა და ვაჟკაცურ შებმას ვერსად ახერხებს და გამწარებული უნაპირო ქვეყნის ერთი კუთხიდან მეორეს აწყდება.

უკანდახეულ სულტანს მამამისის მორჩილი ხანები და ათაბაგები ძველებურად მდაბლად უკრავდნენ თავს, მაგრამ ერთ დროს ზღაპრული სიმდიდრითა და ლაშქრის მრავალრიცხოვნებით განთქმული ხვარაზმმას მემკვიდრე, მოსაჩვენრად მორჩილი ხანებისაგან ვერც ოქროს შოულობდა საკმარისსა და ვერც ჯარს. თათრების უძლევლობაში დარწმუნებულ ხანებს

ჩინგიზის შებრძოლებაზე ფიქრიც კი განგების წინააღმდეგობად ეჩვენებოდათ, რადგან მონგოლთა მბრძანებელს ღვთის მიერ მათივე ცოდვების სამაგიეროს მოზღვისათვის მოვლენილად თვლიდნენ. მასპინძლები თავიანთ მაღალსა და კეთილშობილ სტუმარს საზრდოსა და სამსახურზე უარს ვერ უბედავდნენ, მაგრამ თათრების მოახლოებით შეძრწუნებულები, თვითონაც თავქუდმოგლეჯილი გარბოდნენ და მისი მეთაურობით მტერთან გადამწყვეტ შეხმას მიუდგომელ ციხეებში ჩაკეტვას ამჯობინებდნენ.

იმ ციხეებისკენ იწვევდნენ სულტანსაც, თუმცა ეს წვევაც ცალყბა იყო, რადგან კარგად იცოდნენ, რომ, რაც უფრო შორს იქნებოდა მათგან ჯალალედინი, მით უფრო ნაკლები რისხვა დაატყდებოდათ მონგოლთა ულმობელი მბრძანებლისაგან.

თავათ ჯალალედინი ამაოდ ამხედრებდა საომრად მონგოლთა მოახლოებით ზარდაცემულ მიუვალ ციხეებისკენ გაქცეულ ხანებს, მათი გულის გამაგრება და შემობრუნება რომ არ შეეძლო, თავისივე უღონობით გახელებული, გულს ასკდებოდა. ჯალალედინმა კარგად იცოდა, რომ მონგოლთა კირთებისაგან მუსულმანებს მიუვალი ციხეები ვერ დაიცავდნენ და რომ ერთადერთი ხსნა მტრის წინააღმდეგ გამირული შემართება იყო.

ისიც აწუხებდა ჯალალედინს, რომ იმ ხუთი წლის განმავლობაში, რაც იგი მონგოლთა მდევარი ლაშქრისაგან მოწყვეტას ცდილობდა, ერთხელაც ვერ აჩვენა მტერს თავისი ძალა, ბრძოლისუნარიანობა და ხმლის ბრწყინვალება.

და აი, მთელს აღმოსავლეთსა და დასავლეთში ძლიერებით განთქმული სახელმწიფოს დედაქალაქის – თბილისის აღება იყო ჯალალედინის პირველი დიდი გამარჯვება, რომელსაც არა მარტო იმედგადაწყვეტილი საისლამოსათვის უნდა გაეხსენებინა, რომ მას ქომაგი და დამცველი ჰყავდა, არამედ მონგოლთა ძლევამოსილი ყაენის ბანაკშიაც შიშის ზარი უნდა მიეტანა იმის გამო, რომ მათ დაუძინებელ მტერს ჯერ კიდევ შესწევდა ძალა ბრძოლის ველზე სასწაულის ჩადენისა.

ვიდრე ხვარაზმელი სულტნის მოხელეები დაპყრობილი თბილისის აურაცხელი განძისა და სიმდიდრის მითვლასა და აღწერას უნდებოდნენ, შიკრიკები და მალემსრბოლები ქვეყნის ყოველ მხარეს გადასცემდნენ ჯალალედინის უმაგალითო გამარჯვების ამბავს.

ჯალალედინი წარმოდგენით ხედავდა მრისხანე ჩინგიზის გაოცებას და შეშფოთებას, როცა მას სულტნის გამარჯვების ამბავს მიუტანდნენ: მის მოსისხლე მტერს, რომელიც სიკვდილისპირას მიყვანილი ეგონა, აღმოსავლეთის უძლიერესი სამეფო გაენადგურებინა. და მერე როგორი სამეფო! – უძლეველი საქართველო, რომლის შერყევაც მისმა საუკეთესო ბაღათურებმა – ჯებემ და სუბუდაიმაც კი ვერ შესძლეს და უშედეგო ბრძოლის შემდეგ მშვიდობიანად გაცლა ამჯობინეს!

მშვენიერ გუნებაზე გაელვიდა იმ დილას სულტანს. მთას იქით გამოწვერილი ვეებერთელა სისხლისფერი ბურთი თანდათან მაღლდებოდა.

ჯალალედინმა სისხლისფერი მზის ამოსვლა იმ ჩარხის შემოტრიალების მომასწავებლად ჩასთვალა, რომელიც მისთვის ამდენ ხანს ასე უკუღმა ბრუნავდა.

თბილისში მზე ამოდიოდა – ჯალალედინის ძლევამოსილებისა და გამარჯვების მზე.

სულტანი საზეიმოდ გამოეწყო. სამოსელთაგან ყველაზე ძვირფასი ჩაიცვა და სამკაულთაგან ყველაზე პატიოსანი თვლებით აღიკაზმა.

ახლობლებთან ისაუბრა. თბილისის ადებაში განსაკუთრებით თავგამოჩენილებს ქებას ასხამდა. საერთოდ სიტყვაძვირი სულტანი იმ დღეს ჩვეულებრივზე მეტს ლაპარაკობდა, ხუმრობდა და ენაწყლიანობდა.

სიცილი ჩვეულებად არ ჰქონდა, მხოლოდ შეკავებული ღიმილით გამოხატავდა ხოლმე იმ განცდას, რომელიც სხვებს ხმამაღლა ახარხარებდა.

იმ დღეს მარჯვნივ და მარცხნივ უხვად აფრქვევდა ღიმილს და წყალობას.

სუფრიდან რომ წამოდგა, შერეფელმოლკს უთხრა: ნამდვილად რაღაც საწყენი შემხვდება, ისე მხიარულად ვარო.

სიონის გუმბათზე ასავლელი გრძელი კიბე უკვე მოეთავებინათ. სულტნის ბრძანებით, თავმორღვეულ გუმბათზე ტახტი დაედგათ. ტახტზე ჯალალედინი უნდა დამჯდარიყო და იქიდან თბილისელთა განკითხვისათვის უნდა ეცქირნა.

სიონიდან ღვთისმშობლის ხატი გამოეტანათ და ხიდზე დაეგდოთ. ხიდთან უამრავი ტყვე მოერეკათ: კაცი და ქალი, დიდი და პატარა; სულტნის ბრძანებით, ყველას, ვინც ღვთისმშობლის ხატს ფეხს დაადგამდა, იქვე ქრისტიანობაზე ხელი უნდა აეღო და წინა დაეცვითა. ხოლო ისინი, ვინც რჯულის გმობაზე და ხატის შეგინებაზე უარს იტყოდნენ, იქვე წამებით უნდა დაეხოცათ.

ტყვეების მოთქმა და ზრიალი გულისშემღონებლად ისმოდა ცეცხლისაგან გარუჯულ, სახლებდაცარიელებულ, დაღეწილ ქალაქში.

დარახტული ქურანი მოჰგვარეს სულტანს. კარვიდან გამოსულმა მდორედ მიმდინარე მტკვარს დაადგა თვალი. ფიქრმა წაიღო და ერთხანს გაშტერებით უყურა სისხლით ნაპირებშეღებულ მდინარეს. ალბათ, მტკვრის ცქერამ რაღაც მოაგონა, უცებ შემოტრიალდა და მეჯინიბეთუხუცესს მიმართა:

– ეს არა, ჩემი თეთრონი მომგვარეთ...

მეჯინიბეებმა ქურანი უკანვე გააბრუნეს.

სულტანს ტახტი მიართვეს. ფიქრში წასული ჯალალედინი მიიმედა დაეშვა ტახტზე და თვალი ისევ მტკვარს გაუშტერა.

სულტანი მტკვარს გაჰყურებდა, მაგრამ აქაფებულ სინდზე ფიქრობდა, ინდუსტანის შორეულ მდინარეზე.

ხუთი წლის წინათ ბედმა სწორედ სინდის ქარაფოვან ნაპირებთან მიაგდო ჯალალედინი. მანამდე მან ორიოდე შეტაკებაში სძლია მონგოლთა მცირე ძალებს და ბოლოს ფერუანის ბრძოლაში სასტიკად დაამარცხა მონგოლების

ოცდაათათასიანი ლაშქარი ჩინგიზის საყვარელი სარდლის ხუტუხუს მეთაურობით.

მაგრამ ხვარაზმშას ბედი არ სწყალობდა და ამ გამარჯვებას უფრო დიდი განსაცდელი მოჰყვა. ნადავლის გაყოფისას, ჯალალედინის ორი მთავარი მოკავშირე ემინ მელიქი და აგრაკი ჯიშიან არაბულ ცხენზე შეეცილნენ ერთმანეთს. მელიქი ისე გაფიცხდა, რომ თავის მოცილეს სახეში მათრახი გააწნა. ჯალალედინი მათ ჩხუბში ვერ ჩაერია, პატივმოყვარე ემინს შეურაცხყოფილის წინაშე ბოდიშის მოხდა ვერ მოსთხოვა და გაბრაზებულმა აგრაკმა იმ ღამესვე დასტოვა სულტანის ბანაკი.

აგრაკის მაგალითს სხვა ხანებმაც მიბადეს და სულტანი თურქებისა და ხვარაზმელების ამარა დარჩა. ამ მცირე ძალით ჩინგიზის უზარმაზარი ლაშქრის გამკლავებაზე ფიქრიც კი არ შეიძლებოდა და ჯალალედინი იძულებული იყო, ჯერ დაზნისა და შემდეგ სინდისაკენ დაეხია.

შეიტყო თუ არა ხუტუხუს დამარცხებისა და ჯალალედინის დაზნისაკენ ლტოლვის ამბავი, ჩინგიზ-ხანი მთელი ლაშქრით აიყარა და უკან გამოუდგა სულტანს.

დადევნებული ლაშქარი ერთ წუთსაც არსად ისვენებდა, საჭმლის მოსახარშადაც არსად ჩერდებოდა. ჩინგიზი ჩქარობდა, უნდოდა სულტანს მანამ დასწოდებოდა, ვიდრე იგი სინდზე გადავიდოდა; სინდი ძნელი გადასასვლელი მდინარე იყო, ბევრგან ზღვასავით ფართო და თვალუწვდენელი; სულტანს რომ მეორე ნაპირზე გადასვლა მოესწრო, იგი სამშვიდობოს იქნებოდა და ვინ იცის, კიდევ რამდენ უსიამოვნებას შეამთხვევდა.

ხვარაზმელები ტივებისა და ნავების ძებნასა და გამართვაში იყვნენ. მონგოლები მათ უკან მავალ ნაწილებს წამოეწივნენ, გრიგალივით ეკვეთნენ და გაჰფანტეს.

ჯალალედინი მენავებს აჩქარებდა.

როგორც იყო, ერთი ხომალდი გამართეს, ზედ ქალები და ბავშვები აიყვანეს. ხომალდი დინებამ მოიტაცა და ნაპირთანვე შეამსხვრია კლდეს.

აღელვებულ ზღვას ჰგავდა კლდოვან ფართო კალაპოტში სინდი. ტივებსა და ნავებს ნაფოტებივით ისროდა და ამტვრევდა.

მონგოლთა მეწინავე ჯარმა სინდის ნაპირებთან შეუტია და მდინარიდან უკუიქცა გადასვლის თადარიგში მყოფი მტერი. თავისდაღწევის ერთადერთი გზა მოჭრილი იყო. ახლა სულტანს განგება ან ხმალი თულა იხსნიდა. ჯალალედინმა გაღმა გასვლაზე ზრუნვას თავი ანება და ჯარის საბრძოლოდ დაწყობას შეუდგა.

მონგოლთა ლაშქარი ნალისებურ ნახევარწრეებად ერთყმობდა ხვარაზმელებს. გარე მომდგარ ლაშქარს ორივე წვერი მდინარისთვის მიეზღინა და უზარმაზარ მშვილდს ჰგავდა, რომლის ბოლოებს შორისაც სინდი გადაჭიმული-ყო ლარად.

სამმაგი რკალი შემოარტყა ჩინგიზმა ხვარაზმელებს და ჯალალედინი ცეცხლსა და წყალს შუა მომწყვდეული აღმოჩნდა.

ბრძოლის წინ ყაენმა სასტიკი ბრძანება გასცა: არამც და არამც სულტანი არ მოეკლათ და, რადაც არ უნდა დაჯდომოდათ, ცოცხლად შეეპყროთ.

განთიადზე მონგოლთა იერიში დაიწყო. ძლიერმა მტერმა ჯერ მარჯვენა ფრთა გაანადგურა, მერე მარცხენას შეუტია და ისიც მიწასთან გაასწორა. შვიდასი თავზეხელაღებული მებრძოლით გარშემორტყმული ჯალალედინი ლაშქრის შუაგულში იდგა და ერთი მუჭა ჯარით თავგანწირული აწყდებოდა ხან ერთ, ხან მეორე მხარეს.

ყველგან, სადაც მისი დროშა გამოჩნდებოდა, მტრის წყობა იშლებოდა, შუაზე იპობოდა და არეულად უკან იხევდა.

ჩინგიზის ბრძანება კანონი იყო: სულტანი ცოცხალი უნდა ეგდოთ ხელთ. ამიტომ ვერც ხმლის დაკვრას უბედავდნენ და ვერც ისრის დამიზნებას. სიკვდილთან თავდავიწყებით მოთამაშე სულტანი უშიშრად დაჰქროდა მტრის ლაშქარში და უწყალოდ ჰკაფავდა მისი თავგანწირვით გაკვირვებულ მონგოლებს, რომელთაც გააფთრებული მტრის წინააღმდეგ ხმლის აღმართვა ვერ გაეხედნათ.

სისხლისაგან მთვრალი ჯალალედინი შუადღემდე ბრუნავდა მტრის მორევში, შუადღისას მიხვდა, რომ ყოველი ღონე ამაო იყო, მონგოლთა ზღვას ნაპირი არ ჰქონდა, ხმლით გაპობილი ტალღა ისევ მთელდებოდა, ყალყზე დგებოდა და მის ჩასანთქმელად მოიწევდა. ჩინგიზის რკალი ნელ-ნელა, მაგრამ შეუჩერებლად ვიწროვდებოდა.

სულტანმა თანამებრძოლთა შეთხელებულ რიგებს თვალი მოავლო, უცებ რაღაც გადაწყვიტა. ეს თეთრონი იქვე ახლო ჰყავდა მარქაფად, დასვენებული და შეკაზმული.

დაღლილი ცხენიდან თვალისდახამხამებაში დასვენებულზე გადაინაცვლა, ერთხელ კიდევ გააფთრებით შეუტია მტერს და მონგოლებმაც ერთხელ კიდევ დაიხიეს უკან მის წინაშე. მაშინ მოულოდნელად ცხენი შემოაბრუნა ჯალალედინმა, იარაღი გადაჰყარა, ფარი ზურგზე გადაიგდო და თეთრონი ციცაბო ნაპირზე შურდულივით გააქანა.

გონსმოსული ჩინგიზის შვილები მიხვდნენ, რომ სულტანი ცოცხალიც და მკვდარიც ხელიდან უსხლტებოდათ. ცხენები აღმართზე ააჭენეს და მალლობზე აიჭრნენ, საიდანაც მბრძანებელი ბრძოლის ველს დაჰყურებდა.

– ნება მოგვეცი, ვესროლოთ, დავჭრათ ან მოვკლათ!

შესძახეს შვილებმა, მაგრამ სანახაობით გაოგნებულს, ხედვადქცეულ ჩინგიზს მათი არ ესმოდა. ცალი ხელით ანიშნა გაჩუმება და მეორე ხელი პირზე დაიფარა, რათა გოცებისაგან აღმომხდარი ძახილი დაეხშო.

ჩინგიზის სისხლიანი ლეკვებიც სანახაობას დაეტყვევებინა და თვალით ისინიც სინდს მიჯაჭვოდნენ.

ჯალალედინმა თეთრონი კლდიდან ასკუპა და პირდაპირ აქაფებულ სინდში შეაგდო. დასვენებულმა რაშმა ღონივრად გააპო სინდი და ძლიერი ხომალდით მეორე ნაპირისკენ გააქანა პატრონი.

გაღმა ნაპირზე გასულმა სულტანმა თეთრ რაშს შუბლზე აკოცა და ადამიანსავით მოეფერა, მერე ტანსაცმელი გაიწურა და მუშტით დაემუქრა გამოღმა დარჩენილს, ბრაზისა და გოცებისაგან გამტერებულ მონგოლთა ყაენს.

შემდეგ, გვიან უამბეს ჯალალედინს: მისი თავგანწირვით მოხიბლულ ჩინგიზს შვილებისთვის ეთქვა: მამას მხოლოდ ასეთი შვილი უნდა ჰყავდესო.

სინდთან ბრძოლაში იძლია ჯალალედინი, მაგრამ ომში ისეთი დამარცხებაც არის, რომელიც თავისი მნიშვნელობით გამარჯვებას აღემატება ხოლმე.

იმ დღეს სულტნის ვაჟკაცობამ და თავგანწირვამ გადასწონა ბრძოლის წაგების მნიშვნელობა. ცხენზე ჯდომასა და ბრძოლაში გაზრდილმა, გაჭაღარავებულმა ჩინგიზმა იცოდა მტრის ვაჟკაცობის ფასი; ამიტომაც აღტაცებისაგან თავი ვერ შეიკავა და სულტნის გმირობა შვილებს მაგალითად დაუსახა.

ჩინგიზმა იცოდა, რომ სანამ ასეთი ნებისყოფიანი და თავზეხელაღებული მტერი ცოცხალი იყო და ხელთ ხმალი ჰქონდა, მისი გამმწარებელი მშვიდად ვერ დაიძინებდა. ამიტომ სდევდა ფეხდაფეხ ხვარაზმისა და ხორასნის თვალუწვდენელ ველებზე ვეფხვივით გაჭრილ სულტანს, მოსვენებას არსად აძლევდა და თავადაც ვერ ისვენებდა.

სინდს გაღმა სასწაულებრივად გასულ სულტანს ვაჟკაცური სულისა და ამ თეთრონის მეტი აღარაფერი შერჩა: მრავალრიცხოვანი ჰარემი ულამაზესი ხათუნებითა და მცირეწლოვანი შვილებით, ოქრო-ვერცხლითა და სხვა საუნჯესთან ერთად, სინდის ტალღებში ჩააძირვინა, რომ მტერს არ ეგდო ხელთ.

ღარიბი და მიუსაფარი სულტანი მოჩვენებასავით გაუდგა გზას და ამ ცხენის იღბლიანმა ფეხმა სამშვიდობოს გაიყვანა.

ლაშქრის გროვებასა და მტრისგან ლტოლვაში გაატარა ბუდემოშლილმა სულტანმა თითქმის ხუთი წელი. ცხენზე სჭამდა და ცხენზე ეძინა სიმშვიდედაკარგულსა და განსვენება-მონატრებულს, მაგრამ ეს თეთრი რაში, რომელმაც სინდთან სიკვდილისაგან იხსნა, ერთხელაც აღარ შეუკაზმინებია. იგი ყველგან თან დაჰყავდა და საგანგებოდ მიჩენილ მეჯინიბეებს აპატივებინებდა.

თეთრ რაშს იმ დღისათვის ინახავდა, რომელზეც ოცნება ძილს უტეხდა და ცხოვრების ერთადერთ აზრად გადაქცეოდა. ბოლოს და ბოლოს ხომ უნდა შეტრიალებულიყო უკუღმა მბრუნავი ჩარხი, ერთხელ ბედს მისთვისაც უნდა გაეღიმა, წყეული ჩინგიზი თანაბარ ბრძოლაში შეეხვედრებინა და ამდენი სისხლისა და უბედურებისთვის სამაგიერო ეზღვევინებინა.

ამ თეთრ რაშზე ამხედრებული შევიდოდა მაშინ ჯალალედინი მამის სატახტოში... მაგრამ ის სანატრელი დღე იგვიანებდა, მისი უნაპირო სამეფოს აყვავებული ქალაქები მონგოლთა ცხენების ფეხქვეშ მიწასთან სწორდებოდა, ცეცხლსა და წყალში ინთქმებოდა. ბედი მტრის მხარეს იყო, თავის რჩეულს არ აღემატებოდა, გამარჯვებას გამარჯვებაზე ანიჭებდა.

მაინც არ ტყდებოდა ჯალალედინი, მაინც სჯეროდა, რომ ერთხელ მისი მზეც უნდა ამოსულიყო და, აკი ამოვიდა კიდევ!

თბილისის თავზე ვეებერთელა წითელი ბურთი ვარვარებდა – ჯალალედინის ძლევამოსილების მზე ბრწყინავდა. ქადაგ-მკითხავებმა, დერვიშებმა და შეიხებმა წითელი მზის ამოსვლა კეთილ ნიშნად მიიჩნიეს და ჯალალედინს ბედის ჩარხის შემობრუნება უწინასწარმეტყველეს. თბილისთან, წინააზიის უძლიერესი სამეფოს სატახტოსთან, უნდა დამთავრებულიყო ხვარაზმელი სულტანის ბედუკუდმართობა, გზა ლტოლვისა და დამცირებისა. ამიერიდან მის წინაშე გამარჯვებისა და დიდების გზა უნდა გაშლილიყო და ამ გზაზე სულტანს იმ თეთრი რაშით უნდა ევლო, რომელმაც იგი ადიდებულ სინდთან ჯოჯოხეთის ცეცხლიდან გამოიყვანა და თითქმის მკვდრეთით აღადგინა.

ფიქრიდან ცხენის ჭიხვინმა გამოიყვანა ჯალალედინი. ორი მეჯინიბე ძლივს უჭერდა თავს ნასუქალსა და უნაგირსგადაჩვეულ თეთრონს. თამაშ-თამაშით, ცეკვა-ცეკვით მოდიოდა ნესტოებდაბერილი და ფაფარგაშლილი თეთრი რაში.

უხანგი დაუჭირეს და სულტანი მსუბუქად მოევლო თეთრონს.

ჯალალედინმა რაში დასძრა და მწყობრად, ნელი რხევითვე მიჰყვა დროშებისა და შუბების ტყე.

მეციხოვნეები და შინაგამცემები რომ ერთიმეორეს დაერივნენ და ქალაქში ხვარაზმელები შემოცვივდნენ, ვაჩე ისნისკენ ბრძოლით უკანდახეულთა შორის იყო. ცხენი მოუკლეს და ქვეითად, ხმლით იგერიებდა მოჯარებულ მტერს. მერე მხარში დაჰკრეს, შეტორტმანდა, თავი ველარ შეიმაგრა და დაეცა. ბრძოლის ყიჟინამ, ხმალ-აბჯრის ჩახაჩუხმა იქიდან გადაინაცვლა და ვაჩემ თვალი მოჰკრა, როგორ შევარდა ისნის ციხეში გოჩი მუხასძე გადარჩენილ ქართველებთან ერთად. ისნის ციხის კარი დაიკეტა და ხვარაზმელები ამაოდ აწვებოდნენ რკინის კარს.

კიბეზე ჩაკეცილი დაჭრილი ვაჩე სისხლისაგან იცლებოდა. ბრძოლა იმ ქუჩებში მისწყდა, ალაგ-ალაგ ცას ხანძრის ალი ანათებდა. ეგებ ის ხანძრები ძალიან ახლოსაც ენთო, რომ ვაჩე მთელ სხეულში უჩვეულო სითბოს გრძნობდა. დაღლილობისა თუ ძილის მოძალებისაგან თვალი თავისთავად ეხუჭებოდა და ტან-ფეხში ჩაღვრილ სითბოს რაღაც უცნაური ჟრუანტელით ქვეყნის ხმაურისა და საზრუნავისაგან შორს, ძალიან შორს მიჰყავდა, ტალღაზე შემდგარი ნავივით ნელა არწევდა და გონებას თანდათან უბნელებდა.

უცებ შეინძრა, გამოერკვა. წამოწევა უნდოდა და ხელებით მიწაზე დაბჯენა სცადა. ხელისგულებზე რაღაც თბილისა და სქელის შეხება იგრძნო.

– სისხლისაგან დაცლილხარ, ბეჩავო, – ჩაესმა ნაცნობი ხმა. თვალი გაახილა. თავს ცაგო დასდგომოდა.

– აქ რა გინდა?

მისუსტებული ხმით ჰკითხა ვაჩემ.

– ბაღს დავეძებ, წამით წყალზე გავედი და მობრუნებულს შინ აღარ დამიხვდა.

ვაჩემ ისარნაკრავივით შეტოკდა, დაიძაბა, უკანასკნელი ძალ-ღონე მოიკრიბა და ცაგოს შეაჩერდა. ახლალა დაინახა, რომ ქალს ადამიანის ფერი აღარ ედო და თვალები შეშლილივით უბრიალებდა.

– წადი, ბავშვი მოძებნე... მე არა მიშავს, – კვნესით თქვა ტკივილისაგან სახედაღმეჭილმა ვაჩემ.

მანდილი წაიძრო ცაგომ, შუაზე გახია და დაიხარა. ახალუხის ღილები შეუხსნა, სწრაფად მოუნახა ჭრილობა და ფრთხილად, მაგრამ მარჯვედ შეუხვია. ვაჩემ იქაუ-რობას მოხედა: რუსუდანის ახალ სასახლესთან ყოფილა, სულ ახლო.

გრძნობდა, რომ ღონე ღალატობდა და გული მისდიოდა.

– შიგ შემიყვანე, რუსუდანის პალატებში... – ჩურჩულით თქვა და თვალი მიხუჭა.

ცაგო თან წაიყვანდა ვაჩემს, მაგრამ აქედან მისი თავშესაფარი შორს იყო, ქუჩებში მტრის ჯარი დაჰქროდა და დაჭრილს ვინ გაატანდა. ბაღის საძებრად გამოსულს ეჩქარებოდა, შვილის მეტი აღარა ახსოვდა რა. ვაჩემს მხარში შეუდგა, ზურგზე წამოკიდებდა მოუნდომა, მაგრამ ვერ მოერია ახოვან ვაჟკაცს, ისევ ძირს დაუშვა და ძლივსძლივობით დასძრა.

როგორც იყო, პალატაში შეაღწიეს. იქ ტახტზე დააწვინა დაჭრილი.

– ბაღს მოვძებნი და მოვბრუნდები...

დაუგდო სიტყვა, მაგრამ მისი ნათქვამი აღარც ვაჩემს გაუგონია და აღარც თავათ მოუხედია დაჭრილისაკენ. თმაჩამოშლილი ცაგო ქარივით გავარდა გარეთ.

შუადღისას გაღვიძებულ ვაჩემს ისევ ის დღე ეგონა. არც ის იცოდა, რამდენ ხანს ეძინა, აღარც ის ახსოვდა, აქ როგორ გაჩნდა.

იწვა ტახტზე სიციხიანი, ძილისაგან ოდნავ ფერმობრუნებული და ღონემოსული.

გაეღვიძა თუ არა, იქაურობას თვალი მოავლო, მიხვდა, რომ რუსუდანის ახალ პალატებში იყო, სწორედ იმ ოთახში, რომლის მოხატვასაც ამდენი დრო მოანდომა.

პირდაპირ კედელზე მეფედსაკურთხევლად მიმავალი რუსუდანი და მისი ამაღის დამთავრებული სურათი ჩანდა, მხოლოდ სახედართან მდგარ ცაგოს სახესღა აკლდა დასრულება: ტანი და მთელი სხეული დახატული იყო, ის

ადგილი, რომელზედაც ვაჩეს ცაგოს სახე უნდა გამოეხატა, ჯერ მხოლოდ მონახაზებით იყო მინიშნებული.

ქვეყანა იქცეოდა, თბილისს ცეცხლი ანადგურებდა. თავათ ვაჩეც იქნებ ამ მძიმე ჭრილობას ვერ გადარჩენოდა, ამ პალატებსაც, ალბათ, ხანძარი დანთქავდა.

მაშ, ვიღასთვის იყო საჭირო კედელზე ცაგოს სახის მოხატვა და სურათის დამთავრება, თუკი მაინც ცეცხლსა და მტრის შემმუსვრელ ხელს უნდა მოესპო ყოველივე!

ალბათ, აღარავისთვის, მხატვრის გარდა. აღარავისთვის, ვაჩეს გარდა! და სწორედ ამ განწირულებისა და საყოველთაო უბედურების წუთებში მოუხდა ვაჩეს ნახატის დასრულება, ცაგოს სახის დახატვა.

მარცხენა მხარი სტეხავდა და უხურდა დაჭრილს, თავიც სიცხისაგან ჰქონდა დამძიმებული და სახეზე ალმური ასდიოდა, ბარბაცით მივიდა კედელთან. იქვე უწესრიგოდ დაყრილ ფუნჯებსა და საღებავებს დასწვდა...

ხატავდა სიცხისაგან რეტდასხმული და გაბრუებული, მაგრამ შთაგონებით აღფრთოვანებული და ზეაწეული. ყალამი ნელ-ნელა აცოცხლებდა ცაგოს დაუვიწყარ სახეს, რომელიც ყველგან და ყოველთვის თან დაჰყვებოდა და თვალწინ ედგა.

ჯერ ოდნავ გაზიდული თვალები და წვრილად გატყორცნილი წარბები დახატა. გაცოცხლდა ცივი და უტყვი კედელი. სიცოცხლითა და სიტურფით გაივსო იქაურობა. ამეტყველდა ვერცხლისწყალივით მოძრავი, ლამაზი და ალერსიანი თვალები და ვაჩეს ყველაფერი დაავიწყდა, თავისი ჭრილობაცა და სატკივარიც, სამშობლოს უბედურებაცა და სიკვდილის სიახლოვეც.

ამდენი ხნის ნაფიქრი და ნაოცნებარი ნახატში ფუნჯისა და ყალმის მოსმით გადაჰქონდა, შთაგონების ფრთები თავბრუდამხვევად მიაქანებდა და აჩქარებდა. თავათაც სულსწრაფობდა, გრძნობდა, რომ ღონე დიდხანს არ გაჰყვებოდა და უნდოდა სურათის დამთავრება მოესწრო.

სიკვდილი იქვე იდგა, ზურგს უკან, ხოლო განკითხვის დღე – ყველგან, მთელს სატახტოში.

ყოველი წამი ძვირფასი იყო და დათვლილი, ცაგოს სახე უნდა დაემთავრებინა და მერე უკვე სულერთი იყო, ჭრილობა მოჰკლავდა თუ ხანძარი დანთქავდა.

უკანასკნელად მოუსვა ფუნჯი: გაცოცხლებულმა, ცისკენ გასაფრენივით ჰაეროვანმა და მოძრავმა შეხედა ცაგომ კედლიდან და დადნა ვაჟკაცი სიხარულითა თუ ბედნიერებით.

უკან დაწევა, შორიდან შეხედვა და თვალის შეჯერება მოუხდა, ოდნავ გადაიხარა და ამდენი ხნის შეკავებულმა ტკივილმა თუ უღონობამ ერთბაშად აიშვა. თვალთ დაუბნელდა და იატაკზე უგონოდ დაეცა.

შეღონებულს განწირული ზრიალი ჩაესმა. თანდათან გონი უბრუნდებოდა. გაინაზა და ყური მიუგდო. სადღაც, ახლო, ქალების მოთქმა და ზავშვების ზრიალი, ვიშვიში და წივილ-კივილი იდგა.

ღონე მოიკრიფა, ვაივაგლახით სარკმლისკენ გახობდა:

ხიდზე უამრავი ხალხი შეეყარათ. წინ ერეკებოდნენ, რაღაცას აძალებდნენ. კანტიკუნტად, თითო-ოროლა გაუბედავი ნაბიჯით გადადიოდა მეორე ნაპირზე. უმრავლესობა უკან იხევდა და ვერც მათრახი, ვერც ხმლის ცემა წინ ფეხს ვერ ადგმევინებდა.

უკანშემოქცეულებს ცხენოსანი ხვარაზმელები ხმლით ჩეხდნენ და უწყალოდ მტკვარში ჰყრიდნენ,

მაღლა, სიონის გუმბათზე ტახტი იდგა. იმ ტახტზე ძღვეამოსილი ხვარაზმმა იჯდა და ზემოდან ადევნებდა თვალს ღვთის საგმობად და გასაჟღეტად მირეკილ თბილისელთა განკითხვას.

დედათა და ბაღდათა ზრიალმა გული უარესად შეუღონა ვაჩეს.

თვალი დახუჭა და ყურებზე ხელი მიიფარა: საშინელი სურათი თუ ჩვენება მაინც თვალწინ ედგა და ყურში უფრო ძლიერად, გულისწამლებ ზუზუნად ესმოდა განწირულთა გოდება.

თვალი ისევ სიონის გუმბათს მიაპყრო: ახლო იყო რუსუდანის პალატებიდან სიონი, კარგი ვაჟკაცი ისარს დაუცდენლად მიუწევდა.

მაგრამ ან ისარი სად იყო და ან მკლავის ღონე! დაჭრილმა დარბაზს მოავლო თვალი: უწესრიგოდ მიყრილ-მოყრილ ფუნჯებისა და ყალმების, საღებავებისა და ხელსაწყოების მეტი არა ჩანდა რა.

ის იყო, თვალი უიმედოდ უნდა მიეხუჭა, რომ კარის ზღურბლზე დაგდებულ კაპარჭს მოჰკრა თვალი. კაპარჭიდან სანახევროდ ამოვარდნილი ერთადერთი ისარი წვერით მაღლა შემართულიყო და მზის შუქზე ლაპლაპებდა.

კაპარჭი, ალბათ, მაშინ მოსწყდა ვაჩეს, ცაგო რომ მოათრევდა. მტერზე დაუხარჯავი ერთადერთი ისარიღა დარჩენია კაპარჭში და ახლა ეს ერთი ისარი ქვეყნის ფასი ღირს! მაგრამ შესძლებს კი ვაჩე ზღურბლთან მისვლას, მერე უკან მობრუნებას და, რაც მთავარია, იმ ერთადერთი ისრის აუცდენლად ტყორცნას სიონის გუმბათისაკენ?

არა, უნდა შესძლოს, აუცილებლად უნდა შესძლოს!

ვაჩე სარკმლიდან ჩამოიწია, კვნესითა და ოხვრით, კედელ-კედელ ხელის ფათურით წავიდა ზღურბლისაკენ.

მშვილდიც იქვე იპოვნა, ისარი აიღო და ფეხზე დასადგომად ძალა რომ აღარ ეყო, ხოხვით უკან წავიდა. ყოველ განძრევაზე ჭრილობა არაადამიანური ტკივილით სჩხვლევდა, ჭირის ოფლი ასხამდა და ყელი უშრებოდა. ხოხვას მაინც არ ეხსნებოდა, ნელ-ნელა წინ მიიწევდა.

ეტყობოდა, დიდხანს მოუნდა სარკმელთან დაბრუნებას: ხიდზე ხალხი შეთხელებულიყო: ალბათ, სულტანი გაძღა უმწეო ტყვეების ტანჯვის ცქერით, ან იქნებ მოსწყინდა კიდეც საშინელების ყურება.

გუმბათიდან მშვიდად ჩამოდიოდა ქართველებზე გამარჯვებით გაამპარტავებული, ზვიადი ხვარაზმმა.

ავსუს, რა სამიზნო დაჰკარგა ვაჩემ, სიონის გუმბათზე გამართული ტახტი! ჩქარობს, უკანასკნელ ღონეს იკრებს და მთელ სხეულს ძაბავს ვაჩე. ცოტა კიდევ და, სულტანი თვალთაგან მიეფარება. უნდა მოასწროს, უნდა გასტყორცნოს ერთადერთი ისარი...

აი, სულტანი დაბლა ჩამოვიდა. ცხენი მოჰგვარეს, თეთრი რაშის ჭიხვინი ვაჩეს ყურამდე აღწევს. ძალისა და გონების უკიდურესმა დამაბვამ წამით საშინელი ტკივილი დაავიწყა.

ჯალალედინი თეთრონს მოახტა და ვაჩეს ისარიც გაფრინდა.

ისრის მტყორცნელს მეტი აღარაფერი დაუნახავს. ისევ თვალთ დაუბნელდა და გონი დაჰკარგა.

ისარი ზედ ყურთან ჩაერჭო სულტნის თეთრ რაშს. ცხენმა საცოდავად შესჭიხვინა და წინა მუხლებზე ჩაიჩოქა. სულტანმა მოასწრო გადმოხტომა და ხელმწიფეს უმაღვე გარს მოერტყნენ მცველები.

ჯალალედინმა წამით შეასწრო თვალი, როგორ ლევდა სულს მისი უდიდესი განსაცდელისა და უდიდესი გამარჯვების ერთგული მოწმე და მონაწილე.

თეთრ რაშს თვალიდან ცრემლი სდიოდა, ცრემლი მოადგა ჯალალედინის თვალსაც, მაგრამ მხოლოდ წამით...

გაცეცხლებული სულტანი წამითვე შეტრიალდა და მცველებით გარშემორტყმული იქაურობას გაეცალა.

ცუდად ენიშნა სულტანს თეთრი რაშის სიკვდილი. მისი ნახევარი ლაშქარი რომ გაეწყვიტათ თბილისელებს, ისე არ დააღონებდა, როგორც თეთრონის მოკვლა. ბაგაზე დაბმულს, ამდენ ხანს იმიტომ ინახავდა, უნაგირს არ ადგმევინებდა და არ ახედნიებდა, რომ გამარჯვებული ამ თეთრი რაშით შესულიყო ურგენჩსა და სამარყანდში, ჰერატსა და მერვში და ახლა, როცა მისი ბედის ჩარხი წაღმა უნდა შებრუნებულიყო, როცა მთელმა ქვეყანამ შეიტყო მისი პირველი და უდიდესი გამარჯვების ამბავი, თეთრი რაში აქ მოკვდა, ხვარაზმელთა სატახტოსაგან შორს და ასე უსახელოდ. იქნებ ჯალალედინსაც ასე უწერია, სამშობლოდან შორს, მტრის ჯავრის ამოუყრელად, უიღბლოდ და უსახელოდ სიკვდილი!

გააფთრებულმა სულტანმა გადასწყვიტა თბილისზე ეყარა ჯავრი. თბილისელთა იმდღევანდელ ჟღერასა და წამებას არ დასჯერდა. ბრძანა, ქუჩები შეეკრათ, ყველა სახლი გაეჩხრიკათ და თუ დამნაშავეს ვერ იპოვნინდნენ, მთელი ქალაქი გადაეწვათ.

ცოფიანი ძაღლებივით მოედგნენ ხვარაზმელები ქალაქს, ერთხელ კიდევ აიკლეს და ააწიოკეს, გამარცხეს და დააქციეს თბილისი.

ნაშუადღევს გამცემი გაჩნდა. თავისი თვალთ დაენახა, როგორ უმიზნებდა უცნობი ქართველი ისარს სიონისაკენ რუსუდანის ახალი პალატების ვიწრო სარკმლიდან.

თავათ ჯალალედინი მივიდა ორხანის, შერეფელმოლკისა და სულტანშას თანხლებით ნაჩვენებ ადგილას. რუსუდანის პალატებს ალყა შემოარტყა და ჯარისკაცები შეუსია სასახლეს.

სულტნის სამსახურში გადასულმა თბილისელმა სპარსელებმა სისხლის კვალით მიაგნეს ვაჩეს და მაშინვე იცნეს დედოფლის კარის მხატვარი.

სიცხისაგან სახეზე აღმური ასდიოდა დაჭრილს. გაოგნებული რაღაცას ჩურჩულებდა და მქრქალი, თითქმის უსიცოცხლო თვალებით მიჩერებოდა კედელზე გამოხატულ უტურფეს ასულს.

მშვილდი და ცარიელი კაპარჭი იქვე ეგდო. რომელიღაცამ სარკმლიდან გადიხედა, სხვებსაც დაუძახა და დანახვა: სიონი ისე ჩანდა, თითქო ხელისგულზე ჰქონოდეტ. ყველაფერი ნათლად წარმოუდგათ: ამ სარკმლიდან, ამ მშვილდით იყო გატყორცნილი ისარი, რომელიც სულტანს ასცდა, მაგრამ, რომელმაც მისი საყვარელი რაში მოჰკლა. მხოლოდ ის გაუკვირდათ სპარსელებს, როგორ ააცდინა მტყორცნელმა მიზანს ისე ახლო და მარჯვე სამიზნოდან.

– ვინ იცის, თავის სიცოცხლეში იქნებ ერთადერთი ისარი ეგ იყო, მხატვრის მიერ გასროლილი, – თქვა ერთმა.

– ვერა ხედავ? სისხლის გუბეში წევს, თითქმის გათავებულია ჭრილობისაგან, – მიუთითა მეორემ ვაჩეზე და თავისქნევით დაუმატა, – კიდევ კარგად უსვრია, მაგის დღეში მყოფს.

ჯალალედინი რუსუდანის პალატებში გაცეცხლებული შემოიჭრა. არც ერთ დარბაზში არ შეყოვნებულა, თვალი არაფერზე შეუჩერებია, თუმცა სიმდიდრეც ბევრი იყო და ძვირფასი განძეულიც.

ჩქარობდა ისრის მტყორცნელის ნახვას. უნდოდა, თავისი ხელით მოეკლა წამებითა და ტანჯვით.

სწრაფად მიმავალს უკან ამაღა მისდევდა. ჩქარი ნაბიჯით იმ დარბაზში შემოსულს, ის იყო, ბროლის იატაკზე უნდა დაედგა ფეხი, რომ შეჩერდა. მოეჩვენა, წყალში ვდგამ ფეხსო, კაბის კალთა აიწია და ფეხისწვერზე შედგა. ფეხქვეშ მყარი იატაკი რომ იგრძნო, გაბრაზდა, როგორ მოვტყუვდიო. მხლებლებს მრისხანედ მოხედა, იმათაც კალთები აეწიათ და ფეხისწვერებს ფრთხილად ადგამდნენ. გაჯავრებულმა ნაბიჯი მტკიცედ გადადგა და დარბაზში რომ შევიდა, იმ კედლის პირისპირ აღმოჩნდა, რომელსაც დაჭრილი ვაჩე ასე დაჟინებით მიჩერებოდა.

ცაგოს სურათის დანახვაზე ჯალალედინი გაშტერდა, თეთრი რაშიც დაავიწყდა, მისი მკვლეელი ქართველიც და უმაღვე მორთმეულ ტახტზე თავისდაუნებურად ჩაიკეცა.

მთელი აღმოსავლეთი მოვლილი ჰქონდა სულტანს, ქვეყნის არც ერთი კუთხის უტურფესი ქალი არ აკლდა მის ჰარემს, მაგრამ მსგავსი სილამაზე ჯერ არც ცხადად ენახა, არც სიზმრად, არც სურათში დაეხატა ვისმე და, ალბათ, ვერც ოცნებაში ვინმე წარმოიდგენდა. იცოდა სულტანმა ქალის სილამაზის

ფასი, ამიტომ ვეღარ მოაშორა თვალი ჯერ კიდევ საღებავშეუმშრალ ნახატს _ ცაგოს უმშვენიერეს სახეს.

_ რა ლამაზია! ტყუილად როდი აქებენ თურმე გურჯისტანის ქალებს!
აღმოხდა აღტაცებისაგან ჯალალედინს და ნახატისაგან თვალისმოუშორებლად ბრძანა:

_ უთხარით დამნაშავეს, თუ ამ ქალს მომიყვანს, სიცოცხლეს ვაჩუქებ.
სანამ ბრძანებას უთარგმნიდნენ, ვაჩემ თავათ გაიგო სულტნის ნათქვამი, სახე ბრაზისაგან დაედრიჯა და ისედაც წამონთებულ ლოყებზე ცეცხლი მოეკიდა, თვალი დახუჭა დაჭრილმა და კედლისკენ იბრუნა პირი.

_ ეგ ქალი მეფის კარის მგოსნის ცოლია. ქმარი გარნისის ომში დაელუპა, _ თავდახრით მოახსენა სულტანმამ.

ჯალალედინს უცებ გაახსენდა, რისთვის იყო აქ მოსული, შუბლი შეიკრა და მკაცრად წარმოსთქვა:

_ წმინდა წიგნში სწერია: ვაი მას, ვინც სულდგმულ არსებას დახატავს. განკითხვის დღეს მხატვრის მიერ დახატული ადამიანები ნახატიდან ჩამოვლენ, მხატვარს წინ წარუდგებიან და სულის ჩადგმას მოსთხოვენ.

ჯალალედინი წამოდგა, დაჭრილის წინ გაიარა, წამით დამცინავი მზერა ესროლა და განაგრძო:

_ უსულოსათვის სულის ჩადგმა მხოლოდ ღმერთს შეუძლია, ეს კაცი სულს ვერ ჩაუდგამს თავის ქმნილებას, ამიტომ თავათ დაიწვება ჯოჯოხეთის მარადიულ ცეცხლზე...

სულტანმა მალლა აღაპყრო თვალი, სახე ისე აღზნებოდა, თითქო ჯოჯოხეთის იმ მარადიულ ცეცხლს მართლა ხედავდა და მისი თეთრი რაშის მკვლელის წამებით ტკბებოდა.

_ მაგრამ ეს ღვთის სასჯელი იქნება, _ უცებ ხმამალლა შესძახა სულტანმა, _ ხოლო ჩვენ ამქვეყნიური სასჯელი უნდა მივაგოთ ურჯულოს.

_ იგი, ალბათ, სასჯელამდე ვეღარ მიატანს, მძიმედ დაჭრილია და სისხლისაგან დაცლილი, _ შეჰბედა ორხანმა.

_ ამიტომ ვბრძანებ, _ აუწია ხმას ჯალალედინმა, _ ჩემმა ექიმმაშმა იბრუნოს მის განსაკურნებლად. ხოლო როგორც განიკურნება, ყველაზე მძიმე სასჯელით უნდა დავსაჯო იგი სხვების სამაგალითოდ. შენ როგორ ფიქრობ, ბიძაჩემო, _ მოუბრუნდა ორხანს სულტანი, _ რა იქნება მხატვრისთვის ყველაზე დიდი სასჯელი?

_ ალბათ, მარჯვენის მოჭრა, _ მცირე ყოყმანის შემდეგ მოახსენა ორხანმა, _ მარჯვენამოჭრილი მხატვარი ფუნჯსა და ყალამს უნდა გამოეთხოვოს და ეს, ალბათ, მისთვის ყველაზე მძიმე სასჯელი იქნება.

_ გამიგონია, მხატვრებსა და ხუროთმოძღვრებს მარჯვენას სჭრიან საქრისტიანოშიო. არცთუ ისე მძიმე სასჯელია, მარჯვენას ქურდებსაც სჭრიან...

ხელი ჩაიქნია ჯალალედინმა და შერეფელმოლკისკენ შებრუნდა. ვაზირი მიხვდა, მის აზრს თხოულობდა სულტანი.

_ საბერძნეთში, როცა მხატვარი მძიმე დანაშაულს ჩაიდენს, თვალს სთხრიან თურმე, _ მძიმედ თქვა ვაზირმა და მბრძანებელს თავი დაუკრა.

_ თვალის დათხრა!.. აი, ეს ნამდვილად მხატვრისთვის მოგონილი სასჯელია, _ გამოცოცხლდა სულტანი, _ ვინც თვალს კარგავს, ამ ქვეყნის სილამაზესაც კარგავს და მხატვრისთვის ამაზე დიდი უბედურება რა უნდა იყოს... ვბრძანებ: განკურნონ გურჯი მხატვარი ჩვენმა ექიმებმა, განკურნებული ჩვენს წინაშე წარმოადგინონ, რათა თვალი დასთხარონ.

ჯალალედინმა ხელი აღმართა, შებრუნდა და სწრაფად დასტოვა ქართველთა დედოფლის პალატები.

სულტნის მხლებელთაგან შერეფელმოლკი ყველაზე გვიან გავიდა რუსუდანის პალატებიდან: იგი მუშტრის თვალით ათვალთვლებდა ახალი სასახლის დარბაზებს და იმას ანგარიშობდა, თუ რისი წაღება ღირდა იქიდან.

თავის მონებს სასახლის გამარცვა და ნამარცვის საიდუმლოდ შენახვა უბრძანა _ სასახლეში ბევრი რამ იყო ძვირფასი და იშვიათი. თუ ჯალალედინი ამ სიმდიდრის თვალის შევლებას მოასწრებდა, მერე ის მისი ვაზირისათვის დაკარგული იყო. ასე იცოდა სულტანმა. ჯერ ის უნდა დაპატრონებოდა ნააღაფარს, საუნჯესა და ულამაზეს ქალებსაც. ვაზირსა და სხვა დიდებულებამდე მხოლოდ მისი ნაწყალობევილა აღწევდა _ სულტნის სალაროში გავლილი ოქრო და სულტნისავე ლოგინში ღამეგათეული მზეთუნახავები.

ამიტომ ცდილობდა ანგარი ვაზირი, ზოგი რამ ჯალალედინისაგან ფარულად გაეპარებინა თავისი საკუთარი სალაროსაკენ.

შერეფელმოლკმა რუსუდანის სასახლის დარბაზები დაიარა და თავისთვის ჩუმადწასაღები ნამარცვი გადაარჩია.

მტერი ჯერ კიდევ შორს იყო, ვაჩემ რომ ცოლ-შვილი ახალდაბაში გახიზნა. დედაქალაქისათვის მოსალოდნელი ომის შიში აღარ ჰქონდა. ღამ-ღამობით თბილისის ზღუდესთან რჩებოდა, თბილისის დასაცავად იარაღსხმულ მოქალაქეებთან ერთად ფხიზლობდა და მტრის მოსვლის მოლოდინში მშვილდ-ისრისა და ფარ-ხმლის ხმარებაში იწაფავდა ხელს. ჯანმრთელსა და ახოვან ვაჟკაცს სამშობლოსათვის ომი ლხინად ეჩვენებოდა და თუმცა დიდების მოყვარული საერთოდ არ იყო, გულში მაინც ბრძოლის ველზე საგმირო საქმეებით თავის გამოჩენას ნატრობდა.

ბრძოლის წინა დღეს, ცოტა ხნით შინმობრუნებულს, მოულოდნელად ლელა გამოეცხადა.

_ აქ რა გინდა? რამ მოგიყვანა? _ შეიცხადა ვაჩემ.

_ შენმა დარდმა მომიყვანა, ვაჩე. ვერ გავძელი უშენოდ. შენ რომ აქ განსაცდელში მეგულები, მე იქ რა გამაჩერებს.

_ ბაღლი როგორ დატოვე? ახლა რა უნდა ვქნათ, აქედან უკან აღარ გაგიშვებენ...

_ ბაღს დედაშენთან რა გაუჭირდება, მე შენთან უნდა დავრჩე, მუხასძეს სთხოვე, მეც რამე ქალის შესაფერის საქმეს მომანდობენ.

საყვედურით რაღა გაკეთდებოდა. ვაჩე დაჰპირდა, რომ გოჩის ნახავდა და ლელასაც რამე საქმეს გაუჩენდნენ.

მეფე-დედოფალივით ბედნიერად გაატარეს ის უკანასკნელი დამე.

დილით ადრე დასტოვა ლოგინი ვაჩემ და თავის თანამებრძოლებს მიაშურა.

იმ დღეს მტერი პირველად მოადგა ქალაქს. პირველი შეტაკებისას ჯალალედინმა გაქცევით უშველა თავს და თბილისის დამცველები, მემნა ჯაყელის მეთაურობით, გამარჯვებულნი მობრუნდნენ დედაქალაქში.

ბრძოლა ხანგრძლივი არ იყო, მაგრამ მსხვერპლი მოსალოდნელზე მეტი აღმოჩნდა.

დაჭრილები სასწრაფოდ შემოჰყავდათ ქალაქში და ისნის ციხეში გამართული სასნეულოებისკენ მიჰყავდათ.

ციხისთავი მუხასძე დაჭრილებისა და ექიმების გაწესრიგებას ხელმძღვანელობდა. წამით პირისპირ შეხვდა ვაჩეს და შეწუხებულმა შესჩივლა:

_ ამდენ დაჭრილს არ ველოდით, დასტაქრები და მათი შემწე ქალები არ გვყოფნის.

_ ლელა წაიყვანე, თავათ შემოგებვქნა, ქალის შესაფერისი საქმე მომანდოს რამეო.

_ ლელას აქ რა უნდა, აკი გახიზნე?

_ გავხიზნე, მაგრამ...

გოჩის ეჩქარებოდა.

_ ახლავე მონახე და ისნის ციხეში მოიყვანე! _ გამოსძახა ვაჩეს და ცხენი ისნისკენ გააქროლა.

ვაჩემ ცოლი ისნის სასნეულოში მიიყვანა და გულდაარხებულმა დასტოვა: თუ ღმერთი გაწყრებოდა და მტერი თბილისს როგორმე აიღებდა, ერთ წელიწადსაც რომ ალყა მდგარიყო, ვერას დააკლებდა ისნის მაგარ ციხეს.

მეორე დღეს მტერი ისევ მოადგა თბილისს, მეციხოვნენი ისევ გაუხდნენ ხვარაზმელებს, მაგრამ უკვე ძლეულნი შემოიქცნენ სატახტოში. მემნა ჯაყელი შინაგამცემებმა მოჰკლეს, მტერმა ქალაქის ღია კარში მოასწრო შემოჭრა და ქუჩებში სასტიკი ომი გაიმართა.

ყველაზე დიდი განსაცდელის ჟამს, როცა მამაკაცთაგან ყველა ომში ჩაება, დაჭრილები ქალებისამარა დარჩნენ.

რამდენიმე გულადმა ქალმა ისნიდან გამოსვლა და დაჭრილების მიშველება გაბედა. ლელამ ხანძრების ბოლსა და ისრის სეტყვაში ძლივს გაატანა, ქუჩის პირად დაცემულ მგმინავ მებრძოლს დასწვდა, ზურგზე მოიკიდა და ხოხვით მეორე ქუჩისკენ წაიყვანა, ბრძოლის ადგილიდან გააღწია, დალეწილ ქულბაქს ამოეფარა და დაჭრილი ძირს დაუშვა.

_ წყა...ლი... _ ამოიკვნესა დაჭრილმა და სახე სიმწრისაგან დაეღრიჯა.

ლელამ უიმედოდ მოავლო თვალი იქაურობას.

დაჭრილი თითქმის სულთმობრძავი იყო.

– ნეტავ ვაჩე არ იყოს! ნეტავ ის არ იყოს! – ნატრობდა გულში ლელა და დაჭრილისკენ გახედვას ვერ ბედავდა.

უცებ ცხენების თქარათქური და რკინის დიდი ჭიშკრის ზრიალი მოესმა.

გაიხედა. ისნის ციხეში ქართველთა ჯარი, ქვეითი და ცხენოსანი, ერთმანეთს ასწრებდა შესვლას.

ციხის კარი ისევ ზრიალით დაიხურა და ლელამ კვლავ ვაჩეზე დაიწყო ფიქრი.

– ნეტავ იქ იყოს! ნეტავ ვაჩეც ისანში ჩაკეტილებთან იყოს! – ნატრობდა გულში ლელა და თან წამდაუწუმ პირჯვარს იწერდა.

– მიი-შვე-ე-ლე-ეთ!

დაიგმინა მის გვერდით დაჭრილმა და ლელა ახლად გამოერკვა.

მომაკვდავი შველას ითხოვდა. ისნის კარი უკვე დაკეტილი იყო და ლელა სულთმობრძავს სასნეულოში ვეღარ მიიყვანდა. თვალს უმწეოდ აცეცებდა, თავათაც არ იცოდა, რა ეღონა.

მანდილი მოიგლიჯა და დაჭრილთან დაიხარა.

ფერდიდან სისხლი სქლად მოჟონავდა.

ლელამ ტანსაცმელი შემოახია იმ ადგილას, სისხლი მოწმინდა და პირდაღებულ ღრმა ჭრილობაზე მანდილი დააფარა.

– ვაიმე, დედილო! – დაიკვნესა დაკოდილმა და სიცხიანი თვალელები ლელას მიაშტერა.

– შენ... ვაჩეს ცოლი ხარ?

ლელამ თავის ქნევით დაუდასტურა.

– მე მამუკა ოქრომჭედელი ვარ, ცაგოს ძმაი, თურმანის ცოლისძმა.

ლელა ცაგოს ხსენებაზე შეტოკდა. დაჭრილს მოხედა, დააცქერდა: ტკივილისაგან დაღმენჭილ სახეს მაინც კიდევ შერჩენოდა ბევრი საერთო მამუკას ლამაზი დის სახესთან.

– მიშველე, დობას გაფიცებ... ვაჩეს გაფიცებ! – შეევედრა მამუკა და ლელას ცეცხლი მოეკიდა.

აკლებულ ქალაქში ყველაფერი მიღწილ-მოღწილი იყო. სადღაც ყელმოტეხილი დოქით წყალი იპოვნა. დაჭრილს გახურებულ პირში ცოტა ჩაუწვეთა. მერე სისხლი მოჰბანა. დამტვრეული ტახტიდან ფარდაგი გადმოიღო, ძირს დააგო და ოქრომჭედელი ნელ-ნელა იმ ფარდაზე გადაიყვანა.

ის დღე და ღამე დაჭრილთან გაატარა, არც თვალი მოუხუჭავს, არც იქაურობას გაშორებია.

ღამე შფოთსა და კვნესაში გაათენა მამუკამ. შუბლი უხურდა და წარამარა ცივ ტილოს სთხოვდა ლელას.

გატეხილ დოქში წყალი ამოთავდა. სულთმობრძავს ეს სათხოვარიც მოეკვეთა, ტკივილს დანებდა და თითქო დაწყნარდა კიდევ. მეორე დღეს

სიცხემ უმატა და ბოდვაც დააწყებინა. ლელა საცოდაობით იწვოდა, ისე თავდებოდა ვაჟკაცი, შველა არ შეეძლო.

ქულბაქის ნანგრევიდან ქურდულად სულ გარეთ იხედებოდა, ეგებ ქრისტიანი ვინმე დავინახო, რომ დაჭრილს რამე ვუშველოო. მაგრამ ქუჩებში მთვრალი ხვარაზმელები დაეხეტებოდნენ ჯგუფ-ჯგუფად, ნადავლსა და საშოვარს ეძებდნენ, ხოცავდნენ და სწვავდნენ ყველას და ყველაფერს.

ქალაქში ხანძარი მძვინვარებდა, გაძლიერებული ცეცხლი მთელ უბნებს მთქავდა და ქრისტიანს სადღა გაეველებოდა!

სამხრობა იქნებოდა. გზაზე სახედაბურული ქალი გამოჩნდა, აღმართზე ამორბოდა.

ქალის სახეს ვერ ხედავდა ლელა, მაგრამ ვინ უნდა ყოფილიყო, თბილისელი იქნებოდა და ეგებ რამეს მოხმარებოდა. ნანგრევიდან გამოვიდა თუ არა, იმ ქალმა სწორედ მას მოატანა.

– ლელა, წამომყე, ვაჩე აქ არი, დაჭრილია! – ხელისქნევით დააყარა, სახიდან საბურავი მოიშორა და ლელამ ცაგო იცნო.

– რაო, ვაჩე დაჭრილიაო? – გაფითრდა ლელა. მომაკვდავ ოქრომჭედელზე ფიქრი უმაღვე დაავიწყდა და სირბილით აედევნა ცაგოს.

– მე თვითონ შევიყვანე მეფის პალატებში. ბაღის საძებრად ვიყავი გამოსული და ვიდრე არ ვიპოვე, ვედარ მივხედე.

– მძიმედ დაჭრილია? – იკითხა ხმის კანკალით ლელამ.

– ბეჭში აქვს ჭრილობა, მძიმე არ უნდა იყოს, – გაუიოლა ცაგომ, თუმცა კარგად იცოდა, როგორ მძიმედაც იყო დაკოდილი ვაჩე.

ქალები მეფის პალატებში შევიდნენ, ქურდულად, ფეხაკრევით.

ცაგო იმ დარბაზში შეუძღვა ლელას, სადაც არც ისე დიდი ხნის წინათ დასტოვა ვაჩე.

უცებ ორივე ქალი შეჩერდა და გაქვავდა.

ორივენი გამტერებულნი შეჰყურებდნენ კედელზე მოხატულ უზარმაზარ სურათს.

ცაგომ თავისი თავი უმაღვე იცნო. თურმანისა და გოჩის სახეებიც მაშინვე გაარჩია და ბოლოს კუთხეში, ბანზე მდგარ ჭაბუკს რომ შეხედა, გული შეუქანდა: ვაჩე ცრემლითა და სამდურავით შეჰყურებდა მისგან შორს მდგარ, თორელისაკენ გასაფრენად ფეხისწვერებზე შემართულ ცაგოს.

და ცაგო მისწვდა მისი სიყრმის მეგობრის ცრემლისა და დარდის მიზეზს, შეებრალა ჭაბუკი, დაენანა მისი წმინდა და წრფელი სიყვარული.

ლელა გაოგნებული მისჩერებოდა კედელზე გაცოცხლებულ ცაგოს.

წამით ცაგოსადმი შურითა და მტრობით აივსო ლელა.

– სად არის დაჭრილი?! – გააფთრებულმა შესძახა და მრისხანე თვალები შეანათა ცაგოს.

ცაგო გამოერკვა, აქეთ-იქით დაბნეულმა მიმოიხედა. დაჭრილი არსად იყო.

ცაგო კიდევ უფრო დაიბნა.

დარბაზში ფეხის ხმა გაისმა და ორივემ უნებურად კარისკენ გაიხედა.

ზღურბლზე გაქვავებულივით იდგა მათთვის უცნობი ჯალალედინის ვაზირი.

– ნამდვილად ის ქალია, ვაზირო! – შესძახა ერთმა მხლებელთაგანმა.

– შევიპყროთ, სულტანს დიდად ვაამებთ, – შეევედრა მეორე.

შერეფელმოლკი მოჯადოებულებით უცქერდა ცოცხალ ცაგოსა და მის ხატებას კედელზე. მერე ლელას მიაჩერდა მონუსხულივით, მუშტრის თვალით გასინჯა, ამ მშვენიერ ნადავლში თავის წილად იანგარიშა, მოეწონა და მხლებლებს უბრძანა:

– წამოიყვანეთ!

შერეფელმოლკმა ლელა თავისთვის საიდუმლოდ დამალა, ხოლო ცაგოს შეპყრობის ამბავი იმ დღესვე მოახსენა ჯალალედინს.

სულტანი ქართლ-კახეთის ასაკლებად მიდიოდა ლაშქრით და თუმცა გულით უნდოდა ამ იშვიათი ნადავლით დატკობა, საშური საქმე ვერ გადადო.

– ჩემს ჰარემში გაგზავნე, თავრეხს. საგანგებოდ მოუარონ და ჩემს დაბრუნებამდე კაცმა არ შეხედოს! – ბრძანა და ვაზირს ისე შეუბღვირა, შერეფელმოლკი მიხვდა, რომ ეს გაფრთხილება მხოლოდ მისი მისამართით იყო ნათქვამი.

სულტანი ლაშქრად წავიდა.

თბილისის გამგებლად ვაზირი დასტოვა.

შერეფელმოლკმა ჯალალედინის ბრძანება აღასრულა: ცაგო, სხვა მრავალ ნადავლთან და სიმდიდრესთან ერთად, თავრეხს გაგზავნა და თან მცველთა დიდი რაზმი გააყოლა.

რუსუდანის პალატებში დაბინავდა შერეფელმოლკი, როგორც კი სულტანი ქალაქიდან შორს გაიგულა, სასახლეში ჩაიკეტა და თავისი გადამალული საუნჯიდან ყველა ძვირფასით დატკობა მოისურვა.

სული მისდიოდა ვაზირს, ვიდრე ლელას ნახავდა, ხელის ფშვნეტითა და ნერწყვის ყლაპვით ელოდა ლამაზი ტყვის შემოსვლას და ნოხებით დაფარულ ვრცელ დარბაზში აღელვებული გადი-გამოდიოდა.

კარი გაიღო და ლელა გამოჩნდა. დარდისაგან თვალეზმობნილი, უჭმელობისაგან ოდნავ გამხდარი, თმაგაშლილი და დამფრთხალი, თვალეზმ ფოცხვერვით აკვესებდა. სხეული უჩვეულოდ დამაბვოდა და ყოველ წუთს მზად იყო გასაქცევად თუ გადასახტომად. ის სევდიანი სათნოება, რომელმაც პირველი ნახვისას მოხიბლა ჯალალედინის ვაზირი, სადღაც გაქრობოდა, სამაგიეროდ სახეზე ველური უნდობლობა და ოდნავ გამომწვევი სიანჩხლეც აღბეჭდოდა. ამან უფრო მეტად მიიზიდა ვაჟკაცი.

ქალს თავის ენაზე დაუყვავა. ლელამ ნათქვამისა ვერაფერი გაიგო, გაისუსა, თავაულებლად ქვეშ-ქვეშ გამოხედა და თავის დასაცავად მოემზადა.

შერეფელმოლკი მიუახლოვდა. ჯერ ჩამოშლილი თმები გადაუყარა უკან, მერე ნიკაპი აუწია და თვალეში ნდომით ჩახედა. ქალი აჩქარებულად სუნთქავდა, მკერდი მღელვარებისაგან შესამჩნევად აუდ-ჩაუდიოდა. უცებ ხელი აუკრა უცხო კაცს, ნიკაპი გაინთავისუფლა და დარბაზის ბოლოს მიაწყდა.

შერეფელმოლკს გაეღიმა, წინააღმდეგობამ ნდომა უფრო მოუმატა და ნელი, დაჯერებული ნაბიჯით წავიდა ისევ ლელასკენ. წელზე ხელის მოხვევა სურდა, მაგრამ ქალმა ხელი ჰკრა და ვაზირი ძირს დაეცა. ქალი ისევ დარბაზის მეორე კუთხისკენ გაქანდა. შერეფელმოლკი გაბრაზებული წამოდგა და ახლა უკვე გახელებული ეცა ქალს. ლელა ისევ გაუსხლტა, ოთახში შემოფრენილი მერცხალივით, ერთი კედლიდან მეორეს აწყდებოდა უმწეო ქალი: ვნებააშლილი, გახელებული მამაკაცი დასდევდა, იჭერდა, მკლავებში იბლუჯავდა და ლოგინისკენ ეწეოდა, მაგრამ გამწარებული ქალი კბილითა და ფრჩხილებით იბრძოდა, მოძალებულ ვაჟკაცს პოტნიდა და კბენდა, ისევ ხელიდან უსხლტებოდა და ისევ გაუბრძოდა. ტანსაცმელი ერთიანად შემოეფლითა, თეთრი მკვრივი ხორცის დანახვამ კიდევ უფრო ალაგზნო გონაზნეული ვაზირი და გამეტებით მიეტია უკვე ქანცგამოცლილ, მოთენთილ ქალს.

ლელამ უკანასკნელი ღონე მოიკრიბა, ერთხელ კიდევ დაუსხლტა ხელიდან და ფანჯრის რაფაზე შეხტა. შერეფელმოლკი ნელა წავიდა ფანჯრისკენ, ახლა კი ველარსად წამიხვალო, – წაიბუტბუტა და ორივე ხელი გამალა ქალის მოსახვევად. ლელამ უკან დაიხია და ზურგით მიაწყდა ფანჯარას. შეშფოთებულმა ვაზირმა დაყვირებაც ვერ მოასწრო: მოულოდნელად სარკმელი გაიღო და ქალი ძირს გადაეშვა.

დაჭრილ ვაჩეს თავს სულტნის ექიმები ეხვეოდნენ. ჭრილობაზე მალამოს ადებდნენ და ღონისმოსაბრუნებლად ათასგვარ წამალსა და საჭმელს აძლევდნენ. ჭრილობა თანდათან დაუცხრა, სიცხე დაუვარდა და ტკივილმაც უკლო. მალე, ალბათ, ნახმლევი პირის შეკვრასა და მოშუშებასაც დაიწყებდა, ვაჩე ფეხზე წამოდგებოდა და სასტიკი სულტნის განაჩენი აღსრულდებოდა, მხატვარს თვალს დათხრიდნენ.

ენანებოდა ვაჟკაცს ყოველივე იმის გამომშვიდობება, რაც მასავით არავის უყვარდა და რასაც მასავით ვერავინ იგრძნობდა. კიდევ რამდენიმე დღე და მისთვის სამუდამოდ დაბნელდებოდა სინათლე, გაქრებოდა შუქ-ჩრდილის თამაში, აღარც ეს ლამაზი მთა-გორები მიიზიდავდნენ, აღარც იმ მთებზე დამდნარი ლაჟვარდი მიუალერსებდა თვალს, აღარც მინდვრებზე დაღვრილი მწვანის ცქერა გაუხარებდა გულს, აღარც...

ვინ მოსთვლის, კიდევ რამდენ რამეს დაკარგავდა, ესოდენ გულისდასაწყვეტსა და საყვარელს, სხვისთვის უგრძნობელსა და მისთვის ახლობელს.

იწვა ვაჟკაცი ლოგინზე. პირი სარკმლისკენ ებრუნებინა და თვალს ნელა მიმდინარე მტკვრის ტალღებს აყოლებდა. მიდიოდნენ უკანმიუბრუნებლად ეს ზვირთები, მიდიოდნენ და ქრებოდნენ. მიდიოდნენ წუთები და საათები და ვაჩესაც სინათლის გაქრობას უახლოვებდნენ.

გაღმა დაღეწილი ქალაქის ნახევარი ჩანდა.

ნახანძრალეებს ბოლი კიდევ ასდიოდათ, კვამლით გარუჯულიყვნენ გადარჩენილი შენობები, ეკლესიის ჯვარმონგრეული გუმბათები და სასახლეების მაღალი სართულები.

დამწვარი შენობების ჩონჩხებს რომ შეხედავდა, ვაჩეს ცივად გააჟრჟოლებდა და ჯალალედინს წყევლიდა იმის გამო, რომ მისი დასჯა ასე შორს გადასდო. მაშინვე რომ დაეთხარა თვალი, აოხრებული თბილისის ნახვას მაინც ვერ მოასწრებდა და უსინათლოდ დარჩენილის ხსოვნას ბედნიერი და კეთილნამენი, დაუნგრეველი და მტრის ხელშეუხებელი თბილისი შერჩებოდა.

დაჭრილმა რუსუდანის ახალ სასახლეს შეავლო თვალი. მაღალ კლდეზე დაშენებული სასახლე ღრუბლებში ატყორცნილიყო და მტკვარს ზედ დაჰყურებდა. სასახლე ხანძარს გადარჩენოდა და ცეცხლისაგან გამოშვიგნულ, ჩადამებულ შენობებს შორის სასწაულივით იდგა – ლამაზი და ერთადერთი.

– რა კარგი სასახლე ააგო გოჩი მუხასძემ! – ფიქრობს ვაჩე და ეს მერამდენეჯერ ჩხრეკს სასახლის ყოველ წვრილმანს. აი, ამ სარკმლიდან ჩამავალი მზის შუქი ახლა მის ნახატს ეცემა...

ვიწრო სარკმელი მოულოდნელად გაიღო და თვალს არ დაუჯერა, სარკმლიდან ანგელოზი გადმოეშვა, ნახევრადშიშველი და თმაგაშლილი. ანგელოზი ფრთების დაურხევლად მტკვარზე დაეშვა და წყალში უცებვე გაუჩინარდა. კიდევ წამი და, იმ სარკმელს მამაკაცი მოაწყდა, ერთი დაბლა გადმოიხედა და შეშინებულმა სარკმელი სწრაფად მიხურა.

ქვეყნად ყველაზე უბედური ქალი დედოფლური პატივითა და დიდებით მიჰყავდათ თავრეზისაკენ.

ორი ძმა თბილისში დასტოვა სიკვდილის პირას, ქმარი მტერს ჰყავდა ტყვედ, ხოლო ერთადერთი შვილი უპატრონოდ დარჩა მტრისაგან აკლებულ, ცეცხლმოდებულ ქალაქში.

შეპყრობის პირველი წუთებიდანვე თავის მოკვლას ფიქრობდა ბედშავი ცაგო, მაგრამ საგანგებოდ მიჩენილი მცველები ფხიზლობდნენ, თვალს წამით არ აშორებდნენ. რაკი თავი ვერაფრით მოიკლა, გადაწყვიტა, უსმელ-უჭმელობით მომკვდარიყო. ერთხანს სმა-ჭამა აღიკვეთა, მაგრამ ბოლომდე ვერ გაუძლო ტანჯვას, ჯერ წყურვილს დაუთმო და მერე თანდათან მიმშვილსაც.

დაუსრულებელ დარდას და ფიქრში საიდანლაც იმედის პატარა შუქმაც იჩინა თავი: თურმანი ჯერ კიდევ ცოცხალია, პავლიაც გამობრუნდებოდა და ბაღს სადმე გადამალავდა, იქნება მამუკაც გადარჩეს სიკვდილს და ცაგოს ოჯახმა ისევ ბედნიერად მოიყაროს თავი! მაშ, რად იკლავს თავს, რატომ ასწრებს ყველას ცაგო, რად სჩადის ღვთისა და ხალხის საგმობ საქციელს?!

ერთი გული რომ ამას ეუბნებოდა, მეორე იმას ეკითხებოდა, თუ რად მიჰყავდათ იგი ასეთი დიდებით სპარსეთისაკენ. ნამდვილად სულტნის ან მისი ვაზირის ჰარემისათვის აპატივებენ ცაგოს, ხვარაზმელთა მბრძანებლების უამრავ ცოლს ამოუყენებენ გვერდში და დღეს თუ ხვალ მასაც ნამუსს ახდიან. ცაგოს ამის გაფიქრებაც კი ზარავდა. ყველაფერს ავიტან, ყველა ტანჯვას გავუძლებ ქმრისა და შვილის ნახვის იმედით, მხოლოდ ამას კი ვერ შევურიგდები, უმალ თავს მოვიკლავო, გადაწყვიტა ცაგომ და ამ აზრზე მტკიცედ დადგა.

მიდიოდა სამხრეთისკენ ბრწყინვალე ამაღლის თანხლებით, საქართველოს ულამაზესი, მაგრამ უბედშავისი ქალი.

მეფური ტახტრევიდან სევდიანად აყოლებდა თვალს უკან დარჩენილ მთაგორებს, წინ გადაშლილ დაუსრულებელ ველებს, ალაგ-ალაგ ბაღებსა და დიდ-დიდ მდინარეებს.

მიდიოდა ცაგო და იმას ფიქრობდა, ალბათ, თურმანიც ამ გზებით წაიყვანესო. ზოგჯერ საშინელ სიცხეში უდაბნოს ალმურში თორელის ლანდი მოეჩვენებოდა, წამით ტახტრევიდან ჩამოსვლა და მისი ნაფეხურების დაკონა მოუხდებოდა, მაგრამ ჩვენება უმალვე ქრებოდა, ცაგო ტიროდა და ქარავანი მიდიოდა.

ახალდაბასა და თბილისს, თორსა და ახალციხეს არასოდეს გაცილებოდა ცაგო და არ ეგონა, თუ ქვეყანა ასე დიდი იქნებოდა. მიდიოდნენ და მიდიოდნენ... გზას ბოლო არ უჩანდა, ქვეყანას _ ნაპირი და დასასრული.

აღარ ახსოვდა, რამდენჯერ დაღამდა და გათენდა. სიცხემ თანდათან უმატა და გზა გაძნელდა. სულისჩამბრუნებელი ნიავის მაგივრად ცხელი უდაბნოს ხორშაკი უბერავდა და საქართველოს ღრუბელი თანდათან თვალს ეფარებოდა.

ტყვეებმა ოხვრა გაახშირეს, ტირილსა და მოთქმას უმატეს.

ღამით რომელიღაც მდინარის პირას შეჩერდნენ. იმ მდინარეს ხშირი ტყე ეკრა და სიცხით დაოსებულმა ტყვეებმა სული მოითქვეს.

ტყვეთა ქარავნის გამცილებელ რაზმს თავი სამშვიდობოს ეგულებოდა და აღარ ფრთხილობდა. იარაღი აიხსნეს და დაღლილებმა კარგად გამოძინება მოინდომეს.

გრძელი გზით დაღლილ ცაგოს ძილში თავისი სახელი ჩაესმა, თურმანის ხმას მიაღსგავსა, სიხარულისაგან შეხტა და მაშინვე გაეღვიძა. ირგვლივ ყველას ეძინა და გუშაგების გაბმული ფშვინვა ისმოდა. ცაგო გაინაბა, ყური მიუგდო, საიდანღაც თითქო ფეხის ხმა ახლოვდებოდა. სადღაც ცხენმა გაიფრუტუნა და ჩურჩულის ხმა მისწვდა. ცაგომ თავი წამოსწია. უცებ ისეთი ხმაური მოესმა, შეგუბებული წყალი რომ ჯებირს გაანგრევს და ღვარი ზათქით წამოვა. ღამის უკუნი ჟინჟილების შუქმა გასჭრა და ცხენების თქარათქურმა იქაურობა გააყრუა.

_ ჰკა მაგას! _ გაისმა ომახიანი ყვილი და ქართველი თავდამსხმელები ქორებივით მიეტივნენ ფეხზე წამოცვენილ, ჯერ კიდევ გამოუფხიზლებელ

ხვარაზმელებს. ქართველმა მდევერებმა წინააღმდეგობის გამწევეებს თავები დააყრევინეს, ხვარაზმელთა ნადავლს დაეპატრონენ და ტყვეებს ხელ-ფეხი გაუხსნეს.

– თავს უშველეთ, ვისაც საით სურს, იქით წავიდეს! – ჩაესმა ცაგოს ნაცნობი ხმა, ტახტრევნიდან წამოიწია და ჟინჟღილების შუქზე ხმაღმემართული ბუმბერაზი, ცხენზე ამხედრებული გოჩი მუხასძე გაარჩია.

– გოჩი! ძმაო, გოჩი! – სუსტი ხმით გასძახა ცაგომ და ქვითინი წასკდა.

მუხასძემ ცხენი იქით მიაგდო და ჟინჟღილი ტახტრევანში შეანათა.

– ცაგო! აქ საიდან, ბეჩავო?! – მოუწყლიანდა თვალი გოჩის, უნაგირიდან გადმოიწია, ცაგოს წელზე ხელი მოხვია, ბურთივით აიტაცა და ცხენის გავაზე შემოიგდო.

– სად გინდა, წაგიყვანო? – შეეკითხა თავმოუბრუნებლად წელზე ვაზივით მოხვეულ ცაგოს.

– სადღა წამესვლება, სახლი მე აღარ გამაჩნია და ოჯახი... სადაც თქვენ, იქ მეც...

– ეგ მერე ვნახოთ, ახლა დრო არ არი, უნდა ვიჩქაროთ! – თქვა გოჩიმ და ცხენი დასძრა.

გოჩის რაზმელებმა ალაფი დახოცილი ხვარაზმელების ცხენებსვე აჰკიდეს. ვინც მათთან წასვლა ისურვა, იმათაც ხვარაზმელთა იარაღი აასხეს, ცხენებს მოახტნენ და ღამეში გაჰქუსლეს.

დანარჩენები გაიფანტნენ და თავთავიანთ გზას გაუდგნენ.

ქენებით მიჰქროდნენ ტყვეთა დამხსნელები. გზად მტრის გადაყრას უფრთხოდნენ და შარაზე გასვლას ერიდებოდნენ, უფრო ტყე-ტყე და ბილიკ-ბილიკ სვლას არჩევდნენ. უგზო გზებზე ქაჯებივით მიაქროლებდნენ ცხენებს და უფსკრულის პირებზე ჭინკებივით ახტუნებდნენ მთებში ნაჩვევ ზერდაგებს.

– ვაი, შვილო! – დაიგმინა უცებ ცაგომ და ცოტა ხნის მერე ხმის კანკალით იკითხა:

– გადარჩებოდნენ, ნეტავ, შალვა და პავლია?

– გადარჩებოდნენ, ღმერთი მოწყალეა! – თავმოუბრუნებლად დაუმოწმა მუხასძემ, თუმცა თავათაც არ სჯეროდა თბილისში დარჩენილთაგან თუ ვინმე გადარჩებოდა.

ცაგო ორივე ხელით მჭიდროდ შემოსალტვოდა წელზე მუხასძეს, მკერდით მის ზურგს მიკვროდა და თავი მის მხრებში ჩაემალა.

პირველად არ უგრძვნია ვაჟკაცს ქალის ეგეთი სიახლოვე, მაგრამ ცოტა რომ გაიარეს, ზურგი თანდათან გაუხურდა და მხრები ქალის სუნთქვამ გაუთბო. ცეცხლი მოეკიდა, აირია და წონასწორობა კინაღამ დაჰკარგა ქალის სიახლოვესა და ლოგინს დანატრებულმა ვაჟკაცმა. სხვა ვერაფერი იღონა, ცხენს მათრახი უჭირა და ისედაც ოთხზე გადასული, მთლად მიწას გააკრა.

რაც უფრო ჩქარა მიჰქროდნენ და რაც უფრო ძნელ გზებზე გავლა უხდებოდათ, მით უფრო ემატებოდა ცაგოს შიში, უფრო ძლიერ ეკვროდა გოჩის და თანაც მთელი ტანით ცახცახებდა.

მუხასძე გრძნობდა, რომ თვალეში სისხლი აწვებოდა და გონებაც თანდათან უბნელდებოდა. ქალის შემოსალტული ხელების მოშორება უნდოდა, მაგრამ ეს უფრო გასცემდა მის მღელვარებას. სხვა ვერაფერი მოიფიქრა და უცებ სიმღერა წამოიწყო. რაზმი გუგუნით აჰყვა მეთაურს და წუთით ისევ გაუნათდა გოჩის გონება.

ცაგო ზედ დამკვდარივით გატრუნულიყო მუხასძის ვეებერთელა სხეულზე. უცებ ცხენმა წაიფორხილა და ქალის ხელების მჭიდრო სალტემ წელიდან მკერდისაკენ გადაინაცვლა.

ქალმა იგრძნო თავის ხელქვეშ ვაჟკაცის გულის უჩვეულო ბაგაბუგი. კაცმა უნებურად სიმღერა შეწყვიტა და წამით მასაც ისე მოეჩვენა, თითქო მისი ამოვარდნილი გული ცაგოს ეჭირა ხელში და მის ნაზ თითებში გაჰქონდა ფართხალი.

ქალმა ხელები ცივად დაუშვა და მხედარიც უცებ გამოერკვა. საშინლად შერცხვა თავისი თავისა და ცაგოსიც.

– მომხვიე, არ გადავარდე! – წაიდუღუნა გოჩიმ და ცაგოს მკლავი თავათვე შემოირტყა წელზე.

ქალიც ანგარიშმიუცემლად მინებდა, წინანდელზე უფრო მეტად მიეკრა ვაჟკაცის სხეულს და ცრემლი ღაპალუპით წასკდა.

მუხასძემ იგრძნო მხრების დასველება.

– სტირი განა, ბეჩავო? – დათვივით წაიბურდუნა გოჩიმ და თავათაც გული ამოუჯდა.

შეკავებული სლუკუნით ტიროდა ორი გულჩამკვდარი ადამიანი, ოთხახმით მიჰქროდნენ მიწასგაკრული ბედაურები და მძლავრ გუგუნად ისმოდა ახლა მტირალი ვაჟკაცის მიერ წუთის წინ დაწყებული ლაშქრული.

მუხასძის რაზმი ტყეში გასულ დანარჩენ ქართველებთან შესაერთებლად იჩქაროდა.

შორ-შორ მოვლით, ტყე-ტყე და მთა-მთა სიარულით გოჩიმ ცაგო ახალდაბის გზაზე დააყენა და გამოემშვიდობა.

სოფლის გზაზე კაცის ჭაჭანება არსად იყო. მინდორში ნახირი არ ჩანდა და ბუხრებიდან კვამლი არსად ამოდიოდა.

ეზოებს ღობეები მორღვეოდა და ალაგ-ალაგ ნახანძრალი სახლები დაქცეული მღვიმეებივით დაყუდებულიყვნენ.

ვაჩეს სახლს მიუახლოვდა ცაგო.

ჭიშკართან პატარა გოგონა იდგა და ხმამაღლა ზღუქუნებდა. ცაგოს დანახვაზე შეკრთა, გაქცევა დააპირა, მაგრამ ისევ შეჩერდა და მისკენ მიმავალს დააკვირდა.

ცაგომ იცნო ვაჩეს ბალდი, მიუახლოვდა. ბავშვმა ტირილს უმატა, სახლისკენ წავიდა და თან უკან-უკან იყურებოდა, მომყვება თუ არა უცხო ქალიო.

ცაგო ჭიშკარში შევიდა და ბალღს მიჰყვა.

სანამ პატარა კიბეზე ავიდოდა, გული კინაღამ ამოუვარდა. რამდენჯერ აურბენია ეს კიბე თავის ბავშვობაში, მაგრამ არასოდეს მსგავსი ღელვა და გულისტრიალი არ უგრძენია. ჩაბნელებულ ოთახში ლოგინთან იდგა ატირებული გოგონა. ლოგინში ვაჩეს დედა იწვა სიცხიანი და სახეწამონთებული. გამხდარი დედაკაცი თვალეხს უმწეოდ ატრიალებდა, შფოთავდა და კვნესოდა. უცებ, სიცხიანმა სიმღერა წამოიწყო, რაღაც გაურკვეველი ჩაიმღერა, მერე ისევ თავი გადაიგდო, ოხვრას მოჰყვა და ტირილიც მოაყოლა:

– ვაი, შენს დედას, შვილო! ვაი შენი კარგი თვალეხის დამღამებელს...

ცაგო ჟრჟოლამ აიტანა. რაღაც საშინელის მოლოდინში სწეულს მიაშტერდა.

– მიწა გაეთხაროს შენი თვალის დამთხრელს, შვილო ვაჩე!.. – მოთქმით გააბა ავადმყოფმა, სუნთქვა გაახშირა და შფოთვას უმატა.

ერთხანს ასე იფორიაქა და იომა სწეულმა. მერე თანდათან მოწყდა და მოეშვა. მარჯვენა ხელის სამი თითი ერთიმეორესთან მიიტანა. მაგრამ ხელი ვეღარ ასწია. გახურებული ტუჩებიდან რაღაც გაურკვეველად ამოიჩიფჩიფა, ერთი გაიზმორა, გაიჭიმა და სუნთქვაც გაათავა.

ბავშვმა იგრძნო, რომ რაღაც დიდი უბედურება მოხდა, ლოგინს შეშინებული მოსცილდა და წინანდელზე უფრო ხმამაღლა ატირდა. ახლავა გამოერკვა ამდენ ხანს გაქვავებული ცაგო, ვაჩეს დედასთან მივიდა, შეშინებული ხმით ჩასძახა და შუბლზე ხელი დაადო. მიცვალებული ყინულივით ცივი იყო და უგრძნობელი. ცაგომ შეშინებულმა მიმოიხედა, გამამხნეველები და იმედის მიმცემი რომ ვერავინ იპოვა, ბავშვს ხელი ჩაჰკიდა და სირბილით გამოიყვანა.

ტირილით გაირბინეს ეზო.

ცაგომ თავის სახლ-კარს მიატანა.

არც მის კარ-მიდამოში იყო სულიერის ჭაჭანება. კიბეზე აიჭრა და გულგახეთქილმა კარი რომ შეაღო, მუხლი მოეკვეთა: ლოგინზე დედა იყო წამომჯდარი, პირზე დოქი მოეყუდებინა და წყალს სულმოუთქმელად სვამდა.

ხმაურზე დოქი მოიშორა. ცაგო რომ დაინახა, სახე გაუნათდა:

– ცაგო! ცოცხალი ხარ, შვილო?!

– ცოცხალი ვარ, დედა! – ამოიტირა ცაგომ და დედის მოსახვევად გაექანა.

– არ მომეკარო, ახლო არ მოხვიდე... სახადი მაქვს... შენც გადაგედება... – იძახოდა და ხელით იგერიებდა, მაგრამ ცაგოს მისი აღარ ესმოდა, გულში ეკვროდა, ეხვეოდა და კოცნიდა

ტირილითა და ალერსით გაძღნენ.

– რათ მომეკარე, შენც ავად გახდები!

– მე რა მიშავს, დედა, დიდი ხანია, ავად ხარ?!

– ორი კვირა იქნება, რაც მტერმა სოფელი აიკლო. რის წაღებაც შეიძლებოდა, წაიღეს, პირუტყვი გაირეკეს, სარჩო-საბადებელი წაგვართვეს, დავაქციეს და წავიდნენ... სოფელში კაცი აღარავინ არი, მარტო ქალები რას გავაწყობდით. დაიმშა დიდი და პატარა, მაგრამ შიმშილს კიდევ გავუძლებდით, ეს სახადი რომ არ გაჩენილიყო. დღე არ გავა, ორი-სამი სული არ შეიწიროს. დამმარხავიც აღარავინ არი და აყროლდა სოფელი. უბედური ვაჩეს დედაც სახადით კვდება, გუშინდლამდე მე ვუვლიდი. ახლა მეც დამაგდო სიცხემ და აღარც მისი ამბავი ვიცი.

– მოკვდა ვაჩეს დედა, ახლახან მოკვდა, – ტირილით თქვა ცაგომ.

– ღმერთმა აცხონოს უბედური, მაინც სიკვდილს ნატრობდა, თავმომულებულს სიცოცხლე აღარ უნდოდა, რაც ვაჩეს თვალის დათხრის ამბავი გაიგო.

– თვალი დათხარესო? ვინ? როდის? – შეიცხადა ცაგომ.

– ჰო, შვილო, წყეულ ჯალალედინს თავისი ხელით დაუთხრია თვალი. იმ უბედურს მეფის პალატებში ლამაზი ქალი დაუხატავს. ჯალალედინს იმ ქალის მოყვანა უბრძანებია ვაჩესთვის, ნახატს როგორ მოუყვანდა, უარზე დამდგარა, სულტანი განრისხებულა და თვალი დაუთხრია.

ცაგოს წამით თვალი გაუშტერდა. ფიქრით რუსუდანის პალატებში გადავიდა და თვალწინ ვაჩეს ნახატი დაუდგა. ჩემი მიყვანა უბრძანებია ჯალალედინს, ჩემს გამო დაუბნელებიათ მზე ვაჩესათვის, ჩემი ტრფობის წერა გამხდარაო, – გაიფიქრა და ვაჩეს წინაშე თავი დამნაშავედ იგრძნო.

– საწყალი ვაჩე! უბედური ვაჩე! – ამოიკვნესა ცაგომ, ლოგინს დაემხო და გულამომჯდარი ატირდა.

ადარბადაგანსა და საქართველოს რომ იპყრობდა, ჯალალედინს თვალი და ყური ირანისაკენ ჰქონდა. იქ დღე-ღამეზე მონგოლების გამოჩენას ელოდა და სანამ ჩრდილოეთით საკმაო ჯარსა და სიმდიდრეს არ შეაგროვებდა, სამხრეთით ძლიერ ომში ვერ ჩაებმებოდა, ჩრდილოეთით სულტნის ლაშქრობა სამხრეთის სიმშვიდეს ეყრდნობოდა. ამიტომ სამხრეთის მცირე შფოთიც ჯალალედინს მოსვენებას უკარგავდა და ახელებდა.

ირანში მყუდროების ოდნავ დარღვევას, ხვარაზმელი სულტნის წინააღმდეგ ამბოხებას ან შეთქმულებას ჯალალედინი ზურგში ჩასაცემად აწვდილი მახვილივით შორიდან გრძნობდა, მაშინვე ყველაფერს ტოვებდა და სამხრეთისაკენ გარბოდა მისთვის ესოდენ სახიფათო კერის ჩასაქრობად.

საქართველოს ძარცვითა და რბევით გართულ ჯალალედინს ერაყიდან აცნობეს: ქერმანს თათრები უახლოვდებიან, ქერმანის პატრონად დატოვებულმა ეჯიბმა ბორაყმა თათრებთან საიდუმლო მოლაპარაკება გამართა და აჯანყებას აპირებსო. შემფოთებულმა სულტანმა მაშინვე თავისი ძმა ყიასედინი აფრინა ექვსი ათასი ჯარისკაცითურთ. ყიასედინს ბორაყი მანამდე უნდა დაემორჩილებინა და გაენადგურებინა, ვიდრე აჯანყებას დაიწყებდა და თათრების ურდოს მოიშველიებდა. სულტანმა ყიასედინს

საუკეთესო ჯარი გაატანა, მაგრამ მაინც ვერ მოისვენა. ჯალალედინმა კარგად იცოდა თავისი ძმის დაუოკებელი ხასიათი. თავნება ყიასედინს კვირაში ორი პარასკევი ჰქონდა. იქ, შორეულ ქერმანში მბრძანებელი ძმის შიში და რიდი რომ არ ჰქონოდა, ვინ იცის, როგორ მოიქცეოდა! ქერმანის განდგომა და მონგოლების იქ მისვლა ჯალალედინის დიდ გეგმებს ფუშავდა, მის ამდენ ბრძოლასა და წვალეზას წყალში ჰყრიდა და საბოლოოდ დასალუპავადაც გასწირავდა, რადგან მონგოლები ქერმანს არ დასჯერდებოდნენ და ეჯიბ ბორაყს ირანის სხვა მმართველთა შორისაც აღმოუჩნდებოდა მიმბაძველი და წამხედური.

ქართველები ჯერ კიდევ ძლიერნი იყვნენ. ჯალალედინმა მსტოვრებისაგან იცოდა, რომ გურჯები ახალ დიდ ლაშქარს კრებდნენ და ხვარაზმელებთან გადამწყვეტი ბრძოლისათვის ემზადებოდნენ; ამასთან, არზრუმის, ხლათისა და იკონიის მუსულმან მმართველებთანაც საიდუმლო მოლაპარაკება ჰქონდათ, ჯალალედინის წინააღმდეგ ამხედრებდნენ და ხვარაზმელებთან ომში ჩასაბმელად აქეზებდნენ. თუ ქართველთა განზრახვა ხორცს შეისხამდა და ეჯიბ ბორაყის აჯანყებაც დაუსჯელი დარჩებოდა, ხვარაზმელი სულტანი ორ ცეცხლს შუა აღმოჩნდებოდა, ამიტომ ჯალალედინს დროზე უნდა ემოქმედა, სამხრეთით საფრთხე დასაწყისშივე უნდა მოესპო, რომ შემდეგ ჩრდილოეთით საქართველო საბოლოოდ გაენადგურებინა. საქართველოს დამხობა ჯალალედინს მონგოლების წინააღმდეგ საომრად ხელ-ფეხს გაუხსნიდა, სამხრეთისაკენ მიბრუნებულს ზურგი უზრუნველყოფილი ექნებოდა. ყოყმანის დრო აღარ იყო.

სულტანი ფიცხლად აიყარა.

ყიასედინი ჯერ კიდევ არ იქნებოდა ქერმანს ჩასული, რომ ჯალალედინიც უკან გამოუდგა თავისი ლაშქრის საუკეთესო ნაწილით.

თბილისსა და საქართველოში სულტანმა ვაზირი შერეფელმოლკი დასტოვა დიდძალი ჯარით.

წასვლისას სულტანმა ვაზირს ბრძანება დაუგდო: საქართველოსათვის სულის მოთქმა არ ეცლია, ქვეყნის განუწყვეტელი რბევა გაეგრძელებინა და თანაც თვალი და ყური საქართველოს მეზობელი სამუსულმანო სამეფოებისკენ ჰქონოდა, გურჯებთან მათი საეჭვო ურთიერთობიდან არაფერი გამოჰპარვოდა.

შერეფელმოლკი ჯალალედინისა და ყიასედინის მიერ დარბეული საქართველოს ერთხელ კიდევ აკლებასა და გაძარცვას არ დასჯერდა, იმ სოფლებსა და ქალაქებს, სადაც მოსახლეობა ჯერ კიდევ ბედავდა წინააღმდეგობის გაწევას, ჯარი ჩაუყენა.

მთებსა და მიუვალ კლდეებში გადამალულს ვერ მისწვდა, მაგრამ დაპყრობილი ბარის სიმდიდრე ამოსწურა და ხარბმა ვაზირმა გამდიდრების ახალ წყაროზე დაიწყო ფიქრი.

სწორედ იმ დროს ჩაუვარდა ხელთ არზრუმის სულტნის საიდუმლო წერილი ქართველთა მეფისადმი. ტოდრილშა ქართველებს ჯალალედინის

შორს ყოფნას ატყობინებდა, ხლათელებთან შუამავლობას კისრულობდა და საერთო ძალით ხვარაზმელების წინააღმდეგ ომის დაწყებას აჩქარებდა.

შერეფელმოლკს ეს საბაბილა უნდოდა. საქართველოს მაჰმადიან ყმადნაფიცთაგან ყველაზე სუსტი არზრუმის სულტანი მაინც თვალში ჰქონდა ამოღებული და რაკი ხვარაზმელთა მიმართ მისი მტრობის უტყუარი საბუთი ხელთ ჰქონდა, რაღა შეაჩერებდა. დიდძალი ლაშქრით დაუყოვნებლივ არზრუმს შეესია. ტოლრილშას არც თავათ ჰყავდა საკმაო ჯარი, ვერც მეზობლების მოშველიება მოასწრო, უეცრად შემოსეულ მტერს მოუშინადებლად დახვდა და დამარცხდა.

ხლათის მელიქი ელაშრიფი სირიაში იყო და დროს ნადირობასა და შექცევაში კლავდა. ხლათს, ჩვეულებრივად, დედოფალი თამთა და სულტნის ერთგული ეჯიბი ჰისამადინი მართავდნენ.

ხლათელებს ქართველებთან საიდუმლო კავშირი ჰქონდათ, ჯარს ჩუმად კრებდნენ და დღეს თუ ხვალ ხვარაზმელების წინააღმდეგ საერთო ბრძოლაში უნდა ჩაბმულიყვნენ.

არზრუმის დარბევის ამბავი რომ შეიტყვეს, ჯალალედინი შორს ეგულებოდათ. მამაცმა ჰისამადინმა, თამთას ჩაგონებით, ლაშქარი სწრაფად შეჰყარა და უკან შემობრუნებულ შერეფელმოლკს მარჯვე ადგილას ჩაუსაფრდა.

არზრუმის სულტანზე იოლი გამარჯვებით გაამპარტავნებულ ხვარაზმშას ვაზირს მის წინააღმდეგ ხმლის აღმმართავი არავინ ეგულებოდა.

გალაღებულ შერეფელმოლკს ხელთ აურაცხელი ნადავლი ეგდო, ულამაზესი ქალები თავისი ჰარემისათვის გადაერჩია, უამრავ ტყვეს მოერეკებოდა და უთვალავი სიმდიდრე მოჰქონდა. ხლათელების თავდასხმა იმდენად მოულოდნელი იყო, ხვარაზმელებს წინააღმდეგობის გაწევაზე აღარც უფიქრიათ, ყოველივე მიატოვეს, ნადავლიცა და საკუთარიც და გულგახეთქილებმა თავს გაქცევით უშველეს.

ლტოლვილი შერეფელმოლკი დიდხანს გონს ვერ მოეგო. მას ისე ეჩვენებოდა, რომ ხლათისა და მისი ყველა მოკავშირის, შამისა, იკონიისა და ეგვიპტის გაერთიანებულმა ლაშქარმა გაუმართა ბრძოლა და ამიტომ იძლია.

ჯალალედინთან მაცნეები აფრინა და ხლათელებთან პატარა შეტაკება დიდ ომად დაუხატა.

შერეფელმოლკის დამარცხება და გაქცევა ქართველებს არ გამოჰპარვიათ. ციხეებში გამაგრებულმა მთავრებმა გარეთ გამოხდომა და მტერზე თავდასხმები გაახშირეს. ვარამ გაგელი იმდენად გათამამდა, რომ განძის მიმდგომ ქვეყანასაც მისწვდა და თავისი საპატრონო მხარის მტრისაგან განთავისუფლება სცადა.

ხლათელებთან მარცხითა და ქართველების მოძალებით შემინებული შერეფელმოლკი შიკრიკს შიკრიკზე გზავნიდა, სულტანს დაჟინებით უკან იწვევდა და თანაც აფრთხილებდა, თუ დროზე არ მობრუნდები, ხლათელები

და მისი მოკავშირეები აჯანყებულ საქართველოს მისცემენ მხარს და იქ მყოფ ხვარაზმელებს საერთო ძალით გაანადგურებნო.

შემწვითებული ჯალალედინი ახლა სამხრეთიდან აიყარა და, რომ არავინ ელოდა, თბილისში ისე გაჩნდა.

ხლათელების თავხედობამ მთლად გააცოფა, მათ დედოფალზე ისედაც გაბრაზებული სულტანი მაინც მიზეზს ეძებდა თამთას დასასჯელად და ახლა, რაკი საბაბი ჰქონდა, რალა დააოკებდა. ჯალალედინმა ხლათელებზე შურისძიება გადაწყვიტა და სამზადისსაც შეუდგა. მაგრამ მტრის მოსატყუებლად ისე მოქმედებდა, ვითომ მხოლოდ საქართველოს დაპყრობით იყო გართული, ჯერ ანისისა და კარის ციხეებს მიადგა. მიუდგომელი სიმაგრეები იერიშით ვერ აიღო, მანქანები მიუყენა და ალყა შემოარტყა. მეციხოვნენი თავგანწირვით იბრძოდნენ და მტერი ვერაფერს გახდა.

სულტანმა ხლათელების თვალისასახვევი ლაშქრობა უცებ შეწყვიტა და პირი სამხრეთისაკენ იბრუნა. ჯალალედინი დარწმუნებული იყო, რომ ხლათელები მის თავდასხმას არ მოელოდნენ, მოუზადებელნი დახვდებოდნენ და წინააღმდეგობის გაწევას ვერ შესძლებდნენ.

მაგრამ ჯალალედინის საიდუმლო განზრახვა ვიღაცამ, მის ახლობელთაგანვე, ოთხი დღით ადრე აცნობა ხლათელებს. ხლათელებმა მოასწრეს გამაგრება და ლაშქრის შეკრება.

სულტანი იოლ გამარჯვებას ელოდა და ქალაქ ხლათზე იერიში მიიტანა. ხლათელები გულმტკიცედ დაუხვდნენ მტერს და თავგანწირული ბრძოლა გაუმართეს.

ხლათის კედლებთან შეყოვნებული სულტანი გულს ასკდებოდა. ადარბადაგანში მოსვლის დღიდან მისი ლაშქრობა იმით იყო იღბლიანი, რომ მტრისთვის მისი განზრახვა მუდამ გამოუცნობი რჩებოდა და თავს სწორედ მაშინ ესხმოდა, როცა მოწინააღმდეგე არ ელოდა. ახლა პირველად შეიტყო მტერმა ჯალალედინის საიდუმლო განზრახვა, მომზადებული დახვდა და თავდასხმის მოულოდნელობის უპირატესობა გაუქარწყლა. ვიღაც ახლობელმა, უადრესად მისანდომ, გასცა სულტნის საიდუმლო და მტერი წინასწარ გააფრთხილა. სულ სამმა კაცმა იცოდა სულტნის განზრახვა: შერეფელმოლკმა, ორხანმა და სარდალმა ყარამელიქმა. ყარამელიქი ავად იყო რალაც გადამდები სენით და კაცი ვერ ეკარებოდა ლოგინად ჩავარდნილს; ორხანი თან ახლდა სულტანს და გვერდიდან არ მოსცილებია. ერთადერთი, ვაზირი რჩებოდა ექვის მისატანად და შერეფელმოლკის დაუძინარმა მტერმა არ დააყოვნა, სულტანს შეაპარა:

– ამობენ, ფარული კავშირი აქვს ვაზირს ხლათის მელიქთანო. ამასწინათ საიდუმლო კაცი მოსვლია დიდი ძღვენითა და წერილით.

ჯალალედინმა მრისხანედ მოხედა ორხანს და თვალი თვალში გაუყარა. ორხანმა თავი დახარა და დადუმდა.

ჯალალედინი კარგად იცნობდა შერეფელმოლკს. იგი უსაზღვროდ ერთგული იყო სულტანისა და სწორედ ამ ერთგულებამ აღამაღლა მის კარზე. შერეფელმოლკი სულტანის თვალი და ყური იყო, მისი ახლობლებისა და დიდებულების ყოველი ნაბიჯი იცოდა და ეჭვით შეპყრობილი ჯალალედინი არაერთხელ გადაურჩენია საფრთხისაგან. სულტანი თვითონაც კარგად გრძნობდა, რომ მისი ძმები და ზოგი სხვა დიდგვაროვანი დიდებულები შურით უცქერდნენ მის ხელმწიფობას, ფარულად შეთქმულებას უწყობდნენ და აშკარადაც ყველაფერს აკეთებდნენ მის დასამხობად. სწორედ შერეფელმოლკი იყო ის მფარველი ანგელოზი, რომელიც წინასწარ გრძნობდა ყველა საფრთხეს, სულტანს დროზე აფრთხილებდა და მის მტრებს პირში ჩალაგამოვლებულს სტოვებდა. რამდენჯერ გადაურჩენია სულტანი საწამლავისა და დამალული მკვლელის მახვილისაგან მისი საიდუმლო დაცვის უფროსს – უგვაროსა და უსახელო შერეფელმოლკს! იგი სულტანის ყველაზე შეურიგებელ მტრებს დაუნდობლად ებრძოდა და სასტიკად უსწორდებოდა (ამ სისასტიკის იმედით დასტოვა საქართველოს მმართველად სულტანმა იგი).

მისდამი უზომო ნდობით გამსჭვალულმა სულტანმა დიდგვაროვანთა საპირისპიროდ აღამაღლა შერეფელმოლკი და ბოლოს თავის ვაზირად გაიხადა. სულტანის ამ უსაზღვრო ნდობამ გაუჩინა შერეფელმოლკს უამრავი მტერი, მაგრამ გამჭრიახ ვაზირს ვერავინ ვერაფერს აკლებდა. იგი სულტანს თავის ერთგულებასა და დიდებულთა მუხანათობას სულ ახალ-ახალი საბუთებით უმტკიცებდა და შერეფელმოლკის მტრები ფრთხილობდნენ, აშკარად მის წინააღმდეგ ბრძოლას ვერ ბედავდნენ და შესაფერის დროს უცდიდნენ მის დასამხობად. სულტანის ახლობელთაგან ყველაზე მისანდო და გავლენიანმა ემირმა – ორხანმა თავიდანვე ცუდი თვალთ შეხედა შერეფელმოლკს. ჯალალედინის ამ ერთგულ ნათესავსა და თანამებრძოლს შერეფელმოლკი საეჭვო კაცად ეჩვენებოდა და მის ერთგულებას ანგარებით ხსნიდა. ორხანი აშკარად და ფარულად ეუბნებოდა სულტანს ვაზირის ძვირს, ჭკვიანი ვაზირი კი განზრახ, მხოლოდ კარგს ეუბნებოდა სულტანს ორხანზე და ჯალალედინის გულს ამით კიდევ უფრო იგებდა. ახლაც, ორხანმა რომ ვაზირის გამცემობის ეჭვი ჩააწვთა, სულტანს არ ეამა, მაგრამ ეჭვს რაღაც საფუძველი ჰქონდა და ჯალალედინმა მოსვენება დაჰკარგა; სამთაგან ერთი იყო მოღალატე: ან თავათ ორხანი, ან ყარამელიქი, ან შერეფელმოლკი!

სულტანმა ეჭვი გულში დაიმარხა და სამთავეს საიდუმლოდ თვალყურის მდევნელები მიუჩინა.

თორელის ყურამდე მიაღწია თბილისის და საქართველოს დიდი ნაწილის კლებისა და აოხრების ხმამ.

აქამდე კიდევ ჰქონდა იმედი, რომ ქართველები გარნისის მარცხის შემდეგაც შესძლებდნენ ღონის მოკრებას და მტრის განდევნას. ამიტომ თავის

ტყვეობას იმდენად არ განიცდიდა, მით უფრო, რომ საპატიო სამუშაო ჰქონდა მინდობილი და გულისხმიერი, განათლებული პატრონი ამხნევებდა.

ჯალალედინისაგან საქართველოს ძლიერების დამხობისა და ქვეყნის მოხრების ამბავი რომ უთხრეს, თორელი გატყდა, სამუშაოს გული ვედარ დაუდო, დამუნჯდა და დაჯავრიანდა. სამშობლოსა და საკუთარი ცოლ-შვილის დარდმა ძილი და მოსვენება დაუკარგა. საჭმელს პირს აღარ აკარებდა, იჯდა კრიჭაშეკრული და ყელში მოწოლილი ცრემლით იხრჩობოდა.

ნესევის ქართველი ტყვის უზომო მწუხარების ამბავი მოახსენეს. თორელი დაიბარა, სუფრაზე დაისვა და გაუმასპინძლდა.

– შენი დაღონების ამბავი მომიტანეს, თორელო. ჩემი სამშობლოს უბედურებამ მეც აგრე დამაღონა თავის დროზე და ამიტომ არ გამკვირვებია. პირიქით, ბუნებრივადაც მეჩვენა, რომ ვაჟკაცი და, მითუმეტეს მგოსანი, სამშობლოს ბედზე სწუხდეს. სამშობლოსათვის დარდი სასახელოცაა, მაგრამ ზედმეტი არაფერი არ ვარგა და სასოწარკვეთას არ უნდა მისცეს თავი.

– ნეტავ, მართალია, რასაც ამბობენ? – ხმის კანკალით ჰკითხა თორელმა.

– რას ამბობენ?

– საქართველო ერთიანად მოაოხრა სულტანმაო, ქალაქები გადაწვა და სოფლები აპყარაო, მოხუცები და ბავშვები მთლად გაჟუჟა, ქალები ჯარისკაცებს მისცა გასაუპატიურებლად, ხოლო კაცები ტყვედ გამორეკაო.

– ზოგი რამ მართალი იქნება, რადგან ომს თავისი კანონები აქვს. შენ თვითონ ჯარისკაცი ხარ და ჩემზე კარგად იცი, სადაც დამპყრობელი გაივლის, იქ სამართლიანობის დაცვა ყოველთვის არ ხერხდება. საქართველოს დაპყრობასაც მსხვერპლი ბევრი მოჰყვებოდა, მაგრამ ჩვენი სულტანი ჩინგიზ-ყაენი როდია, რომ უმწეო ბავშვები და მოხუცები გააჟლეტინოს.

– შინ ცოლი და ჩვილი ყრმა მყავს, ვაითუ, გახიზვნა ვერ მოასწრეს.

თორელს ცრემლი წასკდა და თვალეზე ხელი აიფარა.

– მაგისა ნუ გედარდება, კიდევ გიმეორებ, ჩვენი სულტანი სწორედ მაგვარი ულმობლობისა და განუკითხაობის გამო სწყევლის შეჩვენებულ ჩინგიზ-ყაენს და თავათ როგორ დაახოცინებს უმწეო ბალებსა და უღონო ქალებს.

მოჰამედ ნესევიმ თორელის დასამშვიდებლად თქვა ეს ტყუილი, თორემ სხვაზე კარგად იცოდა, რომ სულტანი ჯალალედინი სისასტიკესა და ულმობლობაში თვითონ ჩინგიზსაც არ ჩამორჩებოდა.

– ღმერთმა ჰქნას, რომ ეგრე იყოს და სულტანი დაპყრობილი ქვეყნის მიმართ მისი მაღალკეთილშობილების შესაფერის დიდსულოვნებას გამოიჩენდეს, – ხელაპყრობით თქვა თორელმა, – თქვენს წმინდა წიგნში ყურანში სწერია, მფარველ ვექმნეთ უღონო მოხუცებსა და უმწეო ყრმებსო. სულტანი მაჰმადის მცნების დამცველია და ღმერთმა ჰქნას, საქართველოშიაც მტკიცედ დადგეს ამ მცნებაზე.

– ეგ აგრე იქნება, მაგრამ, როგორც გითხარი, დიდმა ომმა დიდი მსხვერპლი იცის. ქართველებს რომ გონიერება გამოეჩინათ, სამოყვროდ გაწვდილ

სულტნის ხელს ხელს არ აჰკრავდნენ, თქვენს დედოფალს შერთავდნენ და ჩვენ შორის ზავი და მშვიდობა იქნებოდა.

– ეგ არ მოხდებოდა, წინდაწინვე ვიცოდი.

– ჰოდა, ახლა ქართველები თავიანთი წინდაუხედაობის ნაყოფს იმკიან. ჯალალედინს მოყვრობაზე უარი უთხრეს და ომის წელი კი არა ჰქონიათ. მაინც რა მალე იძლივნენ ქართველები, უფრო ძლიერები გვეგონა, თვითონ ჩვენი სულტანიც არ ელოდა ესოდენ სწრაფსა და იოლ გამარჯვებას. თქვენი ნაქები ძლიერებაც მოსაჩვენარი აღმოჩნდა. დიდებული ხვარაზმისა არ იყოს, საქართველოც თიხის ფეხებზე შემდგარი ბუმბერაზი ყოფილა, ერთი მძლავრი შემოკვრა ეყო, რომ დამსხვრეულიყო და ძირს დაცემულიყო.

– ქვეყანა ძლიერი მაშინ არი, როცა მეთაური ჰყავს ძლიერი. ქართველობას ხვარაზმელების გასამკლავებელი ძალა როგორ არ აღმოაჩნდებოდა, ძლიერი და მტკიცეებისყოფიანი მეფე რომ ჰყოლოდა. სულ რამდენიმე წლის წინათ მონგოლების რჩეული ლაშქარი ვმლიეთ სასტიკ ბრძოლაში და ჩვენი ქვეყნიდან გავაქციეთ, მაგრამ მაშინ მეფე გვყავდა გულოვანი და შემმართებელი. ქართველი ხალხი თავის ძლიერებას მეფის ხასიათის სიმტკიცეში ხედავდა, ყველა მეფისათვის იყო და მეფე ყველასათვის, ქართველობას ერთი პირი ჰქონდა და ღალატი და შინაგაცემა არ იცოდა. ახლა, როცა ქვეყანას სათავეში სუსტი ქალი უდგას, რომელსაც არც თავგასული მთავრების ალაგმვა შეუძლია, არც დამნაშავეს დასჯა, ხალხი მისი ხასიათის სისუსტეში ხელისუფლების სისუსტეს ხედავს. იმის მაგივრად, რომ მთელი საქართველოს გადარჩენით გადაარჩინონ საკუთარი მამულიც, ჩვენი მთავრები თავთავიანთი სამფლობელოსათვის ზრუნავენ და ქვეყნის მტერს საქმეს უადვილებენ, სამშობლოსაც ღუპავენ და თავიანთ კეთილდღეობასაც.

– ქვეყნის ეს შინაგანი სისუსტე ყოველთვის ძლიერ მტერთან შეტაკებისას იჩენს ხოლმე თავს. კარგი და უზრუნველი ცხოვრება ერის ღონეს შინაგანად ასუსტებს, წინააღმდეგობის გაწევის უნარს უდუნებს და უჩლუნგებს. საქმე მარტო მეფე როდია, ჩემო თურმან, მეფეები რომ განცხრომასა და ნებივრობას ეძლევიან, მთავრებიც მათ ბაძავენ, ისინიც უზრუნველ ცხოვრებას იწყებენ და ქვეყნის წინაშე თავიანთ ვალს ივიწყებენ. მეფესა და მთავრებს სხვა დიდებულები, დიდი და წვრილი აზნაურები ბაძავენ და სათავეში ამღვრეული მდინარე ბოლომდე მღვრიედ მიედინება. ასე იყო ჩვენს ხვარაზმში, ალბათ, ასე მოხდა თქვენს საქართველოშიც.

– ჭეშმარიტებას ბრძანებ, მოჰამედ ბატონო. ჩვენში იტყვიან, როგორც ერი, ისეთი ბერიო. მეფეთა უზრუნველობამ ყმებსაც ხელი ააღებინა ქვეყნისათვის ზრუნვაზე. სადავე რომ მიშვებული ნახეს, ყველამ თავისთავისკენ გაიწია, ერთნებობა დაიშალა და მხოლოდ სახელილა შერჩა მეფეს უკლებლივ მთელს საქართველოზე მბრძანებლობისა.

– ყველა უბედურების მიზეზი რომ მარტო მეფე იყოს, მაგას კიდევ ეშველებოდა. მაგრამ, როცა მთელი ერი სწეულდება უზრუნველობის სენით, მისი გადარჩენა უკვე ძნელია. ხვარაზმშია მუჰამედის სიკვდილმაც ვეღარ

უშველა მის დიდ სამეფოს, რადგან უზრუნველობისა და თავკერძობის იმ ჭიას, რომელმაც მისი ტახტი გამოხრა, სამეფოს მთელი სხეული გამოეხრა თურმე. უბედურება ის არის, რომ ქვეყნის ზრუნვაზე ხელადებული თაობა თავის დანაშაულს ვერა გრძნობს მომავალი თაობების წინაშე და არც ფიქრობს თავისი უდარდელობის იმ მწარე ნაყოფზე, რომელიც მის შემდეგ უამრავმა თაობებმა უნდა სჭამონ. ასეთი თაობა თავის სახელს საუკუნოდ საწყევად უტოვებს შთამომავლობას.

– ვაი, რომ მეც ამ თაობას ვეკუთვნი, მაგრამ მე სხვაზე უბედური იმითაც ვარ, რომ კარგად მესმის მომავლის წინაშე ჩემი ვალი. თითქო ყველაფერი გავაკეთე იმისათვის, რომ შთამომავლობისათვის ჩემი სახელი წყევით მოსახსენებლად არ დამეტოვებინა. ვიცი, პაპის ნაჭამი ტყემალი შვილიშვილს მოჰკვეტს კბილს, ჩვენი თაობის მიერ ცუდად წარმართული ქვეყნის საქმე ჩვენს შთამომავლებს დაატყდებათ უბედურებად. მაინც უძლური აღმოვჩნდი, რაიმე გამეკეთებინა საქართველოს მომავლისათვის. როცა ჩარხს უმრავლესობა უკუღმა აბრუნებს, უმცირესობას მისი წაღმა დატრიალება აღარ შესძლებია.

– ეგრეა, თორელიო. მეც ჩემი ქვეყნის მაგ თაობას ვეკუთვნი და მეც ხელები დამაწყდა უკუღმა დატრიალებულ ბედის ჩარხთან ამაო ჭიდილში.

ხლათის ომი გაჭიანურდა. თბილისელთა მაგალითი ხლათელებს აიძულებდა თავი გადაედოთ, მთლად ერთიანად გამწყდარიყვნენ და სასტიკი მტერი კი ქალაქში არ შეეშვათ. ჯალალედინი არ ელოდა ხლათელებთან ომის ასე გაგრძელებას, გააფთრებული აწყდებოდა ქალაქის ზღუდეებს, იერიში იერიშზე მიჰქონდა.

ჯალალედინი რომ ხლათის დაპყრობის ამაო ცდით იყო გართული, ქართველებს თბილისელ მაჰმადიანთაგან მოციქული მოუვიდათ. ხვარაზმელთა ვერაგობითა და სისასტიკით გაბრაზებული მუსულმანები თავიანთ ღალატს ნანობდნენ და ხელსაყრელ შემთხვევას უცდიდნენ, რომ ქართველებს დამპყრობელთა წინააღმდეგ ბრძოლაში გამოდგომოდნენ.

ჯალალედინი ხლათის კედლებს აწყვეტდა თავის რჩეულ ლაშქარს. თბილისში დაპყრობილი ქალაქის დასაცავად დატოვებული ჯარი მცირე იყო.

თბილისელი მაჰმადიანები ქართველებს სთხოვდნენ, ესარგებლათ შექმნილი მდგომარეობით და დედაქალაქი მტრის ხელიდან გამოეგლიჯათ. თბილისელმა მუსულმანებმა ჯალალედინის მიერ შეპყრობილი მოლასედინის გაპარება მოახერხეს. ქართველთა დედოფლის ქმარყოფილმა და უფლისწულების მამამ თბილისელ მუსულმანთა შემონათვალის სიმართლე ხატზე ფიცით დაადასტურა და ქართველები თბილისის აღების სიადვილეში დაარწმუნა. ქართველებმა საკმაო ჯარი შეკრიბეს, ანისისა და კარის მეციხოვნეთა ნაწილიც მოიშველიეს და გოჩი მუხასძის სარდლობით მოულოდნელად მტერს თავს დაესხნენ.

შერეფელმოლკი განძაში იყო და თბილისის მცველ ხვარაზმელთა ჯარს ყარამელიქი სარდლობდა. ქართველების გააფთრებულ შეტევას და ქალაქის

შიგნით აჯანყებულ მაჰმადიან მოსახლეობას ხვარაზმელები ვერ გაუმკლავდნენ. ქალაქი ქართველებმა იგდეს ხელთ.

თბილისელმა მაჰმადიანებმა თვითონ შეიპყრეს ის მოღალატეები, რომელთაც ქალაქი მისცეს ჯალალედინს, ქართველთა სარდლობას წარუდგინეს და მათი სასტიკი დასჯა თვითონვე ითხოვეს. ქართველთა რისხვით შეშინებული მუსულმანები ერთიმეორეს აბეზლებდნენ და თბილისის დაცემის თითქმის ყველა მონაწილე ხელთ უგდეს ქალაქის გამათავისუფლებლებს. გოჩი მუხასძემ ქალაქის მოედანზე ძელები აღამართვინა, ყველა დამნაშავე ზედ სათითაოდ ჩამოჰკიდა და მათი სახლ-კარიც მიწასთან გაასწორებინა.

ლტოლვილმა ხვარაზმელებმა პირველად განძაში ჩაიტანეს ქართველთა გამარჯვების ამბავი. შერეფელმოლკი შეშინდა, რაკი ჯალალედინი შორს ეგულებათ, ქართველები იქნებ ჩემზე შურის საძიებლად განძასაც მოადგნენო. მაშინვე სულტანთან შიკრიკი აფრინა.

ამასობაში ზამთარმა მოუსწრო ჯალალედინს. სიცივე დაიჭირა და თოვლიც დასდო. ხლათის კედლებთან დგომას აზრი აღარ ჰქონდა, მით უფრო, რომ საქართველოდან ერთიმეორეზე ცუდი ამბები მოდიოდა.

თბილისის დაკარგვით შემფოთებული ჯალალედინი სწრაფად აიყარა და ისევ საქართველოსკენ წამოემართა.

ჯალალედინის უზარმაზარი ლაშქრის პირისპირ შებმა და თბილისში გამაგრება ქართველთა მცირერიცხოვან ჯარს არ შეეძლო. მაგრამ ქართველებს არც ის უნდოდათ, მტერს რომ ბინა თბილისში დაედო და დანარჩენი საქართველო იქიდან ერბია. ამიტომ ქართველთა მთავარმა სარდლობამ, თბილისის დაცლის გადაწყვეტილებასთან ერთად, მეორე, უფრო მძიმე გადაწყვეტილებაც მიიღო. თბილისი თვითონვე უნდა დაეწვათ ქართველებს! ეს იყო სასოწარკვეთის საშინელი გამოხატულება. რაკი ქართველებს ბრძოლის ველზე არ გაუმართლდათ და დამპყრობლები თავიანთი ქვეყნიდან ვერ განდევნეს, ახლა უკიდურეს ნაბიჯს დგამდნენ. ამიერიდან თვითონვე უნდა გადაებუგათ და გაენადგურებინათ ის ქალაქები და სოფლები, რომლებსაც მანამდე მტერი სწვავდა და ანადგურებდა, თვითონვე უნდა მოესპოთ თავიანთი საცხოვრებელი, რომ იქ მტერს ფეხი ვეღარ მოედგა, სარჩო ვეღარ ეშოვნა და ვეღარ ეცხოვრა.

მთავარსარდლობისა და მეფის ეს გადაწყვეტილება თბილისში გოჩი მუხასძეს უნდა აესრულებინა.

თბილისის მშენებელსა და კარის ხუროთმოძღვარს სიკვდილი ერჩივნა ამ ბრძანების ასრულებას.

ხვარაზმელთაგან დანთებულ ხანძრებს კიდევ ბევრი გადარჩენოდა, ქალაქის აღდგენა არც ისე ძნელი იქნებოდა, რადგან უმთავრესი და ულამაზესი ნაგებობანი ძლიერ არ იყვნენ დაზიანებულნი. რუსუდანის პალატებს ცეცხლი არც შეხებოდა, ისინი ისევ ამაყად იდგნენ მტკვრის პირას

აზიდულ კლდეზე და მნახველს შორიდანვე ხიბლავდნენ საოცარი სიტურფით.

იმ უიღბლო ქართველთაგან, რომელთაც თბილისი უნდა გადაეწვათ და დაეტოვებინათ, ყველაზე უბედური მათი სარდალი, რუსუდანის სასახლის მშენებელი გოჩი მუხასძე იყო. მუხასძე ჯარისკაცი იყო და სარდლობის ბრძანება უყოყმანოდ უნდა აესრულებინა. მაგრამ გოჩი თბილისელი მოქალაქე იყო, იქ დაბადებული და გაზრდილი და განა უბრალო მოქალაქე, თბილისის პირველი მშენებელი, მისთვის თავდადებული და მასზე შეყვარებული.

სიყვარულში უიღბლო ვაჟკაცმა თავის დროზე ოჯახისა და ცოლ-შვილისათვის არ იზრუნა, მთელი სიცოცხლე თბილისის შენებას გადააგო. თბილისის გამშვენება, მისი უფრო გალამაზება და გაბრწყინება იყო მისი ოცნება და შთაგონება. დიდმა შრომამ ნაყოფი გამოიღო – ქალაქს მისი ნიჭისა და მონდომების კვალი დაეტყო. ბოლოს უთვალავ ლამაზსა და ნატიფ შენობებს შორის, მისი ახალი ქმნილება – რუსუდანის სასახლე აღიმართა. ამ სასახლემ ქალაქს სულ სხვა იერი შეჰმატა. იგი მის მშვენებად და სიამაყედ იქცა.

და ახლა, როცა თბილისის სიტურფის სახელი მთელს ქვეყანას მისწვდა და საზღაპრო გახდა, იგი უნდა დამწვარიყო, მისი განუმეორებელი სილამაზე ცეცხლს უნდა ჩაენთქა და დაეფერფლა.

მეფისა და უმაღლესი სარდლობის ბრძანება რომ მიიღო, მუხასძე გაშრა, ენა ჩაუვარდა და რეტი დაესხა. გონს რომ მოეგო, ჯარის მეთაურები მოიხმო და უმაღლესი ბრძანება გააცნო.

მეთაურებიც მკვდრებივით სდუმდნენ ერთხანს, მერე მათგან უფრო ფიცხებმა და ახალგაზრდებმა სარდალს გადაჭრით უთხრეს: თბილისის უომრად დატოვება და მისი გადაწვა ჩვენთვის მაინც სიკვდილი იქნება, მტერს აქ დავხვდეთ და ყველანი ვაჟკაცურ ბრძოლაში გავიჟლიტოთ.

მუხასძემ წარბები შეჰყარა და მეთაურებს სამხედრო კანონი გაახსენა.

– ვინც მეფისა და უმაღლესი სარდლობის ბრძანებას არ დაემორჩილება, მას თვითონ მე დავსჯი სიკვდილით! – განუცხადა და ყველას სათითაოდ თვალი თვალში გაუყარა. მეთაურები გატყდნენ. სარდალმა მაგიდასთან მიიხმო, ცალ-ცალკე ყველას თავისი გადასაწვავი უბანი მიუჩინა და ხანძრის აღსაგზნები თადარიგისათვის დაითხოვა.

ცოცხალ-მკვდრები გავიდნენ სარდლის სამყოფლიდან ჯარის მეთაურები. თავათ სარდალმა კი არნახული სიმტკიცე გამოიჩინა, ძალა მოიკრიბა, ჯარის ნაწილი გაიყოლა, ქალაქში გავიდა და მოსახლეობის გახიზვნის დასაჩქარებლად უბნებში რაზმები დაგზავნა. ცხენზე მჯდარი მუხასძე ბრძანებებს მოკლედ და ცივად იძლეოდა. მტერი ახლო იყო და სარდალს დროზე უნდა მოესწრო მოსახლეობის გახიზვნაცა და ქალაქის გადაწვაც.

აგერ, ტირილითა და ბღავილით დაიდრნენ თბილისელები, მიდიან და თან ათასგვარ ნივთსა და საგანს მიათრევენ განწირულები. ხვარაზმელთა განუწყვეტელი ძარცვისაგან გადარჩენილ ნოხის ნაგლეჯებს, ჭურჭლისა თუ

უმნიშვნელო ხარახურას ეზიდებიან და თავათაც არ იციან, რაღა ოხრად უნდათ.

ხიდთან შეჩერდნენ გაწამებული ლტოლვილები. ხიდის თავში ცხენოსნები გამოჩნდნენ, წინ თეთრ ცხენზე ამხედრებული ბუმბერაზი მიუძღოდათ. ლტოლვილების ტალღა ხიდს შემოადგა. გოჩი შეჩერდა, მხლებლებს რაღაც უთხრა, რამდენიმემ დაიქვეითა, ხიდზე შედგნენ და წესრიგის დამყარება სცადეს.

ლტოლვილებმა მუხასძისკენ იბრუნეს პირი, ქალებმა ხელაპყრობით შესტირეს და ასე გაწირვისათვის წყევლა-კრულვა დააყარეს.

მუხასძეს გული ჩასწყდა, უცებ შეირყა და კინალამ ცხენიდან გადმოვარდა. ტკივილი დაიოკა, ტუჩების კვნეტით ცხენი უკან შემოაბრუნა და ხიდს გაშორდა.

მიდიოდა და თან ლტოლვილების წყევლა მიჰყვებოდა. ხალხისა და სამშობლოს სამსახურის დავიწყებისათვის, მარტო თავის გადარჩენაზე ზრუნვისათვის, უბრძოლველად მტრის შემოშვებისათვის წყევლიდნენ გამწარებული ლტოლვილები მტყუნასა და მართალს, უდანაშაულოსა და დამნაშავეს. განურჩევლად ყველას, ვისაც იარაღის ტარება და ხმლის მოქნევა, ცხენზე ჯდომა და მტრის დახვედრა შეეძლო.

გოჩიმ ყურებში ხელი დაიცო, რომ განწირულთა ეს ზრიალი არ გაეგონა, მაგრამ ხმაურმა უფრო იმატა და თითქო შიგნიდან მოაწყდა, საფეთქლებში დაუშინა და თავის ქალას მოაწვა.

ხელები უმწეოდ ჩამოუშვა და ცრემლი წასკდა ამოდენა ვაჟკაცს.

ვიწრო ქუჩაში ლტოლვილების ახალ ჯგუფს შეეყარა. ვიღაცას ძალით მიათრევდნენ და წინ ჯოხის კაკუნით გზას მიიკვლევდა. ეტყობოდა, ბრმა იყო.

– მე რაღა გასახიზნი ვარ, ღვთის მადლმა, აქ დამტოვეთ, ბრმას ვინ რას მერჩის...

იხვეწებოდა უსინათლო და გოჩის ხმა ეცნაურა. დაიქვეითა და ბრმას რომ დააკვირდა, ძლივს იცნო თმაწვერმოშვებული, უსინათლო ვაჩე!

– ვაჩე! უბედურო ვაჩე!

გადაეხვია გოჩი და ქვითინი აუვარდა.

– რომელი ხარ? ვინა ხარ? – კითხულობდა ბრმა და ხელების ფათურით ცდილობდა, გამოეცნო მის მკერდზე აქვითინებული კაცი.

– გოჩი ვარ... გოჩი მუხასძე...

შეჰბლავლა ვაჟკაცმა და გული უფრო ამოუჯდა.

– გოჩი... ძმაო გოჩი! – ახლა უსინათლო ატირდა. – ხომ მხედავ, რა დღეში ვარ, გოჩი, დღის სინათლეს, ქვეყანას ველარ ვხედავ.

გოჩიმ ცრემლები მოიწმინდა, ბრმა მეგობრის უაზროდ დაჰყეტილ ცარიელ უპეებს დააცქერდა, მერე ლტოლვილების გრძელ ქარავანს გახედა და ცრემლმომდგარმა ფშლუკუნით უთხრა:

– იქნებ ეგა სჯობდეს, რომ ვერა ხედავ, ვაჩე, ჩვენს შერცხვენასა და დამცირებას, სამშობლოს უბედურებასა და საქართველოს ვაებას...

– გოჩი... სულ შენზე ვფიქრობდი, შენს ნახვას ვნატრობდი, რომ მეამბნა, შენი პალატებიდან, რუსუდანის ახალი სასახლიდან ანგელოზის გადმოფრენა ვნახე.

გოჩიმ გაოცებით შეხედა, ეჭვის თვალით დააკვირდა.

– მაღალი სარკმლიდან გადმოფრინდა ანგელოზი, მტკვარში დაეშვა და გაუჩინარდა... ნეტავი შენც იქ ყოფილიყავი და გენახა...

– გაგიჟებულა უბედური! – გაიფიქრა გოჩიმ და სიბრალულით მიაჩერდა უსინათლოს...

– რა ლამაზი იყო, გოჩი, ჩვენ რომ ანგელოზებს ვხატავთ, იმათ რა უნდა მაგასთან!.. ნახევრადშიშველი, თმებგაშლილი გადმოეშვა და ფრთებმოკეცილი წამოვიდა.

ვაჩე აღვზნებული ლაპარაკობდა, თითქო ისევ თვალწინ დგომოდეს ის ფრთებდაკეცილი ანგელოზი.

– უბედური კი არა, ბედნიერია, რომ ამ ქვეყნის აღარც არაფერი ეკითხება, ვერც ველარაფერს ხედავს, – დაასკვნა თავისთვის გოჩიმ და მეგობარს ერთხელ კიდევ მოეხვია.

– წადი, ვაჩე... წადი... მეც მალე დაგეწევი, – უთხრა და აქეთ გამობრუნდა.

– ნეტავი შენც გენახა, რა ლამაზი იყო. – მოსძახოდა მზებნელი ვაჩე და ჯოხის კაკუნით გზას მიიკვლევდა.

გოჩიმ ლტოლვილები გაატარა და ისევ ცხენზე შეჯდა. მოსახვევთან ჯარისკაცებს გადაეყარა – სახლებისოდენა ბულბულებს მიათრევდნენ.

თავის დანახვამ მუხასძეს წამით დავიწყებული სატკივარი გაახსენა: მალე ცეცხლის წაკიდების ბრძანება უნდა გაეცა და თავისი საყვარელი ქალაქი უნდა გადაეწვა. ტანში ჟრუანტელმა დაუარა და შუბლზე ცივი ოფლი დაასხა.

ცრემლიანი თვალი მტკვარს გააყოლა. წყლის ნელმა დინებამ მარტო თვალი კი არა, გული და ფიქრიც აიყოლია და თანდათან სიმშვიდე დაუბრუნა.

ძველი დროის რომელიღაც ქართველი მეფე თუ უფლისწული გაახსენდა: მტერი მოსაკლავად მოსდევდა თურმე, სატრფო ცხენზე შემოისვა და ვაჟკაცი თავის გადარჩენაზე მეტად სატრფოს ხსნაზე ფიქრობდა. ცხენს გამეტებით მოაჭენებდა ლტოლვილი. მდინარისთვის რომ მიუტანებია, დარწმუნებულა, მდევარს ველარ წავუვალო. სატრფო რომ მტერს არ ჩავარდნოდა ხელთ, უფლისწულს სატკივარი გაუძვრია და თავის ხელით მოუკლავს ის, ვინც თავსა და ქვეყანას ერჩია.

ვაჟკაცები თავიანთ უსაყვარლეს ადამიანებს მტერს არ აძლევენ შესაგინებლად, თავის ხელით კლავენ და მერე... მერე, ალბათ, თავსაც იკლავენ.

გოჩი გამოფხიზლდა, თითქო თავისი მოქმედების გეზი და ახსნა იპოვაო. სახეზე ღიმილი გადაეფინა და ცხენს სადავე მოსწია. ეს ღიმილი რომ ვისმე დაენახა, ალბათ, ისიც გიჟად მოეჩვენებოდა, რადგან ვერავინ გაიგებდა, თუ რას უღიმოდა თავის გულში გოჩი მუხასძე – თბილისის უიღბლო მშენებელი, შემდეგ მტრისგან მისი გამომხსნელი და ბოლოს თავისივე ხელით ნაშენების ხანძარში დამნთქმელი.

ქალაქი იცლებოდა. მოსახლეობა გაიხიზნა, შემდეგ ჯარიც დაიძრა. მუხასძემ ცეცხლის აღზნება ბრძანა და ქალაქის სხვადასხვა კუთხეში ალი ავარდა.

სარდალმა ქალაქიდან გასულ ჯარს თავისი ნაცვალის უთავა, რაღაც საქმე მოიმიზეზა, მალე დაგეწევითო, – უთხრა და რუსუდანის პალატებისაკენ გაეშურა. მალე ავიდა და სარკმელი გამოაღო.

მზე ჩადიოდა, მთებიდან წამოსული ბინდი თანდათან ხანძრის ალით წითლდებოდა და ქალაქი უზარმაზარ შუქ-ჩრდილის ზღაპრულ თამაშში იძირებოდა.

თბილისიდან მისი დროებით გამათავისუფლებლების უკანასკნელი რაზმები გადიოდნენ. გოჩი გრძნობდა, რა გულითაც სტოვებდნენ საყვარელ ქალაქს უბრძოლველად მიმავალი ჯარისკაცები, იქნებ მართლა სჯობდა, მათთვის დაეჯერებინა, ქალაქი დაეცვა და მტერს მათთან ერთად შეჰკვდომოდა.

ალმა იმატა, თანდათან გამძვინდა, ქალაქზე დამდგარი ბოლის სქელი ღრუბელი გასჭრა და ცისკენ უზარმაზარი სვეტები აღმართა.

ლტოლვილები ქალაქიდან მოშორებით მთაზე შედგნენ და თბილისს მოხედეს.

მათმა ზრიალმა და ბლავილმა მუხასძის ყურამდე მიაღწია, ამდენხანს გაკერპებულმა ვაჟკაცმა მწარე ტკივილისაგან დაიგმინა.

ცეცხლის ალი რუსუდანის პალატებშიც ავარდა და დატრიალდა. ჯერ საშინლად დაცხა, მერე კვამლი ეცა გოჩის თვალსა და პირში. მუხასძემ ტკივილისაგან თვალელები დახუჭა.

სარკმელს გადაეყრდნო მუხასძე, დაბლა გადაიხედა: მეტეხის კლდესთან მტკვარი შავად ბრუნავდა ცეცხლმოდებული და უკვე დანახშირებული, წყალში ჩაცვენილი სახლების ნანგრევები მოჰქონდა მტკვარს. ქალაქის ოთხივე მხრიდან კვამლი იძროდა და ალი იფოფრებოდა. დროდადრო ნიავი დაუბერავდა, შავი ბოლი კიდევ უფრო დატრიალდებოდა და ცაში შადრევნებად ადიოდა ურიცხვი ნაპერწკალი.

იწვოდა თბილისი.

აგერ ას წელზე მეტი გასულიყო, რაც საქართველოს დედაქალაქს ცეცხლი აღარ ენახა. მოსვენებული და მოშენებული მხარბეჭს იფართოებდა, მალდებოდა და ლამაზდებოდა. თბილისის ამ სილამაზეში თავისი წვლილი შეჰქონდა იმ კაცსაც, რამდენიმე წუთის წინ ქალაქის დაწვის ბრძანება რომ გასცა და ახლა პირმოკუმული, ენაჩავარდნილი გაჰყურებდა ასეული წლობით, რამდენიმე თაობის მიერ გულმოდგინედ და სიყვარულით ნაშენის ცეცხლში დანთქმასა და დანაცრებას.

ამის ჩამდენმა კაცმა, ყველაზე საყვარელის მომსპობმა კაცმა აღარ უნდა იცოცხლოს!

გოჩიმ დავით აღმაშენებლისა და თამარის ცეცხლმოდებული პალატებისკენ გაიხედა, მერე ისევ თავის ახალ სასახლეს მოხედა და გული ჩასწყდა:

რუსუდანის სასახლის ოქროსფერი ქვის პერანგი კვამლისგან ჩამავებულიყო, ფანჯრებიდან თმაგაწეწილი ალი მოიწევდა და უკვე დამწვარი ბანების ჩუქურთმებიანი სვეტის თავები ძირს მოცვიოდა. არა, აღარ უნდა იცოცხლოს გოჩიმ. ის, ვინც ყველაზე საყვარელ არსებას თავისი ხელით ჰკლავს, შემდეგ თავსაც იკლავს და აღარც ცოცხლობს!

გოჩიმ ღრმად ამოიოხრა, იქაურობას ერთხელ კიდევ მოავლო ცრემლიანი თვალი.

უცებ რეტი დაესხა, თუ ყველაფერი დატრიალდა და დაბარბაცდა. შუა სვეტი გადმოიზნიქა და წასაქცევად წამოვიდა. მუხასძემ მკლავები გაშალა და თითქო სატრფოს იკრავს გულშიო, უზარმაზარ სვეტს მკერდი შეაგება. წამით ჩაეხვია; მაგრამ თავათაც უმაღლე გადაიზნიქა და სვეტს შემოჭდობილი, მოჭრილივით დაეცა ძირს. საყრდენგამოცლილმა ჭერმა იზრიალა, ქვა და კირი, ცეცხლი და ნახშირი ჩამოშვავდა და სვეტიცა და კაციც ერთად დამარხა.

ქალაქგარეთ შემდგარ ლტოლვილთა შორის ვიღაცამ შეჰკვივლა და ვაჩეს სტაცა ხელი:

– რუსუდანის პალატები იწვის!

– რას ამბობ? – შესძახა ვაჩემ და თვალთა ცარიელი ბუდეებით სადღაც შორეულ, ბნელ წერტილს მიაცივდა. ხანძრის მონაბერი სითბო და ალის შუქი ლტოლვილებამდე აღწევდა და მწუხარებისაგან დათეთქვილ სახეებსა და ჩაღრმავებულ თვალებს უცნაური ნათლით უნათებდა, ისე, როგორც მკვდრის მზემ იცის ხოლმე ჩუმი და მიმკვდარი შუქით განათება.

– სასახლე იწვის, მეფის ახალი სასახლე, – ქვითინით თქვა ვიღაცამ.

– ისიც დასწვეს? ნუთუ ისიც დასწვეს?! – ამოუჯდა გული ვაჩეს და ძირს ჩაიკეცა. – ეგ როგორღა გაიმეტეს დასაწვავად, ანგელოსების სამყოფელი!.. – ხრიალით თქვა ბრმამ, მიწას დაემხო და დასაკლავი ხარივით ჩაჰღმუვლა.

თავი მეექვსე

ქართველებისაგან თბილისის აღებამ და შემდეგ გადაწვამ საშინლად განარისხა ჯალალედინი.

დაპყრობილი ქვეყნის შფოთითა და ურჩობით გახელებულმა სულტანმა გადაწყვიტა საქართველოს წინააღმდეგობა საბოლოოდ გაეტეხა. უკანასკნელად დატრიალებულმა ამბებმა იგი ერთხელ კიდევ დაარწმუნა, რომ მხოლოდ საქართველოს დაჩოქება გაუხსნიდა ხელ-ფეხს სამხრეთისაკენ თავისუფალი მოქმედებისათვის.

ჯალალედინი კარგად ხედავდა ხვარაზმელთა წინააღმდეგ საქართველოსა და მისი მეზობელი სამუსულმანო ქვეყნების სამხედრო გაერთიანების

ჩანასახს. ეს წამოწყება ძირშივე უნდა აღეკვეთა, რომ შემდეგ იგი მრისხანე ძალად არ გადაქცეულიყო.

ხვარაზმშამ ჯერ ვარამ გაგელის დასჯა გადაწყვიტა იმ შეჭირვების სამაგიეროდ, რაც მას განძის მიმდგომი ქვეყნისათვის მიეყენებინა. ღამით მოულოდნელად შეესია გაგელის სამთავროს, აიკლო, გადასწვა და თან ურიცხვი ტყვე წამოასხა.

გაგიდან ხვარაზმელები თამთა დედოფლის საპატრონო ქალაქებსა და სოფლებს მიადგნენ.

ჯალალედინმა თამთას ჯავრის ამოსაყრელად საქართველოში კუთვნილი მისი მამულები მოაოხრა. ალიაბადის ციხე აიღო, მეციხოვნენი გასწყვიტა და ქალაქი აიკლო.

ალიაბადის შემდეგ სულტანი კაკისა და ყვარლის ციხეებს შემოიწყო, იერიშით ვერაფერი დააკლო და ალყა შემოარტყა.

ალყა გაგრძელდა. ჯალალედინს მოთმინება აღარ ჰყოფნიდა. თბილისიდან ვაზირი ატყობინებდა, ქართველთა მეფე ლიხთ-იმერეთში დიდ ჯარს კრებს, დარიალიდან ყივჩაღები გადმოჰყავს და თუ დროზე არ მობრუნდი, საქმე ცუდად წავაო.

ჯალალედინმა ვაზირის ცნობა ანგარიშგასაწევად ჩათვალა, მთებით შემორტყმულ ციხეებთან უქმად დგომა მაინც არაფერს ამღევდა. მიუვალ კლდეებსა და მთებს მინდობილი ქართველები გაუვალ ბილიკებსა და უგზო გზებზე ისე დაჰქროდნენ, თითქო ტრიალ მინდორზე ყოფილიყვნენ. ბარსა და ვაკე გზებს ნაჩვევ ხვარაზმელებს მთებში გასვლა უჭირდათ. მათ ფეხქვეშ მიწაც იწვოდა და ყოველ ნაბიჯზე ჩასაფრებული მტრის ისრით სიკვდილი ელოდათ. ყვარლისა და კაკის ციხის აღებას არც იმდენი მნიშვნელობა ჰქონდა ხვარაზმელთათვის, მაშინ, როცა დასავლეთ საქართველო ახალ დიდ ჯარს აგროვებდა და მტერზე გადამწყვეტი შეტევისათვის ემზადებოდა. ჯალალედინს კვლავაც უნდა დაესწრო, ქართველთა მთავარი სამხედრო ძალა მანამდე უნდა გაენადგურებინა, სანამ ჩრდილოეთიდან ყივჩაღთა და მთიელთა ლაშქარს მოირთავდნენ.

სულტანს ლიხთიმერეთისაკენ კარგა ხანია თვალი ეჭირა. იქ, ხვამლისა და სვანეთის მთებში ქართველთა უმთავრესი განძი იყო გახიზნული და გადამალული. ლიხთიმერეთის დაპყრობა არა მარტო ქართველთა სამხედრო ძალას მოშლიდა საბოლოოდ, არამედ სულტანს ახალ დიდ სიმდიდრეს ჩაუგდებდა ხელთ, ისეთ საზღაპრო სიმდიდრეს, რომელთანაც შედარებით თბილისის აღებისას დარჩენილი დავლა სახსენებელიც არ იქნებოდა.

მერე როგორ სჭირდებოდა ახლა ჯალალედინს ქართველთა ის განძი, რომლის მრავალრიცხოვნების გამო მთელს დუნიანზე ზღაპრები დადიოდა!

ჯალალედინმა კახეთის ციხეებს ალყა მოხსნა და სწრაფად თბილისს დაბრუნდა.

ხმა დაჰყარა, ისევ ერაცს მივდივარო, თბილისიდან ღამით გავიდა და ლაშქარი ლიხთიმერეთისკენ დასძრა.

ხვარაზმელთა ლაშქარი კვლავაც უთვალავი იყო, მაგრამ ამჟამად მსუბუქად შეიარაღებული მიემართებოდა, რათა ძნელ გზებსა და ვიწრო ხეობებში თავისუფლად ემოძრავნა.

თავათ ჯალალედინი ლაშქარს შორიახლოს მიჰყვებოდა. მზვერავთა რაზმებს შორს გზავნიდა და წინ ნელ-ნელა მიიწევდა.

ქართველთა სარდლობამ მტრის განზრახვა დროზე შეიტყო, მისი ყოველი ნაბიჯი იცოდა და ბრძოლისთვის ემზადებოდა. ოვსთა და ჯიქთა მოშველება აღარ მოესწრებოდა, ყივჩაღების გამოსხმაზე ხომ ფიქრიც აღარ შეიძლებოდა. ქართველები მხოლოდ თავისი ძალით უნდა დახვედროდნენ რიცხოვრივად დიდად ჭარბ მტერს.

ბრძოლა ძნელი და უთანასწორო იქნებოდა, მაგრამ თუ იგი დამხდურთა გეგმით წარიმართებოდა, გამარჯვება მათ უნდა დარჩენოდათ. ქართველთა გეგმა კი მტრის მთავარი ლაშქრის შეტყუებას ითვალისწინებდა უღელტეხილის ვიწროებში. იქ მრავალრიცხოვანი ჯარი ვერ გაიშლებოდა, ადვილად ვერ იმოძრაებდა და მარჯვე ადგილებში ჩასაფრებულ მცირერიცხოვანი ქართველების მოულოდნელ თავდასხმას ვერ გაუმკლავდებოდა.

მთავარსარდლობამ აღმოსავლეთ საქართველოს მთავრებს დროზე აცნობა მტრის განზრახვა და ვისაც ღონე ჰქონდა, მტრის ზურგში მოქმედება დააკისრა. ავავ მხარგრძელი, ქართლის ერისთავი, ვარამ გაგელი და ეგარსლან ბაკურციხელი თავიანთი ჯარებით ჯალალედინის კვალს ჩაუდგნენ და ჩუმად წარმოემართნენ. დიდი და პატარა მათი მზვერავი და მეგზური იყო, მტრის ფეხის ყოველი გადადგმა მაშინვე იცოდნენ და თავიანთ ყოველ ნაბიჯს მას უფარდებდნენ.

ცაგოს დედას მომჯობინება დაეტყო.

თავათ ცაგო რაღაც სასწაულმა გადაარჩინა, სნეულს მოუცილებლად თავს ადგა, მაგრამ სახადი არ დაემართა. დედამ რომ ფეხზე წამოდგომა იწყო, ცაგომაც გაბედა შინიდან გასვლა. ჯერ თბილისიდან ამოხიზნული ლტოლვილები მოიძია და მოინახულა. შვილისა და ძმისა ჭორადაც ვერავინ უთხრა რა. გამწარებულ ცაგოს კიდევ ერთი იმედი ჰქონდა, ეგებ პავლია კუტის მონასტერში იცოდნენ რაიმე თავიანთი წინამძღვრისაო.

მონასტერი შორს იყო, იმ მხარეს მტრის ჯარები იდგნენ. და გზად შეიძლებოდა ბევრ ხიფათს გადაჰყროდა.

მაგრამ ცაგოს აღარაფრისა აღარ ეშინოდა, შორი გზის მოვლით, სოფელ-სოფელ ღამ-ღამ სიარულით გაუდგა იმ მონასტრის გზას.

მონასტერში ბალღის ვერაფერი უთხრეს, მაგრამ ლიხთიმერეთიდან საიდუმლოდ გამოგზავნილი წინამძღვრის წერილი აჩვენეს და პავლია კუტი რომ ცოცხალი იყო, დანამდვილებით დაარწმუნეს.

ფრთაშესხმული დაბრუნდა ახალდაბას ცაგო. რაკი პავლია მტრისაგან თბილისის აღებისას ცოცხალი გადარჩენილა და საპყარს ცეცხლმოდებული

ქალაქიდან გახიზვნა მოუხერხებია, შალვაც მასთან იქნება, ცოცხალი და უვნებელი. ისევ მოუბრუნდა ცაგოს სიცოცხლეს აზრი და მიზანი, ისევ ამდერდა ჩამკვდარი გული და ისევ აკიაფდა თურმანთან შეხვედრის იმედის შუქიც.

ცაგო მეზობლებში მიდგა-მოდგა, ცოტა ფული და საგზალი იშოვა და ლიხთიმერეთის გრძელ გზას დაადგა.

მოკლე საცალფეხო გზებით მიდიოდა ცაგო. დაცარიელებულ ქართლის სოფლებში თავშესაფარსაც ვეღარსად პოულობდა და ტანმორჩილი ცხენით ნელ-ნელა კეცავდა ძნელსა და გრძელ გზას.

განთიადისას ქართველ ცხენოსნებს გადაეყარა. დანდობილად მიმავალს ვიღაცამ აღვირში უტაცა ხელი.

– ვინა ხარ და საით მიდიხარ? – მკაცრად ჰკითხა რაზმის უფროსმა.

– ქართველი ვარ, ქრისტიანი. შვილის სამებრად მივდივარ ლიხთიმერეთს, – მშვიდად უპასუხა ცაგომ.

რაზმელებმა ერთიმეორეს რაღაც უთხრეს ჩუმად.

– მოგვეყ! – უბრძანეს ცაგოს და უკან შემოაბრუნეს.

ექვით დაკავებული ქალი უფროსებს წარუდგინეს.

ავაგ მხარგრძელმა და ვარამ გაგელმა მაშინვე იცნეს თორელის ცოლი.

– აქ რა გინდა, ცაგო, მტრის ტყვეობას ერთხელ ძლივს გადარჩი და მეორედ შენითვე ვარდები ლომის ხახაში? – გაიოცა გაგელმა.

– ლიხთიმერეთს მივდივარ ბაღლის სამებრად, – აუხსნა ცაგომ.

– მერე, განა არ იცი, რომ ლიხთიმერეთის გასასვლელებთან ახლა ჯალალედინი დგას და ცოტაც რომ გაიარო, ხვარაზმელებს ზედ თავზე წაადგები?!

– საიდან მეცოდინება მე უბედურს, – დაიკვნესა ცაგომ, მხედრებს თვალი მოავლო და ჩურჩულით იკითხა, – მტერი თუ აგრე ახლოა, თქვენ რაღამ მოგიყვანათ აქ?

– ჩვენ აქ დიდი ომი მოგველის, შენ აქ საფრთხეში იქნები, საიმედო კაცს გაგატანთ და უკან მშვიდობით გაგისტუმრებთ.

– უკან რა დამრჩენია მე უბედურს! სადაც თქვენ, იქ მეც. ან თქვენთან ერთად დავიღუპები, ან თუ გაიმარჯვებთ, ლიხთიმერეთს თქვენთან ერთად წავალ. მეც რამეში გამოგადგებით... დაჭრილებს მივხედავ.

შეევედრა ცაგო სარდლებს და საომრად მიმავალ ჯართან ერთად დარჩა.

ქართლის ბაღებს მოედვნენ ხვარაზმელები. იქ სულტანმა ლაშქარი ორად გაჰყო. ერთი ნაწილი სურამის უღელტეხილისკენ დასძრა, მეორე ალის გზით ჭერეთხევისკენ გაისტუმრა.

თვითონ სულტანი ხილიან-მწვანეიან სოფელში შეჩერდა მცირე ჯარით. უღელტეხილს რომ გადავიდოდნენ, მთავარ ლაშქარს თვითონაც უნდა დასწეოდა, სათავეში ჩასდგომოდა და ქუთაისის ალებისათვის ეხელმძღვანელა.

წინწასულ ლაშქარს ფრთხილსა და სწრაფ მოქმედებას ავალეზდა.

ადრე დაწვა ჯალალედინი, მაგრამ ძილით კი არ იქნა და არ დაეძინა. წინ ურიცხვი ლაშქარი ჰყავდა გაგზავნილი, უკან დანგრეული, დაცარიელებული სოფლები იყო, მოსახლეობა მთებში გახიზნულიყო და მტერი არსად სიცოცხლის ნიშანს არ იძლეოდა.

მაინც რატომღაც ძილი გაუფრთხა და მთელს ქვეყანაზე უშიშრობით ცნობილ ვაჟკაცს გულში შიში შეეპარა. რა უნდა ამ მიუვალ მთებში თვალუწვდენელი ველებისა და უნაპირო ვაკეების ხელმწიფეს. ამ კლდე-დრეებისა და ხევხუვების ქვეყანაში მარტო ქაჯებსა და გურჯებს შეუძლიათ თავისუფლად სიარული. ყოველ ნაბიჯზე წვერით ცას მიბჯენილი მთა არის, ან ბობოქარი მდინარეებით ჩახრამული უფსკრული. ეშმაკმაც არ იცის, საიდან წამოგეპარება მტერი, სად წამოგეწევა მწვერვალიდან დაგორებული ქვა და რომელ ნაპრაღზე აგისხლტება ფეხი. ლიხსაქეთ კიდევ არა უშავს, ბარი დიდია და ვაკეც ბევრია, ლიხსიქით უფრო მიუვალსა და უგზო ქვეყანას ამბობენ. ეს უღელტეხილი ათასნაირად არის თურმე დახვეული და დაკლაკნილი, უფსკრულების პირად დაკიდებულ გზებზე ზოგან ორი კაცი ვერ აუვლის გვერდს ერთიმეორესო და მტერი რომ იმ ვიწროებში ჩასაფრებული დახვდეს, ამოდენა ლაშქარი სად უნდა გაიშალოს. ხომ არ აჩქარდა სულტანი და გურჯების სრულიად მოსპობის მოსწრაფემ შეუძლებელსა და სამიშ საქმეს ხომ არ მოჰკიდა ხელი?!

რას იფიქრებდა დიდი მუჰამედის მემკვიდრე, ურგენჩისა და სამარყანდის, მერვისა და ბუხარის პატრონი, რომ ოდესმე ამ მიუვალ მთებში გაუტყდებოდა ძილი სამკვიდროდან აყრილსა და თავშესაფრის მძებნელს. მაინც სად მოიყვანა ბედმა უიღბლო სულტანი! რა მანძილიც მან გამოირბინა ხვარაზმის ქალაქებიდან საქართველოს მიუდგომელ მთებამდე, ქარსაც დაღლიდა და საქართველომდე, ალბათ, მისი ქვეყნიდან დაძრული ვერც ერთი ქარი ვერ იქროლებდა. იქ, ჯალალედინის სამშობლოში, ცხელი ქარები იცის, აქ, საქართველოს მთებში, გრილი ქარები ქრიან ამოდ და თუ იქაური ქარიც ვერ ეწყობა ამ მთებს, კაცი როგორღა შეეგუება აქაურობას!

როდის გაინავარდებს კიდევ ჯალალედინი ირანისა და მავერანახრის თვალუწვდენელ ველებზე, როდისღა დატკბება მისი თვალი არხებით დაქსელილი წალკოტებისა და მუხლამდე ბალახებში გაფანტული ჯოგების ცქერით!

ჯალალედინი ველების ხელმწიფეა და მას თუ გამარჯვება უწერია, ისევე ველებზე უნდა გაიმარჯვოს. ეს იცის ჯალალედინმა, კარგად იცის, რომ თავის მოსისხლე მტრებს მონგოლებს ირანის და ხვარაზმის ველებზე უნდა შეხვდეს პირისპირ საბოლოოდ და გადამწყვეტ ბრძოლაში და თუ მაინც აქ შეჩერდა, მთიან საქართველოში, ეს მხოლოდ დროებით, ღონის მოსაკრებად და სულის მოსათქმელად.

მაგრამ ვაი, რომ ვერც სული მოითქვა და ვერც ღონე მოიკრიბა სულტანმა საქართველოში: ქართველები არ ცხრებიან, ბრძოლას არ ეხსნებიან და მოსვენებას არ აძლევენ ხვარაზმელ დამპყრობლებს. გაუგრძელდა

საქართველოში ყოფნა ჯალალედინს, ერთი დაკვრით უნდოდა გაეთავებინა საქმე ქართველებთან, ქვეყანა დაემორჩილებინა და ოქროთიც ავსებულყო, მაგრამ ქართველობა არათუ არ დამორჩილდა, ახალ-ახალ ბრძოლებსა და შეტაკებებში ითრევს, ქვეყნის სიღრმისკენ, მიუვალ მთებისკენ იტყუებს და, ვინ იცის, როგორ გათავდება ეს ციხეებისა და გამოქვაბულებისათვის ბრძოლა.

მართალია, თბილისის აღებისას საკმაო სიმდიდრე იგდო ხელთ ჯალალედინმა, მაგრამ იმის გამო, რომ საქართველოს წინააღმდეგობა საბოლოოდ ვერ გასტეხა და აქაურობას ვერ გაეცალა, ის ნადავლი ოქრო ისევ ქართველებთან ომებში ეხარჯება და ადნება ხელში სულტანს.

ღმერთმა ჰქნას, ეს ომი უკანასკნელი იყოს, საქართველოს სამხედრო ძლიერება საბოლოოდ გასტეხონ და სვანეთის მთებში გადამალული განძიც ხელთ იგდონ ხვარაზმელებმა. ცოტა ხანს დაისვენებს, სულს მოითქვამს სულტანი, ნადავლი ოქროთი დიდძალ ჯარს შეკრებს და უზარმაზარი ლაშქრით უკანვე დაადგება იმ გზას, რომელმაც აქ მოიყვანა; პირისპირ შეხვდება მონგოლებს, გადამწყვეტ ბრძოლაში დაამარცხებს მათ და მორჩებით დაჯდება თავისი ნეტარი მამის, დიდი მუჰამედის ტახტზე.

მერე კი ფიქრითაც აღარ გამოიხედავს სვებედნიერი სულტანი ავბედობის ჟამს ესოდენ მისი გამამწარებელი ქართველებისკენ, ჯიუტი და გაუტეხელი გურჯებისკენ...

ფიქრით დაღლილს გვიან ჩაეძინა.

შუაღამე გადასული იქნებოდა, მტრის ზურგში მავალი ქართველები რომ დაეცნენ სულტანის ბანაკს. ფხიზელ ძილს ჩვეულ ჯალალედინს ამჯერად სხვებზე გვიან გაელვინა: ხმლების ჩახაჩუხი და თავდამსხმელთა ყიჟინა მაშინ ჩაესმა, როცა ბანაკი უკვე აშლილი იყო და ხელჩართული ბრძოლა ჩაღებოდა.

ძილისაგან დამძიმებული თავი ძლივს აიღო და ტანთ სწრაფად გადაიცვა. ის იყო, იარაღსაც დაავლო ხელი, რომ კარვის კალთა გადაიწია და ჯალალედინმა უცნობი ქართველი დაინახა. ქართველი დაჭრილს მოათრევდა მის კარავში. ზღურბლზე შემომდგარმა ოფლი მოიწმინდა და თმები მხრებზე ჩამოეშალა. წამით სული მოითქვა და თავი ჯალალედინისკენ მოიბრუნა.

სულტანის დანახვაზე შეკრთა, დაჭრილს ხელი უშვა და გაცეცხლებული მიაჩერდა ჯალალედინს. გასაქცევად გამზადებული ჯალალედინიც დაბნეული უყურებდა თმებჩამოშლილ ქალს.

წამით თვალი თვალში გაუყარეს ერთიმეორეს და ჯალალედინს უცებ გაახსენდა, რომ სადღაც ენახა ეს ქალი თუ მისი სურათი.

მაგრამ ფიქრის დრო სადღა იყო!

ქალმაც, ალბათ, სულტანი გუმანით იცნო, დაჭრილის სატევრისკენ წაიღო ხელი და გადასახტომად მოემზადა. ჯალალედინმა დაასწრო და ისარი სტყორცნა.

ქალი პირქვე დაემხო.

სულტანს უძვირფასესი თვლებით შემკული თაჯი აღარ გახსენებია, ქამარ-ხანჯალს დაავლო ხელი, გარეთ გამოვარდა და ცხენს მოახტა.

ბრძოლას იქიდან გადაენაცვლა და ჯალალედინი მიხვდა, რომ განგებას ბეწვზე გადაერჩინა.

ხვარაზმელთათვის ზურგიდან თავდასხმა იმდენად მოულოდნელი იყო, სულტანის მხლებელმა ჯარმა ხეირიანად წინააღმდეგობის გაწევაც ვერ მოახერხა. მტრის ერთი ნაწილი მძინარე ჩაეკაფათ ქართველებს კარვებშივე. ვისაც გაღვიძება და იარაღის ასხმა მოესწრო, ჯერ კიდევ თავგანწირვით იბრძოდა.

ჯალალედინმა შეატყო, რომ მტერი ბევრად სჭარბობდა და ბრძოლაში ჩაბმა ერთხელ ღვთით გადარჩენილი თავის მეორედ ისევ სიკვდილის საფრთხეში ჩაგდება იქნებოდა. საიდანღაც რამდენიმე ერთგული ემირი გაჩნდა და გარს მოერტყა. ვიდრე თავდამსხმელები მის ძებნას დაიწყებდნენ, სულტანმა ცხენს ქუსლი ჰკრა და გაქცევა ამჯობინა.

ცხენხეთქებით გაფრინდა თბილისისაკენ სიკვდილს ძლივსგადარჩენილი, ძლეული და სირცხვილეული სულტანი.

დარჩენილები ერთხანს კიდევ იბრძოდნენ. მერე ვიღაცამ დაიძახა სულტანი გაიქცაო. ისედაც დაშლილ ხვარაზმელთა წყობას ესლა უნდოდა, ცხენოსნებმა ოთხივ მხრივ გაქცევით სცადეს თავის გადარჩენა, ქვეითებმა იარაღი დაჰყარეს და ტყვედ ჩაბარდნენ.

ხმალგასისხლიანებული ვარამ გაგელი პირველი შევარდა ჯალალედინის კარავში. სულტანის ლოგინი ანგრეული იყო, პატიოსანი თვლებით შემკული თაჯი მაგიდაზე იდო, სულტანის ძვირფასი ტანსაცმელი და ქოშები საწოლთან ეყარა უწესრიგოდ.

ვარამმა ერთი მოავლო თვალი იქაურობას და მიხვდა, რომ სულტანი გაქცეულიყო.

კართან მკვდარზე დამხობილ ქალს დასწვდა, გადმოაბრუნა და ძლივს იცნო ერთიანად გასისხლიანებული, თმაგაშლილი ცაგო.

კარავში სხვებიც შემოვიდნენ და დაჭრილს ფრთხილად ამოუღეს მკერდში გარჭობილი ისარი.

ცაგო ცოცხალი იყო.

გონსმოსულმა პირველადვე ის იკითხა, სულტანი თუ შეიპყრესო.

– გაგვექცა, სიბნელეში სადღაც გაგვისხლტა ხელიდან, – უთხრეს შეწუხებულებმა.

ცაგომ ტუჩზე იკბინა, გულშეღონებულმა თავი გადაიგდო და ცრემლიანი თვალი მიხუჭა.

გამარჯვებულმა თავდამსხმელებმა მძიმედ დაჭრილები და, მათ შორის ცაგოც, ქართლის სოფლებიდან გამოსულ მოლაშქრეებს ჩააბარეს, თავათ ძვირფასი ნადავლითა და ტყვეებით მტკვრის ხეობას აჰყვინენ სწრაფად და ზეკარის გზით ლიხთიმერეთს გადავიდნენ.

უღელტეხილში შესულ ხვარაზმელთა ლაშქარს როგორც კი ზურგში ქართველთა თავდასხმისა და სულტნის გაქცევის ამბავი მოუვიდა, მაშინვე უკან შემობრუნდა.

ლიხთიმერეთში შეყრილმა ქართველთა ჯარმა აღარ დააყოვნა და შეტევაზე გადავიდა.

ხვარაზმელებმა მძიმე ბრძოლებით დაიხიეს უკან და დიდი ზარალით თავი დააღწიეს უღელტეხილის ვიწროებს.

ქართველებმა რიცხოვრივად დიდად ჭარბ მტრის ბარში ჩაყოლაზე უარი თქვეს და უამრავი ტყვითა და ალაფით ისევ ლიხთიმერეთისკენ გაბრუნდნენ.

სამარცხვინოდ ლტოლვილი, ბეწვზე გადარჩენილი ჯალალედინი თბილისში მოვარდა.

შერეფელმოლკი გაოცებული გაეგება და ცხენიდან ჩამომხდარ ჯალალედინს გულუბრყვილოდ ჰკითხა:

– თაჯი რა უყავი, მბრძანებელო, ხვარაზმშაჰების ძვირფასი თაჯი?

ჯალალედინმა ერთი მოზვერივით შეუბღვირა, აღვირი მიუგდო და სასახლეში სწრაფად შევიდა. თან ორხანი შეჰყვა მხოლოდ.

– დაგვცინის კიდეც, თაჯს კითხულობს ვაზირი და იმაზე კი არა ნაღვლობს, თავი როგორ დავაღწიეთ სიკვდილს!.. – შეაპარა ორხანმა, – რატომ თვითონაც არ გაეხლა ამ ომში, ეგრე დაჟინებით რომ გიწვევდა ლიხთიმერეთის დასალაშქრავად.

სწორედ კარგი დრო შეურჩია ორხანმა შერეფელმოლკს, ხლათის შემდეგ ახლა მეორედ მიაყენა დარტყმა თავის ფარულ მტერს და, როგორც ეტყობოდა, ეს დარტყმა საგრძნობი უნდა ყოფილიყო.

ჯალალედინს ორხანის ნათქვამმა თითქო თვალი აუხილა, ვაზირის ქცევას დაუფიქრდა და ზოგი რამ მართლაც საეჭვოდ ეჩვენა: შერეფელმოლკი დღედაღამ ლიხთიმერეთის დაპყრობას ჩააგონებდა სულტანს, გამუდმებით ქართველებთან საომრად აქეზებდა და უღელტეხილზე გადასვლის სიძნელეს უადვილებდა. ბოლოს, სულტანი რომ ლაშქრად გაემართა, ვაზირმა რალაც მოიმიზეხა და მბრძანებელს თან არ ეახლა.

სხვა დროს, დამშვიდებული განსჯისას, ჯალალედინი გაიხსენებდა, რომ ორხანი და შერეფელმოლკი ერთიმეორის მტრები იყვნენ. მაგრამ ახლა, ქართველთაგან აგრე სასტიკად დამარცხებით გააფთრებულ ჯალალედინს გონივრად განსჯის თავი აღარ ჰქონდა, თავისი ამ შერცხვენის მიზეზს სხვების მოქმედებაში ეძებდა და ამიტომაც მიუპყრო ყური ერთგულ ემირს.

– ხლათზე გალაშქრებისა არ იყოს, ლიხთიმერეთისკენ გალაშქრება ისე საიდუმლოდ მზადდებოდა, მტერი ვერ შეიტყობდა, ისევ შენს ახლობელსა და მესაიდუმლეს რომ არ გაეცა ჩვენი განზრახვა – ჩურჩულით უთხრა ორხანმა და თან ცალი თვალი გააპარა იმის დასანახავად, თუ რა შთაბეჭდილება მოახდინა მისმა ნათქვამმა.

ორხანმა ჯალალედინს ცეცხლზე ნავთი დაუსხა. მარცხით აღშფოთებას ეჭვით გაშმაგება მოემატა და სულტანმა გონი დაკარა. ცეცხლმოკიდებული ჯალალედინი ბრაზისაგან თიშს იგლეჯდა, ქართველთაგან გადაბუგულ თბილისში გაცოფებულ სულტანს ყველაფერი აღიზიანებდა და ახელებდა.

გამწარებული მარტო ჩაიკეტა, თავისთან არავის უშვებდა და ვერც ვინმე ბედავდა რაიმე საქმისათვის მასთან შესვლას.

შუადღემდე ასე გაგრძელდა, მაგრამ ნაშუადღევს ქალაქში ზედიზედ რამდენიმე მალემსრბოლი მოვარდა.

ყველას ერთი ამბავი მოჰქონდა, ამ ამბავს მთელი ქვეყანა შეეძრა, მაგრამ განსაკუთრებული მნიშვნელობა ჯალალედინისათვის ჰქონდა და ამიტომ ისწრაფოდნენ მაცნეები სულტნის ნახვას. ორხანმა, მოტანილი ამბავი გაიგო თუ არა, ვეღარ მოითმინა, სულტნისათვის რომ არ ეცნობებინა. გაბედა და მბრძანებელს ეახლა.

ჯალალედინის სამყოფელში შემოიყვანეს შორი გზით დაღლილი მოამბე. მაცნე პირქვე დაემხო:

– ისმინე, ხელმწიფევ, სასიხარულო ამბავი და ცხონდი უკუნითი უკუნისამდე! _ შესძახა მაცნემ და თავი ასწია.

– წყეული ჩინგიზ-ყაენი მოკვდა და ახლა მისი სული ჯოჯოხეთის საუკუნო ცეცხლში იტანჯება!

ჯალალედინი ფეხზე წამოხტა.

– რა თქვი? ვინ მოკვდაო?

– წყეული ჩინგიზ-ყაენი, მონგოლთა შეჩვენებული მბრძანებელი ადესრულა ურწმუნოთა სიკვდილით, _ გაიმეორა მაცნემ.

ჯალალედინი გაფითრდა და ნელა დაეშვა ტახტზე.

– როგორ და რით მოკვდა უძლეველი და ამაღლებული ჩინგიზი? _ იკითხა ფერწასულმა სულტანმა.

– ჯერ კიდევ შარშან ნახა სიზმარი ჩინგიზ-ყაენმა. იმ სიზმრით უფალმა სიკვდილის მოახლოება ამცნო მონგოლთა მბრძანებელს. წელს ჩინგიზი ტანგუტთა მეფეს ებრძოდა და მათ ქვეყანაში იდგა ბანაკად. მონგოლთა მბრძანებელი სამოცდამეცამეტე წელში იყო გადამდგარი. სიკვდილის მოახლოება რომ იგრძნო, მასთან მყოფი შვილები ოქოთაი და თული მოიხმო, ანდერძი დაუბარა და მიიცვალა. თანახმად მბრძანებლის ანდერძისა, მისი სიკვდილი საიდუმლოდ შეინახეს, ტანგუტი ხალხი და მათი მეფე დედაბუდიანად გაჟლიტეს და ტანგუტთა ქვეყანა მიწასთან გაასწორეს. ჩინგიზი ჩუმად წაასვენეს. მისი სიკვდილის ხმა რომ არ გავრცელებულიყო, გზად ვისაც ხვდებოდნენ, ყველას ხოცავდნენ. ბოლოს თავის სამშობლოში მოასვენეს თურმე და მის მიერვე დანაბარებ ადგილას მიაბარეს მიწას.

ჯალალედინმა თავი ჩაჰკიდა. ეტყობოდა, მძიმე ფიქრებში წავიდა და მაცნეს აღარ უსმენდა.

– ჩინგიზ-ყაენმა თავის ძეთაგან მემკვიდრედ ოქოთაი დასტოვა და დანარჩენ შვილებს მისი მორჩილება უბრძანა.

ჯალალედინი მოამბეს აღარ უსმენდა. თავაულებლად, ხელით ანიშნა, გაიყვანეთო. მაცნეს შუბოსნები მიცვივდნენ, გაოცებისაგან გაოგნებული ზეზე წამოაგდეს და იქაურობას სწრაფად მოაშორეს.

ჯალალედინმა თავი აიღო, იქ მყოფთ თვალი მოავლო და თავისთვის, ოდნავ გასაგონად თქვა:

– აღესრულა დიდი კაცი, დასრულდა ხანა შფოთისა და დიდი ამბებისა.

– სამახარობლო ეკუთვნის ჩვენგან ამბის მომტანს, ხელმწიფევ, – შეჰბედა ორხანმა, – ღმერთმა ჩვენი სულტნის უბოროტესი მტრისა და მთელი საისლამოს ამაოხრებლის, წყეული ჩინგიზის სიკვდილი რაკი ინება, ამიერიდან...

– ამიერიდან ცხოვრება მოსაწყენი ხდება, ეშხსა და მიმზიდველობას ჰკარგავს, რადგანაც აღარ არის ჩინგიზ-ყაენი, რომლის მტრობაცა და მოყვრობაც ერთნაირად საამაყო იყო. რისთვისღა მინდა გამარჯვება და ძლევამოსილება, თუ მას ვეღარ შევხვდები პირისპირ, ხმალდახმალ. რაღა აზრი აქვს ხმლის ქნევას და ქვეყნების დაპყრობას, თუ ჩინგიზ-ყაენი ვეღარ ნახავს თავის დაცემასა და ჩემს ამაღლებას!..

ჯალალედინი ფეხზე წამოდგა, ხელი ჩაიქნია და თავის საწოლში განმარტოვდა.

იმ დღესვე ნესევისთან კაცი აფრინა, თბილისში დაიბარა და თან ჩინგიზ-ყაენის ცხოვრების წიგნის მორთმევა დაავალა.

ნესევის მონგოლი «მემატიანე» მოცალების ჟამს თორელს მონგოლურ ენას ასწავლიდა. ყველა სხვა ენის უმეცარი მონგოლი ხელის ნიშნებითა და საგნის ჩვენებით უხსნიდა, თორელი ნათქვამს ქართული ასოებით იწერდა და სიტყვებს იზეპირებდა. იმ ორ წელიწადში იმდენი ისწავლა, რომ თავის ტყვე ამხანაგთან თავისუფლად ლაპარაკობდა.

მონგოლს სჯეროდა, დღეს თუ ხვალ ჩინგიზ-ყაენი ჯალალედინს წამოეწეოდა და ძალღვივით ამოხდიდა სულს, მათ ტყვეობასაც მალე მოეღებოდა ბოლო და თვითონაც ჩინგიზის უძლეველ ლაშქარს შეუერთდებოდა, რათა მთელი დედამიწის ზურგი დაეპყროთ და უთვალავ ხალხებზე ებატონათ.

ნესევის სხვა ტყვეები წიგნის კითხვითა და სამუშაოთი იყვნენ გართულნი და მათ სამყოფელს გარეთ მომხდარ ამბებს დიდად არ იძიებდნენ. მონგოლი ტყვე, მათგან განსხვავებით, სულ მიყურებული იყო, სულ იმას ცდილობდა, ვისმეს გამოლაპარაკებოდა და რამე გაეგო.

ჩინგიზ-ყაენის სიკვდილის ამბავი რომ შეიტყვეს, ნესევიმ და სულტნის სხვა ახლობლებმა ამბის მომტანებს სამახარობლო დაურიგეს და ნადიმი გამართეს.

ყაენის სიკვდილის ამბავმა ნესევის ტყვეებამდისაც მიაღწია. მონგოლ ტყვეს ერთხანს სიცილად არ ჰყოფნიდა ღვთისსწორი მბრძანებლის, უკვდავი ჩინგიზის სიკვდილი და ამ ამბავს მონგოლთა მტრების მიერ გავრცელებულ ჭორად თვლიდა. მაგრამ, როცა ყველა ტყვემ, უიღურმა და სინდელმა,

ადარბადაგანელმა და ქართველმა, ერთად მოიწყინეს და ახლო მომავალში ჯალალედინის უღლისაგან თავიანთი ქვეყნებისა და საკუთარი განთავისუფლების იმედი დაკარგეს, მაშინ კი შეფიქრიანდა მონგოლი. ნესევისა და მის ყველა ტყვეს ფიცით ათქმევინა სიმართლე. როცა ყველამ უყოყმანოდ ფიცით დაუდასტურა ჩინგიზ-ყაენის სიკვდილი, მონგოლი უცებ გამოიცვალა, მოტყდა და მოეშვა. დანადვლიანებული, სულ მუდამ განმარტოებული, კუთხეში მიყუჟული იჯდა, ფიქრობდა გაუთავებლად და ოხრავდა. მადა დაკარგა და ჭამა თითქმის სულაც აღიკვეთა.

ერთ მშვენიერ დღეს ნესევის ტყვეთა კარავთან ჩოჩოლი შეიქნა. ყოველი მხრიდან მორბოდნენ ხვარაზმელი ჯარისკაცები.

ნესევიც სირბილით მიიჭრა და თვალწინ საშინელი სანახაობა წარმოუდგა: კარვის კართან გუშაგად მდგარი ხვარაზმელის შუბზე მუცლით წამოგებულიყო მისი მონგოლი მემატინანე.

გუშაგი ფიც-სალავათს ამბობდა, შუბი თავათ გამომტაცა და ზედაც თვითონ წამოეგო.

ნესევიმ ტყვეების დაცვა გააძლიერა, მონგოლის «ნაამბობით» შექმნილი ჩინგიზის მატინანე თან წამოიღო და ჯალალედინს თბილისში ეახლა.

ზაფხული იდგა.

თბილისში ცხელოდა და ჯალალედინი დასაძინებლად გადაბუგულ ქალაქში აღარ რჩებოდა. თაბორის მთაზე გამართულ კარავში კოჯრის ნიავი ჰქროდა და გრილოდა. მხარ-თემოზე წამოწოლილი სულტანი მდივანს უსმენდა. ნესევი ჩინგიზ-ყაენის «იასას» კითხულობდა.

– ყოველი კაცი, რომელიც თავის სახლში დაამყარებს წესრიგს და თავის ოჯახს მოუვლის კარგად, დიდ სამფლობელოშიც შესძლებს წესრიგის დამყარებას და ქვეყანას კარგად მოუვლის; ყოველი კაცი, რომელიც ათ კაცს ჯეროვნად დარაზმავს ბრძოლისთვის, ღირსია იმისა, რომ ათასს ან ათი ათას კაცს უძლოდეს: იგი ისევე კარგად დარაზმავს ბრძოლისათვის ათი ათასსაც, როგორც ათ კაცს...

– ჭეშმარიტი ნათქვამია, მოჰამედ, ვინც ათს გაუძღვება, ის ათასსაც უწინამძღვრებს, ვინც ათ კაცს ვერ დარაზმავს, ის ათასს სულ ვერ გაართმევს თავს... _ ბრძანა ჯალალედინმა და ნესევის ანიშნა, კითხვა გაეგრძელებინა.

– ვაჟკაცის სიკეთე ცოლის სიკეთით გაიზომება. თუ ცოლი უჭკუოა და სულელი, გარყვნილია და უწესო, ეს ქმრის ბრალია და მისი ვაჟკაცობაც ამით გამოიცნობა... ხალხს, რომლის შვილები მამის დარიგებას არ მისდევენ, უმცროსი ძმები უფროსებს არ უსმენენ, ქმარი ცოლს არ ენდობა, ცოლი ქმრის სიტყვას არ ემორჩილება, დიდი პატარას არ იცავს და პატარა დიდს არ უჯერებს, დიდებულები ქვეყნის სიკეთით სარგებლობენ და ქვეყანას კი არაფრით ამდიდრებენ, ადათებსა და კანონებს არ იცავენ, გონიერებასა და გარემოებას ანგარიშს არ უწევენ, ასეთ ხალხს ქურდები, მექრთამეები და თაღლითები დაუბნელებენ მზეს.

– ასე იყო მუდამ და ყველგან, ესეც ჭეშმარიტება უთქვამს ჩინგიზ-ყაენს.

– როცა კაცი ღვინითა და არყით ითრობა, იგი ბრმავდება. ველარაფერს ველარ ხედავს, ყრუვდება და აღარაფერი ესმის, მუნჯდება და ველარაფერს პასუხობს. ღვინოში და არაყში არ არის არც სარგებელი, არც ჭკუა, არც ვაჟკაცობა, არც კეთილი ქცევა. სიმთვრალეში სამარცხვინო საქმეს სჩადიან, ერთიმეორეს ეჩხუბებიან და ჰკლავენ. ღვინო კაცს ცოდნასა და ხელოვნებას ართმევს. ღვინისა და არყის მოყვარული ხელმწიფე ვერ შესძლებს დიდი და ქველი საქმეების გაკეთებას. თუ ადამიანი სმას ვერ ეხსნება, მაშინ თვეში სამჯერ უნდა დალიოს. როგორც კი მეტს დალევს, რაიმე დანაშაულს ჩაიდენს. თუ თვეში მხოლოდ ორჯერ დათვრება, ესა სჯობს, თუ მარტო ერთხელ, ეს კიდევ უფრო საქებარია, თუ სულ არ დათვრება, ამას ხომ არაფერი აჯობებს! მაგრამ სად იპოვი ისეთ კაცს, რომელიც სულ არ სვამს. ხოლო თუ ასეთი მოიძებნება, _ იგი ღირსია პატივისცემისა და დაფასების...

– ასეთი კაცი მარტო შენა ხარ, მოჰამედ. შენ თვეში კი არა, წელიწადში არა სვამ ერთხელ.

– თავიდანვე ვერ შევეჩვიე სასმელს და, რა ვქნა, დასანახავად მძულს ღვინო და არაყი.

– ტყუილად ნანობ, მოჰამედ. სასმელში, მართლაც, არა ჰყრია რა, ჩინგიზ-ყაენი ბრძენი ხელმწიფე იყო და შენი მსგავსი კაცი სწორედ დაფასების ღირსია.

ნესევი გაწითლდა და კითხვა განაგრძო:

– ვაჟკაცის უდიდესი სიამოვნება ის არის, წინააღმდეგობა დათრგუნოს და მტერი დაამარცხოს, ძირფესვიანად აღმოფხვრას იგი და წაართვას, რაც აზადია, ცხარე ცრემლით ატიროს მისი ქალები, მის ნაპატივებ მერანს მსუქან გავაზე მოახტეს, მისი ცოლების მკერდები სასთუმლად გაიხადოს, უცქიროს მათ ფერად-ფერად ღაწვებს და კოცნოს ისინი, ხოლო მათი ტკბილი უნაბისფერი ტუჩები საწუწნელად ჰქონდეს.

– ჰქონია გემო ჩინგიზ-ხანს! _ აღმოხდა ჯალალედინს, _ მამაჩემისა და ჩემი საუკეთესო მერნებით იქროლა, ჩვენივე ჰარემების ულამაზესი ქალები იგდო ხელთ და მათი მკერდები სასთუმლად გაიხადა, მხოლოდ ჩემი ძირფესვიანად აღმოფხვრა ვერ შესძლო, _ სულტანი ტახტზე წამოიწია, თვალეები აღზნებული ჰქონდა და სახე ანთებული, _ ხელთ რომ ჩავვარდნოდი, ალბათ, მაშინვე მომკლავდა... მე კი...

– შენც მოჰკლავდი, ხელმწიფე!

– ჰო, ალბათ, მეც მოვკლავდი, მაგრამ ასეთი კაცის მოკვლა ცოდო იქნებოდა. მოჰამედ! ხომ უნდა გამხარებოდა მისი სიკვდილი, მაგრამ, მერწმუნე, გულწრფელად მეწყინა. ჯერ ერთი, იმით იყო საწყენი ასეთი გონიერი და ძლიერი კაცის სიკვდილი, რომ თავისი მიზნები ბოლომდე ვერ განახორციელა, მთელი მსოფლიოს დაპყრობა ვერ მოასწრო; მეორეც იმით, რომ, თუ სიკვდილი იყო, ჩემი ხელით მაინც მომკვდარიყო, როგორც ვაჟკაცს შეჭვერის, ხმალდახმალ თანასწორ ბრძოლაში და არა დიაცივით ლოგინში მწოლარე. მისი სიკვდილის შემდეგ ცხოვრება მოსაწყენი გახდა, მოჰამედ, ომში გამარჯვება აღარ მახარებს, რადგან ის ვერ შეიტყობს და დააფასებს ჩემს

წარმატებას, რომელმაც ყველაზე კარგად იცოდა ჩემი მამაცობისა და გაუტეხელობის ფასი.

– ჩინგიზ-ხანის სიკვდილი ჩვენთვის მაინც დიდი იმედის მომცემია, მისი მემკვიდრეები მამის მიერ დაპყრობილი უთვისაღი ქვეყნის ხელში დაჭერას, ალბათ, ვერ შესძლებენ, ხალხები აღსდგებიან და ჩვენი სამშობლოც მათი უღლისაგან განთავისუფლდება.

– ეგ მხოლოდ ჩემი მეთაურობით მოხდება, მოჰამედ, რადგან, შენც კარგად ხედავ, ჩინგიზის მიერ დაპყრობილ უთვისაღი ქვეყანაში ჩემს მეტი კაცი არ გამოჩნდა, მონგოლებს რომ წინააღდგომოდა და ვაჟკაცურად შებმოდა. მე კი, ჩინგიზის სიკვდილის შემდეგ, ომის სურვილი დავკარგე, რადგან ბრძოლას მხოლოდ ისეთ მტერთან აქვს ეშხი, როგორც ჩინგიზ-ყაენი იყო. მის ღლაპებთან შებმა და თავის გაყადრება არცა მსურს და აღარც შემფერის, ჩემო მოჰამედ!

– შენი წმინდა ვალი ის არის, ხელმწიფევ, შენი ხალხისა და ქვეყნის განთავისუფლებისათვის იბრძოლო და სამაჰმადიანოს მისი უბოროტესი მტრების, მონგოლების უღელი მოაშორო. განა სულ ერთი არ არის, ვის თავზე გადაამტვრევ იმ უღელს, ჩინგიზის თუ მისი ლეკვების ძვლებზე დალეწავ შენი სამშობლოს ბორკილებს?!

– არის და არც არის, მოჰამედ! კაი ყმას კაი მტერთან ომი აძლევს ძალასა და გულოვანებას, ბრძოლის ეშხსა და აღტყინებას.

– ჩინგიზის უზარმაზარი სამფლობელო ეგრე ადვილად, თავისთავად არ დაიშლება და მონგოლების წინააღმდეგ მებრძოლ ხალხებს წინამძღოლობა ახლაც ისევე სჭირია, როგორც ჩინგიზის სიცოცხლეში. ჩინგიზ-ყაენმა თავის მემკვიდრეებს ბრძოლისა და ცხოვრების ისეთი წესი და რიგი დაუკანონა თავისი «იასით», რომ ვიდრე მათ ერთი პირი ექნებათ და მამის კანონებს არ გადავლენ, დიდხანს დარჩებიან უძლეველნი და მოურეველნი. აგერ, თავათ ჩინგიზ-ყაენი წერს თავის «იასაში»: «მომავალში, ხუთასი, ათასი და ათი ათასი წლის შემდეგაც, როცა ჩვენი შორეული შთამომავლები დაიბადებიან და ყაენის ტახტზე დასხდებიან, თუ ეს შთამომავლები ჩვენს წესსა და კანონს დაიცავენ და მათ არ შეცვლიან, ზეცა მათი შემწე იქნება და ისინი ბედნიერებასა და სიხარულში იცხოვრებენ»... ჩინგიზ-ყაენის სიბრძნე მარტო მისი შვილების საკუთრებად როდი უნდა დარჩეს, ჩვენც ზოგი რამ უნდა გადმოვიღოთ მის წესთაგან, სასარგებლო და გონივრული, მაგალითად, ჯარსა და სახელმწიფოში უფროს-უმცროსობის მტკიცედ დაკანონება, ლაშქრისა და ქვეყნის დაყოფა და ბევრი სხვა, რომელთაც მომავალშიც მიზამავენ და შეითვისებენ ძლიერი და ჭკვიანი ხელმწიფეები.

– მე მეყო სწავლაცა და ბრძოლაც, მოჰამედ! იქნებ მართალი იყო ათაბაგი უზბეგი და ეგებ მართლაც იმად არ ღირს ეს სოფელი, რომ კაცი ერთ წამს მაინც გამოფხიზლდეს, ქვეყნის სიმუხთლეს ამოდ შეებრძოლოს და თავდავიწყების ბედნიერებაზე ხელი აიღოს. მომწყინდა ცხოვრება, მოჰამედ, დავიღალე, ნეტავ სადმე უკაცურ კუნძულზე გამხიზნა მამაჩემით და ცოტა ხანს მაინც

დამასვენა. რაც საქართველოში მოვედი, ხმალი ვეღარ ჩავაგე და ომებისაგან სული ვეღარ მოვითქვი. საქართველოს დაპყრობით ღონის მოკრებას ვფიქრობდი, მაგრამ ლაშქარიცა და აქ ნაშოვნი ოქროც თოვლივით მადნება ხელთ და, გაძლიერების მაგივრად, თანდათან ვსუსტდები. კარგი იყო, გურჯებს არ გადავყროდი და მათთან დაუსრულებელ ომში არ ჩავბმულიყავი, მაგრამ სინანული გვიანაა და ჩადენილი შეცდომა აღარ გამოსწორდება.

ჯალალედინმა ხელი ჩაიქნია, ფეხზე წამოდგა და გაიარ-გამოიარა. მერე შუბლშეკრულმა ნესევის მრისხანედ მოხედა და კბილებიდან მკაცრად გამოსცრა.

– ვატყობ, თუ დალუპვა მიწერია, ქართველები დამლუპავენ, საქართველო ჩემს ბედისწერად იქცა და თუ აქაურობას დროზე არ გავეცალე, სიკვდილი არ ამცდება!..

ნესევი სალაშქრო ბანაკში ჰყავდა გამოძახებული ჯალალედინს და თორელს კარგა ხანი არ ენახა.

გამოცვლილი, დაღლილი და მოტეხილი ეჩვენა თურმანს თავისი პატრონი.

– თბილისსა და ხლათში ვიყავი, თორელო, და მინდა ქართული ღვინით გაგიმასპინძლდე, – შესვლისთანავე მიაგება სიტყვა ნესევამ და გაშლილი სუფრისკენ მიიწვია.

– საქართველოში რა ამბებია, მოჰამედ-ბატონო? – მოუთმენლად იკითხა თორელმა და სქელი წარბებით დახურულ მრგვალ თვალებში მიაჩერდა ნესევის.

– ცუდი... ძალიან ცუდი, – ამოოხვრით თქვა ნესევამ და თორელს ღვინო დაუსხა.

თორელს ღვინისკენ არც გაუხედია, ნესევის პირში მისჩერებოდა და თავისი ქვეყნის ამბის გაგებას წყალობასავით ელოდა.

– დალიე, თქვენ ისეთი კარგი ღვინო გქონიათ, ლამის მეც შევეჩვიო სმას. – გაიღიმა სახედაქუფრულმა ნესევამ და თორელს სასმისი მიუწია.

თორელმა ცოტა მოსვა, სასმისი დადგა და პატრონს ისევ თვალებში მიაჩერდა:

– ახალი რა არის ჩემს ქვეყანაში? – აკანკალებული ხმით იკითხა თორელმა.

– ახალი ისაა, რომ ქართველები სიჯიუტით თავსაც ილუპავთ და ჩვენც გვლუპავთ...

მსგავსი რამ არასოდეს დაცდენია ჯალალედინის მდივანსა და მემატანეს თორელთან. მანამდე, ქართველების უგუნურობაზე რომ ლაპარაკობდა, მარტო საქართველოს უქადდა დალუპვასა და განადგურებას. ახლა კი მოულოდნელად ხვარაზმელების შესაძლო დალუპვაზედაც წამოსცდა სიტყვა და თორელი სმენად იქცა.

– თქვენს მეფეს რომ ჰკუა ჰქონოდა, ჯალალედინს შეირთავდა, თქვენი ქვეყანაც უზრუნველი დარჩებოდა და ჩვენც დაწყნარებული ზურგი გვექნებოდა. ეს არა ჰქენით, მოყვრობის მაგივრად სამტროდ აღგვიდექით და

ახლა თქვენსავე დათესილს იმკით, სულტანი ჯალალედინი დაუზოგავად ანგრევს და აოხრებს საქართველოს.

– ეგ ახალი ამბავი არ არის, ჩემო ბატონო.

– ახალი ისაა, რომ ჯალალედინისთვის საქართველო ბედისწერად იქცა.

– ეგ როგორ?

– რაც საქართველოში ფეხი შემოდგა, სულტნის მოსვენება არ იქნა. ქართველები მის წინააღმდეგ შფოთსა და ომს არ ეხსნებიან.

– სხვაგვარად როგორ უნდა მოქცეულიყვნენ?

– ქართველების დაუცხრომელი შფოთისა და ბრძოლებისაგან ვეღარ მოიცალა სულტანმა. ქართველებს ჰგონიათ, მთელი აღმოსავლეთის მპყრობელს, დიდსა და აღმატებულ სულტანს საქართველოს მეტი სხვა საქმე არა აქვს რა. რამდენჯერაც თავისი მთავარი საქმეებისათვის სამხრეთისაკენ მობრუნდა, იმდენჯერ ქართველებმა ზურგში მოუნდომეს მახვილის ჩაცემა. ახლა მეზობელ სამაჰმადიანო სამეფოებსაც უმხედრებენ და საერთო ძალით უპირებენ გამკლავებას. მაგრამ ჯალალედინი ჯერ კიდევ უძლეველია და თუ ქართველები მის ბედისწერად გახდომას ფიქრობენ, სულტანი თვითონ იქცევა საქართველოს ბედისწერად, საბოლოოდ მოსპობს და ისე გაანადგურებს ქართველობას, მათი სახსენებელი გაჰქრეს და ქვეყნად ქართულად მოლაპარაკე კაციც აღარ დადიოდეს.

– ეგ ძნელი საქმეა, მოჰამედ-ბატონო, შეუძლებელი საქმეა, – შეჰბედა თორელმა.

– შეუძლებელი ჩვენი სულტნისათვის არაფერია. ჯალალედინს სხვა გზა აღარ აქვს, ან ქართველები უნდა დაემორჩილონ და მის მტრობას დაეხსნან, რასაც უგუნური გურჯები არ შერებიან, ან საბოლოოდ უნდა მოისპონ სულტნის მახვილითა და მიწის პირისაგან აღიგავონ... – მოსჭრა ნესევიმ. მერე უცებ საუბრის გეზი შეცვალა, მაგრამ როგორღაც ლაპარაკი ვეღარ აეწყო.

თორელმა სასმელ-საჭმელს პირი ვერ დააკარა და ამჯერად ყმისა და პატრონის სტუმარმასპინძლობა არ გამოვიდა.

დაძმარებული დაბრუნდა თურმანი თავის სამყოფელში. ნესევის ამ უცნაურ დაწესებულებაში თორელის მეტი აღარავინ შემორჩენილიყო. ყველას დაესრულებინა თავისი სამუშაო, ნესევისათვის თავიანთი ქვეყნების ისტორია დაეწერათ, პატრონს თავის ტყვეთაგან ზოგი გაეყიდა, ზოგიც გაეშვა და ზოგიც მომკვდარიყო.

თორელიღა შერჩენოდა ნესევის. მასაც პატრონის ყველა დავალება შეესრულებინა და ახლა თვითონაც არ იცოდა, რატომ არ იშორებდნენ თავიდან.

აგრერიგად გაანჩხლებული ნესევი თორელს არასოდეს ენახა. რაც უფრო უღრმავდებოდა ნესევის ნათქვამს, მით უფრო რწმუნდებოდა სულტნის მდივნის ნათქვამის სიმართლეში – საქართველო ჯალალედინის ბედისწერად იქცაო. მაგრამ თუ ჯალალედინმა მართლა გადაწყვიტა თავათაც საქართველოს ბედისწერა გახდეს და მის მოსპობას გადააკლას თავი, მაშინ რაღა ეშველება

თორელის სამშობლოს, ვინ იხსნის ქართველ ერს? თუ საქმე მხოლოდ ჯალალედინის პიროვნებაშია და მისი მოსპობით საქართველოც გადარჩება, ნუთუ კაცი არ უნდა გამოჩნდეს, რომელიც ამ გმირობას ჩაიდენს და მთელ ერს იხსნის დალუპვისაგან? ეგებ თავათ თორელმა მოახერხოს საიდანმე სულტნის მიდგომა და მასთან ანგარიშის გასწორება? მაგრამ საიდან და როგორ? სულტანი შორს არის და ახლოც რომ იყოს, გუშაგებით გარშემორტყმულ ტყვეს ვინ მიუშვებს ჯალალედინთან?!

თორელს ამქვეყნად გამაღლებული სულის მეტი აღარაფერი შერჩენოდა და ახლა იმასდა ფიქრობდა, ის სული ისე დაელია, თავისი ქვეყნის გადარჩენისათვის ერთხელ კიდევ რამე გაეკეთებინა.

ლიხთიმერეთის გადასასვლელებთან მოპოვებულმა გამარჯვებამ ქართველებს მტრის საბოლოოდ დამარცხებისა და განდევნის იმედი განუმტკიცა. ლაშქრის შეკრებასა და მომზადებას უფრო გულით მოჰკიდეს ხელი. ერთის მხრივ, კავკასიონის გადაღმელ მთიელებთან გამართეს მოლაპარაკება ჯარის დასაქირავებლად, მეორე მხრივ, ხლათის მელიქსა და იკონიის სულტანს დაუწყეს წვევა საერთო მტრის წინააღმდეგ გაერთიანებული ძალით გამოსვლისათვის.

საგანგებოდ გაგზავნილმა ელჩებმა ელაშრაფსა და ქეიქობადს უკანასკნელ ბრძოლაში დავლად დარჩენილი ჯალალედინის თაჯი და აღკაზმულობა ჩაუტანეს იმის დასამტკიცებლად, თუ როგორ სასტიკად დაამარცხეს ხვარაზმმა და როგორ ბეწვზე გადაურჩა დალუპვას ჯალალედინი. ქართველები თავიანთ მომავალ მოკავშირეებს ხვარაზმელთა დასუსტებასა და საერთო ძალით მათი განადგურების შესაძლებლობაში არწმუნებდნენ და ყოველი ღონით თავის მხარეს იბირებდნენ.

ჯალალედინის მძლავრობით შეჭირვებულ ხლათელებს სხვა გზა მაინც აღარ ჰქონდათ; იკონიის სულტანიც ჯალალედინისაგან დღეს თუ ხვალ იმასვე ელოდა, რაც ხლათსა და საქართველოს გადახდათ.

მოკავშირეები შეთანხმდნენ გამოსაყვანი ლაშქრის რაოდენობაზე და სამივე ჯარის თავშესაყრელი დრო და ადგილი დათქვეს.

ქართველებმა დიდძალი ჯარი შეკრიბეს, ლეკები, ალანები და მთის სხვა ტომებიც მოიშველიეს და რუმის სულტნისა და ხლათის მელიქის ჯარებთან შესაერთებლად გაემართნენ, რათა შემდეგ ერთად შებმოდნენ ჯალალედინს.

ჯალალედინმა საიდუმლოდ შეიტყო მტრების განზრახვა და ისევ დაასწრო. მუსულმანი მოკავშირეები ჯერ კიდევ შორს იყვნენ, რომ სულტანი ბოლნისის ხევში დაბანაკებულ ქართველთა ლაშქარს მოულოდნელად დაესხა თავს.

სასტიკსა და თავგანწირულ ბრძოლაში ორივე მხრიდან ურიცხვი მოსწყდა, ქართველებმა გმირულად იბრძოლეს, მაგრამ მტრის სიჭარბემ კვლავაც თავისი ქნა. ქართველები ბრძოლით რომ მოიქანცნენ, ხვარაზმელებმა მაშინ ჩააბეს ომში დასვენებული ჯარები. ქართველთა სიმხნე გატყდა, მტერმა ისევ სძლია, უამრავი დაიხოცა და უფრო მეტი კიდევ ტყვედ ჩაუვარდა სულტანს.

ქართველთა წინააღმდეგობა რომ გასტეხა, ჯალალედინს ხელ-ფეხი გაეხსნა სამხრეთისაკენ სამოქმედოდ და ისევ ხლათისკენ დაიძრა. ხლათს ალყა შემოარტყა და ქვის სატყორცნი მანქანები მიუყენა.

ალყა დიდხანს გაგრძელდა. უკიდურესი გაჭირვების ჟამს ციხეში შინაგამცემები გაჩნდნენ და გამძვინვარებული ხვარაზმელები მხეცებივით შეცვივდნენ ხლათში. ჯალალედინმა აქაც მისთვის ჩვეული უღმრთელობა გამოიჩინა, მეციხოვნენი გაჟუჟა და ქალაქის ზღუდე მიწასთან გაასწორა.

სატახტოს დაცემამ სირიაში მყოფი ხლათის მელიქი ელაშრაფი გამოაფხიზლა და ამოქმედა. ჯერ სირიის მპყრობელი მოიხმო, მერე იკონიის სულტანს ეზრახა. ქეიქობადმა ელაშრაფის სირიელთა ლაშქარს თავისიც შეუერთა და ჯალალედინისაკენ საომრად გაემურა.

ჯალალედინი ერზინჯანის ახლო დახვდა მტერს. მოპირდაპირენი საომრად დაეწყვნენ და ჯალალედინი გაოცდა მტრის ცხენოსნების სიმრავლით! ოცდაათი ათასამდე საუცხოოდ შეჭურვილი მეომარი ჯიშთან არაბულ ცხენებზე ამხედრებულიყო. ცხენთა აღკაზმულობამ და სიკაცსკაცემ სულტანს თვალი მოსტაცა და ჯალალედინს შეეხარბა ქეიქობადისა და ელაშრაფის ბედი, იმ ოცდაათიათასიანი ლაშქრის სათავეში დგომა და მონგოლთა წინააღმდეგ ომი ინატრა.

რა მტერი დაუდგება ამ მფრინავ ცხენებზე ამხედრებულ, ომებში გამოწრთობილ სირიელ და იკონიელ ცხენოსნებს. აფსუს, რომ ჯალალედინი არ არის მათი წინამძღოლი სარდალი! როგორ წალეკავდა დიდფაშვიან დაუქედელ ცხენებზე მსხდომ წვრილთვალა მონგოლებს ხვარაზმელი სულტანი!

გემოთმიმყოლ ადამიანს რომ საუკეთესო სასმელ-საჭმლის ან ულამაზესი ქალის ხელთგდება მოუნდება, ისე მოსწყურდა ჯალალედინს იმ ცხენოსანი ლაშქრის სარდლობა. მაგრამ ის ლაშქარი ახლა მის პირდაპირ იდგა და წუთიწუთზე თავათ მას უნდა შებმოდა.

ჯალალედინმა თავის ჯარს მოხედა და სახე გაუფითრდა: უწესრიგოდ შექუჩრებულ ფარას ან ჯოგს ჰგავდა მტრის ცხენოსან ლაშქართან შედარებით მისი ჯარი.

თავის სიცოცხლეში პირველად იგრძნო შიში მტრის წინაშე მამაცმა ჯალალედინმა და გული შეუქანდა. შემდრკალ, გუნებაგაფუჭებულ სულტანს ბრძოლა აღარ უნდოდა, მაგრამ მოწინააღმდეგე უკვე დაიძრა მისკენ და უომრად გაცლა აღარ შეიძლებოდა.

მტრები ერთიმეორეს ეკვეთნენ. არაბმა და თურქმა მხედრობამ ხვარაზმელთა წყობა დაშალა, მტერი გრიგალივით ახვეტა და ჯალალედინმა პირველად უჩვენა ზურგი თავის ერთმორწმუნეებს.

დაიღალა სულტანი უაზრო ომებით და ქვეყნის ერთი კუთხიდან მეორისაკენ წყვეტებით. მოსწყინდა გაუთავებელი ბრძოლები საქართველოს

მიუვალ მთებსა და ხეობებში. წვრილ-წვრილი ომები სამაჰმადიანო სახელმწიფოების პატარა მეფეებთან და მელიქებთან, რომელთა სახელიც ქვეყნად მათი ქვეშევრდომების გარდა სხვამ არავინ იცოდა.

ჩინგიზ-ყაენის სიკვდილის შემდეგ ჯალალედინისათვის ბრძოლის ველი დაცარიელდა: იქ ღირსეული მოპირდაპირე აღარავინ ეგულებოდა და ამიტომ გული ბრძოლისკენ აღარ მიუწევდა. რაც უფრო უფიქრდებოდა ჩინგიზის სიკვდილს ჯალალედინი, მით უფრო რწმუნდებოდა, რომ თავისი უსაშინელესი მტერი ჩინგიზი ყვარებია, მისი სიკვდილის შემდეგ ცხოვრების აზრი დაკარგა და აღარაფერი ახალისებდა სულტანს. ყვარებია, ნამდვილად ყვარებია ჯალალედინს ჩინგიზი და თუ ჩინგიზი არა, მისი მტრობა, მასზე შურისძიების ოცნება მაინც ყვარებია.

ბრძოლის გაგრძელებას რომ აზრი დაეკარგა, ცხოვრებაზეც გული აეყარა. დიდ საქმეებზე ხელი ჩაიქნია, თავისი სამშობლოს განთავისუფლებისა და მთელი საისლამოს გადარჩენისათვის ზრუნვას მოეშვა.

სამაგიეროდ, წვრილმანი გახდა, თავისი კარისა და ახლობლების საქმეების ჩხრეკვა დასჩემდა.

რაც დრო გადიოდა, უფრო სასტიკი და ეჭვიანი ხდებოდა, ახლობლებს უკვირდათ მისი ზნის შეცვლა, ეშინოდათ და ერიდებოდნენ. სულტანი ყველაზე მისანდობებსაც გაურბოდა, მათ ყოველ ნაბიჯს ეჭვის თვალით უცქეროდა.

განსაკუთრებით თავის ვაზირსა და ძველ თანამებრძოლს, შერეფელმოლკს ჩაუდგა კრიჭაში. რაკი ერთხელ დაეჭვდა მის ერთგულებაში, ვერ იქნა და გული ველარ მოიბრუნა. მისი აღარაფერი მოსწონდა, კარგიც ავად ეჩვენებოდა და ძველებურად აღარ ენდობოდა. ყველას გაერიდა. ბოლო დროს ირგვლივ ყველა შეთქმული ეგონა და ეჩვენებოდა, რომ ყველას მისი მოკვლა უნდოდა. შეშინებულმა მცველთა რიცხვი გაადიდა და მამლუკებსაც ფარულად ერთიმეორის თვალთვალი დაავალა.

ცაგო ქვაბთახევის მონასტერში იწვა და თავს მკურნალი ბერი ადგა. ერთხანს მომჯობინება დაეტყო, ჭრილობამ პირის შეკვრა იწყო და ავადმყოფმა ცოტა მოიხედა.

პირველადვე ქმარ-შვილის ამბავი იკითხა. სანუგეშო რომ ვერაფერი უთხრეს, კედლისკენ გადაბრუნდა და აქეთ გამოხედვა აღარ ინდომა. ჯავრმორეულს ძალით ასმევდნენ წამლებს, სასმელ-საჭმელს პირს აღარ აკარებდა. თანდათან დასუსტდა და უარესობისაკენ წავიდა ერთხანს გამობრუნების გზაზე დამდგარი ქალი.

მერე ისევ დაალო პირი ჭრილობამაც და მკურნალი ბერი ამაოდ აკვდებოდა ავადმყოფს, მის თანგადაყოლასა და ხელოვნებას უკვე სასურველი შედეგი აღარ მოჰქონდა. სნეულის საქმე სულ უკუღმა მიდიოდა.

ბოლოს ძილსაც უკლო. ცოტა ხნით ჩამინებულს ქმარ-შვილი დაესიზმრებოდა და ნეტარების ღიმილი გადაეფინებოდა. გაღვიძებული ცხარე ცრემლით ტიროდა და სასოწარკვეთას ეძლეოდა.

ზოგჯერ წათვლემილს ჯალალედინი მოელანდებოდა, ხმლით მისკენ მიიწევდა მოსაკლავად და ხელიდან რომ უსხლტებოდა, ისევ მოთქმითა და ვიშვიშით ახელდა თვალს. ქოქოლას იყრიდა და გაჩენის დღეს იწყევლიდა სულტნის ცოცხლად გაშვებისათვის.

გრძნობდა ცაგო, რომ საამქვეყნო პირი აღარ ჰქონდა. ასე სიკვდილი არ უნდოდა, ერთხელ კიდევ ახალდაბა არ ენახა.

– თქვენს მადლს მე ვერ გადავიხდი, მაგრამ გეყოფათ ჩემგან შეწუხება. აქ ტყუილადაა ვარ. ჩემს სოფელში გამიშვით. თქვენს წამლებს წავიდებ, იქ დედაჩემი მომივლის და მშობლიური ჰაერიც სულს უფრო ჩქარა ჩამიბრუნებს, – შეეხვეწა ცაგო მკურნალ ბერებს.

ბერებმა ერთიმეორეს უსიტყვოდ გადახედეს. ცაგოს განკურნების იმედი მაინც დაწმენდილი ჰქონდათ და აღარ გაჯიუტდნენ.

– გაგიშვებთ, რაკი არ იშლი. დედის ხელი და შენი სოფლის ჰაერი ჩვენს მოვლაზე მეტად გარგებს. ოღონდ წამლებს არ გაანებო თავი და, ღვთის შეწევნით, მალე ფეხზე დადგები, – გაამხნევა ბერმა ცაგო. ცხენზე შესვეს, მორჩილი გააყოლეს, წამლებიც გაატანეს და გაუშვეს.

მორჩილი შუაგზიდან დააბრუნა და ცაგო მარტო გაემართა ახალდაბისაკენ. ცხენი ნელა მიჰყავდა, მაგრამ გრძელმა გზამ მაინც დაღალა და უკანასკნელი ღონეც წაართვა. მთელი სხეული უხურდა, სახე წამონთებული ჰქონდა და თავი უბრუოდა. სიცხე თანდათან უმატებდა და თვალში ბინდი ერეოდა.

მწუხრი დგებოდა, ახალდაბას რომ მიატანა. ცხენზე თავს ძლივს იჭერდა და მიდამოს კარგად ვეღარ არჩევდა. მაინც იცნო მშობლიური სოფელი: ლანდად ხედავდა ნაცნობ მთა-გორებს და ველ-მინდვრებს, ბაღ-ვენახებსა და პატარ-პატარა უბნებს.

ნიაჲმა გაიქროლა და სული ჩაუბრუნა. წამით შვება იგრძნო. ბაგეებზე ღიმილმა გადაურბინა. აღვირს ხელი უშვა და მკლავები გაშალა, თითქო იმ ნიაჲს თუ თავისი ბედნიერი ბავშვობის ჩაკვრა უნდოდა გულში.

თვალთ დაუბნელდა, რეტი დაესხა და ცხენიდან გადმოეკიდა.

ცხენი შეჩერდა, ერთი მოკლედ დაიჭიხვინა და ტორის ცემას და ფრუტუნს მოჰყვა.

ძირს დაცემულმა ცაგომ მწარედ დაიკვნესა და წამით ისევ გამოფხიზლდა. თვალი გაახილა: ცაზე მთვარე ჩნდებოდა, აქა-იქ ვარსკვლავები ბრწყინავდა.

აი, ჩემს სწორა რომ ვარსკვლავია, ის თუ მოსწყდა, მოკვდები, ფიქრობდა ნახევრად გონდაკარგული, სიცხისაგან გახურებული ცაგო და მოციმციმე ვარსკვლავს თვალს არ ამორებდა.

უცებ საიდანღაც ფანდურის ჩხაკუნის და სიმღერა მისწვდა:

ახალდაბაო, დაბაო,
შორს ურჯულოებს ვკაფავო...

ჩაესმა ნაცნობი ხმით ნათქვამი სიმღერა და ცაგოს ტკივილი დაავიწყდა. ვარსკვლავებით მოჭედული ცა უცებ მისი ბავშვობის ჭრელ ნაქარგად მოეჩვენა, იმ ცის დაბლა ჩამოღება, მუხლზე დადება და სიმღერით ქარგვა მოუნდა.

მანდ ერთი გოგო დავტოვე,
აცვია მწვანე კაბაო,
თუ მომკლავს, მტერი ვერ მომკლავს,
ის მომკლავს, შავთვალწარბაო...

ჩაიმღერა ჩუმიად გულში, მაგრამ უცებ სუნთქვა შეეკრა და გულისწვერზე რაღაც ისარივით დაესო.

ცაგომ თვალი მიხუჭა და ტკივილისაგან დაიგმინა.

გზადმომავალმა ვაჩემ ფანდური გააჩუმა, ყური მიუგდო. კვნესა ზედიზედ განმეორდა აქვე ახლო, ვიღაც კვნესის და მოეჩვენა თუ ნამდვილად ესმის ვაჩეს, ვიღაც მის სახელს იმახის, ვიღაც საშველად უხმობს.

უსინათლომ ჯოხით გზა მოსინჯა და ფეხს აუჩქარა. აგერ, სადღაც ცხენის ფრუტუნნი ისმის. ბალახს ძოვს ლაგამწაყურელი პირუტყვი და კარგად ესმის ვაჩეს, როგორ აწვალეებს ლაგამს ბალახით პირგამოტენილი ცხენი.

– ვააა-ი-ი-ი-ი!

დაიკვნესა ისევ ვიღაცამ და ვაჩემ მიხვდა, რომ ქალის ხმა იყო.

– ვინა ხარ? სადა ხარ?

გაეხმაურა ვაჩემ, წამით შეჩერდა, ცარიელი თვალის ბუდეები დააჭყიტა და სმენად დაიძაბა.

– ვააი!..

ისევ დაიკვნესა ქალმა და ვაჩემ ჯოხის კაკუნით იქით აიღო გეზი, საიდანაც ხმა მოდიოდა.

რამდენიმე ნაბიჯი რომ გადადგა, გახშირებული სუნთქვაც მოესმა.

– ვინა ხარ?

– ცა-გო ვარ... ვა-ჩემ... – ისევ დაიგმინა ქალმა და ვაჩეს გული შეუქანდა.

– ცაგო?.. აქ საიდან?!

ამოილულულა ვაჩემ და მუხლზე მოცელილივით დაეცა.

უკვე სულ ახლო ესმოდა კვნესა. ქალის ცხელი სუნთქვა მისწვდა ვაჩეკაცს და თავბრუ დაესხა.

ვაჩემ ხელი მოაფათურა. ქალის გულ-მკერდი მოხვდა ბრმას ხელთ, მერე ზემოთ აჰყვა ყელ-ყურზე, შუბლზე... შუბლზე ცივი ოფლი ჰქონდა ქალს. შეშფოთებულმა ვაჩემ ორივე ხელით თავი აუწია და თვითონაც ზედ დაიხარა თვალდათხრილი. თვალთა ცარიელი ბუდეებით დააცივდა ცაგოს უსინათლო, თითქო რამეს ხედავდა.

ცაგომ თვალი გაახილა, სიბრალოლით შეხედა:

– რა კარგი იყო, ვაჩემ! – ერთი ამოიოხრა და თვალი ისევ მიხუჭა.

თვალდახუჭული, ალბათ, ფიქრში თავის ბავშვობას ხედავდა, ვაჩეს იმ კარგ თვალეებს ხედავდა, კრძალვით და გაუმხელი ალერსით რომ მისჩერებოდნენ

ხოლმე. ბაგეებთან ღიმილი აუთამაშდა, ხელი ვაჩეს თვალისკენ წაიღო და ორთავ თვალის ცარიელ ბუდეებს დააფარა, ღონემ უცებ უმტყუნა და ორივე ხელი მოჭრილივით ჩამოუვარდა.

– ვკვდები, ვაჩე!

ამოიკვნესა ცაგომ და თავი უღონოდ გადააგდო.

– რას ამბობ, ცაგო! ახლავე სოფელს დავუძახებ, დედაშენს შევატყობინებ...

– არ გინდა... არავინ არ გინდა... არ დამტოვო...

– არ დაგტოვებ, ცაგო... მაგრამ რა ვიღონო... – აწრიალდა უმწეოდ ვაჩე.

– არაფერი არ გინდა... ვკვდები, ვაჩე...

ვაჩე ვერ ხედავდა, მაგრამ ხელებით გრძნობდა, როგორ თანდათან ცივდებოდა ცაგო, აფორიაქებული ვერც ხელს უშვებდა მომაკვდავს, ვერც წამოდგომა მოეხერხებინა.

– მაპატიე, ვაჩე! – უღონოდ, ოდნავ გასაგონად თქვა ცაგომ და დადუმდა.

– რა უნდა გაპატიო, ცაგო, შენ რა გაქვს საპატიებელი?! – შესძახა ვაჩემ და სასოწარკვეთილმა თავი გზისკენ მოიბრუნა. გზაზე, ეტყობოდა, კაცთაგანი არავინ იყო, ბალახებში გადასული ცხენის არხეინი ხრამუნი ისმოდა მხოლოდ უკაცურ შარაზე.

ვაჩე ისევ დაჟინებით «დააჩერდა» ცაგოს. ხელები მოუფათურა და საშინელი სიცივე იგრძნო.

– ცაგო! ცაგო! – ჩასძახა განწირული ხმით. ცაგო აღარც ხმას იღებდა, აღარც ინძრებოდა.

ვაჩემ ყური დაადო გულზე: გული აღარ სცემდა და ქალის მთელი სხეული ქვასავით ცივი იყო.

– ცაგო! ვაი, ცაგო! – დაიღრიალა უსინათლომ.

ცაზე ცაგოს სწორა მისი ბედის თუ უბედობის ვარსკვლავი ისევ ენთო და ციმციმებდა; ცაც ჭრელი იყო, ცაგოს ბავშვობის ნაქარგივით ჭრელი. ლაგამწაყურელი ცხენი ბალახს ძოვდა და ფრუტუნებდა.

დანადაკრულივით ზმუოდა ვაჩე.

თორელის სამყოფელში ნესევი მოვიდა. ჩვეულებრივად, თავის კარავში იბარებდა ხოლმე თურმანს მოჰამედი და საკუთარი ფეხით მასთან არასოდეს მისულა. დაღვრემილი, წინანდელზე მეტად მოტეხილი ეჩვენა ნესევი თორელს.

მოჰამედი დაჯდა, მაგიდაზე მოზრდილი წიგნი დასდო და ამოიოხრა.

– რად ოხრავ, მოჰამედ-ბატონო, ჩემს ბედნიერ პატრონს რა უნდა ჰქონდეს საწუხარი?

– ჩემი საწუხარი ჩემი პატრონისა და მთელი ქვეყნის მფლობელის, დიდი და აღმატებული სულტნის საწუხარია. ალაჰი რომ კაცს გაურისხდებია, ფათერაკს ფათერაკზე შეამთხვევს და მარცხზე მარცხს მიაყოლებს. სულტანს უსაყვარლესი შვილი გარდაეცვალა, დიდად სწუხს და იტანჯება.

თორელმა დაკვირვებით იცოდა, სულტანი რომ მათ სამყოფელში გამოჩნდებოდა, დაცვა ერთი ათად მატულობდა ხოლმე. ორი დღეა, რაც იქაურობა სულტნის მცველი მამლუკებით გაივსო. თურმანს ეჭვი ჰქონდა, რომ სულტანი სადმე ახლო უნდა ყოფილიყო და აკი გაუმართლა გუმანი?

– ეგ სულტნის რომელ შვილზე ბრძანეთ?

– დუშხანი მოკვდა, ჯალალედინის უსაყვარლესი შვილი. მთელმა ქვეყანამ იცის და შენთან რა დასამალია, დუშხანის დედა სულტნის ჰარემის მშვენიება და ჯალალედინის ერთ-ერთი ცოლი იყო, ერთგული ყმა და მსახური აქაშმოლკი რომ შემოეხვეწა, დამითმეო. სულტანმა მის მიერ უკვე დაორსულებული ქალი მისცა აქაშმოლკს და ეს იმითაც გამომჟღავნდა, რომ აქაშმოლკის ცოლს დუშხანი ცხრა თვეზე ადრე ეყოლა. ბავშვი პირწავარდნილი ჯალალედინი იყო, სულტანს თავის კანონიერ შვილებზედაც მეტად უყვარდა და რომ იტყვიან, მზე მასზე ამოსდიოდა! ახლა დუშხანი უეცრად გარდაიცვალა. ექიმებმა ვერაფერი უშველეს და განრისხებულმა ჯალალედინმა მათი სასტიკი დასჯა გადაწყვიტა.

– მერე თუ ექიმები უბრალონი არიან?

– ჯალალედინმა განრისხების დროს ბრალიანი და უბრალო არ იცის, ეგ არი მაგისა და ჩვენი უბედურება, – ისევ ამოიოხრა ნესევიმ, – მაგრამ ახლა სულტანს აღარც ექიმი ახსოვს და აღარც თავისი თავი, შვილის დაკარგვას ხმამაღლა მოსთქვამს და მის კუბოს არ სცილდება...

ნესევიმ წიგნი თორელისკენ მისწია.

– სულტნის უიღბლობამ და სოფლის უხანობამ მეც გული გამიტეხა და საწუთროზე ხელი ჩამაქნევინა, თურმან. შენ ჩემზე უკეთ იცი, ადამიანს ჭირთა თქმასავით არაფერი შველის, ხოლო თუ კაცს თავისი დარდის ლექსად თქმის უნარი გააჩნია, მწუხარება კიდევ უფრო დიდად უმსუბუქდება. შენ, ალბათ, გაცდები და იქნებ ისიც გაიფიქრო, გამოჩერჩეტებულა ჩემი პატრონიო, მაგრამ ნუ გაგიკვირდება, ზოგი სმასა და შექცევამი კლავს ჯავრს, ზოგიც ჩემსავით კითხვასა და წერაში. ამ ლექსებს ჩემთვის ვწერ და არ ვაპირებ ქვეყანას მოვფინო. ჩვენს დროში, როცა უამრავი ჭეშმარიტი მგოსანი თხზავს ნამდვილად უკვდავ ქმნილებებს, ჩემი მჭლე ლექსებით ვის გავაკვირებ. მაგრამ ხომ იცი, კაცს რომ ლექსის წერის ჭია აქვს, ის ჭია დამფასებელსაც თხოულობს და მეც შენი გულწრფელი აზრის გაგება მსურს. ღირს რამედ თუ არა ჩემი ეს ახირება, აქვს თუ არა ამ ლექსებს კიდევ სხვა გამართლება, გარდა იმისა, რომ დარდს მიქარვებს და რაღაც ჭიას ვიკლავ?!

თორელმა არაფერი თქვა. გაუკვირდა ასეთი საქმიანი კაცისაგან მიმხცოვნების ჟამს ლექსებზე გადაგება, მაგრამ იმასაც ფიქრობდა, ესოდენ ჭკვიანი, განათლებული და გემოვნებიანი კაცი სხვა ბერიკაცებივით სისულელეს არას დაწერდა და მით უფრო, სხვის სამსჯავროზე არ გამოიტანდაო.

ნელა დაუწყო ფურცვლა წიგნს. რამდენიმე ფურცელი რომ ჩაიკითხა, დარწმუნდა, ალღოს არ უმტყუნია. ნესევის ლექსებში ბევრი ღრმა და

დამაფიქრებელი აზრი იყო, გამართულად ნაწერ ლექსებს დამწერის ხელგაწაფულობაც ეტყობოდა, მაგრამ ფრთები აკლდა მოჰამედის ლექსებს, ის ძლიერი ფრთები, რომელიც მარტო დამწერს კი არა, წამკითხველსაც გადასდებს ხოლმე აღმაფრენასა და თავდავიწყებას.

სოფლის ამაოებისა და საწუთროს გაუტანლობის სევდა, ბრძოლისა და შრომის უაზრობის აღიარება, სამშობლოსათვის თავდადების უნაყოფობის შეგნება გასდევდა ელეგიების მთელ წიგნს. გაუთავებელი სამდურავი, ცოტა არ იყოს, მოსაწყენსა და ერთფეროვანს ხდიდა ნესევის ლექსებს, მაგრამ თორელმა წიგნი მაინც დიდი გულისყურით წაიკითხა. უკანასკნელი ფურცელიც რომ გადაშალა და თავი აიღო, თორელი შეეყოყმანდა: მის წინ ამოდენა ღირსებითა და წლებით დაზიდული კაცი დამნაშავე ბავშვივით იდგა და თვალში ისე შესცქეროდა, თითქო მისგან ელოდა შემდგომი ყოფნა-არყოფნის მსჯავრს.

ნესევიმ ყოყმანი შეატყო თორელს, მაშინვე ხელის ცახცახით დახურა წიგნი და შეეხვეწა:

– ახლა ნურაფერს მეტყვი, ამ წიგნს დაგიტოვებ, ერთხელ კიდევ გადაიკითხე და შენი აზრი დამიწერე. სიმართლის პირში თქმა უფრო ძნელია, ვიდრე დაწერა, ამიტომ მეგობრულად გთხოვ, რასაც ფიქრობ, ყოველივე დამიწერე, ავიცა და კარგიც. შენ თავათ მგოსანი ხარ და მე შენი გულწრფელი აზრის გაგება მინდა; გახსოვდეს, პატივმოყვარე კაცი არა ვარ და პირმოთნეობა ჭირივით მძულს.

ნესევი წამოდგა.

– უკვე შუადამე გადასულა. ჩემი ნაცოდვილარის კითხვით თუ ძალიან არ დაგღალე, ცოტა გამყევი, გამაცილე, – უთხრა თორელს და დასტურს არ დაელოდა, ისე წავიდა წინ.

მთვარიანში მიდიოდნენ. გზად გუშაგები იდგნენ ყოველ ნაბიჯზე, სულტნის მდივანს სცნობდნენ, თავს მდაბლად უკრავდნენ და მის თანამგზავრთან ერთად უსიტყვოდ ატარებდნენ.

უცებ ნესევი შეჩერდა, თორელს მკლავში ხელი სტაცა და ჩურჩულით უთხრა:

– სულტანი მოდის, გზად ნუ გადაეყრები, სადმე მოეფარე.

თორელი დაილუნა და იქვე ახლო მდგარ კარავში შეიმალა. ნესევიმ გვერდზე გაუხვია და ისიც მეზობელ კარავში გაუჩინარდა.

კარავში სვეტსამოფარებულ თორელს გული სწრაფად უცემდა. აგერ მეექვსე წელი გადიოდა, რაც სულტნის შეხვედრას ნატრობდა, ახლა წინ გადაეყარა და გზიდან გაექცა, იმის მაგივრად, რომ ყელში სცემოდა და ზედ შეკვდომოდა მისი ქვეყნისა და ხალხის დამაქცევარს.

კარავში მხრებმოხრილი, თავგალუნული ჯალალედინი შემოვიდა. გვერდით ჩაუარა სვეტსაკრულ, სუნთქვაშეგუბებულ თორელს.

სულტანი კარვის შუაგულისკენ წავიდა და თორელმა ახლად დაინახა კარავში მდგარი პატარა კუბო.

ჯალალედინი წამით შეჩერდა და თორელი უკვე ნახტომს ზომავდა, სწრაფად ანგარიშობდა თუ სად და როგორ დაცხრომოდა სისხლიან სულტანს, ქვეშ როგორ მოეგდო და როგორ გაეთავებინა.

უცებ ჯალალედინმა თავში ხელი წაიშინა, კუბოს დაემხო და აღრიალდა.

ფეხისწვერებზე შემდგარმა თორელმა დაინახა, როგორის სასოებითა და მხურვალეებით კოცნიდა ჯალალედინი ბავშვის პატარა თითებს, ხუჭუჭა შავი თმის კულულებსა და დახუჭულ თვალებს.

უცებ გალხვა ყინული და ჩვარივით მოეშვა გადასახტომად გამზადებული, ზამბარასავით დაჭიმული თორელის სხეული, წახდა, ხელები ჩამოყარა და მუხლები აუკანკალდა. გულამოსკვნილი, საცოდავად ტიროდა ჯალალედინი და თორელსაც გული ყელში მოებჯინა, მასაც თავისი პატარა შვილი გაახსენდა, ცრემლი მოეძალა და ტირილი მოუნდა.

თავისდაუნებურად, შეკავებული ოხვრა აღმოხდა თორელს, ის ოხვრა ჯალალედინის ყურს მისწვდა, სულტანი უცებ გაინაბა, მერე ერთი ისკუპა და ხმალი გააძრო. იქ ვერავის ხედავდა, მაგრამ კარისკენ უკან-უკან წავიდა ხმლის ქნევით.

თორელს ცივი ოფლი დაასხა, ერთი სიკვდილი გაათავა. უნდოდა ყელში სცემოდა კართან მოახლოებულ სულტანს, მაგრამ ჯალალედინი ისე გამეტებით იქნევდა ხმალს, ახლო მაინც არ მიუშვებდა. ყველაფერი დაღუპა იმ ერთმა წამმა, გულის აჩუყებისა და ადამიანობის იმ ერთმა წამმა! ამ კარავს, ალბათ, ახლავე ალყას შემოარტყამენ და იქ დარჩენა უაზრობა, თვითმკვლელობის სწორი იქნება.

თორელი გამოვარდა და ისიც იმ კარავში შეიძალა, სადაც წელან ნესევიმ შეაფარა თავი.

ყველა მტარვალის ბოლო თითქმის ერთნაირია, მათ უკანასკნელ ამოსუნთქვამდე არ სტოვებს ნებისყოფა, წინანდელზე მეტი დაჟინებითა და ღონისმოკრეფით აგრძელებენ ბრძოლას, რომელსაც უკვე აზრი აღარა აქვს და ძველებური რწმენით აკეთებენ საქმეს, რომელიც უკვე წაგებულია.

ისინი ინერციით, უკანმოუხედავად ისწრაფიან წინ და ვერ გრძნობენ, რომ უფსკრულს უახლოვდებიან.

უფსკრულისაკენ ამ თავბრუდამხვევ ქროლვაში ბრმად უკან მიმყოლთა რიგები თანდათან თხელდება, ღალატი და განდგომა ხშირდება. მკაცრი მბრძანებლები მოღალატეებსა და რწმენაშერყეულებს სასტიკად უსწორდებიან, უყოყმანოდ იშორებენ და თითქმის უცნობი, ახალი ადამიანებით ცდილობენ სიცარიელის შევსებას.

ყველაზე გვიან მბრძანებელს ის უახლოესი თანამებრძოლები სტოვებენ, რომლებთან ერთადაც თითქმის მთელი სიცოცხლე გაუტარებია, გამარჯვებისა და მარცხის სიხარული და ჯავრი გაუყვია და რომელთაც ზედ უფსკრულის წინ ახელიათ თვალი.

ასეთი ახლო თანამებრძოლების განდგომა იმის მომასწავებელია, რომ საქმე, რომლის გამარჯვებისთვისაც ერთად უბრძოლიათ, დაღუპულია, მაგრამ

ნებისყოფაგაუტეხელი მტარვალეები ღალატის მიზეზს ვერ უფიქრდებიან, გახელებულები შექმნილი მდგომარეობის ცივად განსჯას ვერ ახერხებენ და სულის სიღრმემდე აღშფოთებულნი ანგარიშმიუცემელ სისასტიკეს იჩენენ, არაადამიანურად უსწორდებიან მას, ვისაც არაერთხელ დაუმტკიცებია ერთგულება საკუთარი თავგანწირვით.

მცირე ხანი თავრეზს დაჰყო ჯალალედინმა.

საყვარელი შვილის სიკვდილის შემდეგ, როგორც კი ცხოვრების ადრინდელ კალაპოტში ჩადგა, ათაბაგ საადის ულამაზეს ასულზე იქორწინა.

ათაბაგის ნორჩი ასულის უბადლო მშვენებამ, უმანკოებამ და უზომო მინდობამ სულტანი ისევ გაახალისა, სიცოცხლის ჭაბუკური წყურვილი აღუდგინა და მალ-ღონის მოჭარბება აგრძნობინა.

ერთხანს სიყვარულით განცხრომასა და თავდავიწყებას მიეცა. ერთთავად ათაბაგის ასულთან ათენებდა და აღამებდა, ქვეყნისა აღარც ძველი ახსოვდა, აღარც ახალს კითხულობდა.

მაგრამ ერთ დილას საშინელმა სიზმარმა შეაშფოთა: განკითხვის დღეს, ბეწვის ხიდზე მიმავალს, ალაჰი ცოდვებს ეკითხებოდა. სულტანმა სათითაოდ გაიხსენა, რომელ ომში რამდენი კაცი დაეხოცა. ალაჰმა მოუსმინა.

– ომი იმიტომ არი, რომ ხალხი უნდა დაიხოცოსო, – ბრძანა უფალმა და სულტანს მისი ხმლის უამრავი მსხვერპლი მიუტევა.

შემსუბუქება იგრძნო ბეწვის ხიდზე მიმავალმა, მაგრამ წელში მაინც ვერ გასწორდა, ფეხი ვერ გადგა.

მაშინ მისი ბრძანებით გაჟლეტილთა სულები გაიხსენა ჯალალედინმა, ბევრი უდანაშაულო გაეჟუჟათ მის ჯარისკაცებს ქვეყნის დაპყრობისა და ქალაქების აღებისას.

– მე მხოლოდ ისლამის მტრებს, ურწმუნოებსა და მაჰმადის უარყოფლებს ვაჟლეტინებდი! – დაიგმინა სულტანმა და ალაჰის გვერდით მჯდომ მაჰმადს მიაპყრო ვედრებით თვალი.

მაჰმადმა ალაჰს შეხედა და მისი სარწმუნოებისთვის თავგამოდებული სულტნის სული შეავედრა.

– მიუტევე, უფალო, რამეთუ იღვწოდა ჭემმარიტი სარწმუნოებისათვის.

უფალმა ისმინა თავისი წინასწარმეტყველის ვედრება და ბრძანა:

– ეს ცოდვაც მიეტევოს.

ახლა კი მოეხსნა მხრიდან მთავარი სიმძიმე ცოდვილს, წელშიაც ოდნავ გაიმართა, მაგრამ ფეხს მაინც ვერ დგამს წინ.

ჯალალედინი ისევ დაფიქრდა, ისევ გაიხსენა, თუ რამ ავკაცობა ჩაედინა და უფალს შეჰლადადა:

– დამნაშავე ვარ სხვათა მიერ უდანაშაულოდ შებეზღებულთა და შეთქმულთა უწყალოდ დასჯაში.

– მეფეები უმაგისოდ ვერ იმეფებენ და ეგ ცოდვაც მოგეტევოს! – ბრძანა უფალმა.

ცოდვილმა შვებით ამოისუნთქა. ყველა ტვირთი მოეხსნა და ის იყო, გასაფრენად მოემზადა, რომ ფეხქვეშ ბეწვის ხიდი შეირყა. წონასწორობა დაერღვა და განკითხული კინაღამ ჯოჯოხეთის ცეცხლში ჩავარდა.

– სხვა რა ცოდვა მაქვს კიდევ, უფალო?! – შესტირა განწირულმა.

– ცოდვა უდიდესი და მიუტევები.

– რომელი, უფალო?

– შენ დასთხარე თვალნი, რომლებშიაც ენთო ცეცხლი ჩემი.

სულტანი აცახცახდა, თვალი ვერ გაუსწორა უფლის ცეცხლოვან თვალს.

– შენ დასაჯე თვალის დათხრით შვილი ჩემი, რომელი შეუდგა ჩემს გზას...

– ვითარ, უფალო?

– იგი ხედავდა და ქმნიდა თავისი უფლის მსგავსად. აწ იხილე ის კაცი, რომელიც აღმაღლდება ცათა შინა ჩემთანა და მან ნახოს, თუ როგორ ჩავარდები შენ საუკუნო ჯოჯოხეთის ცეცხლში.

უფალმა სადღაც ხელი დასტაცა ქართველთა მეფის კარის მხატვარს და მაღლა-მაღლა წაიყვანა. მხატვარს გვერდით ორი უმშვენიერესი ასული უდგას, მარჯვნივ და მარცხნივ, ორი წვეთი წყალივით ჰგვანან ისინი ერთმანეთს და სულტანი მიხვდა, რომ ერთი მათგანი მხატვრის მიერ კედელზე დახატული ულამაზესი ქალია, ხოლო მეორე – იმ ნახატის ცოცხალი დედანი. მეორემ, ცოცხალმა ქალმა თვალი თვალში გაუყარა ჯალალედინს და სულტანმა მაშინვე იცნო ის ქალი, რომელმაც მის კარავში დაჭრილი შემოათრია, ლიხთიმერეთის გადასასვლელებთან რომ დაესხნენ გურჯები თავს. ამ თვალეზით უყურებდა ის ქალიც, დაჭრილს სატევარი რომ ამოადრო და ცოტაც გაწყდა, კინაღამ სულტანს დასცა. ჯალალედინმა ისრის ტყორცნა დაასწრო და მერე აღარ გაუგია, ის ლამაზი თვალეზი სამუდამოდ დაიხუჭა თუ კიდევ ანათებს სადმე.

მხატვარი გაცისკროვნებული თვალეზით შეჰყურებს ხან იმ უმშვენიერეს ქალეზს, ხანაც – ბეწვის ხიდზე მოქანავე პატარა კაცს.

ბეწვის ხიდი თანდათან უფრო და უფრო წვრილდება და...

გალეული ხიდი ჩაწყდა, ჯალალედინმა ერთი შეჰყვირა და ჯოჯოხეთის ცეცხლში დაინთქა...

სულტანს საზარელ გუნებაზე გაეღვიძა.

სიზმარს დაუფიქრდა და მის მიერ ჩადენილი სისასტიკის მოგონებაზე გააჟრჟოლა.

– შერეფელმოლკის ბრალია! მაინც საიდან მოიგონა ასეთი საშინელი სასჯელი? – გაიფიქრა სულტანმა და ვაზირი მოიხმო.

შერეფელმოლკი თავათაც ცუდ გუნებაზე იყო. მბრძანებელს მონგოლების მოახლოების ამბავი აცნობა.

– ცუდმა სიზმარმა ცუდი დღის გათენება იცის! – თავისთვის თქვა სულტანმა და ხანმოკლე დუმილის შემდეგ ვაზირს მიმართა:

– ის ქართველი ტყვე ქალი რა იქნა, ვაზირო, რომლის ქმრისთვისაც საშინელი სასჯელი მოიგონე?!

ვაზირი გაშრა, სულტანს კარზე უბოროტესი მტერი ჰყავდა მომდგარი, ყოველი წამი ძვირად ღირდა, ჯალალედინს გაქცევაზე და თავის გადარჩენაზე სწრაფად უნდა ეზრუნა, ის კი ექვსი წლის წინანდელ ამბავს იხსენებდა და ტყვედმეპყრობილ რომელიღაც ქართველ ქალს კითხულობდა.

– ადარბადაგანისაკენ მიმავალ ქარავანზე თავდასხმისას გაიტაცეს გურჯებმა. მერე, მგონი, მაინც ვერ გადარჩა ალაჰის რისხვას და ისევ მორწმუნეთა ხელით მოიკლა, – მოახსენა ვაზირმა და ეშმაკური ღიმილით შეხედა სულტანს.

ჯალალედინმა მრისხანე მზერა ესროლა.

– ახლავე ავიყაროთ მულანისკენ, იჩქარე, გზას მალე უნდა დავადგეთ.

ვაზირმა მორჩილად დაუკრა თავი და სწრაფად გავიდა.

ჯალალედინმა თავრეზი დასტოვა და მულანისაკენ გაიქცა. ეს მერამდენედ დააგდო ბედისაგან დევნილმა სულტანმა თავისი ჰარემი და სიმდიდრე მტრების იავარსაყოფად.

თან მხოლოდ ათასი ცხენოსანი ახლდა. იმ ათასში ათიჯ აღარ იქნებოდა მისი მინდობილი და ბოლომდე ერთგული. ძველ თანამებრძოლთა და ახლობელთაგან უმრავლესობა შემოცლოდა. ზოგი ომებში დაცემულიყო, ზოგს უიმედო ბრძოლებზე ხელი აელო და თავისი ბედი სხვა დროშისთვის მიეზარებინა.

მისანდოთაგან ერთადერთიღა შემორჩენოდა – მისი ერთგული მდივანი და მემატიანე, მასზე მლოცველი მოჰამედი.

ჯალალედინი თავისი მცირე რაზმით მულანისკენ იჩქაროდა.

იგი ხედავდა, როგორ ნელ-ნელა, მაგრამ გარდუვალად უახლოვდებოდა აღსასრული. რა არ იღონა, რომ მონგოლთა ტალღა შეეჩერებინა, უკუეგდო და ბოლოს სრულიადაც დაემსხვრია, მაგრამ ეს ტალღა, მისთვის აუხსნელი რაღაც საიდუმლო კანონზომიერებით, მაინც წინ მოიწევდა, ფეხდაფეხ მოსდევდა და ახლა უკვე საბოლოოდ დანთქმას უქადდა.

მულანი უკანასკნელი თავშესაფარი იყო. მონგოლები აქაც მოვიდოდნენ ხვალ თუ ზეგ და მერე... მერე ქვეყანა მისთვის თავდებოდა, გასაქცევი და სულის მოსათქმელი აღარსად რჩებოდა.

ჩრდილოეთით სამკვდრო-სასიცოცხლოდ გადაკიდებული ქართველები იყვნენ, ხოლო დასავლეთით – მის მიერ აკლებული და შევიწროებული მელიქები და სულტნები. ეს უკანასკნელი ხვარაზმშას მემკვიდრეს, დიდსა და აღმატებულ სულტანს ერთ დროს მთელი საისლამოს იმედად და მახვილად სახავდნენ წყეულ მონგოლებთან ბრძოლებში, ჯალალედინიც მათ სულ მონგოლთა მოსალოდნელი შემოსევის გარდუვალობით აშინებდა და საერთო ძალით დახვედრის აუცილებლობას ჩააგონებდა. ძალთა გაერთიანების და ერთობლივი ბრძოლის აუცილებლობა ჯალალედინს თავათაც ერთადერთ ღონედ ესახებოდა, მაგრამ საქმით თავისი ამ რწმენისა და განზრახვის საწინააღმდეგოდ მოქმედებდა: მუსულმანურ ქვეყნებსაც ქრისტიანულ

საქართველოსავით ექცეოდა, ალყას არტყამდა და იპყრობდა, ძარცვავდა და იკლებდა.

ჯალალედინმა თავის ამ უგუნურობით მუსულმანი სულტნები და მელიქებიც ისევე აიძხედრა და მტრად გადაიკიდა, როგორც ქრისტიანული საქართველო.

მულანი უკანასკნელი სადგური იყო. აქ თავდებოდა დევნილი სულტნისთვის ქვეყნის ნაპირი – წინ წყალი იყო და უკან მეწყერი.

სულტანმა მთელ სხეულში სიცივე იგრძნო. სად არ უვლია და რომელ მიწაზე არ გაუთევია ღამე, მაგრამ ციება არსაიდან აპყოლია. ეს სიცივე, ალბათ, მოახლოებული სიკვდილის სუსხი იყო, მთელ ტანში რომ დაურბინა ჟრუანტელივით.

ცხენი შეაყოვნა სულტანმა, ჩამოხდა და ღვინო მოითხოვა. ხარბად სვამდა, თვალეგამტერებული, რაღაც წერტილს დაჟინებით მისჩერებოდა და ფიქრობდა... ფიქრობდა დაღუპულ ცოლ-შვილზე, სიმდიდრესა და დიდებაზე, დამსხვრეულ იმედსა და წამხდარ ვაჟკაცობაზე.

თვალეზე ცრემლები მოადგა, სული ყელში მოეჭინა და ველარ იქნა, ველარ შესძლო ტირილის შეჩერება. დაჭრილივით ერთი დაიგმინა და ცრემლი ღვარად წასკდა.

რა დიდი შვება ყოფილა ცრემლი, როცა შენს უნებურად მოდის, როგორი მოფონება სცოდნია, როგორ მოეშვა მშვილდის მოზიდული ლარივით დაჭიმული თითოეული ძარღვი.

რამდენჯერ მოსწოლია ყელში დარდი და ბრაზი, მაგრამ თავი ვაჟკაცურად შეუკავებია, ცრემლზე არც კი უფიქრია. არც ახლა უფიქრია ცრემლზე ჯალალედინს, მაგრამ თავათ ცრემლმაც არა ჰკითხა რა, თვითონ წამოვიდა, გზაც იპოვნა და სულის საოხიც მოუტანა.

არც ეს არის კარგი: ვაჟკაცი რომ ცრემლს ველარ ერევა და დიაცივით ტირის, ალბათ, დამაბუნების ნიშანია. ძაბუნი და გატეხილი ვაჟკაცი რისლა ვაჟკაცია, მისი ან მეფობა ვიღას უნდა, ან სარდლობა და ომში წინამძღოლობა.

სულტანმა ცრემლები მოიწმინდა და კვლავ ცხენზე ამხედრდა. ცხენმა დაარწია და ცრემლი ისევე ღაპალუპით წამოვიდა.

მიდიოდა სულტანი და გრძნობდა, რომ სიკვდილისკენ მიდიოდა, გრძნობდა, მაგრამ აღარც ცხენის შეჩერება შეეძლო, აღარც ცრემლის.

მულანში რომ შეჩერდა, უკვე ღამდებოდა. ცოტა წაიძინა, მაგრამ მალევე გაეღვიძა და კარგ გუნებაზე ადგა: ისე მხნედ იყო, თითქო ცხოვრებას თავიდან იწყებდა ჯანითა და იმედით სავსეს. გზაზე დაღვრილი ცრემლიც დაავიწყდა და სიკვდილის სიახლოვეც.

ნესევი იხმო, ხლათის მელიქთან და იკონიის სულტანთან გასაგზავნი წერილები უკარნახა. ამ წერილებში ჯალალედინი ერთხელ კიდევ თხოვდა ჯარის მოშველებას საერთო ძალით მონგოლების გასამკლავებლად.

წერილები შერეფელმოლკთან გაატანა მდივანს და ვაზირს საიმედო ხელით, დანიშნულებისამებრ, სასწრაფოდ გაგზავნა დაავალა.

შერეფელმოლკი ჯალალედინის საქმეს უკვე საბოლოოდ დადუპულად თვლიდა, მის უიღბლობასა და ბედუკუდმართობაში დარწმუნებულს სულტნის ყოველი ნაბიჯი განწირულად მიაჩნდა.

რაკი ბრძოლამ ვერაფერი მისცა, უკვე მიმხცოვნებულ ვაზირს მშვიდი სიბერე და მოსვენებული სიკვდილიდა უნდოდა.

მხედრის აყრილი ყოფა მოსწყენოდა და ერთ ადგილზე დამკვიდრებულ, დაწყნარებულ ცხოვრებას ნატრობდა. გარეგნულად თამამი ვაზირი, ბუნებით მხდალი და მშიშარა იყო. ომში მტერთან პირისპირ შებმასა და სიკვდილთან თამაშს გაურბოდა, სამაგიეროდ, დაპყრობილ და დამორჩილებულ მტერთან, უდანაშაულო ტყვეებთან საშინელ სისასტიკესა და უღმობლობას იჩენდა. ღვთის მოშიშს ყურანის კითხვისას ყველაფერი ამქვეყნიური ავიწყდებოდა ხოლმე, გულწრფელად ტიროდა და ქადაგად დაცემულივით მთელი სხეულით ცახცახებდა.

დაიღალა შერეფელმოლკი ამდენ წანწალსა და წყვეტებაში, აყრა-დაყრასა და ღამისგასათევის მუდმივ ძებნაში.

ჯალალედინს ცხოვრებამ ვერაფერი ასწავლა, მას ისევ შფოთი და ბრძოლა უნდა. რაც უფრო ცუდად მიდის სულტნის საქმე, მით უფრო ჯიუტი და თავნება ხდება, ვაზირისა და ახლობლების გაუბედავად შეპარებულ რჩევას ყურს არ უგდებს, ერთხელ ამოჩემებულს არ ეხსნება და კვლავ ბრძოლის ველისკენ მიიწევს, თითქო იქ სიკვდილის მეტი რამე ელოდეს. ვერ ხედავს სულტანი ამ სიკვდილს თუ არ უნდა რომ დაინახოს, ყოველი გაფრთხილება, გონიერებისკენ მოწოდება ღალატად ეჩვენება, კიდევ უფრო აღიზიანებს და უფრო მეტად უღმობელს ხდის.

ჯერ კიდევ დრო აქვს შერეფელმოლკს, რაკი სულტანი გონს ვერ მოდის და თავს იღუპავს, ვაზირი რაღად უნდა დაიღუპოს. განა ერთხელ მაინც თავისი ბედის გადაწყვეტის უფლება მასვე არ უნდა ეკუთვნოდეს? ამდენ ხანს, მთელი სიცოცხლის მანძილზე შერეფელმოლკის ბედი და სიცოცხლე სულტანს ებარა და როგორც სურდა, ისე იყენებდა მზრძანებელი. ახლა, როცა სიკვდილ-სიცოცხლის გზაჯვარედინზე დგანან, მათი გზები თავისთავად იყრება – სულტანი სიკვდილისაკენ ისწრაფვის, ვაზირს სიცოცხლე უნდა.

ვაზირი უკანასკნელი გოდოლიდაა ჯალალედინის სიმაგრეში. მისი ძალა კარგად იციან სულტნის მტრებმაც და მოყვრებმაც, მის განდგომას ბუნებრივად ჩათვლიან და კარგადაც დაუფასებენ.

შერეფელმოლკმა ჯალალედინის წერილები მოსპო, დაჯდა და თავათ მისწერა უსტარი ხლათის მელიქსა და იკონიის სულტანს. წერილებში ვაზირი მწუხარებას გამოთქვამდა იმის გამო, რომ ჯალალედინმა ვერ გაამართლა ვერც მუსულმან მეფეთა კეთილგანწყობილება, რომელნიც მას ესოდენ მეგობრულად შეხვდნენ, ვერც მისი ახლობლებისა და მრჩევლების იმედები, რომლებიც ასე ერთგულად და თავდადებით ემსახურებოდნენ სულტანს.

იმის მაგივრად, რომ პატივითა და ღირსებით მოქცეოდა თავის მუსულმან მოკავშირეებს და საერთო მტრის, მონგოლების წინააღმდეგ ბრძოლაში გამძლეობდა მათ, უგუნურმა ჯალალედინმა მართლმორწმუნე მუსულმანების რბევას მიჰყო ხელი, დაპყრობა და დამონება მოუწოდოდა სულტნებსა და მელიქებს, რომლებიც თავიანთი წარმოშობითა და კეთილშობილებით არათუ ხვარაზმშაზე დაბლა იდგნენ, არამედ, აღემატებოდნენ კიდევაც მას.

ჯალალედინმა თავისი ზვიადობითა და წინდაუხედაობით თვითონვე განიმზადა აღსასრული. სულტანს აღარც ლაშქარი ჰყავს, აღარც ერთგული მოკავშირეები. მას სამყოფელიც აღარა აქვს და მისი ხელისუფლება უშუალო ხელქვეითებსა და მსახურებს იქით აღარ ვრცელდება. ადარბადაგანის ნამდვილი პატრონი, ქვეყნის მთავართა და დიდებულთაგან აღიარებული მფლობელი ამჟამად შერეფელმოლკია. მხოლოდ მას შეუძლია წესრიგის დამყარება ადარბადაგანში და კეთილმეზობლური ურთიერთობის აღდგენა ხლათისა და იკონიის სახელმწიფოებთან. ვაზირი შეიპყრობს ჯალალედინს და სათანადო სასჯელის მისაგებად გადასცემს ელაშრაფსა და ალადინს. ამ სამსახურის სამუქვოდ, შერეფელმოლკი მხოლოდ მისი ხელისუფლების ცნობას მოითხოვს ადარბადაგანზე, ამით მოისპობა შფოთი და უნდობლობა მუსულმანთა შორის და დამყარდება გულწრფელი თანამშრომლობა მონგოლთა წინააღმდეგ საღვთო ომის საწარმოებლად.

შერეფელმოლკმა წერილები დაბეჭდა და უაღრესად საიდუმლოდ გაგზავნა დანიშნულებისამებრ.

მაგრამ მოხდა სწორედ ის, რასაც ყველაზე ნაკლებ ელოდა გამდგარი ვაზირი. ჯალალედინის ბრჭყალები ჯერ კიდევ სჭრიდა, ალადინისა და ელაშრაფისათვის განკუთვნილი ვაზირის წერილები მის ხელთ აღმოჩნდა.

სულტნის აღშფოთებას საზღვარი აღარა ჰქონდა. მის მიერ კაცადქცეული და ესოდენ აღზევებული უბრალო მონა, რომელმაც ხეირიანად წერა-კითხვაც არ იცოდა, რომელსაც სულს გარდა, ყოველივე ჯალალედინისაგან ჰქონდა მინიჭებული და ნაწყალობევი, ეს მდაბალი და უღირსი მონა მის მტრებთან აბამდა უშუალო კავშირს, თავის მბრძანებლის ხელყოფას ბედავდა, ნადირივით უპირებდა შეპყრობას და არცთუ ისე დიდ ფასად გაყიდვას.

თვალწინ დაუდგა ყველა ის მარცხი, რომლებშიაც დამნაშავედ თავიდანვე ვაზირს თვლიდა. შერეფელმოლკმა გადაკიდა ხლათელებს ჯალალედინი, მას რომ სულტნის უნებართვოდ არზრუმზე არ ელაშქრა და უკან შემოქცეული ხლათელებთან ომს არ გადაყროდა, ხვარაზმელები, ალბათ, ხლათის მტრობას გადარჩებოდნენ. შერეფელმოლკის ჩაგონებითა და წაქეზებით გაილაშქრა ლიხთიმერეთს ჯალალედინმა, სასტიკად დამარცხდა და კინაღამ გურჯების ხელთ ჩავარდა. ვაზირის მოქმედება მაშინვე საექვოდ ეჩვენა სულტანს, ლიხთიმერეთს გადასვლა გადაჭრით ურჩია და თვითონ კი ლაშქარს არ გაჰყვა, რაღაც მიზეზით ფეხი აითრია და თბილისში დარჩა. იქნებ მანვე შეატყობინა ქართველებს სულტნის საიდუმლო გალაშქრების ამბავი! ეს ეჭვი მაშინვე აღედგრა და უსაფუძვლო როდი ყოფილა!

ჯალალედინმა შერეფელმოლკთან თავისი ურთიერთობიდან ყველაფერი დაივიწყა, მისი ძველი ერთგულებაც და სამსახურიც. მის გონებაში მხოლოდ ის აღდგა ამ ხანგრძლივი სამსახურიდან, რაც თავის დროზეც საეჭვო იყო და ნაკლებ სანდო. რამდენი ახლობელი და საყვარელი ადამიანი შეაბეზლა სულტანთან ვაზირმა, მათ დანაშაულში ცრუმოწმობით დაარწმუნა და მოაკვლევინა. შემდეგ გვიან იგებდა ვაზირის დასმენის მსხვერპლთა უდანაშაულობას, მაგრამ მკვდარს რაღა გააცოცხლებდა და ან სულტანისთვის რა სახელი იყო თავისი შეცდომის გამჟღავნება. ვაზირმა ისე მოაწყო, რომ სულტანის კარს მისთვის საშიში ყველა დიდებული მოაშორა და მხოლოდ მისივე ერთგულების, მის მიერვე აღზევებული მსახურების ამარა დასტოვა. ასეთ გარემოცვაში სულტანთან ვაზირის ყველა მტერს გზა მოჭრილი ჰქონდა, ჯალალედინამდე ვერც ვაზირის უსამართლობის ხმა აღწევდა, ვერც ვაზირის მსხვერპლთა საჩივარი. თვე არ გავიდოდა, რომ ვაზირს სულტანის საწინააღმდეგო შეთქმულება არ აღმოეჩინა. სულტანი ყველას სასტიკად სჯიდა და თურმე ბრმად ვაზირის პირად ანგარიშებს ასწორებდა. რამდენი ერთგული ადამიანი მოასპობინა სულტანს ამ გამოგონილი შეთქმულების საბაბით და ყველაზე საშიში შეთქმული თავათ ყოფილა ვაზირი.

გაცეცხლებულ სულტანს ცხელ გულზე ვაზირთან მიჭრა, ცხენის ძუაზე გამობმა და თრევა უნდოდა, მაგრამ გონიერებამ შეაკავა. შერეფელმოლკი მიუვალ ციხეში იყო და მის შესაპყრობად მისული, შეიძლებოდა, თვითონ აღმოჩენილიყო შეპყრობილი.

სულტანმა ნესევი იხმო., ერთგულმა მოჰამედმა სიდინჯე და წინდახედულობის გამოჩენა ურჩია.

ჯალალედინმა ბრაზი დაიოკა და მოსაჩვენრად დაწყნარდა.

მულანში მისვლის აღსანიშნავად ნადიმი გამართა და, ვითომ არაფერი მომხდარიყოს, თავისი ვაზირი მიიპატიჟა.

ორგული ვაზირიც ძვირფასი ძღვენით ეახლა. სულტანს რომ ექვი არ აელო, თან შეიარაღებული მცველებიც არ გაიყოლა.

ნადიმი კარგა ხანს გაგრძელდა. სულტანი და ვაზირი ერთიმეორეს აჭარბებდნენ თვალთმაქცობაში, ზედმიწევნით იცავდნენ ერთმანეთის მიმართ ჩვეულ მოპყრობას, ზედმეტ თავაზსა და მოფერებას უფრთხოდნენ, რომ გულისნადები არც ერთს არ გაემჟღავნებინა.

მოღალატე ვაზირი თეთრ კბილს უჩვენებდა, მაგრამ გული შავი ჰქონდა და იმაზე ფიქრობდა, თუ როგორ შთაბეჭდილებას მოახდენდა მისი წერილები ალადინსა და ელაშრაფზე, როგორ მოუვიდოდა მათი დასტური და როგორ პატივყარილსა და შეპყრობილს გაგზავნიდა თავისი მტრების წინაშე ამ არხეინსა და უდარდელს, ზვიადსა და ამპარტავან სულტანს.

რა იცოდა უბედურმა გამცემმა, რომ ის წერილები ხლათისა და იკონიისკენ კი არ მიჰქონდა იმ წუთს მის სანდო შიკრიკს, არამედ მის გვერდით მჯდარ ჯალალედინს ედო უბეში და სულტანიც ფარულად თავის მხრივ იმაზე

ფიქრობდა, თუ როდის მოუტანდნენ მისი მცველები შერეფელმოლკის ერთგული მამლუკების შეპყრობის ამბავს.

ორივემ ბევრი სვა, სულტანმაც და ვაზირმაც, ორივე მაგრად დაითრო, მაგრამ არც ერთს ხვაშიადი არ გაუმჟღავნებია, გადაკრული სიტყვითაც ერთიმეორისთვის არაფერი უგრძნობინებიათ.

გვიანლამ გაიყარნენ პირზე კოცნითა და ერთგულების ფიცით.

ვაზირი სულტნის მცველებმა მიაცილეს. მთვრალი მივიდა თავის სამყოფელში და იმდენი გონი აღარ მიჰყვა, რომ იქ მომხდარი ცვლილებები შეემჩნია. მსახურებისთვის არ დაუძახნია, გაუხდელად დაწვა და მაშინვე მკვდარივით დაეძინა.

ჯალალედინი სხვას ვერავის ენდო, ისევ თავისი ერთგული მდივანი ნესევი მოიხმო და მოლალატე ვაზირის მიმართ სიკვდილის განაჩენის აღსრულება მას დაავალა.

სულტნის მდივანსა და მემატიანეს ხელი კალამზე და სამეფო ბეჭედზე ჰქონდა გაჩვეული, ხმაღს იშვიათად იღებდა და ისიც მხოლოდ მაშინ, როცა სხვა გზა და ღონე აღარ ჰქონდა მტრისგან თავის დასაცავად.

ახლა, მისი სათაყვანებელი სულტნის სიცოცხლე რომ ბეწვზე ეკიდა, მოჰამედი არა მარტო ხმაღს იხმარდა, თუ საჭირო იქნებოდა, ადიდებულ წყალს მისცემდა თავს და გამმვინვარებულ ცეცხლში შევარდებოდა.

ნესევამ თვალი მოავლო სულტნის მამლუკებს.

რადაცაზე დაფიქრდა.

მერე მსახური იხმო და თორელი მოაყვანინა.

– იარაღი გაქვს? – შეეკითხა შემოსვლისთანავე.

თორელი ვერ მიუხვდა.

– ალბათ, საწერ-კალამს კითხულობთ, ახლავე მოვიტან, – მიუგო თორელმა და მოსატანად გაბრუნება დააპირა.

– რა დროს საწერ-კალამია, ხმაღ-ხანჯალზე გეუბნები, – შეუწყრა სულტნის მდივანი.

– ხმაღ-ხანჯალს ტყვეობაში გადავეჩვიე, რომ მქონდეს, ალბათ, ვეღარ მოვიხმარ.

ღიმილით მოახსენა, ცოტა არ იყოს შემკრთალმა თორელმა.

– მიეცით იარაღი!

ბრძანა ნესევამ და სულტნის მცველებმა მაშინვე მიართვეს თურმანს ხმაღ-ხანჯალი.

ნესევამ მცველები დაითხოვა და თორელთან მარტო დარჩა.

– აისხი! – იარაღზე მიუთითა მოჰამედმა და თავათაც აღჭურვას შეუდგა.

ნამდვილად მცდისო, ფიქრობდა თორელი და ნესევის გაშტერებული შეპყურებდა, არ იცოდა, როგორ მოქცეულიყო.

ნესევამ აღკაზმვა მოათავა, თორელთან ახლო მივიდა, პირისპირ დაუდგა და თვალეებში ჩააცქერდა.

– შემიდლია, გენდო?

ჰკითხა და თან თვალებით ხვრეტდა თორელს.

– სულით ხორცამდე!

აღმოხდა თორელს და ნესევის გამოწვდილ მარჯვენას თავისი შეაგება, ერთიმეორის მარჯვენას ჩაფრენილები წამით ასე შეჰყურებდნენ ერთმანეთს. მერე მოჰამედმა ხმალი აიღო და თავისი ხელით გადაჰკიდა თორელს.

– ამაღამ საიდუმლო დავალება უნდა შევასრულო. მხოლოდ მამლუკების ერთგულებას ვერ ვენდობი. შენ ქართველი ხარ და თანაც კეთილშობილი. შენი სიტყვისა მჯერა. ვიცი, არ მიღალატებ. ამიტომ გადავწყვიტე, თან გაიხლო. მძიმე საქმის შესასრულებლად მივდივართ, თანაც ისეთი საქმისა, გურჯები რომ დაგვიმადლებენ. იცოდე, შენ სიტყვასა და სინდისს მინდობილი ვიქნები.

– სიცოცხლე შენგან მაქვს ნაჩუქარი, შენვე მოიხმარე, როგორც გინდოდეს, – მტკიცედ უთხრა თორელმა და იარაღის ასხმას შეუდგა.

ნესევიმ იცოდა, რომ ქართველებს უდიდესი სიძულვილი ჰქონდათ შერეველმოლკისა. სულტნის ვაზირმა არაერთხელ მოსწვა და მოაოხრა თბილისი და საქართველოს დაჰყრობილი ნაწილი. მისი სახელი საქართველოში წყევლა-კრულვით იხსენიებოდა და ქართველებს მისი სიკვდილივით ვერაფერი გაახარებდა.

მოჰამედი დარწმუნებული იყო, ქართველ კაცს შერეველმოლკის მოსაკლავად ამართული ხელი არ აუკანკალდებოდა.

ამ რწმენით წაიყვანა თორელი, სულტნის განაჩენის აღსასრულებლად მიმავალმა ნესევიმ.

დილით ხმაურზე გაეღვიძა შერეველმოლკს. იქაურობას თვალი მოავლო: თავს სულტნის იარაღასხმული მცველები ადგნენ.

გაოცებული წამოიწია.

მცველებმა ერთმანეთს რაღაც უჩურობდნენ, ერთმა მათგანმა კარი გამოაღო და ვიღაც იხმო.

კარის ზღურბლზე თავშიშველი მოჰამედი აღიმართა, ისიც თავით ფეხებამდე იარაღში ჩამჯდარი.

სულტნის შუბლშეკრულ მდივანს მელოტი გრძელი თავი ულაპლაპებდა, გადმოხურულ სქელ წარბებქვეშ დიდი შავი თვალები მრისხანედ უელავდა.

ეს ოთახისა და საწერ-კალამის ჩუმი ვირთხა, რომელსაც ვაჟკაცებში არც კი თვლიდა შერეველმოლკი, ახლა ყოვლისშემძლე ბუმბერაზად მოეჩვენა. იგი სულთამხუთავის სასტიკი გამომეტყველებით უახლოვდებოდა.

ნესევის ხმალზე ხელდადებული უცნობი მოჰყვებოდა, მხარბეჭიანი და შნოიანი. სადღაც ენახა და ვერ გაიხსენა. იერით ქართველს მიამგვანა და შეშფოთდა. იარაღასხმული ქართველის მოსვლა მისთვის კარგს არას მოასწავებდა.

– უზენაესი სულტანი ჯალალედინი, განადიდოს ღმერთმა დიდება მისი, განაგრძოს ჩრდილი მისი და განამტკიცოს კეთილდღეობა მისი, –

ხელაპყრობით წარმოსთქვა ნესევიმ, – ბრძანებს: სიკვდილი ღვთისა და ხელმწიფის მოღალატეს!

შერეფელმოლკი ლოგინზე წამოჯდა, წამით თვალი მოავლო იქაურობას, მისი იარაღი აღარსად იყო, აღარც მის მცველთაგან ჩანდა ვინმე.

ვაზირი უცებ მოიკუნტა, დაპატარავდა და თვალეზად იქცა – ბუდეებში შემალულ, დაფეთებული თაგვივით მოძრავ, შეშინებულ თვალეზად.

შერეფელმოლკი ქვემ-ქვემ იყურებოდა. ეტყობოდა, მისი ტვინი სწრაფად მუშაობდა, რაღაც გამოსავალს ეძებდა და, ალბათ, რომ ვერ იპოვდა, უცებ მოიკუნტა, თითქო ნაჭუჭში შესაძრომად დაპატარავდაო. უყურებდა თორელი ამ მედროვეს, მახეში გაბმულს, გატეხილსა და დამფრთხალს, გასაცოდავებულსა და პეწდაკარგულს. სადღა იყო მისი ზვიადობა, მოსაჩვენარი გაფუყულობა და ფახიფუხი. მთელი სიცოცხლე სხვებს უგებდა მახეს, სხვებისათვის თხრიდა ორმოს და ბოლოს აკი თვითონ გაეზა და თავისივე ფეხით ჩავარდა ორმოში.

ისე ბრძანავით გაეზა, საფრთხის სიახლოვეც ვერ იგრძნო, იმავე ქსელში გააბეს, რომლის ქსოვის შეუდარებელ ოსტატადაც თავათ ითვლებოდა. და აი, რა საწყლად გამოიყურება ახლა ეს ხაფანგში გაბმული მელა თუ თაგვი, როგორ ფერფური მისდის და როგორ უცემს გული. რა ადვილი ყოფილა სხვების ხოცვა, როცა შენ მხოლოდ ბრძანებებს იძლევი და ათასობით აჟლეტინებ უმწეო მოხუცებს, ქალებსა და ბავშვებს. რა ადვილი ყოფილა სხვათა სიკვდილის ცქერა და რა ძნელი, როცა საკუთარ სიკვდილს უყურებ თვალში.

შეეზიზღა თორელს ესოდენ უღირსი ადამიანის სიშიშვლე, სიმდაბლე და პატარაკაცობა, გული აერია მისი საცოდაობის ცქერით.

ხომ ასე საცოდავად გამოიყურება განსაცდელში ჩავარდნილი ვაზირი ახლა, მაგრამ ახლა აბა ერთი სიკვდილს გადარჩეს, ისევ გაიბერება და გაამაყდება, ისევ შეიფერებს დიდკაცობას და ისევ დაუზოგავად გაჟლეტს ხალხს.

ნესევიმ განაჩენი წაუკითხა.

ვაზირს პირველმა შეკრთომამ გაუარა, ნელ-ნელა მოეშვა. რაკი ყველაფერი გათავებული იყო, აღარც წინააღმდეგობის გაწევას ჰქონდა აზრი, აღარც შეწყალების თხოვნას. ამ გაუთავებელ სიცოცხლეში მაინც არა ეყარა რა, მოსვენება აქამდე არ ღირსებია და ამიერიდან ხომ უკეთესს აღარას მოელის.

ერთი დამცინავად მოავლო თვალი მის მოსაკლავად მოგზავნილებს: როგორი მუყაითობითა და ბეჯითობით ასრულებდნენ სულტნის ბრძანებას, როგორ ცივად და უგრძნობლად გამოიყურებოდნენ, თითქო ის სიკვდილი, რომელიც ახლა მისთვის მოჰქონდათ, მათ არასოდეს მიაკითხავდა (ასე ეგონა მასაც, მაგრამ როგორ მოტყუვდა!).

მასხრობა ყოფილა წუთისოფელი. ეს უბედური მონები ჯერ კიდევ გუშინ მისი კალთის მთხვევას ნატრობდნენ და მის ფეხის მტვრადაც არ ღირდნენ, ვაზირის ერთი მწყრალი გამოხედვა იკმარებდა, რომ მხრებზე თავი აღარ შერჩენოდათ.

რა მაღლა იყო გუშინ და რა დაბლა დაცემულა დღეს! როგორ მალე წაშლილა ის მანძილი, რომლის გადალახვას სიზმრადაც ვერ წარმოიდგენდნენ ეს საცოდავი მონები.

ძალა და ხელისუფლება თურმე საოცრად ზრდის მანძილს ადამიანებს შორის, რაც უფრო შორს არის ხალხისაგან მბრძანებელი, რაც უფრო მიუწვდომელია და მიუკარებელი, მით უფრო დიდია და არაჩვეულებრივი იგი ხალხის წარმოდგენაში. მაგრამ საკმაოა, ძალა, ხელისუფლება გამოეცალოს მბრძანებელს, რომ მოსაჩვენარი მიუწვდომლობა და განსაკუთრებულობა გაქრეს და იმავე ხალხის წინაშე გაშიშვლებული, დიდებაშემომარცხული წარსდგეს ჩვეულებრივი ადამიანი, რომელიც თურმე მხოლოდ იმით განსხვავდებოდა მათგან, რომ ხელთ ძალა ჰქონდა და ამ ძალას, დანარჩენთაგან გამოსაცალკევებლად რაც შეიძლება შორს და მაღლა დასაყენებლად იყენებდა.

საოცარია, ადამიანები კერპებს თვითონ ქმნიან და თვითონვე ამხობენ. იმ კერპების დამხობისასაც ისეთსავე აღტყინებას და ტკბობას განიცდიან, როგორც მათზე ლოცვისას განიცდიდნენ და მხოლოდ გვიან გრძნობენ გულის გატეხვას, როცა ყველა სიმაღლე და ბრწყინვალება საბოლოოდ კარგავს ფასსა და მიმზიდველობას.

შერეფელმოლკი თბილი წყლით განიბანა. მერე სასთუმლიდან განუყრელი ყურანი ამოიღო, საყვარელი ადგილი გადაშალა და წაიკითხა:

ოდეს თვალი დადგეს,
ოდეს მთვარე დაბნელდეს,
ოდეს მზე და მთვარე შეერთდეს,
მაშინ ღალად ჰყოს კაცმა:
_ სადა ვპოვო სადგური თავშესაფარი?
აღარსად იყოს სადგური თავშესაფარი შენდა,
თვინიერ უფლისა შენისა,
რომელ გეყოს სადგურად თავშესაფარად.

შერეფელმოლკს ცრემლი მოერია და ხმა აუკანკალდა. ცოტაც კიდევ და, ქალივით ქვითინი წასკდა. იქ მყოფი მამლუკები გატყდნენ, თითქო გულში ყინული გაულხვათო, მოლბნენ, თვალები მოუწყლიანდათ და თავი რომ არ გაეცათ, შებრუნდნენ.

მკაცრად მოავლო მხლებლებს თვალი ნესევიმ. ყველაზე მეტად იმან გააოცა, გურჯიც რომ ცრემლს ძლივს იმაგრებდა, შეწითლებული ნესტოები უცახცახებდა და ხმაზე დადებული ხელი უტოკავდა.

მეც არ მოვიშალოო, _ გაიფიქრა გაკერპებულმა მოჰამედმა და მამლუკებს მკაცრად უბრძანა:

_ დროა, შევუდგეთ!

სულტნის მცველები უცებ გასწორდნენ წელში და ვაზირისაკენ მტკიცე ნაბიჯით დაიძრნენ.

– უზენაესი სულტნის ბრძანებით, ვაზირს ნება აქვს აირჩიოს – დახრჩობა ან თავის მოჭრა.

– თავის მოჭრა.

დაუფიქრებლად თქვა არჩევანი შერეფელმოლკმა და ბაგეზე ნაძალადევი ღიმილი შეეყინა.

– კეთილშობილებს თავს არა სჭრიან. დახრჩობა უფრო ღირსეული სიკვდილია და ნაკლებ მტკივნეულიც.

განმარტა სულტნის მდივანმა, თითქო არჩევანი დახრჩობასა და თავის მოჭრას კი არა, წითელი და თეთრი ღვინის შესმას შეეხებოდა. შერეფელმოლკი მიხვდა, ეს უკანასკნელი არჩევანიც უიმისოდ იყო გადაწყვეტილი.

– ეგრე იყოს! ისე ჰქენით, როგორც მოგილაპარაკნიათ! – ყრუდ წაიდუდუნა ვაზირმა, დაწვა და საყელო გადაიწია. მამლუკთაგან ერთმა ხელები გაუკავა, მეორემ ყელზე შემოაჭდო ორივე ხელი და ნელა, მაგრამ ღონივრად წაუჭირა.

ვაზირს სუნთქვა შეეკრა და ხრიალი დააწყებინა. ჯერ სახე წამოუწითლდა, მერე თანდათან თვალები გაუფართოვდა და ბოლოს, მთლად რომ გალურჯდა, ხრიალიც შეწყდა.

მკვლელმა სახე ამოუტრიალა და თორელმა დაინახა გადაბრუნებული, სიღრმისკენ უაზროდ მზირალი თვალები.

მამლუკმა ყელიდან მოაშორა ხელი, თვალთან ახლო მიიტანა, რატომღაც დააცქერდა, თითები რამდენჯერმე გაშალა და ისევ მოხარა.

– წავიდეთ!

თქვა ნესევიმ და მსხვერპლისაკენ აღარც ერთს აღარ მოუხედია, ყველანი ჩუმად, ფეხაკრეფით გავიდნენ, თითქო ვისმესგან მიიპარებოდნენ ან ვინმეს გაღვიძებას ერიდებოდნენ.

კარი მიუგდეს და თითქო მოლაპარაკებულნი იყვნენ, ისე დადგნენ, ერთმანეთისთვის რომ არ შეეხედათ.

– თავი უნდა მოვჭრათ? – ჩურჩულით იკითხა მკვლელმა.

– თავი სულტანს უნდა მივართვათ.

ჩურჩულით თქვა ნესევიმაც.

– გაცივება ვაცალოთ?..

– ვაცალოთ!..

ისევ სიჩუმე ჩამოვარდა.

მკვლელმა რატომღაც ისევ ხელებზე დაიხედა, თითქო დაბუჟებული ჰქონოდა, თითები რამდენჯერმე ისევ გაშალა და მოღუნა.

– კარგი იყო, ცოტა რომ დამელია! – თავისთვის თქვა მკვლელმა.

– მერე დავლიოთ.

გაეხმაურა ნესევი.

– არ გაცივდებოდა?

იკითხა მეორე მამლუკმა.

– ცოტაც ვაცალოთ.

მოჰამედი სდუმდა, ქვასავით ცივსა და მკაცრად შეკრულ შუბლზე მძიმე ფიქრი აღბეჭდოდა.

უცებ თორელი შებრუნდა, არავისთვის არაფერი უკითხავს, არც თვითონ იცოდა, რატომ წავიდა კარისკენ, რაღაცამ შიგნიდან უბიძგა და ფეხები თავისთავად დაიდრნენ.

კარი შეაღო და ზღურბლთან გაშეშდა:

შერეფელმოლკი საწოლზე იჯდა, ფერზე მოსული და გონმოზრუნებული. ხელებზე დაყრდნობილი მოყანყალებულ თავს ძლივს იმაგრებდა, კისერი ერყეოდა და მთვრალივით ირწეოდა.

კართან მომდგარ მკვლელებს მოხედა და უცნაურად შეჰლიმა.

თორელს ძარღვებში სისხლი გაეყინა, ვერ მიხვდა, ამ ღიმილით მათ ხელობას დასცინოდა ერთხელ უკვე მკვდარი ვაზირი, თუ შეწყალებას სთხოვდა უკანასკნელად. ამაზრზენი სურათისაგან პირი იბრუნა და თვალებზე ხელი აიფარა.

_ მოსჭერთ!

ბრძანა მოჰამედ ნესევიმ.

მამლუკი ვაზირთან მიიჭრა, ხმალმა წამით გაიელვა, ტუჩებმა ერთი გაიწკაპუნეს და შერეფელმოლკის თავი ძირს დაეცა.

თორელმა თავი ვეღარ შეიკავა და ერთხელ კიდევ შეხედა: მოჭრილ თავს ბაგეებზე შეჰყინოდა დამცინავი თუ შეწყალების მთხოვნელი წელანდელი ღიმილი.

თურმანს გააჟრჟოლა და შეტრიალდა. მამლუკმა მოჭრილი თავი შეახვია და სწრაფად გამოვიდა.

სიტყვის უთქმელად, მუნძულით დაუყვა კიბეს, მერე უხმოდვე ცხენებს მოასხდნენ და გაშორდნენ იქაურობას, როგორც დაწყევლილ ადგილს.

სულტანი დარწმუნდა, რომ თურქი მელიქები მოლაპარაკებას განზრახ აჭიანურებდნენ და მის მოსაშველებლად თითსაც არ ანძრევდნენ.

მონგოლები ახლოვდებოდნენ, გარიყულივით ქვეყნის განაპირას ჯდომდა აღსასრულის შერიგებას ჰგავდა, საჭირო იყო ჩქარი და საზრიანი მოქმედება: მუღანში უქმად ყოფნა აღარ შეიძლებოდა, იქ ვერც ჯარს შეაგროვებდა სულტანი, აღარც უკანდასახევი გზა ექნებოდა.

ისევ ხალიფი თუ უშველიდა. მორწმუნეთა მეთაური სხვაზე უკეთ გაერკვეოდა მოსალოდნელ საფრთხეში, მას უკვე ეცოდინებოდა, თუ რა უბედურება მოჰქონდათ მონგოლებს მუსულმანთათვის; ალბათ, ისიც გაგონილი ექნებოდათ, რომ მაჰმადიანთა ერთადერთი იმედი წყეულ მონგოლებთან ბრძოლაში ჯალალედინი იყო, მხოლოდ ჯალალედინს შეეძლო მუსულმანთა დაცვა, მონგოლთა წინააღმდეგ წაძლოდა და მტრის საბოლოოდ განადგურება.

ბაღდადის ხალიფს ოქროც ბევრი ჰქონდა და ჯარიც ბევრი ჰყავდა. თუ ის დაეხმარებოდა, მთელი საისლამო ფეხზე დადგებოდა და მონგოლთა წინააღმდეგ საომრად ქუდზე კაცი გამოვიდოდა.

სულტანმა ყოველივე იანგარიშა, აწონ-დაწონა და ის იყო, ბაღდადს წასვლა გადასწყვიტა, რომ მოულოდნელად ამიდის მფლობელის, მოჯაფერის დესპანები მოუვიდა. მოჯაფერი თავის ჯარსა და სამსახურს სთავაზობდა იმ პირობით, თუ ჯალალედინი არზრუმის დაპყრობაში დაეხმარებოდა. წყალწაღებულივით ხავსს მოეჭიდა ჯალალედინი. მოჯაფერის მიერ შემოთავაზებული ლაშქრობა ერთადერთ ხსნად დასახა და იმედის ნაპერწკალი ისევ აენტო. არზრუმის სულტანი ამას წინათ ისევ გადუდგა ჯალალედინს. მისი დაპყრობით ნადავლსაც იშოვიდა და ჯარსაც შეივსებდა. არზრუმის სულტნის დასჯა სხვა სულტნებსა და მელიქებსაც დააშინებდა. ჯალალედინის ძალას აგრძნობინებდა და ჯარისა და ოქროს მოშველებას დააჩქარებინებდა.

განგებამ თუ ბედისწერამ მოჯაფერთან წასვლა ჩააგონა. სულტანი აიყარა და ამიდის გზას დაადგა.

ლამით პატარა სოფელში შეჩერდა, დაბინავდა და კარები გაამართვინა.

მას შემდეგ, რაც უკანასკნელი დიდი ჰარემი თავრებს დარჩა, ჯალალედინს ახლის შევსებაზე აღარც უფიქრია. მულანში თან ათაბაგ საადის ასული ჰყავდა მხოლოდ. ამხნის კაცი ჭაბუკივით იყო გამიჯნურებული ყვავილივით ნაზ ქალიშვილზე.

ათაბაგის ასულის ალერსი და მასთან ყოფნა განწირულ სულტანს თითქო ამქვეყნიური ბიწიერებისა და ჭუჭყისაგან სწმენდდა, ადამიანთა მუხანათობას და წუთისოფლის გაუტანლობას ავიწყებდა და ცხოვრებაზე გულს უბრუნებდა. მის უძირო შავ თვალებში მაცქერალს სიცოცხლის დაუსრულებლობის, სიკეთის უძლველობის რწმენა უბრუნდებოდა და მის წინააღმდეგ მბრუნავ ბედის ჩარხთან ერთხელ კიდევ შეჭიდების სურვილი უათკეცდებოდა.

ცხენების ჭიხვინი მიწყდა, ბანაკი მიწყნარდა, გრძელი გზით დაღლილ ათაბაგის ასულს ეძინა. სულტნის კარავში სუფრას აწყობდნენ.

ჯალალედინი კარვის კართან იდგა და ჩაბნელებულ სოფელს გაჰყურებდა.

სოფელი პატარა იყო, სინათლევ არსად ბჟუტავდა. ცაზე მთვარე არ ანათებდა, ვარსკვლავებიც არ ჩანდა და თვალი ღამის წყვილიადში ვერ ატანდა.

სადღაც ტურის კვილი გაისმა, მერე ძალლი აჰყვა და გრძლად გააბა შემზარავი ყმუილი.

უჩვეულოდ ყმუოდა ძალლი, უცნაური წკავწკავითა და გაბზარული ხმის კანკალით. ყმუილს კი არა, გამწარებული დიაცის გოდებას უფრო ჰგავდა ძაღლის ეს გაბმული, გულისგამწყალელებელი მოთქმა. ცუდად ენიშნა სულტანს. ტანში ჟრუანტელმა დაურბინა. ბნელი ღამისა თუ მარტოობის შიშმა აიტანა და თავის უმწეობაზე გული ამოუჯდა.

მუხლები მოეჭრა და წაიქცეოდა, რომ კარვიდან მსახური არ გამოსულიყო და ვახშმად არ მიეწვია.

გამოღვიძებული ათაბაგის ასული ყელზე მოეხვია მბრძანებელს და უცებ გაჰქრა, გაიფანტა მარტოობის შიშშიცა და ბნელი ღამის წინაშე უმწეობის შეგრძნებაც. თვითონვე მოეჩვენა სულტანს საოცრებად: როგორ უცებ გამოეცვალა გუნება, თითქო ეს სუსტი გოგონა და კარვის თხელი კედლები ჰყოფდნენ და იფარავდნენ სამყაროს იმ უსასრულობისა და ყოვლისშემცველობისაგან, რომლის წინაშე უღონობამ წელან ასე შეაშინა.

ათაბაგის ასული სუროსავით ეხვეოდა.

ბედი ჰქონდა ჯალალედინს ქალებში. ეს ტანდაბალი, არაბივით შავი კაცი ქალებს რაღაც უხილავი ძალით იზიდავდა. ას წარმოსადეგ ვაჟკაცთან ერთად რომ გაეველო, ქალები მხოლოდ მას გააყოლებდნენ ვნებიან მზერასა და ჩუმ ოხვრას. მისი ყოველი კუნთი და მთლიანად უჩვეულოდ შეკრული სხეული მუდამ დაძაბული იყო და მოუღლელი. დაუმცხრალი ჟინით ანთებული ყოველი ნაკვეთი სიცოცხლის წყურვილით სუნთქავდა და, ალბათ, ქალები შორიდანვე შინაგანად გრძნობდნენ სიცოცხლის ამ ძალას, რომ მისი სურვილი ასე ცეცხლივით ედებოდათ და სწვავდათ. სულტნის დაბალ ტანს, შავ სახეს შნოსა და იერს, შუქსა და ეშხს საოცრად ცოცხალი თვალები აძლევდა: გაბრაზების დროს – ცეცხლივით სასტიკი და ლახვარივით მჭრელი, ალერსის დროს – კატასავით თბილი და შემპარავი.

ქალებს ერთნაირად იზიდავდა ჯალალედინის სისასტიკეცა და სინაზეც, რადგან დიაცთაგან ცოტას მოსწონს მუდამ ზომიერი და აუღელვებელი მამაკაცი.

იგი დაუვიწყარი იყო ყველა ქალისათვის, რომელსაც კი ოდესმე გაჰკარებია, რადგან მასთან გათენებული ერთი ღამე მათი ხსოვნიდან შლიდა უამრავ სხვა ღამეს, როგორც უსიამო მოგონებას.

ამიტომ იყო, რომ ჯალალედინის ბედის მონაწილე ცოლები, მისი მრავალრიცხოვანი ჰარემის უტურფესი ასულები, განწირულების ჟამს, თავიანთ თავზე მეტად სულტნის სიცოცხლეზე ფიქრობდნენ და წყალში თუ ცეცხლში დანთქმისას მის სახელს ავედრებდნენ ყოვლისშემძლე ალაჰს.

ასე ლეკვივით იყო სულტანს ჩამკვლელელებული ათაბაგის ეს პატარა ასულიც.

ჯალალედინის ღონიერ მკლავებში გაიღვიძა მისმა ქალობამ და მისი რჩეული ალერსით ეზიარა ცხოვრების უტკბეს სიამეთ. თუმცა იმას არაფერი ესმოდა, რაც დიდ ქვეყანაში ხდებოდა, მაგრამ, ალბათ, ქალური ალღოთი თუ წინათგრძნობით ხვდებოდა, რომ მისი ბედნიერება ხანგრძლივი არ იქნებოდა. იქნებ ამიტომ ეწაფებოდა ასე ხარბად ამ ბედნიერების ფიალას, ამიტომ ცდილობდა, წუთიც არ დაჰკარგვოდა მასთან უალერსოდ.

პირველად, როცა დიდისა და აღმატებული სულტნის ცოლად მოიყვანეს, ცოტა არ იყოს, ეოცა: «ქვეყნის მპყრობელს» არც ბროლის სასახლე ჰქონდა, არც ჯარი ჰყავდა ურიცხვი და არც თვალ-მარგალიტი თავზე საყარი. სულტანს ხან

ტყეში ეძინა და ხან მინდორში, ზოგჯერ მთელ ღამეებსაც ცხენზე მჯდარი სტეხდა, რათა გრძელი გზები სწრაფად დაეფარა.

პირველმა გაცემამ მალე გაიარა. ათაბაგის ასული მიეჩვია ფათერაკებით სავსე სულტნის ცხოვრებას, ტყესა და მინდორში ძილს, გამოუძინებელ წამოხტომას და ცხენით გაქცევას. სადაც არ უნდა დაევიანა სულტანს, მისი ახალგაზრდა ცოლისთვის კარავი მუდამ მზად იყო, იმ კარავს ფუფუნება არ აკლდა, და, რაც მთავარია, სულტნის ფართო და ძლიერი მკლავები ყოველთვის თბილი, საამოდ მომღლეელი და უშფოთველი ძილის მომგვრელი იყო.

რაც უფრო ცუდად მიდიოდა სულტნის საქმე, მით უფრო მეტად ეტანებოდა თავის უკანასკნელ სიყვარულსა და ღვინოს, თავდავიწყებით ეწაფებოდა ერთსაც და მეორესაც, თითქო ათაბაგის ქალის ალერსითა და რჩეული ღვინის სმით შეიძლებოდა დარდის ჩახშობა და ბედის განაჩენის შეცვლა.

ახლაც, ლოგინიდან ახლად წამომდგარი ქალის სითბო რომ იგრძნო, ხელი დაავლო, ბურთივით აიტაცა და ისევ ლოგინისაკენ გააქანა...

ალერსით დათენთილ ქალს საწოლისკენ მოუწია სუფრა სულტანმა. ათაბაგის ასულმა შარბათი შესვა, დურაჯის ფრთას ცოტა მოსწიწკნა და ხორციელად და სულიერად ერთნაირად კმაყოფილმა ბალიშზე მისდო თავი.

ჯალალედინმა უდარდელად მძინარ ცოლს საბანი დაჰხურა და საწოლიდან ფრთხილად გადმოვიდა.

რა იცოდა სულტანმა ან ათაბაგის მშვენიერმა ასულმა, რომ ეს მათი უკანასკნელი ღამე იყო.

ჯალალედინს შიოდა, ვახშამს მადიანად შეექცა და ღვინოს ხარბად დაეწაფა.

ცოტა რომ შეზარხოშდა, საუბარი მოუნდა თანამესუფრესთან. ფეხზე წამოდგა და ნესევის კარვისკენ წავიდა. წამით მოეჩვენა, რომ ვიღაცა აედევნა, ნაბიჯს აუჩქარა და ნესევის კარავში შევარდა.

მოჰამედი მაგიდას უჯდა, ხლათსა და იკონიას გასაგზავნი წერილებს წერდა.

სულტანმა სული მოითქვა და უსიტყვოდ დაჯდა მაგიდასთან მდივნის პირდაპირ. უსიტყვოდვე ხელი მოუსვა ჯერ კიდევ მელანშეუმშრალ წერილებს, დაჭმუჭნა და გასტყორცნა.

ამ წერილების წერით თვალეზგამოდამებული ნესევი წამოხტა და ხელში ეცა მბრძანებელს, მაგრამ სულტნის მოღუშულ სახეს რომ შეხედა, სკამზე უღონოდ ჩაიკეცა.

– მბრძანებელო, იკონიასა და ხლათს გასაგზავნი წერილები იყო...

შეულულლულა მდივანმა..

– ჯანდაბას იკონიაცა და ხლათიც, ჩვენს საქმეს მაინც აღარა ეშველება რა.

ჩაიქნია ხელი სულტანმა.

მერე მსახურები იხმო და სუფრის გაშლა უბრძანა.

ორნი უსხდნენ სუფრას – სულტანი და მისი ერთგული მდივანი მემატთანე.

სულტანი გამეტებით სვამდა. სულმოუთქმელად, ერთი-მეორეზე ცლიდა დიდრონ სასმისებს.

ღვინოს მიუჩვეველ მოჰამედს ზიზღით მიჰქონდა ტუჩთან სასმისი, გული ერეოდა, მაგრამ სულტნის ხათრით მაინც ცოტ-ცოტას წრუპავდა და ფიალას ოხვრით დგამდა, თითქო საწამლავი დაეღიოს.

სულტანმა მემუსიკენი ახმობინა. მათთან ერთად თავათაც იმღერა, ბოლოს ღვინო დააძალა მემუსიკეებს. უარზე რომ დადგნენ, ძალით ჩაასხეს პირში თითოეულს, მერე ყველას პანდური უთავაზა და იქიდან დაიფრინა.

ცისას და ბარისას ედებოდა ღვინისაგან გონწართმეული სულტანი, მერე ერთხანს ფიქრმა წაიღო. სკამი ნესევისაკენ მისწია, მხარზე ხელი მოჰხვია და ხმადაბლა თქვა:

– მამაჩემი, ღვთივკურთხეული ხვარაზიმმა, არ მეხსნება ეს ერთი ხანია.

– ხვარაზიმას შენზე რა ხელი აქვს, – შუბლი შეიჭმუნა ნესევიმ, – იგი მოწამეთა სიკვდილით აღესრულა და ალაჰთან არის მისი სასუფეველი.

– როგორც კი თვალს წავატყუებ, მამაჩემი მეცხადება, ქვეყნის მპყრობელი მუჰამედი. აბესკუნის კუნძულზე მეძახის, კეთროვნებთან პურის საჭმელად... ჰა-ჰა-ჰა-ჰა... – აუვარდა ისტერიული სიცილი სულტანს, – მთელი ქვეყნის მპყრობელი, მორჩმული ხვარაზიმმა და კეთროვნების სუფრა, ჰა?! ღირსეული დასასრულია, არა?!..

– ალაჰს, ალბათ, ასე სურდა, რათა შემდგომ იქ ამაღლებულიყო, – ნესევიმ ხელი ცისკენ აიშვირა, – იქ ამაღლებულიყო მართალთა და მორწმუნეთა შორის, განსვენებული ხვარაზიმმა.

– ალაჰს, ალბათ, ისიც სურს, რომ მეც მამაჩემივით აბესკუნის კუნძულზე გავიხიზნო, კეთროვნების ნაწყალობევი პური ვჭამო და ზეზეურად გავიხრწნა. ალაჰი უსამართლოა! – სულტანმა მუშტი დაჰკრა და სუფრამ ზრიალი გაიღო. – ალაჰი ბრმა არი და უსამართლო, დაუნდობელი და უგულო! მე არ წავალ კასპიის კუნძულებზე... არ მინდა კეთროვნებთან... სიკვდილი არ მინდა... არა.

ჯალალედინი საყელოში ეცა ნესევის, ერთხანს ასე ანჯღრია, მერე ხელი უშვა, სუფრას წიხლი ჰკრა და წააქცია. უგონოდ მთვრალი სულტანი თავათაც წაიქცა და ხვრინვა ამოუშვა.

კარვის კართან ხმაური გაისმა. ნესევიმ შეშინებულმა გამოიხედა: სულტნის მცველ მამლუკებს თორელი შეეპყროთ, ერთს გულზე შუბი მიეხვინა, დანარჩენები ხელებს უკრავდნენ. თორელის ფეხებთან შიშველი სატევარი ეგდო და ღამეში თვალისმომჭრელად ლაპლაპებდა. თურმანი უძალიანდებოდა, ხელიდან დასხლტომას ამაოდ ცდილობდა.

ნესევი მიხვდა, რაც მომხდარიყო, თორელს მწარე ღიმილით შეხედა და თურმანმა ვერ გაიგო, ის ღიმილი ზიზღს გამოხატავდა თუ სინანულს.

– წამოიყვანეთ! – უბრძანა მამლუკებს და თავათ წინ წაუძღვა.

ერთხანს იარეს, თურმანის სამყოფელთან შედგა მოჰამედი.

– ხელი გაუხსენით! – მიუბრუნდა მცველებს.

მამლუკებმა ბრძანება უყოყმანოდ შეასრულეს.

– ახლა დაგვტოვეთ. სულტანს მიხედეთ! – უბრძანა მცველებს, წინ თორელი გაუშვა და კარავში შევიდა.

თორელი სულს ძლივს ითქვამდა. ნესევის ცივ მზერას თვალს არიდებდა და პატრონისკენ არ იხედებოდა.

– ასე გადამიხადე, თორელო? – უთხრა მოჰამედმა, საწოლზე ჩამოჯდა და თვალეზი ისარივით ჩაასო თორელს.

თორელმა თავი დახარა და სუნთქვა უფრო გაახშირა.

– არ მეგონა, კეთილშობილი რაინდი და ისიც მგოსანი, თუ ასე უმადური იქნებოდი! სულტანზე ამართე, განა, მახვილი?

თორელი ხმას არ იღებდა.

– დიდებულ სულტანს ისე როდი აქვს საქმე მოწყობილი, რომ ყოველმა გამვლელ-გამომვლელმა და, მით უფრო, მისმა ტყვემ მოუსწრაფოს სიცოცხლე. შენ ჩემი მონა ხარ, სიცოცხლე მე გაჩუქე და, ალბათ, იცი, შენი ყოველი ნაბიჯისათვის მე ვარ სულტანისა და ალაჰის წინაშე პასუხის გამცემი.

თორელმა თავი კიდევ უფრო ჩაჰკიდა.

– სულტანზე რომ მახვილი ამართე, იმ მახვილით მე მკლავდი უპირველესად, რადგანაც სულტანის მოკვლის უბრალო ცდისთვისაც შენი მფარველი და პატრონი აგებს პასუხს.

– დამნაშავე ვარ შენს წინაშე, ჩემო პატრონო, მაგრამ მახვილი სამშობლოს სიყვარულმა და მამულიშვილობის ვალმა ამაღებინა, ხოლო სამშობლოს წინაშე ვალი ყველა სხვა ვალდებულებას აღემატება.

– მერე, ჯალალედინის მოკვლით რა ვალს იხდიდი სამშობლოს წინაშე?

– აკი შენ თვითონ გიბრძანებია, არაერთხელ, ჯალალედინი საქართველოს ბედისწერად იქცა, თქვენს ქვეყანას მანამ არ დაეხსნება, ვიდრე სრულიად არ მოსპობსო?!

– მითქვამს და ეგრეც იყო, მაგრამ ეგ ისევ თქვენივე უგუნურობით მოხდა. ქართველებს რომ შორსმჭვრეტელობა გამოგეჩინათ, ჯალალედინს კი არ უნდა შებრძოლებოდათ, მისთვის ოქრო და ლაშქარი უნდა მიგეცათ და იმ მთავარი მტრის წინააღმდეგ ომში დახმარებოდით, რომელიც ახლა თქვენსკენაც მოიწევს და ჩვენი განადგურების შემდეგ თქვენც მოგსპობთ.

– დღესდღეობით ხვარაზმის სულტანი აოხრებს საქართველოს და ქართველი კაცის ვალი ის არი, ქვეყანა და ხალხი ამ მტარვალისაგან იხსნას.

– ეგრე მოკლე ჭკუით რომ სჭრით, იმიტომ არი კარგად თქვენი საქმე. შენ თუ შენი ქვეყნის მომავლისათვის ზრუნავ, იმას რატომ ვერ ხედავ, რომ ჯალალედინის შემოსევა დროებითია და ხვალ თუ ზეგ უკანვე წავა, ხოლო მონგოლის მოსვლა გამანადგურებელი იქნება და მის უღელს ვეღარასოდეს ვეღარ მოიშორებთ.

– იქნებ საბოლოოდ მართალი იყოთ, მაგრამ ხვალ რა მოხდება, უფლის მეტმა არავინ იცის. ჩემს ქვეყანას დღეს უჭირს და ჩემი ვალი ის იყო, დღევანდელი ჭირი მომეშორებინა საქართველოსთვის.

ნესევიმ ერთი მრისხანედ შეხედა და თვალი თვალში გაუყარა თორელს.

_ ხვალ შენს თავთან ერთად, ალბათ, ჩემი თავიც ძირს დაგორდება. მეგონა, ჩემს წინაშე შენს დანაშაულს შეიგნებდი და პატიებას მაინც მთხოვდი უკანასკნელად, მაგრამ სიკეთისათვის სიკეთე ვის უქნია?!

ნესევიმ მძიმედ ამოიოხრა და ფეხზე წამოდგა.

_ ხვალემ იზრუნოს ხვალისათვის, აღსრულდეს ბედის და განგების განაჩენი! _ სულტნის მდივანმა ხელი მაღლა ალაპყრო, მერე ერთხელ კიდევ მოხედა თორელს და თავის ქნევით გავიდა კარვიდან. კარავი სულტნის მცველებით იყო გარშემორტყმული.

რაკი ჯალალედინის ჩრდილოეთისკენ ლტოლვის მიზეზი არ იცოდა, თორელს ექვი ჰქონდა, სულტანი, ალბათ, ისევ საქართველოს დასალაშქრავად მიდისო.

საგონებელში ჩავარდნილი ღამეებს თეთრად სტეხდა და იმაზე ფიქრობდა, ან საიდანმე მიდგომოდა სულტანს, ან როგორმე მისი ბანაკიდან გაპარულიყო. გუმანით გრძნობდა, საქართველო იქიდან არც ისე შორს უნდა ყოფილიყო, თუ გაქცევას მოახერხებდა, საქართველომდე მიაღწევდა, ქართველებს მტრის მოახლოებას შეატყობინებდა და უკვე დაუძღურებულ ხვარაზმელებს ერთხელ კიდევ შეებრძოლებოდნენ.

კარგად დაღამდა თუ არა, კარვის კარს მიადგა თურმანი. კარავთან გუშაგები არ იდგნენ და თორელი ფრთხილად გამოვიდა.

არც მეზობელ კარვებთან ჩანდნენ გუშაგები. გაოცებული თორელი ნელი, ფრთხილი ნაბიჯით მიჰყვა კარვების რიგს. შერეფელმოლკის მცველობიდან უკვე მოზრუნებულმა მოკლე სატევარი დაიტოვა, ჩუმად უბეში გადამალული. მაშინ ნესევი იმდენად გახარებული და აღელვებული იყო სულტნის დავალების ესოდენ მარჯვედ შესრულებით, რომ ყურადღებაც არ მიუქცევია იმისთვის, თუ რას უბრუნებდა თორელი მიცემული იარაღიდან. ახლა თორელს ის სატევარი ხელთ ჰქონდა დაბლუჯული და თვალისცეცებით მიდიოდა წინ, სულტნის სამყოფელისკენ.

უცებ კაცის ლანდს მოჰკრა თვალი, კარავს ამოეფარა და სატევარი მოიმარჯვა, ლანდი გაუსწორდა.

თორელმა სულტანი იცნო. ჯალალედინი ღიღინით მიდიოდა. წამით შედგა. ფეხდაფეხ დადევნებულ მცველებს ხელი აუქნია.

_ დამეხსენით, მომწყდით თავიდან! _ შეუძახა მრისხანედ და მცველები მაშინვე ოთხად მოიკეცნენ.

ჯალალედინი სწრაფი ნაბიჯით გაშორდა თორელის სამალავს. თურმანმა ერთი მიიხედა სულტნის მცველებისაკენ. მცველები შებრუნებულიყვნენ და თურმანი ჯალალედინს აედევნა. სწრაფად მიმავალმა სულტანმა თითქო იგრძნო, რომ ვიღაც მისდევდა, წამით მოიხედა და ნაბიჯს კიდევ უფრო აუჩქარა.

ჯალალედინი ნესევის კარავში შევიდა. თურმანი შორიახლო მიჰყვა და იმ კარვის კედელს აეკრა.

თორელი თვალს არ აშორებდა სულტანს. ერთ წუთს ყოყმანობდა, შევარდნილიყო თუ არა ნესევის კარავში, მაგრამ სულტანისა და მდივნის საუბრის მოსმენამ გაიტაცა.

მერე, მთვრალი სულტანი რომ ნესევის ევა ყელში და ნჯღრევა დაუწყო, თურმანმა სატევარი ამართა და კარვის კარისკენ ისკუპა.

მაგრამ, ეტყობა, ჯალალედინს თორელის ხელით სიკვდილი არ ეწერა, თითქო მიწიდან ამოძვრნენო, საიდანღაც სულტანის მცველები გაჩნდნენ, გულზე შუბი მიაბჯინეს და ხელიდან სატევარი გააგდებინეს.

ყველაფერი გათავდა ისევ უიღბლოდ და უსახელოდ.

ხვალ ჯალალედინის ჯალათი თორელს თავს გააგდებინებს, და ალბათ, ისევე გაიწკაპუნებს თურმანის კბილებიც, როგორც შერეფელმოლკის კბილებმა გაიწკაპუნეს, როცა მისი თავი დაგორდა ძირს. თორელს თვალი მოუწყლიანდა და თვითონვე გაუკვირდა: თავისი პირადი უბედურებითა და სამშობლოს ავბედობით გამწარებულს სიკვდილი ბევრჯერ უნატურია და ახლა, როცა ეს სიკვდილი ასე ახლო იყო, თურმე სიცოცხლის დასრულება ენანება.

გარეთ ძალდი ყმუოდა გაბმით, გულის შემღონებელი გრძელი ყმუილით. თურმანს ისე მოეჩვენა, თითქო ის ძალდი თორელის კვალზე მოსულ სულთამხდელს ხედავდა და მისი საცოდაობით ატირებული შეჰყმუოდა სიკვდილს, რომელიც გათენებასთან ერთად მოვიდოდა.

იმ ძალდის ყმუილითა თუ თორელის თავხედობითა და უმადურობით შემფოთებულ ნესევისაც ძილი გასტეხოდა. იგი ხვდებოდა, რომ აღარც თორელის მოკვლას ჰქონდა მნიშვნელობა, აღარც მის სიცოცხლეს. ყველაფერი გათავებული იყო, ბედს განაჩენი გამოტანილი ჰქონდა და უკვე ველარაფერს ვერ შეცვლიდა ერთი ან ასი ზედმეტი ღამის გათენება, სულტანისათვის მტრის მახვილის აცდენა და მისი სიცოცხლის ცოტად თუ ბევრად გახანგრძლივება. განგებას ყოველივე წინასწარ ჰქონია გადაწყვეტილი და რაც ამდენ ხანს უშფოთნია დიდებულ სულტანს, თურმე სულ ამო ყოფილა. ადამიანები მხოლოდ ბედისწერისაგან დათქმულს აკეთებენ თურმე და ტყუილად ცდილობდნენ მისი მარწუხებისაგან თავის დაღწევას. ადამიანი ცოცხლობს და იბრძვის, ერთი კუთხიდან მეორეს აწყდება, ქვეყნებს იპყრობს და ხალხებს იმორჩილებს და ჰგონია, რომ თავის ბედსა და სხვებისასაც თვითონ განაგებს, მაგრამ თურმე თავს იტყუებს მხოლოდ და მისი ბრძოლაც და წყვეტებაც მარტოოდენ განგების ძლიერ ხელებში ფართხალია.

აგერ, უბედური ჯალალედინი, რას არ ეცადა. როგორ არ ეწვალა და რა არ იღონა, მაგრამ ბედის განაჩენს მაინც ვერაფერი უყო, ვერც შეცვალა და ვერც გაექცა: მონგოლების წინსვლა ვერაფრით შეაჩერა, ვერც პირადმა გმირობამ უშველა, ვერც დროის გასვლამ, ვერც ჩინგიზის სიკვდილმა და ვერც ქვეყნის მეორე ნაპირისკენ ლტოლვამ. ასე სცოდნია ბედს, ერთს მოიძულებს და მეორეს შეიყვარებს. ის, ბედისაგან მოძულებული, ამაოდ ებრძვის თავის ხვედრს და ბევრჯერ ისე კვდება, ბედის ერთხელ გაღიმებასაც ვერ მოესწრება.

ასე ყოფილა დასაბამიდან, ქვეყნის რომელიმე კუთხეში ბრძოლისა და ნგრევის სული გაჩნდება, თანდათან გაძლიერდება და მერე უდაბნოს ქარივით დაიდრება. იმ სულმა ერთხანს უნდა იზოზოქროს, ყველა წინააღმდეგომი ქვეშ უნდა იგდოს და დალეწოს. ამაოა მისი შეკავების ცდა, მის შესაჩერებლად და დასაოკებლად აღდგომა. ბოზოქარი სული თავათ უნდა დასცხრეს ამ ქროლვასა და წყვეტებაში, თვითონვე უნდა მოეშვას შინაგანად და ძალაგამოცლილი დადგეს. უგუნურობაა იმ ნგრევისა და შფოთის ბოზოქარი სულის შებრძოლება, მაგრამ, ალბათ, ეს არჩევანიც არ არის ჩვენზე დამოკიდებული და რაგინდ სხვას ფიქრობდე, მაინც იმ ორომტრიალში ჩათრეული აღმოჩნდები.

გაექცა და გაერიდა ჯალალედინის მამა დიდი მუჰამედი ჩინგიზის ურდოებს, მაგრამ ვერ უშველა გაქცევამ.

წინაღუდგა, შეებრძოლა იმავე ურდოებს ჯალალედინი, მაგრამ ვერც ბრძოლამ უშველა. ბედის განაჩენს ვერავინ შეცვლის და სიკვდილი სულ ერთია სად მოგისწრებს.

აი, ახლაც მოდის სიკვდილი, მოდის დაუჭედელ ცხენზე ამხედრებული სიკვდილი და ნესევის ესმის მისი ჩუმი ფეხის ხმა, მისი ცივი და მკაცრი სუნთქვა. ამ სიკვდილს მაინც ვერსად წაუხვალ, იგი შეჰყრის ყველას ერთად, უძლეველ ჩინგიზსაც და უიღბლო ჯალალედინსაც, მტერსაც და მოყვარესაც, ლამაზსაც და მახინჯსაც, ყრმასაც და მოხუცსაც... იმდენად გაუტეხა გული ნესევის ცხოვრებამ მარადიული სიკეთის შესაძლებლობაზე, ბოროტების საბოლოოდ დასჯაზე და სიმართლის გამარჯვებაზე, რომ აღარც საიქიოსი და საუკუნო სასუფევლის სჯერა. ღმერთმა ნუ ჰქნას, რომ ამქვეყნიური ცხოვრების შემდეგ კიდევ იყოს წინასწარმეტყველთაგან აღთქმული მეორე იმქვეყნიური ცხოვრება! ნესევი დაიღალა და იმ მეორე, დაუსრულებელი ცხოვრებისათვის აღარც ძალა აქვს, აღარც ხალისი.

ადამიანს მხოლოდ არარაობა დაასვენებს, არყოფნის სიცარიელე და უსაზღვროება. ბედნიერება არყოფნა არის და ის არყოფნა ახლა გარდუვალობის უღმობელი სიმკაცრით უახლოვდება მასაც, სულტანსაც...

_ ნეტავ დროზე მაინც მოვიდეს! _ ამოიოხრა ნესევამ და თვალი ისე დახუჭა, კვლავ გახელის არავითარი სურვილი აღარ ჰქონდა.

გვიან დაძინებულმა ნესევამ ცუდი სიზმარი ნახა. შემფოთებულმა გაიღვიძა. სიზმარში თავისივე მოჭრილი თავი ედო მუხლებზე მოჰამედს, თავს აღარც თმა ჰქონდა, აღარც წვერი და საგანგებოდ ცეცხლზე გატრუსულს ჰგავდა.

ადრე, სიჭაბუკეში თმაგაცვენილ ნესევის სიზმარში გამელოტება ცუდად ჰქონდა დაცდილი.

უკვე გათენებული იყო, მოჰამედმა რომ თვალი გაახილა. საშინელ სიზმარს ჩაუკვირდა და ასე ახსნა: მისი თავი სულტანი იყო და რაკი ეს თავი სიზმარში მოჭრილი და თმაწვერგაცვენილი ნახა, სულტნის დაღუპვა გარდუვლად ეჩვენა, გაცვენილი წვერი სულტნის ახლობლებადა, ხოლო თმა სულტნის ქონებადა განმარტა; ჯალალედინი ერთსაც მალე დაჰკარგავდა და მეორესაც.

ჯერ კიდევ სიზმრისაგან ხეირიანად გამორკვეული არ იყო, კარავში თორელი შემოვარდა.

– ადექით, მონგოლები დაგვესხნენ თავს.

შეჰყვირა თორელმა და დაბნეულ ნესევის ხელთ ტანსაცმელი შეაჩეჩა.

მოჰამედმა აცახცახებული ხელებით ტანსაცმელი ძლივს ჩაიცვა და იარაღი აისხა...

თორელი აჩქარებდა. სულტნის მდიდარ მდივანს ერთი დრამის საღირალი არაფერი უძებნია, მხოლოდ ტყავში ჩასმულ წიგნს დასტაცა ხელი.

თორელმა იცნო წიგნი – ორ ცალად ნაწერი ჯალალედინის ცხოვრების მატიანე.

ამ წიგნს წლების განმავლობაში დიდი რუდუნებითა და გატაცებით წერდა უბედური სულტნის მდივანი და ამ შრო-მას თავისი ცხოვრების უმაღლეს და ერთადერთ გამარ-თლებად თვლიდა.

ახლა, როცა ნესევის სიცოცხლე ბეწვზე ეკიდა, თავის ხსნაზე მეტად ამ წიგნის გადარჩენა აფიქრებდა.

– ვინ იცის, რა ბედი მელის, – მიმართა თორელს ნესევამ, – ჩემი ცხოვრების აზრი ამ წიგნის დამთავრება იყო, მაგრამ ჩანს, რომ ჩემი სიცოცხლის აღსასრული და ამ მატიანის ბოლო ერთად დამდგარა. ამ წიგნის მეორე ცალს შენ გაბარებ და შემოგვედრებ, როგორმე გადაარჩინო და შეუნახო შთამომავლობას. ამ სიკეთეს არა მარტო სამაჰმადიანო დაგიმადლებს, არამედ შენი ქვეყანაც მადლობელი დაგრჩება, რადგან შთამომავლობამ თავისი მტრის ცხოვრებაც ისევე უნდა იცოდეს, როგორც მოკეთისა.

ნესევამ თორელს წიგნი გადასცა და ორივენი გარეთ გამოვარდნენ.

ცხენებს რომ მოასხდნენ, ნესევამ სულტნის კარვისკენ გაიხედა და გაფითრდა: მონგოლები გარს ერტყმოდნენ კარავს. სულტანს, ალბათ, ისევ ეძინა და არ იცოდა გარეთ რა ხდებოდა.

მოულოდნელად საიდანდაც სულტნის მხედრობა მოვარდა. მონგოლების მეწინავე რაზმს შეუტია, ნაწილი დახოცა, ნაწილიც გაფანტა.

სულტნის ერთი მამლუკი კარავში შეიჭრა და სულტანი გამოიყვანა. თავზე თეთრი ჩაჩი ეხურა საცვლების ამარა სულტანს. ჯალალედინი მორბოდა და თან სახელოებში ხელებს უყრიდა. ცხენზე რომ შეჯდა, პატიოსანთვლებიანი ოქროს დიდი სარტყელი შემოირტყა, მსახურს იარაღი ჩამოართვა, რაზმის უფროსს რაღაც უბრძანა და ცხენს ქუსლი ჰკრა.

– მომეყ, – შესძახა თურმანმა და ნესევისა და თორელის ცხენებიც ერთდროულად მოსწყდნენ ადგილს.

ისინი სხვა მხრისაკენ მიჰქროდნენ, კარგა გზა რომ გაიარეს, მოჰამედი მიხვდა, თორელმა ჩრდილოეთისაკენ აიღო გეზი.

უკანმოუხედავად მიაჭენებდნენ ცხენებს. რომელიღაც მდინარეს გასცდნენ, მერე ტყეს აუარეს გვერდი, გრძელი მინდორი გალიეს და კვლავ რომ მდინარეს მიადგნენ, ნესევამ ცხენი შეაჩერა.

– ცოტა შევისვენოთ, მდევრები მაინც არ ჩანან.

თქვა ნესევიმ და თორელის თანხმობას არ დაელოდა, ცხენიდან გადმოხდა, ლაგამი წაუყარა და მოსართავეები შეუშვა.

თორელმაც დაიქვეითა, მანაც ჯერ გაოფლილ ცხენს მიხედა.

– კარგად იფრინეს ჩვენმა ცხენებმა, მდევარი შორს მოვიტოვეთ და, ალბათ, ჩვენი კვალიც დაკარგეს.

თქვა თორელმა და ტანსაცმლიდან მტვერი დაიბერტყა.

– მდევრები... მგონი, ჩვენ სულაც არავინ მოგვდედა. ჩვენ ვის ვუნდივართ. მონგოლები სულტანს დაედევნებოდნენ... ნეტავ, თუ გაასწრო მბრძანებელმა.

– გაასწრებდა. კარგი ცხენი ჰყავდა. სანამ მონგოლები მის ჯარს გაუსწორებოდნენ, სულტანი სამშვიდობოს იქნებოდა.

– ვინ იცის, ყველაფერი ალაჰის ნებაზეა, უმისოდ კაცის თავიდან თმის ღერიც არ ჩამოვარდება.

ოხვრით თქვა ნესევიმ და თმის ღერის ხსენებამ წუხანდელი სიზმარი მოაგონა.

მისი სათაყვანებელი სულტნის თავი იქნებ მართლაც მოჭრილი გდია მონგოლთა ნოინის ფეხთქვეშ.

ნესევის თვალზე ცრემლი მოადგა.

– ჩვენი გზები აქ იყრებიან, თურმან, შენ სამშობლოსკენ წახვალ, მე კი...

– შენც ჩემთან წამოხვალ, მოჰამედ, ჩემი სახლი შენი სახლი იქნება, საქართველო სტუმართმოყვარე ქვეყანაა, ნახავ, როგორ შეგხვდებიან.

– არა, თურმან, მე საქართველოში არ მიმესვლება. ჯალალედინისა და შერეფელმოლკის სისასტიკის გამო, ქართველებისათვის ყველა ხვარაზმელი მოსისხლე მტერია. მე სულტნის გზა და კვალი უნდა ვეძიო, სიცოცხლეს მასთან გავატარე და სიკვდილიც მასთან მიწერია. შენ სამშობლო გაქვს და ბედნიერი ხარ. მე სამშობლოში ვეღარ დავბრუნდები და, სულ ერთია, სად ჩავკვდები.

ნესევიმ ამოიოხრა და ლოყაზე ცრემლი დაუგორდა.

– ამიდის მფლობელთან, მოჯაფერთან წავალ. თუ სიკვდილს გადაურჩა, ალბათ, სულტანიც მას შეაფარებდა თავს.

– ნება შენია, მოჰამედ. მე კი მზად ვარ, ყოველნაირად გემსახურო.

– ვიცი, თურმან, მაგრამ წილი უკვე ნაყარია და ჩვენი გზები აქ იყრება.

– მაშ, ეს წიგნიც დაიბრუნე, უკვე სამშვიდობოს ვართ.

– სამშვიდობო ჯერ შორს არი ჩემთვის, თურმან, ვინ იცის, კიდევ რამდენ ხიფათს გადავეყრები, ან სიკვდილი სად ჩამისაფრდება.

– ღმერთმა გაშოროს სიკვდილი და უბედურება.

– სიკვდილისა არ მეშინია, თურმან, მაგრამ ამას ვწუხვარ, რომ ჩემი სამშობლოს უნახავი მოკვდები, მისგან შორს, მისი გათავისუფლების ამაოდ მნატვრელი. თქვენი მგოსნის ლექსი მახსენდება, თურმან, რა კარგად უთქვამს:

ვაჰ, სოფელო, რაშიგან ხარ,
რას გვაბრუნებ, რა ზნე გჭირსა,

სადაურსა სად წაიყვან,
სად აღუფხვრი სადით ძირსა...

არაბულად, წამღერებით წარმოსთქვა მოჰამედმა რუსთველის ლექსი, თვალები მოუწყლიანდა და თორელს მოეხვია.

– დაივიწყე წუხანდელი წყენა. ჩემს ადგილზე შენც ისე მოიქცეოდი. ცხოვრება ისეა მოწყობილი, კეთილშობილ ადამიანებს ყოველთვის არა აქვთ უფლება თავიანთი ღირსების შესაფერისად მოექცნენ ერთიმეორეს.

ორივეს ცრემლი მოადგა.

მათ თვალწინ წამით გაირბინეს ერთად გატარებულმა დღეებმა, რუსთველის ქმნილების თარგმანზე ერთად გათეულმა ღამეებმა.

მამაშვილურად გადაჰკოცნეს ერთიმეორე. მოჰამედი ცხენზე შეჯდა და მდინარის ნაპირს აჰყვა დასავლეთისაკენ.

მეორე დღე იწურებოდა.

მოდოდა დაღლილი და გაწამებული თორელი.

გზაზე აღარც ღამის გასათევი შეხვედრია, აღარც ფუნდუკი და ხანაგა, არც სადმე ქარავნის სადგომი.

ნანგრევებსა და ნახანძრალეებში წვიმისა ან სიცხისაგან მცირე ხნით თავის შეფარებას თულა შეძლებდა კაცი, თორემ აღარც სკამი და ლოგინი იყო სადმე, აღარც სულიერი ვინმე, რომ ლუკმა გაემეტებინა და გზა მაინც ესწავლებინა.

მდინარეებზე ხიდი აღარსად იყო და თორელს დიდი მანძილის გავლა უხდებოდა ფონის საძებრად.

გზის ახლომახლო სოფლები ერთიანად დაცარიელებული იყო.

ხანძარსა და ნგრევას გადარჩენილ სახლებში კაციშვილი აღარ დარჩენილიყო, ოთხფეხი და ფრინველი აღარსად ჭაჭანებდა და დაყრუბულ ორლობებში ძაღლის ყეფაც აღარ ისმოდა.

აგვისტო იდგა. ამ დროს აქაურ ვენახებში ყურძენი უკვე შემოსული უნდა ყოფილიყო და ხილით დახუნძლულ ბაღებში მკრეფელები უნდა მდგარიყვნენ, მაგრამ ვაზი ძირადაც აღარსად იყო, ხოლო აჩეხილსა და ცხენებისგან გადაჭმულ ხეხილს ნაყოფი წამლად აღარ შერჩენოდა.

კეთილნაშენი, სიცოცხლით სავსე სოფლები მოშლილიყვნენ, ჩამკვდარიყვნენ და დაყრუბულიყვნენ.

ხალხი ან გამწყდარიყო, ან აქაურობა მიეტოვებინა და თავის გადასარჩენად მთებში გახიზნულიყო.

ექვს წუხე მეტია არ ენახა სამშობლო თორელს. იცოდა ხვარაზმელების მხეცობა, სისასტიკე და დაუნდობლობა, მაგრამ მთელ ქვეყანას თუ ასე გააჩანაგებდნენ და მიწასთან გაასწორებდნენ, ეს კი ველარ წარმოედგინა.

აქა-იქ თითო-ოროლა კაცი რომ გამოჩნდებოდა, თორელის დანახვაზე თავქუდმოგლეჯილი გარბოდნენ, უკან არ იხედებოდნენ და ტყეში შესწრებას ჩქარობდნენ.

თორელის ძახილი და მუდარა არ სჭრიდა, ადგილზე არავინ იცდიდა და აღარც უკან ბრუნდებოდა ვინმე. პირველად ვერ გაეგო თორელს, თუ ასე საფრთხობელასავით რატომ ეშინოდათ მისი გამოჩენისა. მაგრამ თავის თავს რომ დაუკვირდა, მიხვდა, მიზეზი მისი ხვარაზმული ჩაცმულობა იყო.

მაინც ცხელოდა, ქუდი გადააგდო და ხალათი გაიღებდა, ასე უფრო ნაკლებად ეცემოდათ თვალში ქართველებს მისი «ხვარაზმელობა».

მდინარესთან სამიოდე ბიჭს მოჰკრა თვალი, თევზაობდნენ. სანამ ისინი დაინახავდნენ, თორელმა დაასწრო და თავათ გასძახა:

– ქართველებო, ქრისტიანებო!

ბიჭები დაფრთხნენ, თევზის ჭერას თავი ანებეს, ბადეები და კალათები მიატოვეს და ტყისკენ მოჰკურცხლეს.

– მობრუნდით, მეც ქართველი ვარ, ქრისტიანი ვარ!

მისძახოდა თორელი, მაგრამ ბიჭები უკანმოუხედავად გარბოდნენ.

თორელი მდინარის პირას მივიდა, ცხენიდან გადმოხდა. კალათები სავესე იყო ჯერ კიდევ ცოცხალი კალმახებით. თურმანმა ჩაიჩოქა, დააცქერდა წითლად დაწინწკლულ კალმახს და თვალი ვედარ მოსწყვიტა.

იქვე პატარა ხურჯინი იყო ფერდობზე მიწოლილი. ხურჯინიდან ტიკჭორას ამოეყო თავი.

მებადურების საგზალი არც ისე ღარიბი უნდა ყოფილიყო.

ორი დღის უსმელ-უჭმელ თურმანს პირს ნერწყვი მოადგა, ერთი ფიქრი ისიც გაიფიქრა, დამჯდარიყო, ხურჯინიდან საგზალი ამოელაგებინა და ტიკჭორასათვის თავი მოეხსნა, მაგრამ მაშინ ხომ მართლა მტრად ჩასთვლიდნენ მებადურები. გუმანით ხვდებოდა თორელი, რომ ის ბიჭები აქვე, სადმე უნდა ყოფილიყვნენ დამალულნი და შორიდან უთვალთვალებდნენ.

– სადა ხართ, ხალხნო! ქართველებო! ქრისტიანებო!..

გასძახა თორელმა და გაიყუჩა.

პასუხად ისევ დუმილი და სიჩუმე იყო.

მაშინ თორელი ჩამოჯდა და თუმცა ეტირებოდა, ნელა წამოიწყო ხალხში გავრცელებული სიმღერა:

ნეტავ რა არი მისთანა,
ამომავალი მზისთანა,
ტაძარი გელათისთანა,
მეფე თამარ ქალისთანა...

თორელის ეშმაკობამ გასჭრა, სამალავიდან ნელ-ნელა გამოვიდნენ ბიჭები, ჯერ ერთიმეორეს მიაჩერდნენ, მერე მდინარისკენ გაუბედავი ნაბიჯით წამოვიდნენ და შორიახლო შეჩერდნენ.

– ქრისტიანი ხარ?

შემკრთალი ხმით იკითხა შორიდან ერთმა.

– ქრისტიანი ვარ, ქართველი ვარ!
შესძახა თორელმა და გულში მჯილი დაიკრა.

– ნამდვილად ქართველი ხარ?
ახლა მეორემ იკითხა.

– ქართველი ვარ, ქრისტეს მადლმა!
ისევ შესძახა თორელმა, მერე მუხლზე ჩაიჩოქა და სამჯერ პირჯვრის წერით თქვა:

– ქართველი ვარ, საქართველოს ყველა წმინდანის მადლმა, ქრისტიანი ვარ, ქრისტეს მადლმა და ძალამ.

ბიჭები ნელა, მაგრამ უფრო გაბედული ნაბიჯით წამოვიდნენ თორელისაკენ.

– აქაურები ხართ?
ახლა თორელმა იკითხა.

ბიჭებმა ერთიმეორეს გადახედეს და მერე ერთმა თავის ქნევით დაუდასტურა:

– აქაურები ვართ, მაგრამ აქ აღარ ვცხოვრობთ, მთებში ვართ გახიზნული.

– ორი დღეა, პირში ლუკმა არ ჩამსვლია.
ოხვრით თქვა თორელმა და თვალი საგზლით გატენილ ხურჯინს მიაპყრო.
პატრონებმა ხურჯინს თავი მოხსნეს და საგზალი ამოალაგეს. მრგვლად მოხარშული ვარია, გუდის ყველი და დედას პურები დააწყვეს მწვანე მოლზე.

თორელმა მიპატიჟებას აღარ დაუცადა, პური შუაზე გაგლიჯა, ქათამს ბარკალი აახლიჩა და ისე დახარბებული ეცა საჭმელს, გეგონებოდა, ვინმე მოსდევს და ეშინია, არ წაართვასო.

ბიჭები გაკვირვებული უყურებდნენ, თავათ შორიახლო ისხდნენ და ხელს არაფერს ჰკიდებდნენ.

– ღვინოს არ დალევ?
იკითხა ერთმა.

– როგორ არ დავლევ, თუკი ამ სიკეთესაც მიზამთ?!
გაეზადრა სახე თორელს.

– რა ვიცით, მუსულმანი არა სვამს და...

– მერე მე რა მუსულმანი ვარ! – გაცინა თორელს, – ჩემს ჩაცმულობას თუ უყურებთ, ტყვეობიდან ვბრუნდები, მეშვიდე წელია, ხვარაზმელთა ტყვე ვიყავი.

– მეშვიდე წელი?
გაიკვირვეს ბიჭებმა.

– ჰო, მეშვიდე წელი, არც მეტი, არც ნაკლები, – დაუდასტურა თორელმა და ღვინით სავსე სასმისი ჩამოართვა.

– ამ ღვინის მადლი დაილოცოს, მის მომყვან ხალხსა და ქვეყანას გაუმარჯოს, ჭირი აშოროს და ლხინი უმრავლოს!

საჭმლის ღეჭვით თქვა პირგამოტენილმა თორელმა და ღვინო გადაჰკრა.

_ უჰ, რა ღვინოა! _ ამოითქვა სული და პირი გააწკლაპუნა, მერე უღვაშებზე ხელის ზურგი გადაისვა და ჭამა განაგრძო.

_ თავათ სადაური ხარ?

ისევ იკითხა რომელიღაცამ.

_ თავათ თორიდანა ვარ, ახალციხის მხრიდან.

_ შალვა ახალციხელიც თორელი იყო!

აღმოხდა მეორეს.

_ თორელ-ახალციხელები გარნისთან ჩაიხოცნენ, ერთიც არ გადარჩენილა.

_ ვინც გადავრჩით, ტყვედ ჩავვარდით.

_ შენც გარნისთან დაგატყვევეს?

_ გარნისთან, მეც, შალვაც, ზოგი სხვაც...

_ შალვა წამებით მოჰკლეს იმ ურჯულოებმაო, მართალია?

_ მართალია.

_ შენ როგორღა გადარჩი?

_ ეს გრძელი ამბავია, ალბათ, ბედი იყო.

_ ხალხი ამბობს, შალვას რომ მარცხი არ მოსვლოდა, ხვარაზმელები ფეხს ვერ შემოდგამდნენ ჩვენს მიწა-წყალზეო.

_ იმასაც ამბობენ, შალვას მარცხი ღალატით მოუვიდაო, მართალია?

_ იქნებ მართლაც იყოს, ძნელი სათქმელია.

_ როგორ თუ ძნელი სათქმელია, შენ ხომ იქ იყავი?!

_ იქ ვიყავი, მაგრამ მე ხელჩართულ ომში ვიბრძოდი და უკან რა მოხდა, მთავარ ბანაკში, არ ვიცი.

_ უკან რა უნდა მომხდარიყო?

_ ვინ იცის, რა მოხდა. ჩვენ, მესხები, წინამბრძოლები ვიყავით. პირველნი ჩვენ შევხვდით მტერს. მტერი ურიცხვი იყო, ჩვენ _ სულ ოთხი ათასი. ვეფხეებით ვეკვეთეთ და ერთხანს უკანაც დავახევინეთ, მაგრამ ბოლოს მტრის სიმრავლის ზღვამ იმძლავრა და წვეთივით შთაგვნთქა. ქართველთა მთავარი ლაშქარი ჩვენს უკან იდგა გარნისის მთებზე. იქ რა მოხდა, ჩვენგან არავინ იცის, მხოლოდ ეს კია, რომ სამჯერ შეუთვალეს შალვამ და ივანემ _ ჯარი მოეშველებინათ, მაგრამ მშველელი არ გაჩნდა. ისე წაგვლეკა მტრის სიმრავლემ, ჩვენს მთავარ ლაშქარს თითიც არ გაუნძრევია.

_ ღალატი ყოფილა, მა რა ჯანდაბაა!

_ ჩვენებსავე გაუწირიხართ და ეგ ყოფილა!

_ ჰაი, დედასა, იქ ვყოფილიყავი! _ მუჭა შეჰკრა და მუქარით უმისამართოდ დაიქნია ბიჭთაგან უფროსმა.

თორელმა უკანასკნელი ფრთა რომ აიღო, მაშინ მიხვდა, მთელი ქათამი მარტოს გაეთავებინა.

_ ეს რა ვქენი, საგზალი ისე გაგითავეთ, ლუკმაც არ შეგახვედრეთ!

იტკიცა თურმანმა.

– ღმერთმა შეგარგოს! ჩვენ ნასაუზმევი ვართ. თევზსაც მოგიხარშავდით, მაგრამ ცეცხლის დანთებისა გვეშინია, ხვარაზმელი მარბიელები წამოგვადგებიან თავს.

ამის თქმა და, ცხენოსნების გამოჩენა ერთი იყო. ბიჭებმა დაინახეს უცხო ცხენოსნები, ისევ მიატოვეს ყველაფერი და ტყისკენ გაჰქუსლეს.

თორელმა ცხენოსნებისკენ მიიხედა. ხუთიოდე იქნებოდა, ხვარაზმელები უნდა ყოფილიყვნენ.

ეტყობოდა, შემშინებლებს თავათ შეეშინდათ. ერთ წუთს შეყოვნდნენ, მერე ცხენები შეატრიალეს და ქენებით გამორდნენ იქაურობას.

თორელი დიდხანს ელოდა ბიჭების გამოჩენას, ბევრი უძახა, მაგრამ გაქცეულები ტყიდან ვეღარ გამოიყვანა.

ლოდინით გული გაუწყალდა.

წამოდგა და კალთა დაიბერტყა.

ცხენს რომ მოახტა, მაშინ გამოჰყვეს თავი ბიჭებმა ტყიდან.

– რამ დაგაფრთხოთ, ეგრე რამ დაგაგლახავათ! ვერა ხედავთ, იმათ უკვე ჩვენი ეშინიათ?!

ბიჭები მიუახლოვდნენ.

– აქ ახლომახლო კაცი ვერსად გაათევს?

– ვერსად. სოფელში კაცის ჭაჭანება აღარ არი. ისევ მონასტერში თუ ახვალ.

– მონასტერი გადარჩა?

– მხოლოდ ეგ ერთი მონასტერი გადარჩა მთელ ლიხთს აქეთ, ამბობენ, წინამძღვრის წმინდანობამ და ჯალალედინის სიზმარმა გადაარჩინაო.

ჯალალედინს სიზმარში ლომზე მჯდარი მაჰმადი გამოცხადებია, ამა და ამ მონასტერში ვარ, თაყვანი მეცი და შესაწირავი მახლეო. ჯალალედინი მონასტერში მისულა და გუმბათზე სწორედ ლომზე მჯდომი მაჰმადის ის გამოხატულება უნახავს, რომელიც სიზმრად გამოცხადებია. სულტანს მონასტრისთვის წყალობა შეუწირავს და ხვარაზმელები გაუფრთხილებია, მონასტერს არ შეხებოდნენ.

– ზღაპარია, ქრისტიანულ მონასტერში მაჰმადის ხატს რა უნდოდა?!

– ჩვენ თავათ გვინახავს ჩვენი თვალით. ტაძრის გუმბათზე გამოხატული მაჰმადი ლომზე ზის და ქვემოთ წარწერაც აქვს ქარაგმიანი.

თორელს გაეცინა ბიჭების გულუბრყვილობაზე.

– დაღამებამდე ვიქნები მონასტერში?

– იქნები, თუ კარგად ივლი.

თურმანმა მადლობა გადაუხადა მასპინძლობისათვის და ცხენი იქით დასძრა, საითაც ბიჭებმა მონასტრის გზა უჩვენეს.

კარგად დაბინდებული იყო, მონასტერს რომ მიაღწია, ომიანობითა და შფოთით დაშინებულმა ბერებმა არ გაუღეს. ვინაობა და მოსვლის მიზეზი გამოჰკითხეს და წინამძღვარს მოახსენეს.

თორელი რომ გაიგონა, წინამძღვარი ცას ეწია სიხარულით.

ბორბლებიანი სკამით მოაგორებდნენ «წმინდანად» წოდებულ წინამძღვარს. თორელმა შორიდანვე შეიცნო უკვე საფეთქლებთან თმებგათეთრებული, მკერდზე წვერდაფენილი პავლია კუტი.

სიძე-ცოლისძმა აღტაცებით გადაეხვივნენ ერთიმეორეს.

ხვევნა-კოცნას რომ მორჩნენ, თორელმა მაშინვე იკითხა:

– ჩვენები როგორ არიან? – ხო ცოცხლები გადარჩნენ?

– ცოცხლები არიან, – ჩუმი ამოოხვრით თქვა წინამძღვარმა და თავი ჩაღუნა, რომ თორელს თვალში არ შეეხედა. – ბიჭი უკვე დიდია, დედაც კარგად არი...

– ცაგო? ცაგო როგორღა არი? – იკითხა ისევ თორელმა და ამაოდ სცადა კუტის დახრილ თვალებში პასუხის ამოკითხვა.

– ცაგო... კარგად... თუმცა ცოტა შეუძლოდ იყო... – დანაშაულზე წასწრებულივით, დაბნეულად მიუგო პავლიამ და მახეში გამომწყვდეულივით თვალი იქაურობას მოავლო.

– შენ რაღაცას მიმალავ, პავლია! აბა, დაიფიცე, ამ ხატზე დაიფიცე! – უთხრა გაფითრებულმა თორელმა, თავი აუწია და მთავარანგელოზის ხატისკენ გაახედა.

პავლიამ პასუხის მაგივრად ღრიალი ამოუშვა და თავში ხელი წაიშინა.

შუალამემდე ტირილით უყვებოდნენ ერთმანეთს ქვეყნისა და თავიანთ ამბებს. რაზედაც უნდა ელაპარაკათ, მაინც გარნისის საბედისწერო ომს უბრუნდებოდნენ.

– მაინც რა მოხდა გარნისთან? ექესი წელია, ეს კითხვა მაწვალებს და პასუხი ვერ მიპოვნია. ნუთუ მართლა გაგვწირა მხარგრძელმა და მთელმა მხედრობამ?

– არა მგონია, თურმან, მხარგრძელი ესოდენ დიდი დანაშაულის ჩადენას ვერ გაბედავდა.

– შეუძლებელი არაფერია. მხარგრძელს ახალციხელების შური და მტრობა ჰქონდა.

– პირად მტრობას საქართველოს ბედ-იღბალს როგორ ანაცვალავდა! ეგეც არ იყოს, ასე თავის ნებაზე ვერ მიუშვებდა, კბილით დაგლეჯდნენ დანარჩენი სარდლები – ცოტნე დადიანი და ეგარსლან ბაკურციხელი, ვარამ გაგელი და სურამელი... ასე აშკარა ღალატს როგორ გაბედავდა?

– სამჯერ გაუგზავნა მხარგრძელს კაცი შალვამ, სამგზის სთხოვა ჯარის მოშველება, ბოლოს, როცა იმედი გადაუწყდათ, თავათ ივანე აიჭრა მთავარ ბანაკში, მაგრამ არც მაშველი ჯარი გაჩნდა და ივანეც დაიღუპა.

– ამბობენ, ჩვენი ბანაკიდანვე გამოტყორცნილმა ქვამ მოჰკლა ივანე ახალციხელიო.

– ეგ ხომ მაინც ღალატია!

– ღალატია, მაგრამ ვისგან, აი ეს არი გამოსაცნობი. გარნისიდან ლტოლვილი მხედრები ერთნაირად ჰყვებოდნენ მომხდარ ამბავს. ბრძოლის წინა დღეს შირვანელი მოქარავენენი მოსულან ჩვენს ბანაკში, მხარგრძელთან რაღაც დიდი სათხოვარი ჰქონიათ, ძვირფასი ძღვენი და ღვინო მოურთმევიათ. ივანე მეორეს დღეს მტრის შემოტევას არ ელოდა თურმე. დედოფლის ძეობის

ამბავი მოსვლია. გახარებულს და ბანაკის მიუდგომლობით გულდაარხინებულს, სარდლობისათვის სუფრა გაუშლია, თავადაც უსვამს და სხვებისათვისაც ბლომად დაუღვინებია. სუფრის შემდეგ ყველას დაბანგულივით დასძინებია, მარტო ივანეს არ ეძინა თურმე მთელი ღამე, გულისრევა და კუჭის ტკივილი ჰქონია მწვავე. ახალციხელები იმ სუფრაზე არა ყოფილან თურმე და ამასაც უკუღმართად ხსნიან: შალვამ და ივანემ იცოდნენ, ღვინო რომ მოწამლული იყო, თავათ არ დალიეს და სხვებიც არ გააფრთხილესო.

– სიცრუეა, ცილისწამებაა! – აღშფოთდა თორელი. – იმ დღეს სულ მათთან ვიყავი, შუალამემდე არ მოვშორებივარ ახალციხელებს და ნამდვილად ვიცი, რომ მათ არც შირვანელების სტუმრობა გაუგიათ, არც ძღვენის მორთმევის ამბავი.

– მჯერა, რომ აგრე იქნებოდა. შირვანელი მოქარავნენი, როგორც ჩანს, მტრის შემოგზავნილები იყვნენ ჩვენს ბანაკში, თავიანთი საქმე გაუკეთებიათ და იმ ღამესვე გაპარულან. დილით ბრძოლა ისე დაწყებულა, ჩვენს სარდლებს მკვდრებივით სძინებიათ. მარტო მხარგრძელი ყოფილა ფხიზლად და ისიც ტკივილისა და გულისრევისაგან ცოცხალ-მკვდარი. მაინც მოუყვანინებია ცხენი მხარგრძელს, მაგრამ შეჯდომა და ცხენის წაქცევა ერთი ყოფილა – ცხენს ფეხის ძარღვები ჰქონია გადაჭრილი.

– მაშ, თავათ ივანეც გაუყიდნია მოღალატეს...

– აგრე ყოფილა! მხარგრძელი რომ გულშეწუხებული დაცემულა, ბანაკში ყვირილი ამტყდარა: მხარგრძელი მოჰკლეს, მხარგრძელი მოჰკლეს, თავს ვუშველოთო... ჯერ ლეკნი და ოვსნი, ჯიქნი და ძურძუკნი დამფრთხალან და გაქცეულან, ამასობაში მტრის ცხენოსნებიც გამოჩენილან, არეულსა და შეშინებულ ბანაკს შესევინან და ყველაფერი ერთბაშად მოშლილა. მოულოდნელი ელდისა და თავდასხმისაგან გონდაკარგულ ქართველობას მტრისთვის ზურგი უჩვენებია. ერთიმეორეს ასწრებდნენ თურმე, ვინ ცხენითა და ვინ ქვეითად, ძმა ძმას ვეღარ ცნობდა, მამა – შვილს. ყველა თავის გადარჩენაზე ფიქრობდა თურმე და გაქცეული ლაშქრის შეჩერებასა და თავისმოყრაზე აღარავინ ზრუნავდა. თავათ მხარგრძელი რომელიღაც ერთგულ მსახურს შეუსვამს თავის ცხენზე და იქაურობისთვის გაუშორებია. დადევნებულ მტერს უწყალოდ უჟლეტია ლტოლვილი ქართველობა და მიუდგომელ მთებზე გამართული უზარმაზარი ბანაკი უბრძოლველად ხელთ ჩავარდნია. თავათ ჯალალედინი გაოცებულა, თურმე, ჩვენი ბანაკის ხილვისას და ასე უთქვამს: ესოდენ გამაგრებული და მიუდგომელი ბანაკის დაცემა ადამიანის ღონეს აღემატება და მხოლოდ განგების ძალას შეეძლოო.

– ჭეშმარიტად ეგრეა, გარნისის ბანაკის აღებას მტერი ვერ შესძლებდა, შინაგაცემა და დალატი რომ არ ყოფილიყო.

– გარნისის ბრძოლის შემდეგ ნახევარ წელზე მეტი გავიდა, ვიდრე ჯალალედინი თბილისს აიღებდა, დვინი და გარნისი საქართველოს შორეული

მისადგომები იყო. ქვეყნის მეთაურებს ბევრი დრო ჰქონდათ ღონის მოსაკრებად, ახალი ლაშქრის შესაგროვებლად და მტრის დასახვედრად.

გარნისთან ჩავიდა საქართველოს ძლიერების მზე. სწორედ გარნისის ბრძოლამ გამოამჟღავნა, რომ საქართველოს სახელმწიფოს სხეულს ჩუმი ჭია გასჩენია და იდუმალი ხრწნა მორევია. გარნისის ომში იჩინა თავი იმ ძნელმა სატკივარმა, რომელიც კარგა ხანია ღრღნის ჩვენი ქვეყნის ძლიერებას: მძლავრი სახელმწიფო ხელისუფლების დასუსტებამ დაშალა ქართველ მთავართა და ერისთავთა ერთი პირი და ერთნებობა. ლაშას უდროო სიკვდილი დიდი უბედურება იყო საქართველოსთვის. ქვეყანას სათავეში ჩაუდგა სუსტი და უნებისყოფო ქალი, რომელსაც დიდი თამარისა არც სიბრძნე გამოჰყვა, არც სიმტკიცე და ნებისყოფა. სადავემიშვებულმა მთავრებმა ნელ-ნელა დაივიწყეს თავიანთი უმაღლესი მოვალეობა – ტახტისა და ქვეყნის მორჩილება და სამსახური, თითოეულმა თავისი უფლებისა და სამფლობელოს გაფართოება ამჯობინა, თავი ძველებურად მეფის ადგილას მჯდომელად ჩასთვალა და ძველებურად ურთიერთქიშპსა და მეტოქეობას ანაცვალა სახელმწიფოს ძლიერება.

– ეტყობა, მარტო მეფის სისუსტე არ უნდა იყოს ყველა უბედურების მიზეზი. ჩანს, მეფის კარის მოღვაწეთა შორისაც აღარ არიან ძლიერნი და გონიერნი, ქვეყნისათვის თავისდამდებნი და ტახტის ერთგული ვაზირნი და დიდებულნი, მსგავსად ორთავ ძმათა მხარგრძელთა და ახალციხელთა, რომელნიც იყვნენ ბურჯნი სახელმწიფოს სიმტკიცისანი ნეტარი თამარის დროს.

– ვაი, რომ აგრეა, მეფის კარზე შექცევასა და სახიობაზე უფრო მეტს ფიქრობენ, ვიდრე ქვეყნის დაცვასა და განმტკიცებაზე. თავათ მხარგრძელთა მემკვიდრენი, წყობათა შინა ძლიერთა და ახოვან სარდალთა მენი, ავაგი და შანშე მანდატურთუხუცესი ქვეყნისა და ტახტის საქმეს თავს არიდებენ და უფრო თავის გადარჩენასა და შექცევა-ნადიმებზე ზრუნავენ.

– მაშ, დაღუპულა საქართველო, თუ აღარც მეფე ჰყავს მზრუნველი და აღარც ერისმთავარი. იმის მაგივრად, რომ დაგვეცვა და შეგვენახა საქართველოს ძლიერება, ქვეყანა დავამხეთ და დავაუძღურეთ?

– მერე გვაპატიებს, განა, შთამომავლობა? – ვინ იცის, იქნებ სამუდამოდ საწყევლად ვუტოვებთ ჩვენს სახელს შვილთა და შვილიშვილთ.

– ძლივს გამობრწყინდა საქართველოს სახელი და ჩვენივე უგუნურებით დავაბნელეთ. ხალხი ამბობს, ცისკარი ერთხელ იხსნებაო და, ვაითუ, ჩვენს მიერვე დახშული ცისკარი არასოდეს აღარ გაიღოს საქართველოსთვის.

– მაშინ ჩვენს სახელს უკუნითი უკუნისამდე წყევლით მოიხსენიებს შთამომავლობა.

– ახლა მთელი დედამიწის ზურგზე ისეთი ძალები ამოდრავდნენ, ისე დიდი გრიგალები დაიდრნენ, რომ ჩვენისთანა ერს ძალთა დიდი მოკრება და გონიერება მართებს, რათა თავი შეინახოს და გადაირჩინოს.

– ჩვენ, უბედურებმა, მთელი ძალა ხვარაზმელებთან ბრძოლას შევალიეთ და ახლა უფრო ძლიერი მტერი რომ მოგვადგება კარს, ალბათ, წინააღმდეგობის გაწევასაც ვეღარ შევძლებთ. ჩვენ რომ ხვარაზმელებს დარაზმულნი დავხვედროდით და გარნისთან უკუგვექცია, ქვეყანა არ მოოხრდებოდა, ხალხი არ დაძაბუნდებოდა და მონგოლებსაც ისევე ღირსეულად დავხვედებოდით, როგორც ლაშას დროს. ახლა, რაკი ხვარაზმელების საქმე უკუღმა წავიდა, იქნებ მონგოლების მოსვლამდე საქართველომ კიდევ მოასწროს ღონის მოკრება და გაძლიერება. რას ფიქრობენ, რას შვრებიან ჩვენი ქვეყნის მესვეურები, მეფე და მხარგრძელი?

– ხვარაზმელთაგან ლტოლვილი მეფე ლიხს იქითაა შეფარებული, ხოლო მხარგრძელი...

პავლია კუტი შეჩერდა და სული მოითქვა.

– მხარგრძელს მე თავათ დავუხუჭე თვალი ამ მონასტერში, წესიც მე ავუბე და მევე გავაპატიოსნე.

– როგორ? უკვე მიიცვალა ივანე?

– მიიცვალა, ჩვენს მონასტერში მოკვდა ბერად შემდგარი.

– ბერად აღიკვეცა მხარგრძელი?

– გარნისის მარცხიდან წელიწადიც არ იყო გასული, ჩვენს მონასტერს რომ მოადგა. დიდი შესაწირავი შემოსწირა და ბერად აღკვეცას შემოგვეყვებინა.

– ივანე ათაბაგი, თითქმის უგვირგვინო მეფე, ბერად რატომ უნდა შემდგარიყო, თუ ცოდვა რამე არ აწუხებდა?!

– ვერ გეტყვი, თურმან. აღსარებაშიც ისეთი არა უთქვამს რა, გულმხურვალედ მლოცველი იყო და ბერული წესის ბეჯითად აღმსრულებელი. ერთთავად თავის სენაკში იყო ჩაკეტილი, ხმამაღლა გოდებდა და ღმერთს ცოდვათა მიტევებას ევედრებოდა. ერთხელ, ღამე ხმამაღლა ღაღადისი მომესმა, ვიღაც გოდებდა ბოხი ხმით. ჩემი სენაკიდან სკამით გამოვგორდი. მხარგრძელის სენაკი აქვე იყო. ღაღადისი იქიდან მოისმოდა. ყური მივუგდე და ეს ლოცვა გავიგონე:

– ნეტარ არს კაცი, რომელსა არა შეურაცხა უფალმან ცოდვაი და არცა არს პირსა მისსა ზაკვაი. რამეთუ დავდუმენ მე, განკვდეს ყოველნი ძვალნი ჩემნი ღაღადებითა ჩემითა მარადდღე. რამეთუ დღედაღამე დამიმძიმდა ჩემზედა ხელი შენი. მივიქეც მე გლახაკებად, რამეთუ განმესხა მე ეკალი. ცოდვაი ჩემი გაუწყე შენ და ურჯულოება ჩემი არა დავფარე შენგან. ვთქვი: აღუვარო ბრალი ჩემი უფალსა და შენ მომიტევე მე უღმრთოებაი გულისა ჩემისა»...

მდუღარებით ლოცულობდა მხარგრძელი. ბერიკაცის ბოხი ხმა გაბზარულივით ჟღერდა და უფრო მოთქმას გავდა, ვიდრე ვედრებას.

სენაკში მლოცველს, ალბათ, ხმაური ჩაესმა, ღაღადისი შეწყვიტა და ერთხანს მონასტერში ისევ დუმილი ჩამოვარდა, მერე სენაკის კარი გაიღო და მლოცველმა სიბნელეში იკითხა:

– მანდ რომელი ხარ?

– მე ვარ, მამაო იოანე, – მივუგე დანაშაულზე წასწრებულებით შეცბუნებულმა, – მე ვარ, წინამძღვარი. არ მეძინა მე უღირსს და სულის მოსათქმელად გარეთ გამოვედი. არც შენ გძინავს, მამაო, არა?

– ჩემთვის ძილი და მოსვენება დიდი ხანია დაკარგულია, წინამძღვარო. ლოცვასა და ვედრებაში ვათენებ ღამეებს, რამეთუ განმწმინდოს ცოდვათაგან ჩემთა უფალმა და მიიღოს სული ჩემი გატანჯული.

– ილოცე, მამაო, ილოცე. იგულისმოდგინე და უფალი დიდია. წყალობით მოგხედავს გულიწმინდით მლოცველს... – ვუთხარი, პირჯვარი გადავსახე და სკამი გავაგორე.

ივანემ დაღლილი თვალი გამომაყოლა, ერთი მძიმედ ამოიოხრა და სენაკში შებრუნდა.

მეორე დღეს, მხარგრძელი გვიანობამდე რომ არ გამოჩნდა, სენაკში მიაკითხეს. შეუძლოდა ვარო, – ეთქვა: საჭმელ-სასმელი მიეტანათ, მაგრამ ხელი არაფრისთვის ეხლო.., მწუხრისას მიმიხმო ბერმა და რომ შევედი, ვეღარ ვიცანი: ლოგინზე გრძლადგაჭიმული მოხუცი შფოთავდა, სახე სიცხისგან წამონთებოდა და სულს ძლივს ითქვამდა.

გალეული, დამდნარი მეჩვენა ოდესღაც ახოვანი და გულმხეცი ბუმბერაზი. ძვალსა და ტყავზე დასვლოდა უზარმაზარი სხეული, მიხრწნილი და გამოფიტული ბერიკაცი ჩონჩხს დამსგავსებოდა. მხოლოდ თვალებიღა მოაგონებდნენ მნახველს, დაშრეტილი, სევდით სავსე თვალები, რომ ამ ჩონჩხში ჯერ კიდევ კიაფობდა ბოლომდე ჩაუძქრალი ნაპერწკალი მოღლილი, გატანჯული სიცოცხლისა.

– შემინდე, მამაო! – ჩურჩულით მითხრა და წამწამზე ცრემლი ჩამოეღვენთა.

– უფალმა შეგინდოს და გილხინოს სნეულებათაგან! – ვუთხარი უბედურს, ახლო მივედი და ჯვარი გარდავსახე.

– ისძინა ლოცვა ჩემი და მომიწოდა მე უფალმა, რამეთუ ვვლიდი გზითა მართლითა. და აჰა, აღესრულა ესე...

წარმოსთქვა სასოებით და ერთხანს დადუმდა. მერე უცებ თვალი თვალში გამიყარა და მკაცრად მითხრა:

– მატიანეს წერ, თურმე, წინამძღვარო, ჩვენი დროისას.

– შეწევნითა და ჩაგონებითა ღვთისათა ხელვყავ ეგოდენ დიდსა და ძნელ საქმეს... – მივუგე კრძალვით.

– ჰოდა, ეს იცოდე, წინამძღვარო, ყოველი კაცი ისე ემსახურება თავის ერს, როგორც შეუძლია და როგორც ღონე აქვს. მეც ასე ვემსახურე ჩემს ქვეყანას, მისი დიდებისა და ძლიერებისთვის ვიღვაწე, როგორც შემეძლო და ნუ მომიხსენებ ავად ცოდვათათვის, რომელიც კისრად ვიდე.

– რომელ ცოდვაზე ბრძანებ, მამაო?

– სხვათა ღალატის გამო შევიქვენ დამნაშავე ერისა და მეფის წინაშე, უმეცარ ვიყავ შინაგაცემისა, რომლის მიზეზით მოიწყლა ურიცხვი ქართველობა და დაემხო ძლიერება საქართველოსი, – ივანეს ხველა აუვარდა, ლოგინზე

წამოიწია, დიდხანს ახველა, მერე მისუსტებული ისევ ბალიშზე დაეშვა და ძლივს გასაგონად განაგრძო:

– მე ვიყავი ათაბაგი, ბურჯი ტახტისა და ჩემივე აღზრდილი მეფის ძლიერებისა, მე ვიყავი წინამძღოლი ქართველთა ლაშქრისა და ამიტომ ვიდებ თავს ცოდვასა და დანაშაულს, რომლებიც სხვებმა ჩაიდინეს ღალატით, მაგრამ რომელთა გამო მე ვაგებ პასუხს ღვთისა და ერის წინაშე... სხვა სხვისა ომში ბრძენიაო, ჩვენს ხალხს უთქვამს და ჩემს ღვაწლსაც, მამულისათვის ჩემს შრომას, ომსა და სამსახურს სხვები უკეთ განსჯიან, მაგრამ ერთი გახსოვდეს, წინამძღვარო, პატიოსნებისა და უზაკველობის იმ თვალით შეხედე ყოველს ნამოქმედარს ჩემსას, რომლითაც მე ვუყურებდი...

ეს თქვა და დადუმდა უბედური. ნაშუადღევს უფრო ცუდად შეიქნა. მკურნალმა და წამალმა ვეღარ უშველა. აღსარება თქვა და მზის ჩასვლისას სული განუტევა.

– სხვა სხვისა ომში ბრძენიაო, არა!

– ეგრე თქვა და იმის შემდეგ, მართალი გითხრა, მატთანეს წერაზე გული ამიცრუვდა. ლომგული, რკინისმკვნიტელი ბუმბერაზები უზარმაზარი ლაშქრით ერთიმეორეს ეკვეთებიან, ერთი მარცხდება და მეორე იმარჯვებს. ჩემისთანა საპყარი, უღონო კუტი, რომელსაც თავის დღეში ხმალი არ სჭერია, მონასტრის ჩუმ სენაკში ზის და იმ ბუმბერაზების ნამოქმედარს ჩხრეკს, არწივებსა და ლომვეფხვებს გმირობასა და თავგამეტებას უწუნებს. განა სასაცილო არ არის, რომ მე, ბედისაგან ესოდენ დაჩაგრული ბერი, ვაჟკაცური ცხოვრების სიამეს მოკლებული, დავრდომილი, ივანე მხარგრძელისა და შალვა ახალციხელის შეცდომებზე ვწერდე, მათ მხედრულ ღირსებას ვწონიდე და შთამომავლობას ჩემს განაჩენს ვუტოვებდე?!

– ეგ მუდამ ეგრე იყო, ხმლით ერთი წერდა ქვეყნის მატთანეს, კალმით – მეორე. შთამომავლობა ერთსაც მიუდგომლად დააფასებს და მეორესაც. მაგრამ ვაი, რომ ჩვენ ვერც ხმლით ვასახელეთ ჩვენი ქვეყანა და ვერც კალმით.

– მაგას შენს თავზე რად ამბობ, თურმან, შენ ხმლითაც კარგად ემსახურე და კალმითაც შენს ხალხს.

– კარგად ვემსახურეო! მერე სად არი კარგი სამსახურის ნაყოფი, დაქცეული ქვეყანა და დამხოზილი ძლიერება?

– ეგ მთელი თაობის დანაშაულია, თურმან, მარტო შენ რას გააწყობდი.

– საქმეც ეგ არი. ჩვენი თაობის ეს დანაშაული, ალბათ, მომავლის უამრავ თაობას ექნება წყევლა-კრულვით მოსახსენებლად, რადგან პაპის გაჭედული უღელი შვილთაშვილებს გაუღუნავს ქედს.

თორელმა თავი ჩაჰკიდა. დუმილი ჩამოვარდა.

– ახლა ვინ არი ამირსპასალარი? – იკითხა ცოტა ხნის შემდეგ.

– ავაგ მხარგრძელი, ივანეს მემკვიდრე.

– რას ამბობ? ავაგის ამირსპასალარობა სად თქმულა! ივანეს მემკვიდრე პატიოსნებითა და მშვიდობის მოყვარულობით, უზრუნველობითა და დაუდევრობით იყო ჩემს დროს ცნობილი მხოლოდ. ეს თვისებები კი

ამირსპასალარისათვის დიდ ღირსებად არ ჩაითვლება. ავაგი ჩემი ტოლი და კარგი მეგობარია, მაგრამ ვაი, რომ ამ საქმისთვის შეუფერებელი იქნება.

– მემკვიდრეობით გადასცა მეფემ ავაგს ივანეს შემდეგ ამირსპასალარობა.

– მემკვიდრეობით მამულის გადაცემა კი შეიძლება, მაგრამ მთავარსარდლობასა და ლაშქრის უფროსობას სხვა ნიჭი უნდა, როგორც მგოსნობა არ გადადის ყოველთვის შვილზე, ისე არც ამირსპასალარობის ნიჭი გადაეცემა მამისაგან შვილს ყოველთვის. რა სავალდებულო იყო ავაგისათვის ამირსპასალარობის ბოძება, განა სხვა სავაზირო ცოტა ჰყავდა მეფეს?! ან ცოტა სარდალი ჰყავდა ამირსპასალარობის ღირსი?

– თავათ შემოხვეწია ხელმწიფეს, მამის ყველა ღირსება და სახელი დამიმტკიცე მემკვიდრეობითო.

– დავით აღმაშენებელი პირადი ღირსებითა და დამსახურებით არჩევდა ვაზირებს. ხელისუფლების მემკვიდრეობით გადაცემა პირველი ნიშანია მეფის ძალაუფლების დასუსტებისა. ზაქარია და ივანე მხარგრძელები დიდი სარდლები და მოღვაწენი იყვნენ, ქვეყნის სიკეთისა და ძლიერებისათვის ზრუნავდნენ, მეფესა და საქართველოს ბევრი სამსახური გაუწიეს და დიდი ამაგი დასდეს. მათი მემკვიდრეები: შანშე და ავაგი უფრო ნადიმებსა და შექცევას ეტანებოდნენ, როცა მამები სისხლს ღვრიდნენ. არხეინსა და უდარდელ ცხოვრებას შეჩვეული შვილები მამების ტვირთს ვერ ასწევენ. ქვეყნის საქმის მართვას ძლიერი ხელი და გონიერი თავი უნდა...

თავი მეშვიდე

თორელი თბილისს უახლოვდებოდა და ღელავდა. მან უკვე იცოდა, რომ თბილისი ის აღარ დახვდებოდა, რაც ექვსი წლის წინათ დატოვა. ჯალალედინის ნაკვალევზე ბევრჯერ გაუვლია და დაახლოებით მაინც ჰქონდა წარმოდგენილი დანგრეული თბილისი. დედაქალაქის ყველაზე საყვარელი კუთხეები ფიქრშიც არ ემეტებოდა დასაქცევად და გადასაბუგავად და თუმცა არა ერთის ნაამბობით იცოდა, რომ აღარც მტკვარზე მოტივტივე ლაშას სასახლე დახვდებოდა ორთაჭალაში, აღარც რუსუდანის ახალი პალატები, აღარც მეტეხის ულამაზესი ხიდი, მაინც სადღაც კიდეც ჰქონდა იმედის ნატამალი, რომ ყველა ნაამბობი არ გამართლდებოდა, ცოტა რაღაც, თუნდაც სხვებისათვის არცთუ ისე მნიშვნელოვანი, მაგრამ მისთვის ძვირფასი და ახლობელი, გადარჩებოდა ხანძარსა და ნგრევას.

მაგრამ, რაც უფრო უახლოვდებოდა თბილისს, ეს იმედიც ქრებოდა და თორელს თვალთ უბნელდებოდა.

ქალაქარეთ, ორთაჭალაში ის ადგილი მოიძია, სადაც ლაშას სასახლე უნდა მდგარიყო. ეს სასახლე ლერწმისა და ნაქსოვი ჭილისაგან იყო ნაშენი. ხუთ

წელიწადს აშენებდნენ ლაშას ამ სამყოფელს აღმოსავლეთის შორეული ქვეყნებიდან ჩამოყვანილი ოსტატები თვითონ ლაშას გეგმითა და ზედამხედველობით. სასახლე ტივებზე იდგა და ნავივით ირწეოდა.

აქ, ამ სასახლეში უყვარდა ლაშა გიორგის ქეიფი და განსვენება. თავათ თორელსაც ბევრი ღამე გაუთენებია ამ ზღაპრულ სასახლეში, რომელსაც აღკაზმულობით, ფუფუნებითა და მოწყობილობის სინატიფით საქართველოს გარეთაც შორს ჰქონდა განთქმული სახელი.

ჯალალედინმა რომ თბილისი აიღო, განსასვენებლად აქ მოიყვანეს თურმე თბილისელმა სპარსელებმა.

თითქმის მთელი აღმოსავლეთის მპყრობელის მემკვიდრე, უამრავი სასახლის პატრონი და მნახველი რას უნდა გაეკვირვებინა, მაგრამ ლაშას სასახლე რომ უნახავს, გაოცებულა და მოხიბლულა. დიდხანს უყურა, თურმე, ამ ზღაპრულ სათამაშოსავით ბრწყინვალესა და გამჭვირვალე სამყოფელს, მერე მისი დარბაზები და ტალანები დაუვლია, პატრონისა და გამმართავის გამომგონებლობითა და გემოვნებით მოხიბლულა და ვაზირისათვის ღიმილით უთქვამს:

– აქ მე არ დამედგომება, ეს ფუფუნებასა და ნებივრობას შეჩვეული მეფეებისათვის არისო.

სულტანს სალაშქრო კარავი გაუმართვინებია და, როგორც მეომარსა და მხედარს შეჰფერის, ღამეებს იქ ათევდა თურმე.

ბოლნისის ბრძოლის შემდეგ, ქართველებზე გახელებულ ჯალალედინს ლაშას სასახლის დაწვა უბრძანებია და ხუთ წელს ნაშენები ერთ წამში მოუსპია – ლერწამსა და ჭილოფს თივასავით მოსდებია ცეცხლი და უმაღვე გაუნადგურებია.

მტკვარზე დანახშირებული ტივებიღა ირწეოდნენ იმ ადგილას, სადაც ამ ექვსი წლის წინ ხელთუქმნელი სასახლე იდგა.

მიდიოდა თორელი. მარჯვნივ და მარცხნივ ნახანძრალი სახლების ჩონჩხები მოჰყვებოდნენ, გარუჯული კედლებითა და ჩამტვრეული სარკმლებით. ქარვასლები და ქულბაქები, სახელოსნოები და სავაჭროები თითქო მიწისპირისგან აღგვილიყვნენ. მტკვრისპირიდან მოკიდებული, მთების კალთებამდე სახლი აღარ იდგა, რომელსაც ცეცხლისა და ნგრევის ხელი აღარ შეხებოდა. აქა-იქ ნაჩქარევად შეკეთებული სახლები ჩანდნენ, ალბათ, ხვარაზმელ მეციხოვნეთა სადგომები: ახლა ეს სახლებიც დაცარიელებულიყვნენ და მარტო თბილისის ქუჩების ცქერითაც შეიძლებოდა იმის წარმოდგენა, თუ რა დიდი სისხლის ფასად უჯდებოდათ ხვარაზმელ დამპყრობლებს საქართველოს დედაქალაქში ფეხის მოკიდება.

მეტეხის კლდეს შეავლო თვალი თორელმა და გაშეშდა. ძველ ტაძარს გუმბათი აღარ ჰქონდა და კედლები შერუჯოდა. ტაძრის გაყოლებით დიდ მანძილზე ნახანძრალიღა იყო. გიორგი მესამისა და თამარის, ლაშასა და რუსუდანის პალატებისაგან თითქმის აღარაფერი დარჩენილიყო. მხოლოდ დავით აღმაშენებლისეული სასახლეღა იდგა ძველ ადგილზე. ხანძარს

სახურავი მოემორებინა და შიგნიდან გამოებუვა, უზარმაზარი ლოდებისაგან ნაშენი მკვიდრი კედლებისათვის ვერაფერი დაეკლო ცეცხლს; ეტყობოდა, ხვარაზმელ მეციხოვნეებს სასახლე სახელდახელოდ შეეკეთებინათ და, ალბათ, იქ მათი ჯარი იდგა, ვიდრე საქართველოდან გაიქცეოდნენ.

დიდი და ლამაზი ძველი ხიდის ნახანძრალ ბურჯებზე ბოგირივით რაღაც მიეკოწიწებინათ.

უხმოდ ჩაუარა სასაფლაოსავით მდუმარე ნასახლარებს თორელმა. რა ამაო ყოფილა იმის იმედი, ეგებ რუსუდანის პალატები მაინც გადარჩაო! ნაპალატარზე სამირკველიც აღარსად ეტყობოდა და ვაჩეს მხატვრობას რა სასწაული შეინახავდა.

გული მოუკვდა თორელს, ხელახლა გაეხსნა ცაგოს დაკარგვით მიყენებული ღრმა და მძიმე ჭრილობა.

თბილისში დაბრუნება იმიტომაც უხაროდა, ვაჩეს დახატულ ცაგოს ვნახავო. ახლა ეს ოცნებაც დაემსხვრა და ისეთი სიცივე იგრძნო, თითქო სადღაც ღრმად მიდიოდა, მღვიმესა თუ მიწის ქვეშეთში.

მართლაც, მღვიმეს თუ ერთიმეორეზე აკოლიკებულ აკლდამების წყებას ჰგავდა ახლა ის საოცნებო ქალაქი, რომელიც ექვსი წლის წინ ხალხითა და სიხარულით, ხმაურითა და სინათლით სავსე დასტოვა თორელმა.

თურმანმა ფეხშიშველა გოგონა დაინახა, ჭაღარა, დაკონკილ კაცს მოუძლოდა. მხრებში მოღუნული წვეროსანი თავადებული მიდიოდა, ცალი ხელი გოგონასთვის ჩაეკიდა, მეორეთი ჯოხს მოაბაკუნებდა.

შეეშინდა, ესენიც არ დავაფრთხო ჩემი ჩაცმულობითო, ცხენიდან ჩამოხდა და კედელსამოფარებულმა დაუწყო შორიდან თვალთვალი.

გოგონამ მიიყვანა უსინათლო და სწორედ რუსუდანის ნაპალატარის პირდაპირ დასვა ლოდზე.

ბავშვმა რაღაც უთხრა ბრმას, წამით მობრუნდა და თავქვე დაეშვა.

ბავშვი დანგრეულ ქუჩაში ჩაიკარგა. თორელი უსინათლოსკენ წავიდა. მიუახლოვდა და შეჩერდა.

_ მზეს ნუ მეფარები.

ხელი აუქნია უსინათლომ და თურმანს გააჟრჟოლა: ხმა ვაჩესი იყო, ბოხი და მჟღერი.

თურმანი მზის მხარიდან შემობრუნდა. მეორე მხარეს დაუდგა და დააკვირდა: ოდნავ კეხიანი ცხვირი ვაჩესას ჰგავდა, სქელი, ცოტა ჩამოწეული ქვედა ლაშვიც მისი იყო, ხელები კი... ხელები ნამდვილად ვაჩესი იყო, ნიჩაბივით გრძელი ხელები, თხელი და გრძელი თითებით. ამ ხელებს ათასი კაცის ხელებში იცნობდა თურმანი, მაგრამ მაინც ყოყმანობდა. უსინათლომ იგრძნო, რომ ვიღაც იქვე ახლოს იყო და არ შორდებოდა.

_ რომელი ხარ?

იკითხა.

_ მე ვარ, თურმანი ვარ!

აღმოხდა თორელს, სლუკუნნი წასკდა, გულამომჯდარი, მუხლებზე დაეცა და მოეხვია. ხელი კანკალით მოუფათურა ბრმამ ჯერ მხრებზე, მერე თავ-კისერზე.

მერე თითქო წამოდგომა უნდოდა, ოდნავ წამოიწია და ჩურჩულით იკითხა:

– რომელი თურმანი? თორელი ხომ არა?

– ჰო, თორელი ვარ, თურმან თორელი! – ამოსძახა თურმანმა და ხელები მოხვია.

– ნუთუ კიდევ ცოცხალი ხარ, შე ბეჩავო?!

შეჭდრიალა ვაჩემ და გაშლილი ხელები სალტესავით შემოარტყა თორელს. თურმანი გვერდით მიუჯდა ლოდზე.

– ხომ ხედავ, რას ვგავარ, თურმან! რაღა სასიცოცხლო ვარ მე უბედური, ნათელს ვეღარ ვარჩევ და ბნელს, მზეს ვეღარ ვხედავ და ქვეყანას...

– ამით ხარ ბედნიერი, ვაჩე, სწორედ ამით, რომ ჩვენს დაქცევას ვერ ხედავ! ვაჩე პასუხმა შეაკრთო, გაილურსა.

სწორედ ასე უთხრა გოჩი მუხასძემაც ამ ორიოდ წლის წინათ. ეტყობა, საქართველო მართლა საშინელი სანახავი გამხდარა, რომ მისი ცქერა აღარ ახარებთ და უსინათლოს ბედი შურთ.

– ბედნიერი ხარ, რომ ბრმა ხარ და ჩვენი ქვეყნის ასე გაპარტახებას არ ხედავ. ნეტავ, მეც არ ვხედავდე, ნეტავ, მეც ბრმა ვიყო!..

შესტირა თურმანმა და ისევ ხელი მოჰხვია.

– ქვეყანას წყლული მოუშუშდება, ისევ აღსდგება, ეშველება...

– ვინ იცის, ვაჩე? ეშველება კიდევ?.. აღსდგება კიდევ ოდესმე ჩვენი ქვეყანა იმ ბრწყინვალეობით, რომელსაც მე და შენ მოვესწარი?!

საქართველოში ათასგვარი ხმა მოდიოდა: ზოგი ჯალალედინის სიკვდილს ადასტურებდა, ზოგი ირწმუნებოდა, სულტანი ბაღდადს გაიქცა და მთელ სამუსულმანოს ამზადებს მონგოლთა წინააღმდეგ საღვთო ომისთვისო; ზოგი იმასაც ამბობდა, ხვარაზმმა ჯერ კიდევ ხლათსა და არზრუმშია, ახალ ლაშქარს აგროვებს მონგოლების გასამკლავებლად და საქართველოს კვლავაც დალაშქრავსო.

ერთი ჭორი მეორეს ეწინააღმდეგებოდა და მართალი ამბავი არავინ იცოდა.

მთავარი ის იყო, რომ ხვარაზმელები ჩუმად და სწრაფად გაიკრიფნენ საქართველოდან, ქვეყანამ მოისვენა მტრის რბევისა და აოხრებისაგან და ხალხსაც მეტი არა უნდოდა რა; ჯალალედინს საქართველოზე ხელი აღარ მოუწვდებოდა და ქართველებისთვის სულ ერთი იყო, სად დაღევდა სულს მონგოლთა ლტოლვილი მტარვალი.

ასე ფიქრობდა ქართველების უმრავლესობა, მათ შორის ბევრი მათგანიც, ვისაც ქვეყნის გადარჩენასა და ახალი უფრო საშინელი მტრის შემოსევისაგან დაცვაზე უნდა ეფიქრა.

მხოლოდ შორსმჭვრეტელნი და საქმეში ჩახედულნი გრძნობდნენ, თუ რა მოჰყვებოდა ჯალალედინის საბოლოოდ დამარცხებასა და სარბიელიდან გაქრობას. ჯალალედინის უკან მოდიოდა გაცილებით უფრო დიდი და

ძლიერი მტერი, რომლის გამკლავება ჯერჯერობით ვერავინ შესძლო და თუმცა ჯალალედინის არსებობა საქართველოსთვის მხოლოდ უბედურების მომასწავებელი იყო, მაინც ქართველებისათვის უკეთესი იქნებოდა, ხვარაზმელ სულტანს მონგოლებისათვის მეტი წინააღმდეგობა გაეწია, ისინიც მეტად დაესუსტებინა და თავათაც სისხლისაგან დაცლილიყო.

ასე ფიქრობდა თორელიც, თუმცა მის თვალწინ მონგოლებს ისეთ პირობებში გაექცა სულტანი, საეჭვო იყო, ახლა მაინც მტრის ხელისაგან მისი დასახლოება.

მაგრამ სულტანს ყველაზე საშინელ უბედურებაშიც არ ტოვებდა ბედი და, ვინ იცის, ეგებ ახლაც იხსნას სიკვდილისაგან ბედის იმ ვარსკვლავმა, რომელმაც იგი ადიდებულ სინდის ტალღებიდან უვნებლად გაიყვანა და წყეული ჩინგიზი პირში ჩალაგამოვლებული დაატოვებინა.

ქვეყანა ჩვეულებრივ ცხოვრებას უბრუნდებოდა. მინდვრებში გუთნეული იმართებოდა, ნავენახარებში ვაზს ჰყრიდნენ, ნახიდურებზე ხიდებს სდებდნენ და ნასახლარებზე ახალ საძირკვლებს დგამდნენ.

კალატოვებსა და დურგლებს ერთიმეორეს სტაცებდნენ, დაქცეულს თავაულებლად აშენებდნენ და ანახლებდნენ და ხალხს თავისი და ქვეყნის დამაქცევარი სასტიკი სულტნის სახელი მხოლოდ იმადღა ახსენდებოდა, რომ მისთვის ამქვეყნადაც და იმქვეყნადაც წყევლა-კრულვა შეეთვალა და ზედ ლაზათიანი გინებაც მიეყოლებინა.

გზები ისევ გაიხსნა და ქარავნები ისევ დაიძრნენ ოთხივ მხრიდან, მიდიოდნენ და მოდიოდნენ, მოჰქონდათ და მიჰქონდათ, რის მოტანაცა და წაღებაც კი შეიძლებოდა.

საქონელი ბევრი იყო, მაგრამ ჯერ კიდევ ყველაფერს ცეცხლის ფასი ედო; მექარავნენი დიდ ჯგუფებად, თავიდან ფეხებამდე შეიარაღებულები მოგზაურობდნენ და შორს წასვლას ვერ ბედავდნენ.

ყველაფერი ეს იმას მოასწავებდა, რომ საქართველოს სამხრეთითა და ჩრდილოეთით ჯერ კიდევ დიდი შფოთი იყო და ქვეყნის დამშვიდებას პირი არ უჩანდა.

არზრუმის მხრიდან მოსულმა ერთმა მექარავნემ თორელი მოსძებნა და საიდუმლოდ მოჰამედ ნესევის წერილი გადასცა.

«ამ უსტარს რომ მიიღებ, ეგებ მისი დამწერი, შენი მფარველი და მეგობარი მოჰამედ ნესევი ცოცხალი აღარც იყოს, _ სწერდა ნესევი, _ ალაჰს რომ ჩემი ლოცვისათვის ესმინა, აქამდისაც მიიბარებდა ჩემს გამაღლებულ სულს და არ შემასწრებდა იმ საშინელებას, რომელსაც ახლა გამცნობ მე უბედური. უფალმა დამსაჯა ცოდვათა ჩემთათვის და არ მომცა ღონე, გამეგრძელებინა მატთანე დიდისა და აღმატებული სულტნის ჯალალედინის ცხოვრებისა.

ჩვენი განშორების ჟამს, როდესაც ჩემი სიცოცხლე ბეწვზე ეკიდა, მე შენ შემოგვედრე ჩემი წიგნის ერთი ცალი, რათა შთამომავლობას არ დაჰკარგვოდა ნაყოფი ჩემი უდიდესი შრომისა.

განგებამ ისე წარმართა, რომ მე ცოცხალი დამტოვა მაშინ, როცა უღმობელად და სასტიკად მოექცა ყველაზე მაღალსა და კეთილშობილს კაცთა შორის, გამორჩეულს, მორჩმულსა და სვიან სულტანს, რომლის ფერხთა მტვრად არ ვღირვარ არც მე, მისი უღირსი მონა და არც ვინმე მისი დანატოვართაგანი.

ალაჰმა, რომლის უნებურადაც ამქვეყნად არა ხდება რა, სიცოცხლე მოუსწრაფა მას, ვისი სიცოცხლითაც ჩემი ცხოვრებისა და შრომის აზრი ცოცხლობდა და ამით წერტილი დაუსვა ჩემს შრომასაც, თუმცა უფრო სამართლიანი ის იქნებოდა, ჩემს ცხოვრებას დასმოდა წერტილი, ხოლო მატთანე სულტანის ცხოვრებისა სხვას გაეგრძელებინა უკუნითი უკუნისამდე.

მაგრამ ჩვენ მოკვდავნი, უძლურნი ვართ მივსწვდეთ ღვთის განაჩენის სიღრმეს და ვიდრე პირში სული გვიდგას, ვალდებულნი ვართ, ვზიდოთ ცხოვრების ის ტვირთი, რომელიც უფალს ჩვენთვის მოუკუთვნებია.

ამ ვალდებულების შეგნებამ ერთხელ კიდევ ამაღებინა ხელში კალამი, რათა ჩემი წიგნის უკანასკნელი ფურცლები დამეწერა. თუმცა ამ ფურცლების წერისას ცრემლით უფრო ვალტობდი ჩემს წიგნს, ვიდრე მეღნით, მაგრამ მაინც სრულვყავ შრომა ესე.

ახლა ამ წიგნის ბოლოს გიგზავნი შენ, რამეთუ დაურთო იგი ჩემი შრომის იმ ცალს, რომელიც შენ მოგაბარე ჩვენი განშორების ჟამს.

მაშ, ისმინე მონათხრობი ჩემი, დიდისა და აღმატებული სულტანის ცხოვრების უკანასკნელი დღეებისა.

«...როცა სულტანმა დაინახა, რომ თათრები მისკენ მოჰქროდნენ და გარს ერტყმოდნენ, თავის მამლუკებს უბრძანა, მას მოსცილებოდნენ და მტრისთვის შეეტიათ. სულტანის ჯარმა მართლაც გააფთრებით შეუტია მტერს. მტერი აიბნა და უკან დაიხია.

სულტანმა არეულობით ისარგებლა და რამდენიმე ერთგული ცხენოსნით ამიდისაკენ გაიქცა.

ამიდის ციხეს რომ მიადგა, თათრებიც ფეხდაფეხ მიჰყვნენ.

ამიდის მფლობელი შინ არ იყო, ქალაქის მცხოვრებლებმა, თათრების შიშით, ლტოლვილ სულტანს კარი არ გაუღეს და ქვები დაუშინეს, რათა იქაურობას გასცლოდა.

შეურაცხყოფილი და გამწარებული სულტანი ამიდის ციხეს წყევლა-კრულვით გაშორდა და ცხენი ბასიანის მთებისკენ გააქროლა, ეტყობოდა, ხევხუვებსა და ვიწრო მოსახვევებში მდევარს მოსწყდა. კარგა ხანს ისე მიჰქროდნენ, დადევნებული თათრების ხმა აღარ სწვდებოდათ.

ამასობაში დაღამდა და სულტანმა სოფლის კალოზე გაათია.

უნაგირზე თავმიდებულ სულტანს ძილ-ფხიზლად ეძინა. განთიადისას ცხენების თქარათქურმა გამოადვიმა, მდევარს გეში აეღო და ისევ კვალში ჩასდგომოდა.

სულტანი და მისი მხლებლები ისევ ცხენებს მოახტნენ და გააქროლეს.

სულტანმა მხლებლები დაქაქა, სხვადასხვა მხარეს მიაჭენებდნენ ცხენებს და იმის იმედი ჰქონდა, ვერ მიცნობენ, ჩემს მხლებლებს დაედევნებიათ.

მაგრამ, ანგარიშმა არ გაუმართლა, თათრების რაზმს თხუთმეტი ცხენოსანი გამოეყო და სწორედ მას გამოუდგა.

ისარივით მიჰქროდა სულტანის ფრთაშესხმული მერანი, უკან მიიხედა განწირულმა სულტანმა: ბუზისტოლა ჩანდა მდევარი ცის დასალიერზე.

ახლა უფრო გამეტებით გააქროლა ცხენი და ერთხელ რომ კიდევ მოიხედა უკან, მდევარი უკვე მუშტისტოლა ჩანდა. ეტყობოდა, ეწეოდნენ სულტანს.

არამც და არამც მტრის ხელში ცოცხლად ჩავარდნა არ უნდოდა, გადაწყვეტილი ჰქონდა, უკანასკნელ ამოსუნთქვამდე ებრძოლა და ან მომკვდარიყო, ან თავი ეხსნა.

სულტანმა უკან მოიხედა და კარგად გაარჩია: ორილა მოსდევდა. ალბათ, დანარჩენებმა კვალი დაჰკარგეს და ხელი აიღეს დევნაზე. ორთან გამკლავება არ იყო ძნელი.

მშვილდზე ისარი გამართა, ცხენს აღვირი მოსწია და ტანით ნახევრად შემობრუნებულმა, უზანგებზე შემდგარმა გასტყორცნა ისარი. ორთაგან ერთი ცხენზე გადმოეკიდა, დამფრთხალი ცხენი გვერდზე გახტა და ჭიხვინით გზიდან გადაუხვია. მეორე მდევარი წამით დაიბნა, მერე უცებ იმანაც მშვილდ-ისარი მოიმარჯვა და ის იყო, უნდა ესროლა, რომ ჯალალედინის მიერ გამოტყორცნილი ისარი შიგ მკერდში დაერჭო და ისიც ცხენზე თავით გადმოეკიდა.

სულტანი ცხენიდან გადმოხდა და მალლობზე აცოცდა. იქიდან გზას გახედა, კიდევ ხომ არავინ მომდევსო. თვალის მისაწვდენზე არავინ ჩანდა, არც ცხენოსანი და არც ქვეითი.

ჯალალედინმა თავი სამშვიდობოს გასულად ჩათვალა და ალაჰს მადლობა შესწირა;

თანდათან ადგილსამყოფელში გაერკვა და მოისაზრა, თუ საით წასულიყო.

ის იყო, ციცაბო აღმართს ფეხით შეუყვა, რომ გზა გადაუღობეს.

შეხედულებით ქურთებს ჰგავდნენ. ხელში კომბლები ეჭირათ, მაგრამ ერთიანად იარაღში ისხდნენ.

ერთი შეხედვით, სულტანს უბრალო მწყემსებად ეჩვენა უცნობები, მაგრამ როგორც კი მათ იარაღასხმულობასა და ქცევას დააკვირდა, მიხვდა, რომ საქმე შარაგზის ყაჩაღებთან ჰქონდა.

სულტანმა პირი იბრუნა და თავქვე სირბილით დაეშვა. იქ, დაბლა, თავისი ცხენი ეგულებოდა. ცხენზე შეჯდომას თუ მოასწრებდა, მერე ეს ყაჩაღები ვეღარ დაეწეოდნენ.

ორიოდე ნაბიჯიც არ ჰქონდა გარბენილი, რომელიღაც ყაჩაღმა ფეხებში კომბალი ესროლა. სულტანმა წაიფორხილა და წაიქცა.

თავი ნელა ასწია. ქვედა ლაფშიდან სისხლი სდიოდა. სისხლი ხელით მოიწმინდა და თავზე მდგარ ყაჩაღებს ახედა, ყაჩაღებს ხანჯლები გაეძროთ, რაღაცას დაობდნენ, ერთიმეორეს ლაპარაკს არ აცლიდნენ.

სულტანი მიხვდა, მოკვლას უპირებდნენ. ერთმა მათგანმა ძვირფასი თვლებით შემკულ ოქროს დიდ სარტყელში ჩაავლო ხელი სულტანს. ეტყობოდა, ის უფროსი უნდა ყოფილიყო.

ყაჩაღმა სულტანი სარტყელით აზიდა და ჯალალედინს საიდანღაც ჩაესმა თუ გაახსენდა ქეიქაუსის სარტყელზე წარწერილი წყევლა: «იყოს წერა ჩემი, ვინც უკანონოდ შემირტყას». სულტანს შიშით გააჟრჟოლა და ცივი ოფლი დაასხა. რა გულუბრყვილო ყოფილა, როცა ამ წარწერის ამხსნელებსა და ვაზირის რჩევას დასცინა! განგების განაჩენს ჯერ ვერავინ გაქცევია და ეტყობა, ჯალალედინიც ქეიქაუსის ქამრის წერა ყოფილა! დაბნეული და შეშინებული სულტანი თვალეხს აცეცებდა, გამოსავალს ეძებდა.

წინ გაიგდეს და თავქვე დაეშვნენ. ყაჩაღების მეთაური ოქროს სარტყელს ჩაფრენოდა, ხელს წუთით არ უშვებდა და მხარდამხარ მიჰყვებოდა.

ჯალალედინი მხრით ყაჩაღის მხარს მიეკრა და ჩუმად, ჩურჩულით უთხრა:

– მე სულტანი ჯალალედინი ვარ.

ყაჩაღი დაუჯერებელი ამბის გაგონებამ შეაკრთო, ფეხი ქვას წამოკრა და კინაღამ წაიქცა.

– მე რომ მომკლათ, – ჩურჩულით ეუბნება სულტანი, – სიკვდილს ვერც თქვენ გადაურჩებით, ჩემს სისხლს არავინ გაპატიებთ, დედაბუდიანად ამოგხოცავენ. ამიტომ, გიჯობთ, ჩემზე ხელი არ აღმართოთ.

ყაჩაღთა მეთაურმა დანარჩენებს ანიშნა, წინ წასულიყვნენ.

კარგად რომ დაწინაურდნენ, მეთაური შეჩერდა, ტყვეს ახედ-დახედა, დააკვირდა.

– მე ყველა მუსულმანთა ხელმწიფე ვარ და გიბრძანებ, – ისევ ჩურჩულით ეუბნება ჯალალედინი, – ამ ქვეყნის მელიქთან, ელ მოლუკ მოჯაფერთან მიმიყვანე. იგი დიდად დაგიმადლებს, ჯილდოდ შენს წონა ოქროს მოგცემს...

ყაჩაღი ყოყმანობდა, მას უკვე ტყვის კეთილშობილება აღარ ეეჭვებოდა და ამაში მის ნათქვამზე მეტად თვალ-მარგალიტით შემკული ოქროს უშველებელი ქამარი არწმუნებდა.

– ხოლო, თუ ეს არ შეგიძლია, ჩემი ქვეყნის რომელიმე კუთხეში მიმიყვანე, ჯილდოდ სამფლობელოს მოგცემ, ემრობას გიბომებ და ჩემი უზარმაზარი სახელმწიფოს უბედნიერეს კაცად გაგხდი.

ყაჩაღთა მეთაური დარწმუნდა, რომ ტყვის ბრძანებისა თუ თხოვნის შესრულება მეტ სარგებელს მოუტანდა, ვიდრე მისი მოკვლა და გამარცხვა.

– კარგი, წაგიყვან შენს სახელმწიფოში, – დაეთანხმა ყაჩაღი. მერე დანარჩენებს მოელაპარაკა, რაღაცაზე დაითანხმა თუ სადღაც გაგზავნა. ტყვე შემოაბრუნა და ბილიკ-ბილიკ აღმართს შეუყენა.

სოფელში რომ შევიდნენ, შუადღე იქნებოდა. ქურთი პატარა სახლში შეუძღვა სულტანს და კარი მაგრად ჩაკეტა. სულტანი სკამზე ჩამოჯდა, ყაჩაღი მაშინვე მუხლზე დაეცა და ეთაყვანა.

ყაჩაღის ცოლი გოცეებული უყურებდა: სტუმრისა და ქმრის უცნაურ ქცევას საგონებელში ჩაეგდო ტყვეებისა და ნამარცვის მიღებას შერჩვეული ქალი.

ქურთი წამოდგა. ხელი ტუჩთან მიიტანა გაფრთხილების ნიშნად, ცოლი უკან გაიყვანა და დიდხანს ჩუმად ელაპარაკა.

ჯერ ფიცი ჩამოართვა, რომ საიდუმლოს არავის გაანდობდა, მერე გამოუტყდა, რომ მისი ტყვე უბრალო ვაჭარი ან მოგზაური კი არ იყო, არამედ მთელი ქვეყნის მპყრობელი, ხელმწიფეთაგან უდიდესი და უმდიდრესი სულტანი ჯალალედინი ბრძანდებოდა.

ქმარმა სულმოუთქმელად უამბო, თუ რა დიდი ჯილდო მოელოდა სულტნის გადარჩენისთვის, როგორ მისცემდა ემირობას და სამფლობელოს ჯალალედინი და როგორ გახდებოდა საისლამოში უბედნიერესი კაცი.

ცოლი აღტაცებული უსმენდა, მაგრამ ტყვეს ეჭვის თვალთ უცქერდა და თავისი მეოცნებე ქმრის ნათქვამისა ნაკლებად სჯეროდა.

თავისივე ნაამბობით აღფრთოვანებული ქმარი ცოლს გადაეხვია, ერთხელ კიდევ ჩამოართვა ფიცი, რომ სულტანზე სიტყვას არავისთან დასძრავდა, ჯალალედინისაგან ნებართვა აიღო და მთაში წავიდა ცხენების მოსაყვანად.

ქურთის ლოგინზე გაუხდელად წამოწოლილმა ჯალალედინმა ოქროს სარტყელზე ხალათი გადმოიფარა, დამალა და ახლა წუთი-წუთზე ელოდა მასპინძლის დაბრუნებას. სულტანს სჯეროდა, ჯილდოსდახარბებული ყაჩაღი სამშვიდობოს გამიყვანსო, გული საგულეს ჰქონდა.

ოთახში ხანდახან ქურთის ცოლი შემოიხედავდა, ფეხაკრეფით გაივლიდა და უხმოდვე გაქრებოდა. სახე არ უჩანდა ქურთის ცოლს, მაგრამ კარგი ტანი ჰქონდა და ლამაზი, ცოცხალი თვალებით ცეცხლს აკვსებდა, რაც სულტანმა პირველი შეხედვისთანავე შენიშნა.

ჯალალედინი ალიზის დაბალ ჭერს შეჰყურებდა და თავის მუხთალ ბედზე ფიქრობდა. ეს მერამდენეჯერ გარიყა ტახტისა და ქვეყნისაგან დაუნდობელმა ბედმა, ეს მერამდენეჯერ იწყებს, შველასა და შეწყალების სათხოვნელად ხელგაწვდილი, ცხოვრებას თავიდან.

განა ღირს კი ის ტახტი, სამეფო და, საერთოდ, სიცოცხლე ამდენ წვალებად და თავისდამცირებად?!

ღირს და არც ღირს...

ოთახში ყაჩაღის ცოლის ლანდმა გაირბინა. ხვადივით ძუს სუნი იყნოსა ვაჟკაცმა და ქალის სურვილი მოერიო. უცებ წამოიწია, ერთ წუთს წამოდგომა და დიასახლისის მოხვევა დააპირა, მაგრამ ქალი ისევე მალე გაუჩინარდა, როგორც მალე გამოჩნდა.

ჯალალედინს შერცხვა უგონო განზრახვისა, თავის თავზე დამცინავად გაეღიმა და ისევ საწოლზე გაიშალა.

ქალის სურვილმა ათაბაგის ასული გაახსენა. ნეტავ, სად არის ახლა, ვის მკლავზე წევს, ან წევს კი სადმე, ვისმეს ლოგინში? იქნებ, გააუპატიურეს და მერე ისიც ისევე მოჰკლეს მონგოლებმა, როგორც სხვა მისი ცოლები. ვინ იცი... ვინ იცი...

ჯალალედინს ჩასთვლიდა.

ხმაურზე გამოეღვიძა. მაშინვე ხელი ხმალზე იტაცა და ლოგინზე წამოიწია.

ოთახში უცხო კაცი იყო. ბანჯგვლით ერთიანად თავპირდაფარული სისხლიან თვალებს აბრიალებდა და უშველებელ ტლანქ ხელში მახვილს საბურჭალოსავით ათამაშებდა.

რალაცას როხროხით ელაპარაკებოდა დიასახლისს. კილოზე ეტყობოდა, უწყრებოდა.

ჯალალედინი გაინაბა. ძილში ხალათის კალთები ამოწეოდა და ოქროს სარტყელი მოუჩანდა. უცნობი სულტნის ოქროს სარტყელს თვალს არ აცილებდა და ჯალალედინი მიხვდა, თუ დაიღუპებოდა, ამ ოქროს სარტყელის გამო დაიღუპებოდა.

«იყოს წერა ჩემი, ვინც უკანონოდ შემირტყას», – ჩაესმა ისევ იდუმალი ხმა და ისევ ჟრჟოლამ დაუარა: «იყოს წერა ჩემი!.. იყოს წერა ჩემი!» – ჩასძახოდა ვიღაც და წელზე უცებ ისეთი მხურვალეობა იგრძნო, თითქო ის სარტყელი ცეცხლზე გაევარვარებინოს ვისმეს და ისე შემოერტყას. მზად იყო, მოეხსნა და ქურთისათვის ესროლა ქეიქაუსის ის ძვირფასი, შანთივით გაცხელებული სარტყელი, მაგრამ ქურთს მრისხანე სახე ჰქონდა და სულტანს განძრევისა ეშინოდა.

უცნობი: – ვინ არი? რატომ არ მოჰკლავთ, ნუთუ ვერა ცნობთ, რომ ხვარაზმელია?

დიასახლისი: – იგი ჩვენი სტუმარია, ჩემმა ქმარმა მას ამანი მისცა.

უცნობი: – გაგიჟდით? ჩვენს ამომგდებ ხვარაზმელებს ამანსა და თავშესაფარს როგორ აძლევთ, ახლავე მოგვლავ.

დიასახლისი: – არ გაბედო, იგი სულტანია, ჩემმა ქმარმა საიდუმლოდ მითხრა და ფიცი ჩამომართვა, რომ არავის ვეტყოდი.

უცნობი: – ჭკუაზე მოდით, სულტანს აქ რა უნდა. ალბათ, ეგ იმისთვის მოიგონა, რომ თავი გადაირჩინოს. მაგრამ ვის მოატყუებს! ხვარაზმელი სულტანიც რომ იყოს, ისიც არაა დასანდობი. ამას წინათ, მაგ ძაღლებმა ხლათთან ძმა მომიკლეს, შვილივით გაზრდილი ძმა. დაფიცებული მაქვს, ხვარაზმელი არავინ დავზოგო, თუ სადმე გადავეყრები.

ჯალალედინს არ ესმოდა, რას ლაპარაკობდნენ მისთვის გაუგებარ ენაზე. ხვდებოდა კი, რომ ცხარე ლაპარაკი მას ეხებოდა. განგებ თვალმოხუჭული ერთიანად დამაბული იწვა და არ იცოდა, რა ექნა.

უცნობმა ერთი შეჰღრიალა და მისკენ ზვავივით წამოვიდა.

ჯალალედინმა თვალი გაახილა, წამოხტომა უნდოდა, მაგრამ უკვე გვიან იყო. მის თავზე მოქნეული ხმლის ელვასლა მოჰკრა თვალი და ყველაფერი მამინვე დაბნელდა, დაყრუვდა და გათავდა.

რამდენიმე ხნის შემდეგ ელ მოლეკ მოჯაფერმა მოაძებნინა მთებში სულტნის ცხენი და უნაგირი, მისი დიდებული ხმალი და სარტყელი. უფრო გვიან მისი ძვლებიც მონახეს და შესაფერისი პატივით მიწას მივაბარეთ.

აღესრულა სულტანი 17 აგვისტოს, 1231 წელს»...

მეფე ისევ თბილისში გადმოვიდა. რაკი დაქცეულ სატახტოში შესაფერისი შენობა აღარსად მოიძებნა, დედოფალმა აგარებში დაისადგურა. აქ კიდევ გადარჩენოდა ზოგი რამ ხვარაზმელთა მხეცობას. მეფეთა საზაფხულო სამყოფელი გაეძარცვათ, მაგრამ რატომღაც არ გადაეწვათ და იქ ცხოვრება კიდევ შეიძლებოდა.

თორელი მეფეს ეახლა. დარბაზში რომ შევიდა, თვალს არ დაუჯერა: ტახტზე მოღლილი, ნაადრევად მოტეხილი ქალი იჯდა. ჯერ კიდევ სრულიად ახალგაზრდა რუსუდანს თვალები ჩაცვივნოდა და სახეზე ნაოჭები მოხშირებოდა, ფერუმარილი და საღებავები ფარავდნენ, მაგრამ სულ როდი აქრობდნენ უდროოდ გაჩენილი ღარებისა და ადრე მოსული ჭადარის კვალს. ქართველი ხალხის წამების განვლილ ექვს წელს ულამაზესი დედოფლის გარეგნობაზედაც მძიმე დაღი დაესვა, უძილო ღამეებს, საქვეყნო ჯავრსა და საზრუნავს, გამწარებასა და გაჩენის დღის წყევლას თავისი გაეტანა – დედოფალს სიცოცხლის ადრინდელი ხალისი დაჰკარგოდა. ისე გამოიყურებოდა, თითქო ამ ქვეყნისაგან გასაკვირს აღარაფერს ელოდა, აღარც ავსა და აღარც კარგს. ხელჩაქნეულ ბრძენსავით ცხოვრებაზე გული გაგრილებოდა და ბედის უკუღმართობას შეჩვეულს აღარაფერი აოცებდა.

გაუკვირდა თორელს დედოფლის ესოდენ გამოცვლა, – გაუკვირდა და შეებრალა ახალგაზრდა ქალი: რა უიღბლო ყოფილა დიდი თამარის ეს ნებიერი ასული. ჩიტივით უზრუნველსა და უდარდელ ცხოვრებას შეჩვეულს, ნაზსა და აზიზ დედოფალს უცებ ამოდენა ტვირთი და საზრუნავი, უბედურება და მწუხარება დაატყდა თავს. ასეთი განსაცდელი საქართველოს ძველადაც, ძველბედობის დროსაც არ ჰქონია და რუსუდანის სუსტ მხრებზე მოულოდნელად დაწოლილ ტვირთს, ალბათ, ბევრი ვაჰკაცი ხელმწიფეც ვერ გაუძლებდა. სიყვარულში უიღბლო დედოფალმა პირადი ცხოვრებაც ვერ მოიწყო ისე, როგორც თავათ სურდა, თუმცა მისი სურვილი კანონი იყო და მაშინვე უყოყმანოდ სრულდებოდა.

იღბალი არ ჰქონია რუსუდან დედოფალს, ცხოვრება და მეფობა სწორედ მაშინ მოუწია, როცა მის სამეფოს საშინელი ქარიშხალი მოაწყდა და ყველაფერი დაღეწა. ეს ქარიშხალი ჯერ გადავლილიც არ იყო, საქართველოს ახალი, უფრო საშინელი გრიგალი უახლოვდებოდა.

უმწეო და სრულიად უღონო იდგა ამ გრიგალების წინაშე საქართველოს ახალგაზრდა დედოფალი, მისი სამეფოს წასალეკავად დამრულ ტალღას მხოლოდ ძლიერი მკერდი და ღონიერი მკლავი თუ დაუხვდებოდა და შეაჩერებდა. დედოფალი ცრემლით ხვდებოდა წამოსულ გრიგალებს და, აბა, ცრემლი გრიგალს როგორ შეაჩერებდა!

თორელმა თვალი ვერ გაუსწორა მწუხარებით სავსე დედოფლის მზერას, თავი დახარა და, თავათაც იმავე წუხილით გატეხილი, ეთაყვანა.

დედოფალს თვალები მოუწყლიანდა. თორელის დანახვაზე. ცრემლი მოიწმინდა და გაბზარული ხმის კანკალით წარმოთქვა:

– ფრიად გვახარებს, მგოსანო, შენი დაბრუნება. იმედი აღარ გვქონდა, რომ კვლავ გიხილავდით ცოცხალს და უვნებელს. გვეგონა, შენც მტრის ხმლით იყავი მოკლული, ვითარცა სახელოვანი სახლიკაცები შენი – შალვა და ივანე და ვითარცა ურიცხვი ნათესავი შენი, რომელთაც თავი დასდეს ჩვენი მეფობისა და საქართველოს დიდებისათვის.

– უფალმა არ ინება სიკვდილი ჩემი, დედოფალო. ბედნიერი ვიქნებოდი, მეც გარნისის კლდეებთან დამხუჭოდა თვალი და არ მენახა არც ჩემი სათაყვანებელი მეფის ესოდენ შეჭირვება, არც სამშობლოს ესოდენ უბედურება.

– ვიცი, თორელო, შენი ერთგულება ტახტისა და სამშობლოსადმი. უღონო ვარ, ღირსი მოგაგო შენი გმირობისა და თავდადებისათვის. უფალი ჩვენზე უკეთ გადაგიხდის, რადგან მას ვერავინ შეედრება სიუხვითა და მოწყალებით. ხოლო ჩვენ, ჩვენის მხრივ, გადავწყვიტეთ, მოგანიჭოთ მთავრობა. ჯერჯერობით მამულს ვერ მოგცემთ, მაგრამ, როგორც კი ქვეყანა დაწყნარდება, საპატრონოსაც საკადრისს გიბოძებთ.

დედოფალმა მწიგნობართუხუცესს წყალობის სიგელი ჩამოართვა და თორელს გადასცა. თორელი ისევ მუხლებზე დავარდა და დედოფლის კალთას სამგზის სასოებით ემთხვია.

რუსუდანმა სელზე დაჯდომა უბრძანა. მგოსანი კრძალვით დაჯდა იმ სკამზე, რომელზედაც დიდი ვაზირები და ერისთავთ ერისთავები სხდებოდნენ ხოლმე.

– საბერძნეთის დიდ სულტანს სმენია ჩვენი ასულის სიტურფე, მრავალი ნიჭითა და ძღვენით შემოგვევედრა, რათა მივსცეთ ცოლად თამარი.

ბრძანა მეფემ.

თორელს გაგონილი ჰქონდა რუმის ძლიერი სულტნის ალადინ ქეიქობადის სახელი. ქეიქობადი თავის თავს აღმოსავლეთისა და ჩრდილოეთის ქვეყნების მფლობელს უწოდებდა. ხვარაზმელი სულტნის მძლავრობას მან მონგოლების მოსვლამდე დაუდო საზღვარი, თითქმის ბიზანტიის მთელი ზღვის გამოღმა ნაწილი ეპყრა და წინა აზიაში მეტოქე აღარავინ ჰყავდა.

– ეგ რომელი სულტანია, მეფევ, რუმის მპყრობელ ქეიქობადზე ხომ არ ბრძანებთ, დიდი რუქნადინის ძეზე? – იკითხა თორელმა.

– ქეიქობადი უკვე მიიცვალა. მისმა უმრწემესმა ძმამ ყიასედინმა დაიპყრო ქეიქობადის ტახტი და სრულიად საბერძნეთი.

– ყიასედინიც გამიგონია, მეფევ, თავისი გვირგვინოსანი ძმის მსგავსად, ომისა და შფოთის მოყვარულს არ ამბობენ, მაგრამ განათლებული ყოფილა ფრიად, რაც დედამიწის ზურგზე უცხო ფრინველი და ცხოველია, შემოკრებილი ჰყოლია. იმ მხეცების სანახავად და ფრინველების გალობის სასმენლად ქვეყნის ყოველი კუთხიდან მოდიან თურმე.

თორელმა ის აღარ თქვა, რომ ყიასედინი მარტო იშვიათი მხეცებისა და ფრინველების შეგროვებით კი არ იყო გართული, გრძნეულთა

მფარველობითაც ცნობილი იყო, ღვინის სმა და დროსტარება უყვარდა და უმშვენიერესი ქალების ჰარემიც არა ჰქონდა სამხეცეზე მცირერიცხოვანი.

– ფიცით აღგვითქვამს დიდებული სულტანი, რომ ჩვენს ასულს ქრისტეს სჯულს არ დაატოვებინებს და თავის სასახლესთან ეკლესიასაც აუშენებს სალოცავად.

– დიდი სიკეთე იქნება, მეფევ, საქართველოსთვის ესოდენ ძლიერისა და სახელოვანი სულტნის დამოყვრება. ჩემს ტყვედყოფნასა და უცხოობაში მეფის ასული იმოდენა გაზრდილა, მისი სიტურფის ამბავი შორეულ ქვეყნებსაც მისწვდენია. ღმერთმა ბედნიერჰყოს ბატონიშვილ თამარის დედოფლობა საბერძნეთში და ჩვენი მეფისა და საქართველოსთვისაც სასიკეთო ყოფილიყოს იკონიის დიდ სასულტნოსთან დამეგობრება!

თორელმა ხელაპყრობით შეავედრა უფალს მეფე და მისი ასული, მერე ისევ დაიხოქა და დედოფლის ფეხებთან ფარდაგს ემთხვია.

გვიან ღამემდე უჯდა დედოფალს პირისპირ თორელი და დაწვრილებით უამბობდა თავისსა და შალვას თავგადასავალს, ხვარაზმელთა სულტნის გაქცევისა და დაღუპვის ამბავს.

დედოფალმა დარბაზი შეჰკრიბა.

ხვარაზმელთა წასვლისა და ლიხთ-იმერეთიდან კარის გადმოსვლის შემდეგ, ეს დარბაზის პირველი კრება იყო. თორელიც მიიწვიეს მისი ახალი მაღალი მდგომარეობის შესაფერისად.

დარბაზს რომ თვალი მოავლო, თორელი გაოცდა. ძველ დიდებულთაგან ბევრი მოისაკლისა: ვარამ გაგელი არ მოსულიყო, ავაგ ამირსპასალარიც არ ჩანდა. ლიხსიქეთა მთავართაგან დადიანი და სვანთა ერისთავი არ იყვნენ.

ლიხსაქეთელი მთავრები ხვარაზმელთა ბატონობის დროს თავიანთ ციხეებში იკეტებოდნენ და მეფის კარზე ხლებას გადაჩვეოდნენ. ეტყობოდათ, არც ლიხსიქეთელები თვლიდნენ თავს ვალდებულად, მეფის მოწოდებაზე გამოცხადებულიყვნენ და მთლიანი განუყოფელი საქართველოს საქმეების გადაწყვეტაში მიეღოთ მონაწილეობა.

დარბაზში ახლები სჭარბობდნენ, თორელის არყოფნაში მიცვლილან ბრძოლებში დაცემულ მთავართა და დიდებულთა შვილები და მემკვიდრეები.

დარბაზმა ქვეყნის საგარეო და საშინაო მდგომარეობა განიხილა. ყველანი გახარებულნი იყვნენ ხვარაზმელთა გაქცევით. თორელი მეფის ახალი ვაზირებისა და დიდებულების გულუბრყვილობასა და სიბეცეზე მეტად მათმა პირმოთნეობამ და მამებლობამ გააოცა. ისინი ხვარაზმელთა გაქცევას საქართველოს მეფის გონიერი მმართველობითა და ქართველთა სპის გმირობით ხსნიდნენ. მათ არ იცოდნენ ჯალალედინის გაქცევისა და დაღუპვის ნამდვილი მიზეზი, ან თვალს ხუჭავდნენ მოახლოებულ საშიშროებაზე და მეფის წინაშე მლიქვნელობით თავიანთი მდგომარეობის განმტკიცებისათვის ზრუნავდნენ.

თორელმა სიტყვა მოითხოვა. ყველა სულგანაბული უსმენდა გარნისის გმირის მონათხრობს. მან გაოცება გამოსთქვა იმის გამო, რომ ქართველები ანგარიშს არ უწევდნენ მონგოლთა ახალი ურდოების გამოჩენას. მონგოლების შიშით გაიფანტა ჯალალედინის უზარმაზარი ლაშქარი, ხოლო თვით ძლიერი და უშიშარი სულტანი მათივე დევნით მოისპო. მონგოლები, დღეს თუ არა ხვალ, საქართველოშიც მოვლენ და ჩვენს სამეფოს დიდი მომზადება მართებს, რათა სრულიად არ აღვიგავოთ პირისაგან მიწისა. თორელმა სიტყვა დაასრულა და დარბაზს თვალი მოავლო: მიხვდა, რომ უმრავლესობას არ მოეწონა მისი ნათქვამი. კარის მგოსნისაგან მეფის გონიერებისა და ქართველთა სიმხნის ხოტბას მოელოდნენ. ის კი ქართველთა მტრების ძლიერების ამბავს მოჰყვა და ყვაავით სამეფოს ახალი უბედურება დასჩხავლა.

უმრავლესობამ თორელის ნათქვამი არაფრად ჩააგდო, მონგოლები შორს არიან და ჩვენამდე, ვინ იცის, როდის მოვლენო.

განსაკუთრებით ეპისკოპოსმა საბამ გამოიღო თავი: ღმერთმა ჩვენი მეფის გულმხურვალე ლოცვა ისმინა და ქართველთა სპას ხვარაზმელებზე ძლევა მისცაო. ღვთივგვირგვინოსანი დედოფლის ლოცვითა და ვედრებით, ღმერთი კვლავაც კეთილად წარუმართებს საქართველოს, გააძლიერებს მას და აღამაღლებს უფრო მეტად, ვიდრე თამარისა და დავითის მეფობის დროს იყო ძლიერი და ამაღლებული. საქართველო ღვთისმშობლის წილხვედრია და მარიამ ქალწული კვლავაც არ მოაკლებს მფარველობას ჩვენს ქვეყანას და მის უძლეველ მეფესო. საბა რიხითა და მჭექარე ხმით გაჰყიოდა, შიგადაშიგ უმრავლესობისათვის გაუგებარ უცხო სიტყვებს, მეტწილად ბერძნულსა და ლათინურს ურთავდა. მისმა ნათქვამმა ყველა მოხიბლა და აღიტაცა. თავისი სიტყვა დედოფლის მაღალფარდოვანი ქებით დაასრულა და უკანასკნელი სათქმელი რომ დაამთავრა, ვილაცამ დარბაზიდან ღვთისმშობლის საგალობელი წამოიწყო. მთელი დარბაზი ფეხზე წამოდგა და დედოფლისკენ მზერამიპყრობილმა ქვეყნის გამგებლებმა ერთხმად დიდი სასოებით იმღერეს «შენ ხარ ვენახი».

დარბაზის მეორე სხდომა საშინაო საქმეებს მიემდგნა.

მწიგნობართუხუცესმა არსენიმ გრძლად ილაპარაკა ხვარაზმელთა მხეცობასა და ქვეყნის აოხრებული ნაწილის გასაჭირზე. თორელს ეგონა, მწიგნობართუხუცესი გახიზნული მოსახლეობის უკან დაბრუნებისა და საქართველოს დანგრეული ნაწილის მოშენებისა და აღდგენის, მოშლილი მეურნეობის აღორძინების გზებს დაუსახავდა დარბაზს, მაგრამ თორელი აქაც მოტყუვდა: მწიგნობართუხუცესმა უპირველეს საზრუნავად მეფის ახალი სასახლის აშენება დასახა, თანაც ისიც დასძინა, ახალი პალატები ბევრად უნდა სჭარბობდეს სიმდიდრითა და ბრწყინვალეობით ცეცხლისაგან მოსპობილ რუსუდანისა და მისი წინაპრების პალატებს, რათა უცხოთა თვალში ქართველთა მეფის სახელსა და შარავანდედს შუქი და დიდება არ მოაკლდესო.

შემდეგ მწიგნობართუხუცესმა დარბაზს მეფის სალაროს დაცარიელება აუწყა: თბილისის აღებისას მთელი საჭურჭლე ჯალალედინს დარჩა და ლიხსიქით თუ რამ გვქონდა, ისიც ხვარაზმელებთან ომებზე დაიხარჯაო.

ასეთ პირობებში მეფესა და მის ვაზირებს ქვეყნის ძალთა აღდგენაზე უნდა ეზრუნათ უპირველესად, რათა დოვლათი მომრავლებულიყო, სახელმწიფოს შემოსავალი სწრაფად გაზრდილიყო და საქართველოსკენ დაძრული ახალი მტრის დასახვედრად ძლიერი ლაშქარი მომზადებულიყო.

ლამაზი და მდიდრული სასახლეების შენება ამ დროისათვის მიუტევებელ ფუფუნებად და დანაშაულადაც კი ეჩვენა თორელს, მაგრამ, როცა მწიგნობართუხუცესმა დარბაზს მოწოდებით მიმართა, ჩვენს სათაყვანებელ დედოფალს თავის სატახტოში ღამის გასათევიც არა აქვსო, ერის მთავრებს გული აუჩუყდათ და თვალები მოუწყლიანდათ. დარბაზმა ერთხმად დაადგინა, ახალი პალატების ასაშენებლად ხვამლის საგანძურიდან მეფეთა ხელუხლები საუნჯის ნაწილი გამოეტანათ და დაეხარჯათ...

ამ საერთო აღფრთოვანებასა და აღტყინებაში ორიოდ დიდებული შენიშნა თორელმა. ეტყობოდათ, არც ისინი ეთანხმებოდნენ დარბაზის ნაჩქარევ გადაწყვეტილებას, მაგრამ საყოველთაო განწყობილების წინააღმდეგ წასვლას ვერ ბედავდნენ და სიჩუმეს არჩევდნენ.

დარბაზი დაიშალა. თორელი გუნებადამძიმებული გამოვიდა. მოდიოდა გრძელ ტალანებში და თან იმას ფიქრობდა, თუ რა საოცრად შეერყია მტრის მძლავრობას, სულ რაღაც ექვსი წლის განმავლობაში, საქართველოს ძლიერების საფუძვლები. გავლენიან მთავართა უმრავლესობა ტახტსა და სრულიად საქართველოს საქმეებს გადგომოდა. მეფის ვაზირებსა და ახლობელ დიდებულებს სიმართლის თქმაზე ხელი აეღოთ და პირფერობასა და ლიქნს დაჩვეოდნენ. ყველა თავის პირად სიკეთეზე ფიქრობდა და ქვეყნის უშიშროებისათვის ზრუნვა ღვთისმშობლის კალთის იმედად დაეგდოთ. ქვეყნის მმართველთა უზრუნველობას უკვე დაენგრია ძველი საქართველო, ხოლო ახლანდელი მათი გულდაარხეინება და მარტოოდენ საკუთარ მოსახვეჭელზე ზრუნვა სამეფოს საბოლოოდ დალუპვას უქადდა.

ამ ფიქრებში თორელს მწიგნობართუხუცესის კაცი წამოეწია; ვაზირთუპირველესი გიხმობსო, _ მოახსენა.

თორელი მეფის პირველ ვაზირს ეახლა. ვაზირი ისე უდარდელ გუნებაზე დახვდა, თითქო ეს არის, საქართველოსთვის ახალი ყმადნაფიცი სამეფო შემოემატებინოს და აურაცხელი ხარკი მიეთვალოს. თორელი ხალისიანად მიიღო, მიუალერსა, მისი ნიჭი და მამულიშვილობა შეაქო. ბოლოს მთავარი სათქმელი უთხრა:

_ ჩვენს ხალხს ახლა გამხნეება სჭირდება, მას უნდა განვუმტკიცოთ ჩვენი მეფისა და საქართველოს უძლეველობის ის რწმენა, რომელიც ხვარაზმელებთან დამარცხებამ შეურყია. ხალხმა თავისი ძლიერება უნდა ირწმუნოს და ამ ძლიერების წყაროდ ღვთივგვირგვინოსანი დედოფალი რუსუდანი უნდა იწამოს ისე, როგორც თამარ მეფის დროს სწამდა ერს დიდი

თამარი ყველა სიკეთისა და ბედნიერების დასაბამად. საბა ეპისკოპოსმა უკვე შეადგინა იამბიკოდ თქმული მიმართვა ერისადმი. ამ მიმართვაში იგი დაახლოებით იმ აზრს გამოსთქვამს, რაც წელანდელ სიტყვაში გამოხატა, მაგრამ საბას ენა მძიმეა და ხელოვნური, მისი იამბიკო ხალხისათვის გაუგებარი იქნება და მას მარტო სამღვდელთა თუ გაიგებენ ამბიონიდან. შენი ლექსი ლაღია და ხალხისთვის მისაწვდომი; მას ზეპირად ისწავლიან და საკრავებზე დაამღერებენ. შენ უნდა თქვა დედოფლის ხოტბა. არა მარტო მის წარბ-წამწამს, თმათა და ბაგე-კბილს უნდა შეასხა ქება, არამედ მის გონიერებასა და ღვთისმოშიშობას, სახელმწიფოსათვის ზრუნვასა და ხალხისათვის თავდადებას. ქართველთაგან ხვარაზმელების ძლევასა და განდევნას დიდი ადგილი უნდა დაუთმო ქებაში და ეს ძლევაც უფლის მიერ ჩვენი დედოფლისათვის მონიჭებულად უნდა აღიარო.

– მერე სად და როდის სძლია ჩვენმა სპამ ხვარაზმელებს? ისინი მონგოლებმა გაჰვანტეს და გააქციეს, – შებედა დაოკებული ბრაზისაგან წამოწითლებულმა თორელმა.

– მაგას მნიშვნელობა არა აქვს, თუ ვინ სძლია და გააქცია, – განაგრძო არხეინად მწიგნობართუხუცესმა, – ჭეშმარიტება ისაა, რომ ხვარაზმელები იძლივნენ და გაიქცნენ. შენ ეს ძლევა ჩვენს მეფესა და მის სპას უნდა მიაწერო. ხალხმა ხვარაზმელთა გაქცევის ნამდვილი მიზეზი არ იცის და ამიტომ შენ ვერავინ გამოგედავება. ხალხს უფრო გაახარებს, თუ იმას ეტყვი, ქართველთა ჯარმა ხვარაზმელებს ზურგზე ბოლი ადინა და კუდით ქვა ასროლინაო. ხალხს სწორედ ასეთი გამხნელება სჭირდება და შენ, როგორც ღირსეულმა მამულიშვილმა, მეფესა და ხალხს ეს სამსახურიც უნდა გაუწიო.

თორელს უნდოდა, ისევ შეკამათებოდა, მაგრამ მწიგნობართუხუცესთან დავა ზედმეტად ჩათვალა.

– ვიფიქრებ... ვეცდები...

წარმოსთქვა და წამოდგა;

– ახალი მტრის, მონგოლების მოახლოებულ საფრთხეზე ნურაფერს დაწერ, ხალხს დააშინებ და გულს გაუტებ. ღვთისმშობლის კალთა კი არ დაგავიწყდეს, საქართველო ღვთისმშობლის წილხვედრია და ჩვენს ქვეყანას კვლავაც მისი კალთა დაიფარავს!..

– ვიფიქრებ... თუ შევძელი, ვეცდები... – გაუმეორა გაურკვეველი პასუხი თორელმა და გამოემშვიდობა.

– მეჭურჭლეთუხუცესთან შეიარე, ამ ლექსის ჯილდოს წინასწარ მოგიტოვლის... თუმცა შენ ახლა მთავარი ხარ და მეფის ეს წყალობა, ალბათ, მცირედ მოგეჩვენება.

დაადევნა გაღიმებულმა მწიგნობართუხუცესმა, მაგრამ ყელში მომდგარი ბოღმისაგან გასიებულს, ჩქარი ნაბიჯით მიმავალ თორელს მისი სიტყვები აღარ გაუგონია.

რუსუდან მეფემ რომ გულითადად მიიღო და მთავრობაც უწყალობა, თორელის წვევა ყველა მთავარმა სავალდებულოდ ჩათვალა. პატიჟებდნენ თურმანს, საქართველოს ერთი კუთხიდან მეორეში იწვევდნენ და საიქიოდან მობრუნებულივით უსმენდნენ ტყვეობაში ნახულსა და გაგონილს, ძლიერი და აღმატებული სულტნის საოცარ თავგადასავალს, მისი გმირობისა და დაღუპვის ამბავს.

ყველაზე პირველად ავაგ ამირსპასალარმა იწვია თორელი. გარნისის მარცხის გამო ათასგვარი ჭორი იყო გავრცელებული და მხარგრძელის მემკვიდრესთან თორელის სტუმრობას ერთხელ კიდევ უნდა დაერწმუნებინა ხალხი ივანე ათაბაგის უდანაშაულობაში.

გულწრფელი სიხარულით შეხვდა თავის ტოლსა და მეგობარს, საქართველოს კეთილდღეობის დროს მისი ლხინისა და შექცევის მუდმივ მონაწილეს.

ბიჯნისში დიდი ნადიმი გადაიხადა, თორელის პატივსაცემად სამეფოს წარჩინებული პირები ისტუმრა და გარნისის გმირს ღირსეულად გაუმასპინძლდა.

ავაგს მამის სახელო _ ამირსპასალარობა მემკვიდრეობით მიეღო, მაგრამ, ჯერ არსად, არც ერთ ომში ქართველთა ერთიან სპას არ გასძლოლოდა, არც ერთი, ცოტად თუ ბევრად _ სახელოვანი ბრძოლა არ გადაეხადა. მეფის ეს მთავარი ვაზირი ჯალალედინის თარეშის დროს ბიჯნისისა და კაენის ციხეებში იყო შელტოლვილი. სრულიად საქართველოს ამირსპასალარი ქუთაისში გადასულ მეფის კარზე იშვიათად ცხადდებოდა და ლაშქრის შეკრებასა და საომრად გაწყობაში თითქმის არ მიუღია მონაწილეობა. ციხეების მიუდგომლობით დაიმედებული ავაგი წვრილ-წვრილი ბრძოლებითა და უმნიშვნელო გამოხდომებით აწუხებდა ხვარაზმელებს დროდადრო. ახლა, ხვარაზმელები რომ გარდაქარდნენ, მხარგრძელის მემკვიდრემ ძლივს დაისვენა, მშვიდსა და უზრუნველ ცხოვრებას შეჩვეულ ავაგს ახალ ომსა და შფოთზე ფიქრიც არ უნდოდა. მონგოლების ამბები შორიდან ესმოდა, მაგრამ საგანგებოდ არ იძიებდა, არ იცოდა, საქართველოდან შორს, სამხრეთით რა ხდებოდა.

ამირსპასალარს სჯეროდა, რომ მონგოლები ჯერ კიდევ დიდხანს ვერ მოადწევდნენ საქართველომდე, ისიც ეეჭვებოდა, საერთოდ, მოვიდოდნენ თუ არა ისინი ჩვენს ქვეყანაში.

_ თუ მოვლენ, როგორც ერთხელ წავიდნენ, ისე წავლენ, _ უთხრა თორელს ამირსპასალარმა.

_ მაშინ საქართველოს დასაპყრობად და აქ დასამკვიდრებლად არ იყვნენ მოსულნი. საქართველოში შემოჭრილ მონგოლთა მეწინავე ჯარს ქვეყნის გამსტოვრვა და გზების შესწავლა ჰქონდა ჩინგიზისაგან დავალებული. ახლა თათართა უმთავრესი ლაშქარი დაიდრა ჯებესა და სუბუდაის მიერ გაკვლეული გზით. ესენი დაპყრობილ ქვეყნებში დამკვიდრდებიან, კალიასავით მოედებიან და ყველაფერს გააჩანაგებენ. ამიტომ ახლა

პირვანდელზე მეტი სამზადისი გვმართებს. სანამ დრო არი, უნდა მოვემზადოთ და იმაზე მეტი ლაშქარი უნდა შევკრიბოთ, ვიდრე ლაშას ჰყავდა იმ პირველი შებრძოლებისას.

– ხუმრობ, თორელი? – მწარედ გაეცინა ამირსპასალარს. – იმოდენა ჯარს საქართველო კარგა ხანს ვედარ შეკრებს, ქვეყანა ჯალალედინისაგან მოოხრებულია, მოსახლეობა გაჟლეტილი, ხალხი დაშინებული და გატეხილი.

– მაშ, უომრად გავულოთ კარი მონგოლებს? გულხელდაკრეფილი შევხვდეთ მტრის მოსვლას?

– უომრად რადა? ყველანი ჩვენ-ჩვენსას ვეცადოთ. საქართველო მთიანი ქვეყანაა. ჩვენს მიუვალ ციხეებს ისინი ეგრე იოლად ვერ აიღებენ. მათი ცხენები ჩვენს მთებში ფეხს ვერ მოიკიდებენ, თავიანთი ურიცხვი ჯოგებისთვის საძოვრებს ვერ იშოვნიან და როგორც მოვლენ, ისევე წავლენ...

ამირსპასალართან საუბარმა ცუდ გუნებაზე დააყენა თორელი. საქართველოს მხედრობის სარდალმა, რომელსაც ქვეყნის უშიშროებაზე ზრუნვა ევალებოდა, მდგომარეობაში ვერ ერკვეოდა, უსაშინლესი მტრის მოახლოებას უდარდელად უყურებდა და ხელსაც არ ანძრევდა სრულიად საქართველოს დაცვისათვის, ლაშქრის შეკრებასა და საომრად მომზადებისათვის.

გულგატეხილი, იმედგაცრუებული წამოვიდა ავაგისაგან თორელი.

გზად შალვა ახალციხელის მამიდაშვილს ვარამ გაგელს გამოუარა.

ლაშქრობაში გათეთრებულს, თამარისა და მისი მემკვიდრეების უცვლელ ვაზირს ვარამ გაგელს მეფეზე და მის ხელისუფლებაზე გული აყრილი ჰქონდა.

– ჩვენი ქვეყანა მაშინ დაიღუპა, ლაშა რომ დავკარგეთ. საქართველოს რომ ძლიერი მეფე ჰყოლოდა, გარნისის უბედურება არ მოხდებოდა და მტერი ჩვენს მიწა-წყალზე ფეხს ვერ შემოდგამდა. – ოხვრით თქვა ვარამმა.

– მაგაზე მეც ბევრი მიფიქრია. ლაშა ვაჟკაცი იყო, თავკერძა მთავრებს ან დაიმორჩილებდა, ან დავით აღმაშენებელივით მოიშორებდა, ლაშქარს თავად გაუძღვებოდა და სარდლების ურთიერთმტრობას დროზე აღკვეთდა, – დაუდასტურა თორელმა.

– სუსტსა და უნებისყოფო ქალს რა უნდა მოვთხოვოთ. ჯალალედინი რომ გარნისს შემოადგა, დედოფალი ფეხმძიმედ იყო, იწვა, მერე უბედურმა ჩვილი ყრმით თბილისიდან ძლივს გაასწრო შემოსეულ მტერს. მეფის კარი ქუთაისს გადავიდა. იქ თავი მტრისგან უშიშრად იგრძნეს. ისევ ძველებურ განცხრომას მიეცნენ და ხვარაზმელთაგან დაპყრობილ საქართველოზე ფიქრი დაივიწყეს.

– აკი გამუდმებით ვებრძოდით ჯალალედინსო?

– ვებრძოდით, როგორც შეგვეძლო, ციხეებსა და მთებში გახიზნულები. ჯალალედინი რომ წავიდოდა, მის მიერ დატოვებულ ჯარს ვუსწორდებოდით. სულტანი მობრუნდებოდა და ისევ მარტონი ვრჩებოდით მისი ურიცხვი ლაშქრის პირისპირ. მარტო ჩემი სამკვიდრო რამდენჯერ მოაოხრა ჯალალედინმა, ბოლოს, ქართველთაგან თბილისის აღებისა და გადაწვის

ჯავრი გაგსა და შამქორზეც იყარა, ღამე მოულოდნელად შემოგვესია და ქვა ქვაზე აღარ დატოვა.

– მე ასე მითხრა მეფემ, ბევრჯერ შევეყარეთ ურიცხვი ლაშქარი, მაგრამ ვერა გავაწყვეთ რაო.

– ლაშქარი კი შეჰყარეს, მაგრამ ყველა საქმეს და, მით უფრო ომს, თავი უნდა. სანამ ჩვენი მეფე ლაშქარს შეჰყრიდა, მთელი ქვეყანა იტყობდა, რომ საომრად ემზადებოდა. მტერმა წინასწარ იცოდა, შებმას გვასწრებდა და გვამარცხებდა.

უკანასკნელი დიდი ომი ბოლნისთან მოგვიხდა. ყველაფერი კარგად იყო გამოთვლილი და აწონილ-დაწონილი, სამხრეთიდან ხლათის მელიქისა და რუმის სულტნის ლაშქარი უნდა შემოგვერთებოდა; ჩვენც ბლომად ვიყავით, ამოდენა ლაშქრით ჯალალედინს ნამდვილად ვძლევდით, მაგრამ სანამ ჩვენი მოკავშირეების ლაშქარი დაიძვრებოდა, სულტანმა უკვე იცოდა ჩვენი განზრახვაც, ლაშქრის რაოდენობაც და პაემნის ადგილიც.

ფიცხელმა ჯალალედინმა აქაც დაგვასწრო, ბოლნისის ხევში თავს დაგვესხა და ისე გაგვანადგურა, ჩვენი მოკავშირეები ჯერ კიდევ თავიანთი ქვეყნის საზღვრებს არ იყვნენ გამოცილებულნი. მეფე თუ მხედარიც არ არი და ლაშქარს წინ არ მიუძღვის, იმ სამეფოს გამარჯვება არ უწერია.

– არც თამარი იყო მხედარი და ჯარის წინამძღოლი, მაგრამ ჯალალედინზე ბევრად მრავალრიცხოვანი ლაშქრით შემოსეულ სულტან რუქნიდინს სძლია და ბევრი სხვა ძლიერი ომიც სახელოვნად გადაიხადა.

– ჰმ, თამარი! თამარი ღვთის სწორი იყო ჭეშმარიტად, მისთვის თავგანწირვა ღვინად უჩნდა ყოველ ქართველს, დიდსაც და პატარასაც, დიდებულსაც და მდაბიოსაც. თამარი თავისი ღვთაებრივი ბუნებითა და სიბრძნით სჭვრეტდა ქვეყნის მომავალსა და თვითონაც თავდადებული იყო ყოველთა ყმათათვის, რომელნიც თავს სდებდნენ მამულისა და ტახტისათვის. თამარი ღვინსა და შექცევაში როდი ათენებდა ღამეებს. ლოცვასა და ქვეყნის საზრუნავში ასწორებდა დღესა და ღამეს, ერთგულებს უხვად გვაჯილდოებდა, ხოლო ორგულებსაც ერთგულებაზე მოაქცევდა თავისი ღმობიერებითა და გულმოწყალებით. თამარს რომ მისი საქმის ღირსეული გამგრძელებელი დარჩენოდა და ას წელიწადს კიდევ ჩვენს ქვეყანას მისი გზით ევლო, საქართველოს სამეფო საბოლოოდ განმტკიცდებოდა და მისი ძლიერება უკუნითი უკუნისამდე გაგრძელდებოდა.

– ეგ როგორ, მთავარო?

– საქართველოს, სულ ცოტა, ასი წელიწადი კიდევ უნდოდა, რომ სომხეთი მთლიანად ქართველთა აღსარებაზე მოქცეულიყო. აგრეთვე, მთის ტომები, ლეკნი და ალანნი, ჯიქნი და ძურძუკნი ჩვენს სარწმუნოებაზე იყვნენ გადმოსულნი, მათ საყდრებში წირვა-ლოცვა ქართულ ენაზე იყო; კიდევ ასი წელი და, ისინი სრულიად გაქართველდებოდნენ. როცა ამდენი ტომი და ხალხი ერთი სარწმუნოებითა და ენით, ერთი სკიპტრის ქვეშ შედუღდებოდა, მაშინ ვინღა იქნებოდა ქართველთა წინააღმდეგობა.

– ვაგლახ, ჩვენმა თაობამ დალუპა საუკეთესო ქართველთა ეგ ოდინდელი ოცნება!

– დალუპა და, ვინ იცის, ეგების საუკუნოდაც.

– ვინ იცის! – ამოიოხრა თორელმა და თან გული ამოატანა.

– საქართველო მეტისმეტმა სიმდიდრემ და უზრუნველმა ცხოვრებამ დალუპა. ქართველებმა დავივიწყეთ, რომ ეს სიმდიდრე ხმლით იყო მოპოვებული და ხმლითვე უნდა დაგვეცვა. ცხოვრების გემოს მიყვებით, ლხინსა და შექცევას გადავეგეთ და ამასობაში ჩვენი სიმდიდრის საძირკველი – ქვეყნის ძლიერება ფეხქვეშ გამოგვეცალა.

– უბედური ყოფილა ჩვენი თაობა, მეფით დაწყებული და აზნაურით გათავებული. ჩვენ უნდა ვაგოთ პასუხი მომავლის წინაშე და რას ვეტყვით ჩვენს უბედურ შთამომავლებს, რომელთაც აყვავებული და სვიანი სამეფოსაგან პარტახსა და ნაოხარს ვუტოვებთ და მონობასა და ბორკილებს ვუანდერძებთ.

– მარტო ჩვენი თაობის ბრალიც არ არი, თურმან, ქვეყნის ესოდენ დაცემა. საქართველოს სამეფოს ეს ჭია დიდი ხანია ღრღნის და ბოლოს ჩვენს დროში მოერია. ღვთივკურთხეული თამარის სასაყვედუროდ ენა როგორ მომიბრუნდება, მაგრამ, შემინდოს მისმა სიწმინდემ და, ზოგი რამ მასაც მოეკითხება: ის, რაც თვითონ მოიკლო დიდმა თამარმა – ნებივრობა და უზრუნველობა, განცხრომა და განსვენება – თავის მემკვიდრეებს უზომოდ მიანიჭა, აზიზად აღზარდა და მეტისმეტად გაანებივრა. თამარს მისმა კარისკაცებმა, დიდებულებმა და აზნაურებმაც მივბადეთ. ჩვენ რაც განსაცდელი გვინახავს, ჩვენს შვილებს არ ვანახვეთ, შრომასა და გაჭირვებას არ შევაჩვიეთ, დარდიმანდი და უზრუნველი თაობა აღვზარდეთ. ჩვენს შვილებს ეგონათ, მშობლების ხელის შემყურენი სულ ასე არხეინად იცხოვრებდნენ, თავათ ხელს არ ანძრევდნენ და ერთიმეორეს განცხრომაში ეჯიბრებოდნენ. თამარი და ზაქარია მხარგრძელი მიიცივალნენ, საქართველოს სიმტკიცის კედელი მოერღვა. ჭირნახული მშობლები დაიხოცნენ, ლხინს გადაყოლილი შვილები დარჩნენ, მამების ხმლით მოგებული გაფლანგეს და გაფანტეს, ქვეყანას ვერ გაუძღვნენ, უძლეველი სამეფო დაასუსტეს და მისი ძლიერება დასცეს... როგორც ხედავ, მარტო შენი ტოლები კი არ არიან დამნაშავენი ქვეყნის ძლიერების შერყევაში. ეგებ დიდ თამარსაც და სახელოვან მხარგრძელებსაც, მეცა და სამეფოს სხვა მეთაურებსაც, ერთნაირად მიგვიძლოდეს ბრალი შთამომავლობის წინაშე იმ მწარე ბედის გამო, რომელიც მას გავუმზადეთ და ვუანდერძეთ.

– საკვირველი ის არი, ქვეყნის ყველა მესვეური აგრე კარგად ხედავს ჩვენი სამეფოს დაცემის მიზეზს, მაგრამ ვერავინ შებრძოლებია მას, ვერავის ჩაუდგამს ერთობისა და მამულიშვილობის ძლიერი სული ცალ-ცალკე გამდგარი მთავრებისა და დიდებულებისათვის.

– სულის ჩადგმა მხოლოდ ღმერთს შეუძლია, თურმან, ან ღვთის მიერ მირონცხებულ ძლიერ მეფეს. მე და შენ, ან სხვა რომელიმე მთავარს, არავინ დაგვემორჩილება და გაგვეყვება. ქვეყანას ძლიერი, გონიერი და მზრუნველი

მეფე სჭირდება. სანამ საქართველოს ასეთი ხელმწიფე არ გამოუჩნდება, მანამ მისი სიკეთე არ იქნება.

– სანამ ახალი მემკვიდრე დავაჟაკდება და სამეფოს მართვას შესძლებს (ისიც, ვინ იცის, იქნება თუ არა ძლიერი და გონიერი), მანამ ჩვენს ქვეყანას მონგოლთა ურდოები წალეკავენ.

– შენ რომელ მემკვიდრეზე ამბობ?

– დავით რუსუდანის ძეზე. ჩემს ტყვედყოფნაში იგი უკვე მეფედ გიკურთხებიან და რუსუდანის თანამოსაყდრედ დაგიდგენიან.

– ხუთი წლის ჩვილის მეფობა არსად ნახულა, თურმან. მე მის კურთხევას არ დავსწრებივარ და არც დასტური მიმიცია. თუ მეფის დასმა იყო, რუსუდანს ლაშას ძე დავითი უნდა დაესვა მეფედ და თანამოსაყდრედ, რადგან იგი იყო ლაშას მემკვიდრე. თავად რუსუდანმა ფიცი მისცა თავის გვირგვინოსან ძმას, რომ მის ძეს დავითს გაამეფებდა. ახლა დედოფალმა ფიცი გასტეხა, ძმის ანდერძი დაარღვია და ტახტზე თავისი ძე აიყვანა.

– ლაშას შვილი დავითი უკანონო ძედ ითვლება, რადგან წმინდა ეკლესიისაგან არ იყო ნაკურთხი ლაშას და ლილეს ცოლ-ქმრობაო.

– როგორ, განა მარტო ხუცესთაგან ჯვრის გარდასახვაშია ცოლ-ქმრის გვირგვინის კანონიერება? რით არ იყო ლაშასა და ლილეს ცოლ-ქმრობა კანონიერი? ერთმანეთი უზომოდ უყვარდათ და ეკლესია არ შეურაცხუყვიათ, კათალიკოსი და დიდებულების გავლენიანი ნაწილი რომ წინ არ აღდგომოდნენ, ჯვარს დაიწერდნენ (აკი გულით ევედრებოდნენ, ჯვარი დაგვწერეთო!) და მათი შვილის მემკვიდრეობაც კანონიერი გახდებოდა. ლაშას ძე დავითი ქრისტესმოსავი ქართველი ქალის მიერ არის შობილი, ხოლო ეგ კანონიერად აღიარებული მემკვიდრე, თურქი სულტნის ძის, მოღალატე მოღასედიანის შვილია. რომელი უფრო კანონიერი მეფე იქნება საქართველოსთვის – ქართველი მანდილოსნის, ქრისტეს მლოცველი ლილესა და გვირგვინოსანი ლაშას ძე, თუ რუსუდანისა და შინაგამცემის, მაჰმადის რჯულზე უკანვე გადასული თურქის – მოღასედიანის მემკვიდრე?

– მაგათ მეფობას, ალბათ, ჩვენ ვერ მოვესწრებით, ორივე ჩვილია და უასაკო. სანამ საქართველოს ძლიერი მეფე არა ჰყავს, თქვენ უნდა ამოუდგეთ სუსტსა და უღონო დედოფალს მხარში. შენ, ვარამ, შენსავით ბრძენი და გამოცდილი მთავრები და ვაზირები უნდა იყოთ რუსუდანის მრჩევლები და შემწეები, როგორც თამარის დროს იყავით ძმები მხარგრძელები, შენა და ახალციხელები მეფის თანამდგომელნი, მისი მორჩილი და ერთგული მსახურნი. შენ და შენებრ ნამსახურმა სხვა დიდებულებმა უნდა გასწმინდონ მეფის კარი პირმოთნე და მხვეჭელი ვაზირებისაგან, საქართველოს სამეფო ისევ მეფის გვირგვინქვეშ უნდა გააძლიეროთ და გაამაგროთ ქვეყნის საზღვრები ახალი, ძლიერი მტრის დასახვედრად. შენ თავათ სახელოვნად ებრძოდი მონგოლებს პირველი მოსვლისას. მაშინ მონგოლთა მხოლოდ მეწინავე ჯარი გვეომებოდა ჯებე და სუბუდაი ბადათურების მეთაურობით. ახლა მონგოლთა მთავარი ლაშქარი მოდის, ქვიშის უმრავლესი და გრიგალისაგან უძლიერესი. ამათი

დახვედრა უფრო ძნელი იქნება, რადგან ჩვენზე ძლიერი სახელმწიფოებიც ვერ აღუდგნენ წინ. ამიტომ, ვიდრე ჩვენგან კიდევ შორს არიან და დრო გვაქვს, დიდი ლაშქარი უნდა შევკრიბოთ და მოვამზადოთ.

– მაგ საქმისაგან არა გამოვა რა, – ხელი ჩაიქნია ვარამ გაგელმა, – ჯალალედინი საქართველოს ბედისწერად იქცა. ისე დაგვამხო და დაგვაუძღურა, რომ საქართველო ძლიერ მონგოლებს წინ ვეღარ აღუდგება. საქართველო ღონეგამოცლილი და სულიერად გატეხილია. ღონისა და სულის მობრუნებას კი დრო უნდა და პირობები. მონგოლები ამდენს არ გვაცლიან და საქართველოს წინააღმდეგობაც წინასწარვე განწირულია...

სამეფოს ორი მთავარი ვაზირი მოახლოებული საფრთხის წინაშე სრულ დაბნეულობასა და უძღურებას იჩენდა, ორივენი, ქვეყნის ძალების მოკრებისა და ამოძრავების მაგივრად, ხელს არ ანძრევდნენ და თავს იტყუებდნენ თავთავიანთი ციხეების მიუდგომლობას მინდობილნი. მეფე და მისი კარი ძველებური ფუფუნებით ცხოვრებას განაგრძობდა, სამეფოს საზღვრების გამაგრებასა და ლაშქრის მოკრებაზე არავინ ზრუნავდა და სახელმწიფოს უკანასკნელი სახსრები ახალი სასახლეების მშენებლობაზე იხარჯებოდა.

ქალაქები და სოფლები ისევ ნანგრევებად რჩებოდა, მტრისაგან დაშინებულ, განაწამებ ხალხს სახლ-კარის აღდგენაში არავინ შველოდა, ხალხი შიმშილსა და სახადს ებრძოდა, ნასახლარები მრავლდებოდა. საჭემიშვებული ქვეყანა თავქვე მიექანებოდა.

ერთადერთი იმედი ისღა იყო, მონგოლები საქართველოში არ მოსულიყვნენ. თორელმა კარგად იცოდა ამ თავმოსატყუარი იმედის ფასი, მაგრამ რაკი სხვა ნუგეში აღარსაიდან იყო, წყალწაღებულივით ისიც ამ ხავსს ეჭიდებოდა და ქვეყნის გადარჩენის ერთადერთ შესაძლებლობას იმაში ხედავდა, რომ ბაღდადის ხალიფთან და სხვა სამუსულმანო ქვეყნებთან შეჯახებისას თათრები დაბრკოლდებოდნენ, საქართველოში მოსვლას შეაგვიანებდნენ.

თორელი ახალდაბაში თავმეფარებულ შვილთან და სიდედრთან ავიდა, იქ მამულები იყიდა და საბოლოოდ დასახლება გადაწყვიტა. თურმანის ერთადერთი ვაჟი შალვა უკვე წამოზრდილიყო. ყმაწვილი პირწავარდნილი დედა, ცაგოს ნამდვილი ასლი იყო. ზოგჯერ დაფეთებულ შვილის ნუკრივით გამოხედავდა პატარა შალვა, თურმანს წამით მოეჩვენებოდა, რომ ცაგო უყურებდა და გული ეკუმშებოდა. ხასიათითაც დედას ჰგავდა თურმანის ვაჟი – ამაყი და შემმართველი, ლმობიერი, მაგრამ ძნელად დამთმობი.

თურმანმა თავისი დარჩენილი სიცოცხლის ერთადერთ გამართლებად პატარა შალვას აღზრდა დასახა, ბავშვს ჩაუჯდა და გულმოდგინედ დაუწყო წვრთნა. წიგნის კითხვასა და წერას რომ მორჩებოდნენ, მინდორში გაიყვანდა, ცხენოსნობასა და მობურთალობას, ხმლის ქნევასა და ფარის ფარებას

ასწავლიდა და ბალღზე მეტად თავათ თორელს უხაროდა, რომ მისი ვაჟი წიგნშიაც და სამამაცო საქმეშიც ერთნაირად იჩენდა ნიჭსა და მონდომებას.

– შალვას ემსგავსება, თავის დიდ ბიძასა და სეხნიას! – თავმოძვრნედ იტყოდა ხოლმე თორელი და გულში მართლა სულ იმას ნატრობდა, შვილი შალვა ახალციხელივით ახოვანი, ძლიერი და გონიერი აღეზარდა, მისთვის სამშობლოსა და ერის უანგარო სიყვარული ჩაენერგა და მამულისათვის განათლებული მოღვაწე, მიუთხრობელი მეომარი და ერთგული მსახური მოემზადებინა.

ორი თვეც არ იქნებოდა გასული, შიკრიკმა მწიგნობართუხუცესის ბარათი მოუტანა თურმანს. არსენი მამობრივად მოიკითხავდა თორელს, მეფის კარზე ველარ გხედავთ, თავი მოგვანატრეო, – სწერდა და ბოლოს აღთქმულ რუსუდანის ქებას ახსენებდა, ეპისკოპოსმა საბამ უკვე გამოსთქვა თავისი იამბიკონი, აქ ყველას მოგვწონს, მაგრამ შენსასაც მოუთმენლად ველითო.

მეფის კარზე ისედაც გულაყრილ თორელს ამ ბარათმა კიდევ უფრო დაუმძიმა გუნება, საბას ხსენებამ თვალწინ დაუყენა მლიქვნელებისა და ფარისევლების ხროვა, რომელთაც არავითარი წმიდათაწმიდა არ გააჩნდათ, მაღალი სახელისა და ხარისხისაკენ დაჟინებით მიიწევდნენ და ხელისუფლებას მხოლოდ იმისთვის იყენებდნენ, რომ ქრთამი და გამორჩენა მეტი ჰქონოდათ, სიმდიდრე და ქონება მეტი მოეხვეჭათ.

მაგრამ მწიგნობართუხუცესის ბარათმა ისიც შეახსენა თორელს, ამდენ ხანს კალმისთვის ხელი რომ არ მოეკიდნა და ლექსი არ დაეწერა.

საქართველოს თავსდამტყდარი უბედურებით შეწუხებული, ქვეყნის მესვეურთა უზრუნველობით აღშფოთებული თორელი წერად დაჯდა.

რამდენი დრო გასულა, რაც ლექსი აღარ დაუწერია, თითქო გადაჩვევია კიდევ. წერის დაწყება გაუჭირდა, პირველი სტრიქონების დაწერა. მერე კი ძველებურად ლაღად გაშალა ფრთები და ლექსიც თავისით მოვიდა. დიდის გზნებითა და შთაგონებით წერდა თორელი, ოღონდ მეფის კარის მიერ შეკვეთილ რუსუდანის ქებას კი არა, თავისსა და ხალხის გულისთქმას. დიდი შინაგანი ტკივილი და მწუხარება გადაჰქონდა მგოსანს ქალღღუღე.

თორელი შალვა ახალციხელის ქებას წერდა.

პირველ თავებში მგოსანი ახალციხელის მიუთხრობელ გმირობასა და უანგარო მამულიშვილობას ასხამდა ხოტბას: ბასიანისა და შამქორის უძნელეს ომებში, განძისა და ნახჭევნის აღებაში, შავი ზღვის შორეული ნაპირისა და ყაზვინამდის ირანის დალაშქვრაში, ყველგან ახალციხელის სიმხნე და ხმალი ბრწყინავდა, მონგოლებთან ძლიერ ომშიაც შალვა ახალციხელი იდგა რვალის უმაგრესად. ხოლო დაწყევლილ გარნისის ბრძოლაში იგი ერთადერთი იყო ქართველ მთავართაგან, რომელმაც მტრის სიმრავლეს არ ჰრიადა, ხვარაზმელებს ზოგიერთივით ზურგი არ აჩვენა და თუმცა ცხენიც მოუკლეს და ხმალიც ვადაში გადაუტყდა, თავის ძმასთან ივანესთან ერთად პატიოსნად და გმირულად გაუმკლავდა მტერს. ამის შემდეგ მოდიოდა დატირება ოთხი

ათასი მესხისა, რომელთაც მამულისა და ტახტისათვის უდრტვინველად დასდეს თავი გარნისის კლდეებთან და თუმცა მტრის სიმრავლით იძლივნენ, საუკუნოდ უკვდავჰყვეს ქართველთა სიმამაცე და სამშობლოსათვის თავგანწირვა. განსაკუთრებით ძლიერი «ქების» ეს თავები იყო. აქ მგოსანი მშობლიური ბუნების მიმზიდველ სურათებს და მესხეთის შესანიშნავი ვაჟკაცების სახეებს ხატავდა. გულის ღრმა ტკივილით დასტიროდა თავისიანებს და წყევლასა და შეჩვენებას უგზავნიდა იმ მოღალატეებსა და შინაგამცემებს, რომელთაც მესხების მიუშველებლობითა და განწირვით საქართველოს ძლიერება გასწირეს და დაამხეს.

«ქების» უკანასკნელ თავებში თორელი შალვას დატყვევებისა და ბოლოს, გმირთა სიკვდილით მისი მოკვლის ამბავს გადმოსცემდა. მას სამშობლოს დიდებისათვის წამებულად, მამულისა და რჯულისათვის ტანჯულ მოწამედ, სიკვდილითა სიკვდილის დამთრგუნველ ეროვნულ გმირად, ერის დიდებად და სინდისად აცხადებდა. დასასრულ, შალვა ახალციხელის სახელით, მგოსანი ქართველ ვაჟკაცებს საშინელი მტრის, საქართველოსაკენ დამრული მონგოლების დასახვედრად ფეხზე დადგომას, თათართა ურდოების გზის გადასაღობად ამხედრებას მოუწოდებდა. «ქება» სამშობლოს დიდების ჰიმნით მთავრდებოდა.

რამდენიმე დღეს გაბრუებულივით იყო თორელი. ამდენი ხნის ნაფიქრალი თითქმის სულმოუთქმელად გადაიტანა ქალაქად და უკანასკნელი წერტილი რომ დასვა, ისეთი შვება იგრძნო, თითქო მხრებიდან დიდი ტვირთი მოეხსნას. «ქება» რამდენიმე ცალად გადაწერა: ერთი შალვას ოჯახს გაუგზავნა თორში, მეორე – შალვას მამიდაშვილს ვარამ გაგელს გაგში, ერთიც – პავლია კუტს მონასტერში; ორიოდე ცალი ხურჯინში ჩაიდო და თბილისის გზას გაუდგა.

ქალაქში შემოსული თორელი ქუჩებსა და მოედნებს აკვირდებოდა.

დაქცეული და ნახანძრალი სახლები შეეკეთებინათ, აქა-იქ ახალი შენობებიც წამოეწყობოთ, ზოგან ქულბაქები და სავაჭროები გაემართათ. შებოლილი, მინებჩამტვრეული სახლები და ჩახერგილი, ვიწრო ქუჩები პირველყოფილთა საცხოვრის ხვრელებსა და სოროებს უფრო ჰგავდა. მტკვრის პირას ცადატყორცნილი ხარაჩოები შორიდანვე თვალში ეცა: რუსუდანის ძველ ნასახლარზე ახლის კედლები წამომართულიყო, უთვალავ ურემს ქვა და კირი, აგური და ფიცარი მიჰქონდა იმ სასახლისაკენ, შენობას უამრავი მუშა, კალატოზი და დურგალი ფუტკარივით დახვეოდა.

ვიწრო ქუჩაში შემოსულ თორელს ცეცხლმა მიანათა. ცხენი შეაყენა. სახელოსნოში ქურა ენთო, თიხას სწვავდნენ. სახელოსნოს წინ წვერმოშვებული კაცი იჯდა, ჩონგურს აჩხაკუნებდა და დაბალი ხმით რაღაც სიმღერას ბუბუნებდა, თორელმა ვაჩე იცნო, უსინათლო მხატვარი.

მაშინვე ცხენიდან ჩამოხდა, მიესალმა, გადაჰკოცნა, ვაჩემ ჩონგური გადასდო, გრძელ სკამზე მიიწია და თორელი გვერდით მიუჯდა.

– რასა იქმ? როგორა ხარ, ბეჩავო?

მოიკითხა თურმანმა.

– ვცხოვრობ, მივათრევ გამაღლებულ სულს, – ამოიოხრა მხატვარმა, – ცოცხალი კაცი უსაქმოდ ვერ გაძლებს, ეს პატარა სახელოსნო გავმართე, თიხას ვზელ და ჭურჭელს ვაკეთებ. თვალით ვერ ვხედავ, მაგრამ ხელითა ვგრძნობ და ისე გავაჩვიე თითები, თითქო თვალთ ვუცქერდე.

ვაჩემ ორივე ხელი გაიწოდა, გრძელი თითები საოცარი სისწრაფით აათამაშა.

– ცაგო! – გასძახა სახელოსნოსაკენ. – ცაგო, ერთი, სურებისა და ფიალების ნიმუშები აჩვენე სტუმარს.

ცაგოს სახელის ხსენებაზე თორელი შეკრთა. იქაურობას თვალი მოავლო. ეტყობოდა, ვაჩე მიხვდა სტუმრის შეკრთომას, დამნაშავესავით თავი დახარა და ოდნავგასაგონად წაიდუღუნა.

– ცაგო ჩემს ქალს ჰქვია, თურმან, შენს ბიჭზე ორიოდე წლით უმცროსია.

თაროებთან გოგონა დატრიალდა, ფიალები და ლიტრები, ყელყარყარა სურები და აზარფეშები გადმოიღო.

თორელი აღტაცებით დაჰყურებდა უსინათლოს ნახელავს: სხვადასხვა ფრინველებისა და ცხოველების სახედ გამოყვანილი სურები და ჭინჭილები, ჩუქურთმებითა და ამოტვიფრული ნახატებით დამშვენებული ფიალები მართლაც ხელოვნების იშვიათი ნიმუში იყო.

– რა მშვენიერი ნახელავია! ჭემმარიტი მხატვრის ნამუშევარია! ყოჩაღ, ვაჩე! – აღმოხდა თურმანს.

– შენც მოგწონს?! – გაუხარდა ვაჩეს. – წაიღე, რომელიც უკეთესია. ცაგო, ფარშავანგის სურა და შვლის ნუკრის ჭინჭილა გადაუდე. სხვა, რაც თვითონ მოეწონება...

თორელმა თავპატიჟი გაიღო, მაგრამ საჩუქარზე უარი ვერ უთხრა. ჭურჭელი გადააწყო და ისევ ვაჩეს გვერდით ჩამოჯდა.

– ჩონგურის დაკვრაც გისწავლია, ვაჩე.

– რა ვქნა, თურმან, არ მემღერება, მაგრამ მუშაობით რომ დავიღლები, გულს დაკვრასა და ღიღინს ვაყოლებ, ჩონგურზე სევდიან ლექსებს ვამღერებ...

– მაშ, ჩემგანაც მიიღე საჩუქარი, ჩემი ახალი ლექსი ცაგოს წააკითხე და თუ მოგეწონოს, ჩონგურზეც დაამღერე.

თურმანი წამოდგა, ხურჯინში ვაჩეს ნაჩუქარი ჭურჭელი ჩააწყო, ხურჯინიდანვე თავისი «ქება» ამოიღო და ვაჩეს გადასცა.

– შენი ლექსი კარგი იქნება, ჩონგურზედაც ადვილად დამღერდება. – ხელისფათურით ჩამოართვა გახარებულმა ვაჩემ. – თუ ჰანგი შევუწყვე, სხვა ბრმა მემუსიკეებსაც მივცეთ, ჩემთან ხშირად მოდიან.

– შენ იცი, ვაჩე, მე ახლა წავალ, მალე მოგინახულებ და შენს ცაგოსთან ერთად ახალდაბაში უნდა გისტუმრო. – უთხრა თორელმა და უსინათლოს ხელი მაგრად ჩამოართვა.

– მადლობელი ვარ, თურმან. მადლობელი ვარ, რომ არ მივიწყებ, – ცრემლის წმენდით წაიდუღუნა ვაჩემ, ფეხზე წამოდგა და თორელს უშველებელი ხელები მოხვია.

აგარებს მიაღწია თორელმა. აქამდე არ უფიქრია და ახლა თავის აქ მოსვლის მიზანს რომ ჩაუკვირდა, შეყოყმანდა: მეფისა და ვაზირთუპირველესის მიერ შემოკვეთილი რუსუდანის ქების ნაცვლად, მგოსანს შალვა ახალციხელისა და გარნისთან დაღუპული გმირების ქება მოჰქონდა. თანაც ამ ქებაში ქვეყნის გამრიგე ხელისუფალთა უზრუნველობა იყო გაკიცხული. მეფესა და მის ვაზირს ამ ქებით ვერ აამებდა თორელი, პირიქით, ერთიც და მეორეც, ალბათ, ნაწყენი დარჩებოდა და იქნებ უმაღლესი რისხვაც დაემსახურებინა.

აგერ, მწვანეში ჩაფლული მეფის სასახლეც გამოჩნდა. უკან გაბრუნება გვიან იყო, კარისკაცები და მეფის მსახურნი ხვდებოდნენ, ესალმებოდნენ და გზას უთმობდნენ.

იღბლად, მეფე და მწიგნობართუხუცესი სასახლეში არ დაუხვდნენ. კარგ ფეხზე ავმდგარვარ ამ დილასო, – გაიფიქრა გახარებულმა თორელმა, «ქების» თითო ცალი მეფისა და მწიგნობართუხუცესის გადასაცემად დასტოვა და სასახლიდან სწრაფად გამოვიდა.

თორელი ისევ ახალდაბაში ჩაიკეტა. დღისით ყანასა და ვენახს, ბაღსა და მინდორს დასტრიალებდა თავს. უბრალო მიწის მუშაკივით ბარსა და თოხს ურტყამდა, წალდსა და ცელს იქნევდა. ცელქვეშ დაწვენილი თივის სურნელი და გადაბრუნებული მიწის ოხმივარი საამოდ აბრუებდა, გულში მოუცილებლად ჩაბუდებულ დარდს უყუჩებდა, საკუთარ უბედურებასა და საქვეყნო ჯავრს ავიწყებდა.

ერთადერთი, რაც კიდევ უხალისებდა გულს, შალვა იყო. ბიჭი მართლაც კარგი იზრდებოდა, თვალტანადი და ღონიერი, შრომის მოყვარული და ჭკვიანი. სოფლის ბიჭების თავი იყო შალვა, თავისზე უფროსებიც აყოლილი ჰყავდა, ერთი რომ დაემახა, მთელი სოფლის ახალგაზრდობა იქ გაჩნდებოდა და მისი გულისთვის თუნდაც ადიდებულ წყალში გადავარდებოდა. თორელსაც სხვა აღარაფერი ახსოვდა, მზე პატარა შალვაზე ამოსდიოდა და დაცარიელებულ სულს მისი სიხარულით ივსებდა. ქალაქის ხმაურისა და კარის მოუსვენარი ცხოვრებისაგან გამდგარი თორელი ერთთავად გლეხებში ტრიალებდა, მათ ცხოვრებას აკვირდებოდა და როგორც შეეძლო, მათ ჭირ-ვარამსაც იზიარებდა. თავათაც გლეხს დაემგვანა თურმანი, თმა-წვერი მოუშვა და გარეგნობაზე ძველებურად აღარ ზრუნავდა. სარკეს იშვიათად ჩასცქეროდა, მაგრამ სხვების, დიდი ხნის უნახავი ნაცნობების გაოცება ახსენებდა, რომ ნაადრევად იყო გათეთრებული და მხრებიც ადრე მოხროდა. ამდენ ჭირნახულს და განსაცდელგამოვლილ ვაჟკაცს ადრინდელი პეწი გაჰქრობოდა, სიცოცხლის გემო დაჰკარგოდა, თვითონ არავისთან მიდიოდა სტუმრად და აქეთაც იშვიათად აკითხავდნენ.

ვენახიდან მობრუნებულ თორელს სიმღერის ხმა მოესმა.

სოფლის გზაზე ფარა გაჭიმულიყო. ცხვრის ფარას ენაგადმოგდებული ბომბორა ნაგაზები მოსდევდნენ გზის ორივე მხარეს. იალალებიდან ბრუნდებოდა ცხვარი. გზაზე ბლავილი და ყურისწამლები გნიასი იდგა. შოლტის ზუზუნმა და სტვენამ, მწყემსების გადაძახილმა და ძაღლების ყეფამ სოფელი ააფორიაქა.

მზე ჩადიოდა. მწყემსები სოფლის განაპირას შეჩერდნენ. დასიცხული, შორი გზით დაღლილი ცხვარი მხურვალე მიწაზე დაეყარა.

გზაზე დამდგარი მტვერი გაიფანტა და ბლავილიც მიწყდა.

ცოტა ხნის შემდეგ ტაშ-ფანდურის ხმა გაისმა და სოფლის ახალგაზრდობა ორღობებში გამოეფინა.

ეკლესიის ეზოში მწყემსებს ჭიდაობა გაემართათ, ყველა იქით მიიჩქაროდა.

თორელიც მათ მიჰყვა.

ეკლესიასთან ხალხი ჯგუფ-ჯგუფად შეკრებილიყო. ზოგი ჭიდაობას უცქერდა, ზოგიც წრედ დამდგარიყო, იმ მხრიდან ფანდურის ჩხაკუნი და მომღერლის გამყივანი, ძლიერი ხმა ისმოდა.

თორელი იმათკენ წავიდა.

ხმა თანდათან ძლიერდებოდა. მწყემსი ბიჭი ზარიანი ხმით უკიდებდა.

თორელს ნაცნობი სიტყვები მოესმა, შედგა და ყური მიუგდო:

ომი კი არა, ზეციდან
დაცემა იყო მეხისა,
გარნისის კლდესთან კვეთება
ოთხი ათასი მესხისა...

თავისი ლექსის გაგონებაზე თორელს ჟრჟოლამ დაურა, იმ მწყემსებისაკენ ჩუმად წავიდა და შორიახლო დაჯდა, რომ არ შეემჩნიათ და სიმღერა არ შეეწყვიტათ.

მათთან გმირული სიკვდილი,
ვაი, რომ მე არ მეღირსა...

ჩამოათავა მუხლი მომღერალმა და ფანდურის ლარები უფრო ახმიანდნენ. სმენადექვეულ ბიჭებს ცრემლი მოსდგომოდათ და თვალები დაწითლებოდათ.

მწყემსმა სიმღერა განაგრძო. მღეროდა უცნობი მწყემსი თორელის უკანასკნელ «ქებას», ახალციხელისა და მესხი ვაჟკაცების დიდებას. ალაგ-ალაგ სიტყვებს ცვლიდა და თავისას ურთავდა. მაგრამ თურმანი ახლა ამას აღარ აქცევდა ყურადღებას. ეს ერთი ხანი მარტოობასა და ყველასაგან დავიწყებას განიცდიდა თორელი, ეგონა, მისი გმირობა და სამშობლოსათვის თავდადება

კი არა, ლექსიც აღარავის უნდოდა და ახსოვდა, მაგრამ რა უსაფუძვლო ყოფილა თურმანის ეჭვი!

მისი ლექსი ხალხში გავარდნილა და რაკი იმ შორეულ მთებამდისაც მიეღწია, საიდანაც ეს მწყემსები ბრუნდებოდნენ, ალბათ, უკვე მთელ ქვეყანაზე ყოფილა მოდებული.

მაშ, ხალხს არ დაუვიწყნია თავისი მგოსანი, ძველებურზე მეტი სიყვარულითა და სითბოთი ამღერებენ მის ლექსს და ქართველ ვაჟკაცებს ახალი გმირობისაკენ მოუწოდებენ:

ახალციხელი გეძახის, მამულის მტრების მსახვრალი,
აღსდექ, ნუ გძინავს, ქართველო, ახლოა მტერი ახალი,
გზა მკერდით გადაუღობე, ხელში აიღე ფარ-ხმალი...

რახან თორელის ლექსი იმ შორეული მთის იალაღებსაც მისწვდენია, ბარად ხომ უფრო ადრე გავრცელდებოდა, დიდებულებსა და ერისთავებს წაკითხული ან გაგონილი მაინც ექნებოდათ. მეფის კარზე, ალბათ, განრისხებულნი არიან, თორემ აქამდე დარბაზიც ბევრჯერ შეიკრიბებოდა, სხვა საქმეც ბევრი იქნებოდა. თორელს არც დარბაზის შეკრებაზე იწვევენ, არც სხვა რამ საჭიროების გამო ეძახიან. დუმილი წყენისა და, ალბათ, რისხვის ნიშანიცაა, მაგრამ თორელს სულ არ აშინებს ახლა მეფის უღონო ხელისუფლების რისხვა.

ხალხმა მისი მოწოდება გაიგო და აიტაცა, ქვეყნის მესვეურთა უზრუნველობა მხილებული და დაგმობილია, მიზანი მიღწეულია და თორელსაც სხვა აღარა უნდა რა.

შემოდგომა დადგა. ბაღებში ხილი შემოვიდა და ვენახებში ყურძენი შემწიფდა. თორელს სულ უნდოდა ვაჩეს მოპატიჟება, შეპირებულიც იყო, ჩემთან ახალდაბაში უნდა გიწვიო შენს ქალიშვილთან ერთადო, და ახლა სწორედ შესაფერისი დრო იყო.

ვაჩეს დედის სიკვდილის შემდეგ მათი უპატრონო სახლ-კარისგან აღარაფერი დარჩენილიყო.

ვაჩეს, ალბათ, ენატრებოდა მშობლიური ახალდაბა, მაგრამ იქ აღარც არავინ ჰყავდა, აღარც სახლი ჰქონდა და ბრმა კაცი ვის უნდა მისდგომოდა. ვისტუმრებ, ჩემთან კარგა ხანს დავტოვებ და მშობელ კუთხეში დავასვენებ, – გადაწყვიტა თორელმა. კაცი გაგზავნა და თან ცხენი და ურემი გაატანა ვაჩეს და ცაგოს ამოსაყვანად.

სტუმრებს სოფლის თავში გაეგება თორელი. ცაგო მარტო იჯდა ურემზე. ვაჩე არ ჩანდა, ტირილით თვალდასიებული ცაგო გადმოხტა და თორელს შეჰღრიალა:

– მამა წაიყვანეს! ორი დღეა, წაიყვანეს!

– სად წაიყვანეს? ვინ წაიყვანა, ქალო?.. დამშვიდდი... – აწყნარებდა თორელი გულამომჯდარ გოგონას, მაგრამ ცაგო არ მშვიდდებოდა და ღრიალს უფრო უმატებდა.

როგორც იყო, შინ შეიყვანა მტირალი გოგონა, სკამზე ჩამოსვა და ამბავი გამოჰკითხა.

– ამ ორი დღის წინ მამა სახელოსნოსთან იჯდა და მუშაობით დაღლილი ისვენებდა, – ჰყვებოდა ცაგო, – ხელში ჩონგური ეჭირა და იმ ლექსს დაჰმღეროდა, თქვენ რომ დაუტოვეთ. ჩვეულებრივად ბევრი ხალხი მოგროვდა, სულგანაბულნი უსმენდნენ. თქვენი ლექსი დამღონებელი და დამაფიქრებელია, ცრემლს ვერ იკავებდნენ და ოხვრით აძლევდნენ ზანს. უცებ, სად იყო, სად არა, ეპისკოპოსი საბა გამოჩნდა, თან ხუცები მოსდევდნენ.

იქ მყოფთაგან არავის მოერიდა, მიწაზე წამოწოლილთ ზედ გადააღაჯა, მამაჩემს მივარდა და ხელიდან ჩონგურის გამოტაცება მოუწოდოდა. მამა ღონიერია და აგრე ადვილად ვერ გამოგლიჯა. გაფოფრილი მოხუცი ჩონგურს ჩაეჭიდა და თან უყვიროდა: როგორ ბედავ, რომ ქვეყანისა და მეფის აუგს საქვეყნოდ მღერი, ხალხი ეკლესიაში აღარ დადის, შენისთანა სალახანებს უგდებს ყურს და ირყვენბაო.

მამაჩემმა ჯერ ვერ გაიგო, ვინ იყო და რა უნდოდა.

– ვინ ხარ, დამეხსენ, თუ ღმერთი გწამს, მე ჩემი დარდიც მყოფნისო, – უთხრა, მაგრამ ეპისკოპოსი არ მოეშვა; გინდა თუ არა, ეგ ჩონგური უნდა წაგართვა, რომ ნაფოტებად ვაქციოო. დაეხსენ, მოგვასმენინე, ისეთს რა ამბობსო, – შეეხვეწნენ სიმღერის ყურისმგდებლები, მაგრამ გაცოფებული მოხუცი ხალხის გამოსარჩლებამ კიდევ უფრო გადარია. ხუცები მოიხმარა და ჩონგურს ერთად ჩააფრინდნენ.

მაშინ მამაჩემმაც ხელი გამოიღო და ის ჩონგური მოიქნია. ეპისკოპოსს თავში მოხვდა და რეტდასხმული ძირს დასცა... უბედური მამაჩემი ბრმა არი და ვერც იმას ხედავდა, სად მოარტყამდა, არც ის იცოდა, ვის მოუქნია ჩონგური. ხუცები წაქცეულ ეპისკოპოსს დაეხვივნენ მოსაბრუნებლად, ვიღაც გაიქცა და მეფის შუბოსნები მოიყვანა. მამაჩემი გაუძალიანდა, მაგრამ რას გააწყობდა, ხელები შეუკრეს და წინ გაიგდეს. მე ტირილით მივდევდი საპყრობილის კარამდე. საპყრობილის დიდ ჭიშკარში არ შემიშვეს. მამა იქ შეაგდეს და კარი მომიხურეს. ჩემს ხვეწნასა და მოთქმას ყური არავინ უგდო, ვისთანაც მივედი, უკან გამომავდო, არავინ გამიკითხა და იმედიც არავინ მომცა.

მამაჩემის ამხანაგმა ხელოსნებმაც ბევრი ირბინეს, მაგრამ ვერაფერს გახდნენ. ბოლოს მეც თან წამიყვანეს და ეპისკოპოსს ვეახელით პატიების სათხოვნელად. ეპისკოპოსი თავშეხვეული იწვა, წყევლა-კრულვით შეგვხვდა, სიტყვა არ გვათქმევინა, მსახურებს უბრძანა, გარეთ გავეგდეთ და მასთან აღარ შევეშვით. რაღას ვიზამდით, გამოვბრუნდით. კარი რომ მოგვიხურეს, კიდევ გვესმოდა ეპისკოპოსის მუქარა: დილეგში ამოვალპობინებ იმ პირუტყვს, მე მაგას ვაჩვენებ მეფისა და ერის გმობა როგორ უნდაო. მარტო მაგას კი არა, სხვა

მეჩონგურებს და მესტვირებსაც დავაჭერინებ, ყველას ციხეში ჩავყრი, ვინც ხალხის გამრყენელისა და მეფის მაგინებელი თორელის ლექსს მღერის და ავრცელებსო.

თორელი საშინლად აღშფოთდა. ეპისკოპოს საბას თავხედობაში მოხუცის ჩვეულებრივ გაკაპასებაზე მეტი დაინახა და მეფის კარის შემოწყრომის მიზეზსაც მისწვდა: მისი ლექსის აზრი და შინაარსი უკუღმართად აუხსნიათ თურმანის მტრებს, მეფისა და ერის გმობად განუმარტავთ და ერიც და გვირგვინოსანიც მის წინააღმდეგ აუმხედრებიათ. თუ ეს აზრი გავრცელდებოდა, თორელს მარტო მეფის კი არა, ხალხის რისხვაც თავს დაატყდებოდა, მაგრამ თურმანი ახლა იმდენად თავის თავზე როდი ფიქრობდა, მისი მიზეზით უდანაშაულოდ საპყრობილეში ჩაგდებული ვაჩე უნდა გამოეხსნა, ახლავე ყოველი ღონე უნდა ეხმარა და ვაჩე ციხიდან გამოეყვანა.

ცაგო შინ დასტოვა, თვითონ ცხენს მოახტა და თბილისისკენ გაქანდა. ქალაქში ციხისთავს მიადგა. ციხისთავმა დიდი პატივით მიიღო, მაგრამ თხოვნა რომ მოისმინა, ხელები გაასავსავა, უმაღლესი ბრძანება არის და მე არა შემძლია-რაო.

სხვა გზა აღარ იყო, თორელს ის უნდა გაეკეთებინა, რაც ყველაზე მეტად უმძიმდა და ეზარებოდა: მეფის კარზე უნდა მისულიყო და მწიგნობართუხუცესს შეხვეწნოდა. მწიგნობართუხუცესი საბა ეპისკოპოსზე მეტად იქნებოდა თორელზე გაბრაზებული მისი დავალების შეუსრულებლობისა და «ქების» შინაარსის გამო. მაგრამ სხვა არჩევანი არ იყო, თორელმა ცხენი სასახლისაკენ აფრინა.

სასახლეში მწიგნობართუხუცესის კართან აცდევინეს, მერე უთხრეს, ვაზირთუპირველესს გადაუდებელი საქმე აქვს და დღეს ვერ მოიცლისო. გაბრაზებული, შეურაცხყოფილი თორელი პირდაპირ მეფის პალატებისკენ გაემართა.

დედოფლის დარბაზებიდან ვარამ გაგელი და ავაგ ამირსპასალარი გამოვიდნენ. თორელი რომ დაინახეს, გაიხარეს. ერთმანეთი სიყვარულით მოიკითხეს და სელებზე ჩამოსხდნენ.

– ძალიან მომეწონა, თურმან, «შენი «ქება», ბევრი ვიტირე ჩემი მამიდაშვილის სახელოვან შალვას დალუპვის ამბავზე... – დაიწყო ვარამმა და თვალზე მომდგარი ცრემლი მოიწმინდა.

– მეც გულისყურით წავიკითხე ახალციხელის ქება: მოსაწონია, მაგრამ წიგნს ისე განმარტავენ, ვითომ გადაკვრით, ცხონებული მამაჩემის, ათაბაგის საქციელს კიცხავდე. – წარმოთქვა ავაგ მხარგრძელმა და თორელს გამომცდელად თვალი თვალში გაუყარა.

– აბა, ეგ რა საკადრისია!

წაიდუღუნა თორელმა და თავი დახარა.

– აგერ, ვარამიც მოწმეა, მამაჩემი თავათ კინაღამ შეიქნა ლალატის მსხვერპლი. ათაბაგი უბრალოა მესხთა დალუპვაში და გარნისის მარცხში.

– მართალია, თურმან, ჩვენ ყველანი, მეცა და ივანეც, იქ მყოფი ყველა ქართველი ერთნაირად უბრალონიც ვართ და დამნაშავენიც მესხთა დაღუპვასა და გარნისის დაცემაში. გარედან შემოპარულმა მტრის ჯაშუშებმა გვიყვეს ყველაფერი, გარნისის ბრძოლაც წაგვაგებინეს და ქვეყნის ძლიერებაც დაგვამხოვინეს, – დაამოწმა ვარამმა.

– მე ბრალს არავისა ვდებ. ჩემს ლექსში მე მხოლოდ შალვას გმირობასა და მესხთა თავგანწირვას ვუმღერე და ქართველობას ახალი მტრის დასახვედრად მოვუწოდე. ჩემს «ქებას» თურმე ათასნაირად განმარტავენ და ახლაც ამაზე ვარ აქ მოსული.

გაგელმა და მხარგრძელმა ერთმანეთს გადახედეს.

– მეფის პალატების მხატვარყოფილი, ვაჩე გრძელიშვილი თუ გაგიგონიათ...
– განაგრძო თორელმა.

– ის ხომ არა, ჯალალედინმა რომ თვალი დასთხარა? – იკითხა ავაგმა.

– სწორედ იმაზე მოგახსენებთ, – დაუდასტურა თურმანმა და მოკლედ მოჰყვა ვაჩესა და საბა ეპისკოპოსის ჩხუბის ამბავს.

ორივე მთავარი სიცილით გადაბრუნდა. თორელი სიცილის გუნებაზე სულ არ იყო, მაგრამ მასაც გადაედო მთავრების გულიანი სიცილი და აჰყვა.

– სული ხომ არ გააფრთხოვინა ჩონგურით იმ მეტიჩარას? – იკითხა ავაგმა, ცოტა რომ დაწყნარდა.

– არა, მაგრამ თავი კი გაუტეხია, – მიუგო შეწუხებულმა თორელმა.

– ახია! თავის ტყავში არ ეტევა და ყველგან ეჩრება! – ნიშნისმოგებით თქვა ამირსპასალარმა.

– თავათაც რაღაც იამბიკო შეუკოწიწებია იმ საცოდავს, უცხო და გაუგებარი სიტყვებით არის სავსე, ენა მომტყდა მისი კითხვით. – თქვა გაგელმა.

– მე ბოლომდე ვერც წავიკითხე და მაგის დამზეპირებელი ან სიმღერად მთქმელი ვინ იქნება? – დაუმატა ავაგმა.

– შენს ლექსს მთელი საქართველო მღერის, მაგისას ეკლესიაშიც არ ისმენენ და როგორც აი იმ იამბიკოს კითხვას იწყებს, თურმე ხალხი წირვიდან მიიპარება, – სიცილით თქვა გაგელმა.

– ხალხი იმასაც ამბობს, თურმე, ჯალალედინმა ვერ აგვადებინა ხელი სარწმუნოებაზე, საბა ეპისკოპოსი კი ნამდვილად შეგვაძულეებს წირვა-ლოცვას, თუ იმ იამბიკოს კითხვას არ მოეშვაო, – დასძინა ავაგმა და მთავრები ისევ სიცილით გადაბრუნდნენ.

– მაგის იამბიკოს დარდი სულ არა მაქვს, მთავარო, – ისევ მოიღუპა თორელი, – ეპისკოპოსმა უსინათლო მხატვარი საპყრობილეში ჩააგდებინა და ამით გამწარებული მოვედი მეფის კარზე.

– მეფეს მაგისთვის როგორ შეაწუხებ?

– ციხისთავმა მითხრა, უმაღლესი ბრძანებით დავაპატიმრეო და მამ ვის მივმართო, მწიგნობართუხუცესი ჩემზე შემომწყრალია...

– აგერ, შანშეს ვთხოვოთ, ჩემს ბიძაშვილს! – ხმამაღლა დაიძახა ავაგმა და მათკენ მომავალ შანშეს შესაგებებლად წამოდგა.

გაგელი და თორელიც შანშე მანდატურთუხუცესს შემოეხვივნენ.

სალამისა და მოკითხვის შემდეგ ეპისკოპოს საბას ამბავს მოუყვნენ და შანშეც გულიანად აცინეს.

– ციხისთავთან მიგიწერ და ახლავე გაუშვებს, – უთხრა თორელს მანდატურთუხუცესმა. იქვე მაგიდას მიუჯდა, ბარათი დაწერა და თურმანს გადასცა.

– ამ საქმეში მწიგნობართუხუცესიც იქნება ჩარეული, მაგრამ ნუ გეშინია, მიფეს მისი თანდასწრებით ვუამბობ, გვირგვინოსანიც ბევრს იცინებს და ყველაფერი ამით გათავდება. – დააიმედა თორელი შანშემ.

თურმანმა დიდი მადლობა გადაუხადა, ყველას თავაზიანად დაემშვიდობა და სასახლიდან თითქმის სირბილით გამოვიდა.

ცოტა ხნის შემდეგ თურმანი და ვაჩე ახალდაბის გზაზე მიდიოდნენ.

თ ა ვ ი მ ე რ ვ ე

თორელის დახმარებით, ვაჩემ თბილისში თავისი სახელოსნო გაჰყიდა, ახალდაბაში ნასახლარზე ახალი სახლი დადგა და გრძელიშვილების ბუხრიდან ისევ ავიდა ცისფერი ბოლი.

გავერანებულ ბაღსა და ნავენახარში ისევ ჩააყრევინა ვაზი და ხეხილი, ისევ დაიყვია ძაღლმა ვაჩეს ეზოში და ისევ იყივლა მამალმა.

გადიოდა დრო. იზრდებოდა ხეხილი, იზრდებოდნენ და იმ ნერგებივით ტანს იყრიდნენ ბავშვებიც. ცაგო და შალვა მთელი დღე ერთად იყვნენ, ერთად სწავლობდნენ და თამაშობდნენ. ვაჩე ვერ ხედავდა, მაგრამ მათი ხმა სულ ერთად ესმოდა და გრძნობდა, რომ მისი და თურმანის შვილები ისევე განუყრელები იყვნენ, როგორც ერთ დროს ვაჩე და ცაგო.

ბრმას ყანასა და ბაღ-ვენახში მუშაობა არ შეეძლო, მაგრამ ერთიც და მეორეც ძალიან უყვარდა. ვაზი და ხეხილი რომ ნაყოფს დაისხამდა, ვაჩე ცაგოს წაიმძღვარებდა და ბაღსა და ვენახს ჩამოუვლიდა. ქალიშვილი მსხმოიარე ტოტს დაუწევდა. ბრმა ნაყოფს ხელის ფათურით დათვლიდა. მერე ვაზის მტევანს შეაშველებდა ხელს და ღმერთს ბარაქასა და გამოსავალს შეევედრებოდა.

პატარაობიდან გარჯას შეჩვეული ვაჩე ტყუილად ყოფნას ვერ ურიგდებოდა, ხან რას წაატანდა ხელს და ხან რას. ბოლოს ხის დამუშავებას მოჰკიდა ხელი, მთელი დღე იჯდა და ხისაგან სხვადასხვა საგნებს თლიდა. მისი მარჯვე ხელი ხესაც ისე იმორჩილებდა, როგორც თიხას. ხის კულებსა და ჯამებსაც იშვიათი ოსტატობით აქანდაკებდა და ხელოვნების ნამდვილ ნიმუშებს ქმნიდა.

ჯამი ჯამს ემატებოდა, დღე – დღეს და ასე გადიოდა დრო.

თორელი სიბრალულით უცქეროდა უსინათლოს წვალეზას. ვაჩე კი აღარ ცხოვრობდა, წუთისოფელს მიათრევდა, იმისთვისდა იყო, თავისი წილი გზა გაევიღო და ტვირთი ბოლომდე მიეტანა. ასე იყო თორელიც, მხოლოდ იმ განსხვავებით, რომ თვალი კიდევ უჭრიდა და ამ გზის სიშავეს დღის სინათლეზე ხედავდა.

ვაჩესა და თორელის ბედი თითქმის ერთნაირი იყო. მათი სიცოცხლის სიხარული მაშინ დასრულდა, როცა სიყვარული დაიღუპა და სამშობლოს ბედნიერება დაემხო. ახლა მათი სიცოცხლის ხე სიხარულის ნაყოფს აღარ ისხამდა და თუმცა თორელი მზეს კიდევ შეჰყურებდა, ის მზე მის სულს აღარ ანათებდა, მის სულშიაც ისევე ბნელოდა, როგორც ბრმის თვალებში და, ალბათ, სულშიაც.

საქართველოს ახალი, მანამდე არნახული უბედურება ელოდა. მონგოლთა დაუჭედელი ცხენების ფეხის ხმა და ჭიხვინი თორელის ყურს სწვდებოდა და მიღს უკარგავდა.

თათრების ურდოები ჩრდილოეთიდან და სამხრეთიდან ერთდროულად უახლოვდებოდნენ საქართველოს შავი ღრუბლებივით.

ოქოთაი-ყაენმა ირანისა და ადარბადაგანისაკენ ჩორმალონ-ნოინის მეთაურობით ოთხი დუმანი გამოგზავნა.

ვიდრე ჩორმალონი და მისი ლაშქარი ირანსა და ადარბადაგანს იპყრობდნენ, ყარაყორუმს, ჩინგიზის მემკვიდრეებისა და ნოინების დიდ კრებაზე – ყურულტაიზე რუსეთისა და ყივჩაღეთის დაპყრობაც გადაწყდა. მანამდე უკვე ვოლგამდე მოწვენილი ჩინგიზის უფროსი ვაჟის ჯუჩის ძე და მემკვიდრე – ბათო-ყაენი გრიგალივით დაიძრა და რუსეთს შეესია.

საქართველოს ჩრდილოეთით, კავკასიის ქედს გადაღმაც ხანძრების ბოლი ავარდა, დემტი-ყივჩაღისა და რუსეთის თვალუწვდენელ ველებზე ცეცხლი დატრიალდა, ყველაფერი აირია და აფორიაქდა.

საქართველოს სამხრეთით ძლიერი მტრის გამოჩენისას ქართველები მუდამ ჩრდილოეთისაკენ იხედებოდნენ მაშველი ძალის გამოსაყვანად. ახლა ყივჩაღებს თავისი გაჭირვება ადგათ, თავათ იდგნენ საშინელი მტრის პირისპირ და საქართველოს დახმარებისთვის ვისღა სცხელოდა! ჩინგიზის სისხლიანი ლეკვი ბათო-ყაენი უზარმაზარი ლაშქრით მოედო რუსეთს. იმ ურიცხვ ლაშქარს მონგოლთა უძლიერესი და უნიჭიერესი სარდალი, ცალთვალა სუბუდაი მიუძღოდა, ქალაქებსა და ზღუდეებს ლეწავდა. ხალხს ჟლეტდა და აწიოკებდა.

ცად ასული მოთქმა და წყევლა-კრულვა, ქალების ტირილი და ბავშვების წიოკობა ერთდროულად აღწევდა საქართველომდე ჩრდილოეთიდან და სამხრეთიდან.

რაკი ჩრდილოეთიდან დამხმარე ლაშქრის გამოყვანა არ შეიძლებოდა და ხვარაზმელთაგან განადგურებულ საქართველოშიც მნიშვნელოვანი ძალის შეკრება აღარ ხერხდებოდა, საქართველოს სამეფო განწირული ჩანდა.

თათრებმა ირანსა და ადარბადაგანში ციხეები შემუსრეს, ყველა ზღუდე და სიმაგრე მიწასთან გაასწორეს.

მოდით დაუჭედელ ცხენებზე ამხედრებული ჟამი და შავი ჭირი, მონგოლურ ცხენებზე ამხედრებული, ხმალამოწვდილი სიკვდილი.

ამ გარდუვალ სიკვდილს შიში და საშინელი ძრწოლა მოუძლოდა წინ.

ვაჩე ვერ ხედავდა, მაგრამ მის გამახვილებულ სმენას საშინელების ხმა სწვდებოდა და უსინათლო ვეღარ ისვენებდა, ბორგავდა და შფოთავდა.

– ჩემი თავი ჯანდაბას, თურმან, – ეტყოდა ხოლმე მასზე მეტად შეწუხებულ თორელს ვაჩე, – მაინც სიკვდილს ვნატრობ და ჩემი თავი ჭირსაც წაუღია, მაგრამ ბაღს რა ვუყო, ბაღებს რა ეშველებათ!

– ბაღები უნდა გავხიზნოთ, გასახიზნი და თავშესაფარი თუ კიდევ სადმე დარჩა, თუ არადა, ყველას ერთი დღე მოგველის. – ამოიოხრებდა თორელი, ხელებს უღონოდ გაშლიდა და მისი იმედის შემყურე ბრმას სასოწარკვეთილი გაშორდებოდა.

თათრებმა თავრეზი აიღეს, ხლათი და ვალაშკერტი მოაოხრეს, ბარდავი აიკლეს და ბოლოს განძას მოადგნენ.

განძისა და მულანის დაპყრობის შემდეგ ჯერი საქართველოზე მიდგა. მონგოლებმა ჯერ მცირე რაზმებით იწყეს საქართველოს სასაზღვრო საერისთაოების რბევა და ძარცვა, შემდეგ თანდათან დაიძრნენ და ქალაქებსა და ციხეებსაც შემოეწყვნენ.

რუსუდან დედოფალმა თბილისი საქართველოს საზღვრებთან მონგოლების გამოჩენისთანავე დასტოვა და მეფის კარი ისევ ქუთაისში გადავიდა. მეფემ და მისმა ხელისუფლებამ სრულიად საქართველოს ლაშქრის მოკრება და მტერთან შებრძოლება ვერ შეძლეს, სამეფოს უდიდესი ნაწილი ბედის ანაბარად დატოვეს და თავათ ლიხთ-იმერეთს შეეფარნენ.

შეშინებულმა და დაბნეულმა რუსუდანმა თბილისის ციხისთავს ბრძანება დაუგდო, თუ მტერი დმანისამდე მოვიდოდა, თბილისი გადაეწვა, რათა, ხვარაზმელთა მსგავსად, მონგოლებსაც არ დაეპყროთ იგი და თავიანთ სადგომად არ გაეხადათ.

თბილისის ციხისთავმა მეფის ბრძანება აღასრულა: დმანისის დაცემისთანავე თბილისი დაცალა და გადასწვა.

მტერმა ჯერ სამშვილდე აიღო, მერე თბილისისკენ გამოემართა და გადამწვარი სატახტო უბრძოლველად დაიპყრო.

მონგოლები, რაკი ქართველთა ერთიანი და ძლიერი წინააღმდეგობა არსად შეხვდათ, ერთდროულად შეესივნენ საქართველოს სხვადასხვა კუთხეებს. ქართველები დაქსაქსულად, ერთმანეთისაგან დამოუკიდებლად ცდილობდნენ გამკლავებას და ამით მტერს საქმეს უადვილებდნენ. ქვეყნის მეთაურები, მთავრები და ერისთავთ ერისთავები თავიანთი თავის გადარჩენაზე ზრუნავდნენ. იმის მაგივრად, რომ მონგოლებს ღირსეულად დახვედროდნენ და ხალხისათვის გამირობის მაგალითი ეჩვენებინათ, მტრის

მოახლოებისთანავე ივლტოდნენ. მიუვალ მთებში იხიზნებოდნენ და თავიანთ საგამგეო ქვეყანას უპატრონოდ სტოვებდნენ.

თავათ საქართველოს ამირსპასალარი, რომელიც მთელი სამეფოს ლაშქარს უნდა გასძღოლოდა მტრის შესაბმელად, კაენის მიუვალ ციხეში ჩაიკეტა.

მონგოლებმა კაენის ციხეს ალყა შემოარტყეს, მეციხოვნეებს გზა შეუკრეს და წყალი მოუწყვიტეს.

იმედგაწყვეტილმა ავაგმა მონგოლთა ნოინს ჩორმალონს მოციქული გაუგზავნა, მორჩილება შეუთვალა და უვნებლობის პირი ითხოვა.

ავაგი მონგოლთაგან სიკვდილს ელოდა, გაუკვირდა, რომ დამპყრობლებმა მის მიმართ სისასტიკის ნაცვლად მოწყალება და ღმობიერება გამოიჩინეს. მონგოლები სხვების სამაგალითოდ ავაგს პატივით მოეპყრნენ. მის საპატრონო ციხეებს ალყა მოხსნეს, მამულები დაუბრუნეს და ხარკის ძლევა გადაუწყვიტეს.

გაქცეული და მთებსშეფარებული ქვეყნის მთავრები ხალხის მუსვრასა და შეჭირვებას გულისტკივილით შეჰყურებდნენ და შველა რომ არაფრით შეეძლოთ, სასოწარკვეთას ეძლეოდნენ.

ასეთ დროს მონგოლებთან ავაგ ამირსპასალარის დაზავება და მისი სამფლობელოს დამშვიდება ქვეყნის გადარჩენის ერთადერთ გზად დასახეს დანარჩენმა მთავრებმა.

ჯერ შანშე მანდატურთუხუცესმა და შემდეგ ვარამ გაგელმა, ავაგის შუამდგომლობით, მონგოლთაგან უვნებლობის ფიცი მიიღეს და მათ ნოინებს ეახლნენ. მათაც მძიმე ხარკის ძლევა და სრული მორჩილება იკისრეს, თავიანთ ციხეებში მონგოლთა რაზმები ჩააყენეს და მონობის ფასად მშვიდობა და თავისივე მამულები იყიდეს.

სახელოვან მხარგრძელთა შთამომავლებს სხვებმაც მიბადეს და ქართლი და კახეთიც დაწყნარდა.

როგორც კი მონგოლების მოსვლისა და საშინელი ჟლეტის ხმა გავრცელდა, თითქმის მთელი აღმოსავლეთი საქართველო აიყარა. ღარიბთა და უქონელთ შორს წასვლა და ხანგრძლივად გახიზვნა არ შეეძლოთ, ისინი თავისსავე მხარეში ეძებდნენ გამოქვაბულებსა და მღვიმეებს, მიუვალ მთებსა და კლდეებში აფარებდნენ თავს. უფრო შეძლებულები ლიხთიმერეთისკენ გარბოდნენ, სარჩო-საბადებელს სტოვებდნენ და თან მხოლოდ ძვირფასეულობა მიჰქონდათ. ქართლ-იმერეთის ისედაც ვიწრო გზა ურმებითა და საზიდრებით გაიჭედა, ქვეითი და ცხენოსანი ერთიმეორეში აირია. უწესრიგოდ გაჭედილი გზა დროდადრო იკვრებოდა, გაუვალ ხეობებში ერთმანეთის გინება, გამაყრუებელი ყაყანი იყო, ცხენების ჭიხვინი და ბავშვების ყურისწამლები გნიასი იდგა.

ყველა ჩქარობდა, ერთიმეორეს ხელს უშლიდნენ, უწესრიგობით ზოგჯერ გზა სულ იხშობოდა და ლტოლვილებს ღამეების თევა უხდებოდათ უღელტეხილის ვიწროებში.

თორელის თავს იმდენი უბედურება იყო დატრიალებული, მონგოლების მოსვლა კი არა, შავი ჭირიც ვეღარ შეაშინებდა. მას თავისი წილი წუთისოფელი მოჰმულად მიაჩნდა და სიკვდილზე ფიქრი სულ არ აწუხებდა, მაგრამ ამ ქვეყანასთან კიდევ აკავშირებდა ერთადერთი იმედი და სიხარული _ შვილი.

თორელს შალვას გახიზვნაზე უნდა ეზრუნა და თავის შვილთან ერთად პატარა ცაგოცა და უსინათლო ვაჩეც უნდა გადაერჩინა.

თურმანმა დროზე შეკრა ბარგი და ვიდრე გზა ლტოლვილებით გაიჭედებოდა, ქუთაისში ადვილად შესძლო გადასვლა.

მეფის კარი სავსე იყო ლტოლვილებით. ბევრს ნათესავი და ახლობელი პატრონობდა, მაგრამ უფრო მეტი მეფის შემყურე იყო და თავშესაფარსა და შველასაც მეფისგან ელოდა.

დაბნეული მეფის ხელისუფლები ქვეყნის აწეწილ საქმეებს თავს ისედაც ვერ ართმევდნენ, ლტოლვილების დახიზვნასა და დაბანაკებას დროზე ვერ ასწრებდნენ და ქუთაისის სასახლე საომარ ბანაკს უფრო ჰგავდა, ვიდრე სამეფო კარს.

თორელს სიკვდილი ერჩივნა მეფის კარზე წარდგომასა და დახმარების თხოვნას. ბედად ლტოლვილთა გახიზვნაზე მზრუნველ მთავარს _ ცოტნე დადიანს გადაეყარა. ცოტნემ თავის ძველ თანამებრძოლსა და კარის მგოსანს თავშესაფარი და პატრონობა გულწრფელად შესთავაზა. თორელსაც სხვა არჩევანი არ ჰქონდა, ცოტნეს მიენდო და თავისი ლტოლვილები სამეგრელოში დახიზნა.

აღმოსავლეთ საქართველოდან შემამრწუნებელი ამბები მოდიოდა. ვარამ გაგელის სამფლობელო, ქართლი და კახეთ-ჰერეთი მტრისაგან უწყალოდ ითელეობდა, ნადგურდებოდა.

მხოლოდ მესხები იდგნენ ჯერ კიდევ ვაჟკაცურად და ივანე ციხისჯვარელის მეთაურობით ხელს არ იღებდნენ მეფის ერთგულებასა და უძლეველი მტრის წინააღმდეგობაზე. ნახევარი საქართველო მიწასთან სწორდებოდა და ხალხი უწყალოდ იღუპებოდა. ასეთ დროს თორელის ნათესავებს _ მესხებს კიდევ შერჩენოდათ ძველი გმირული სული, მძვინვარე მტრის წინააღმდეგ აღმდგარიყვნენ და უთანასწორო, წინასწარ განწირულ ბრძოლაში ჩაბმულიყვნენ.

თორელს მათგან შორს გულხელდაკრეფილი ჯდომა აღარ შეეძლო, თავისი ნათესავების სისხლი და მამულიშვილობის გაუნელებელი ცეცხლი ემახდა.

გულუბხე მასპინძელს თავისი ხიზნები შეავედრა, მასავით თავგანწირული მეგრელი ვაჟკაცების რაზმით ზეკარის უღელტეხილზე გადავიდა და ივანე ციხისჯვარელის მეთაურობით მებრძოლ მესხებს შეუერთდა.

კაენის ციხის დაცემა და ავაგ ამირსპასალარის დამორჩილება პირველი ბზარი იყო ქართველთა უიმედო წინააღმდეგობაში. დაქსაქსულ, ერთიმეორისაგან დამოუკიდებელ ბრძოლას ნაყოფი არ მოჰქონდა. მონგოლები რიცხვით ბევრად სჭარბობდნენ ციხეებში გამაგრებულ ქართველებს,

ხანგრძლივი ალყით ქანცავდნენ და საბოლოოდ ნებით ან ძალით იმორჩილებდნენ.

თორელი ხედავდა, მონგოლები ჯალალედინით დროებით როდი იყვნენ მოსულნი საქართველოში. ისინი მტკაველ-მტკაველ იპყრობდნენ ქვეყანას, იქაურ ციხეებში თავიანთ ჯარს აყენებდნენ, მოსახლეობას ხარკს აწერდნენ და მართვა-გამგეობის ისეთ წესებს ამყარებდნენ, რომლებიც მეტ სარგებელსა და გამორჩენას მოუტანდათ.

თავიანთ ბატონობას დაპყრობილ ქვეყნებში ისინი ისეთ მკვიდრ საფუძვლებზე აფუძნებდნენ, ეტყობოდათ, აქედან წასვლას, დაპყრობილის მიტოვებასა და ხელიდან გაშვებას არ აპირებდნენ. პირიქით, ყველგან იმას ამბობდნენ, რომ მათი ბატონობა არასოდეს დასრულდებოდა და ცხოვრებასაც ამის კვალობაზე აწესრიგებდნენ.

თორელი ხვდებოდა ერთი მუჟა მესხების ბრძოლის უაზრობას, მაგრამ არ უნდოდა თანამებრძოლებს შორის ეჭვისა და უიმედობის თესლის ჩაგდება, თავათ ყველაზე თავგანწირვით იბრძოდა და ყველას ისე ამხნევებდა, თითქო მტკიცედ დაჯერებული ყოფილიყოს მტრებზე გამარჯვებაში.

მონგოლებმა ბოლოს მთელი ლაშქარი მესხეთისაკენ დასძრეს და ჯიუტი ციხისჯვარელის საპატრონოს შეესივნენ.

ამოდენა ლაშქრის პირისპირ ომის ღონე მცირერიცხოვან მესხებს არ ჰქონდათ და ამიტომ მთებისკენ დაიწიეს. თათრები ქვეყანას მოედვნენ და ციხისჯვარელის თავხედობით გაბრაზებულებმა არნახული საშინელება დაატრიალეს.

სისხლის ღელეები წავიდა და მესხეთის ცა ხანძრებმა დაბურა.

ციხისჯვარელი დარწმუნდა, რომ წინააღმდეგობის გაწევას სამცხისთვის უბედურების მეტი არა მოჰქონდა რა. სხვა მთავრების მსგავსად, მანაც რუსუდან მეფის ნებართვა გამოითხოვა და ავაგ ამირსპასალართან თორელი თხოვნით გაგზავნა, რათა მონგოლ ნოინებთან შუამდგომლობა ეკისრა და უვნებლობის ფიცი მიეღო.

ავაგმა თორელიც თან წაიყვანა, გელაქუნის ტბასთან ბანაკად მდგარ ჩორმალონ-ნოინს ეახლა და დაპყრობილი საქართველოს მთავართან ყველაზე გაუტეხლისათვის უვნებლობის პირი ითხოვა.

ჩორმალონ-ნოინმა მესხების დამორჩილებით გაიხარა, ავაგი საქართველოს სიკეთეზე ზრუნვისათვის შეაქო. მერე მონგოლური წესით დამორჩილებულთ უვნებლობის ფიცი მისცა: წმინდა ოქრო მოატანინა, სამჯერ წყალში გაავლო და ის წყალი შესვა.

უკან დაბრუნებულები ჩუმად მოდიოდნენ. ჩორმალონის მალემსრბოლი მესხეთისკენ მიჰქროდა. ქართველთა უკანასკნელი წინააღმდეგობა უკვე შეწყვეტილი იყო და ორივე – ავაგიც და თორელიც – ახლა თავთავისთვის ამაზე ფიქრობდა.

ბუნებით მშვიდობიანი ავაგი პირველი დამორჩილდა მონგოლებს და სხვა მთავრებსაც მან გაუკვლია მორჩილების გზა თათრებისაკენ. ამით ქვეყანა

დამშვიდდა, უწყალო ჟღერა შეწყდა და ხალხმა ცოტა სული მოითქვა: იცოდა ავაგმა, რომ ხალხი ამ სიკეთისათვის ლოცავდა, მაგრამ ისიც ესმოდა მთავარს, როგორ ჰკიცხავდნენ თავისუფლებისათვის თავგამოდებული ვაჟკაცები. გმირობისა და თავგანწირვის მაგალითის ნაცვლად, დიდი მხარგრძელის მემკვიდრემ მტრის წინაშე შიში და უღონობა გვიჩვენა, მტერზე საბრძოლველად წაძლოლის მაგივრად, ამირსპასალარი ქედზე მონგოლთა უღლის დასადგმელად გაგვიძღვაო, – ლაპარაკობდნენ უკმაყოფილონი. ეს ჩუმი მითქმა-მოთქმა ავაგის ყურამდე აღწევდა და ქვეყნის დაწყნარებისათვის გულწრფელად მზრუნავ მთავარს გულში შხამს უწვევებდა. მძიმე და ძნელი ასატანი იქნებოდა მისი მდგომარეობა, მარტო რომ დარჩენილიყო მონგოლების მორჩილებაში. მაგრამ რაკი მის გზას სხვა მთავრებიც დაადგნენ, ქვეყნისა და მეფის წინაშე დანაშაული უმსუბუქდებოდა და სინდისის ქენჯნაც უნელდებოდა. მორჩილების გზაზე გადმოსულ ყველა მთავარს სიამოვნებით უდგებოდა შუამდგომლად მონგოლებთან, მათ ნაბიჯს ამართლებდა და ამით თავის საქციელსაც აუცილებლობით ასაბუთებდა.

– კარგად მოიქცა ციხისჯვარელი. – დაარღვია სიჩუმე ავაგმა, – კარგად მოიქცა, რომ უაზრო ბრძოლაზე ხელი აიღო და მონგოლებს დამორჩილდა.

– სხვა რა გზა ჰქონდა ციხისჯვარელს, – ოხვრით თქვა თორელმა, – სხვა რაღა გზა ჰქონდა, მარტო ერთი მუჭა მესხებით თათართა ამოდენა ლაშქარს მაინც ვერ გაუმკლავდებოდა, დღეს თუ არა, ხვალ სრულიად გაანადგურებდნენ მონგოლები. ხალხი ტყუილ-უბრალოდ იჟლიტებოდა, გამარჯვების იმედი აღარსად იყო.

– მე სხვაზე ადრე მივხვდი ბრძოლის უიმედობას. უძლეველი მტრის მორჩილება ლაჩრობა კი არ არი, სიბრძნეა. ვინც გარდუვალს ეწინააღმდეგება, აუცილებლობას ებრძვის და კედელს შუბლით ეჯახება. კაენის მიუვალი ციხეც რომ გატყდა, წინააღმდეგობის გაწევამ აზრი დაკარგა. ხალხისა და ქვეყნის გადარჩენისთვის, მორჩილების გარდა, სხვა გზა აღარ იყო.

– ერთი გზა იყო, მთავარო, და ყველანი რომ იმ გზას დავდგომოდით, მტერი ვერ დაგვიმონებდა.

– ეგ რომელ გზაზე ამბობ?

– შეერთებული ძალით ბრძოლაზე მოგახსენებ. საქართველოს ყველა მთავარი რომ შეერთებულიყო, ძველებურად ერთიანი ლაშქარი გამოგვეყვანა და მტერს ერთი სარდლის მეთაურობით დავხვედროდით, ალბათ, ასე არ დაგვემართებოდა.

– მონგოლებთან მაინც ვერაფერს გავაწყობდით, თურმან, ხომ ხედავ, თათრებმა ჩვენზე დიდი და ძლიერი სამეფოები დაიპყრეს. თავათ უძლიერესი ჯალალედინიც დაამხეს და ჩვენ იმ ჯალალედინს რომ ვერა დავაკელით რა, მის დამამხობლებს რას ვუზამდით.

– ჩვენი მოქმედება იმით კი არ ფასდება, მთავარო, თუ ბოლოს რა იქნებოდა. ჩვენს თაობას იმის პასუხს მოსთხოვენ, თუ რა გავაკეთეთ ქვეყნის გადასარჩენად და მტრისაგან დასაცავად. ჩვენ ჩვენი ცდა არ უნდა დაგვეკლო,

მტრის დასახვედრად მთელი ქვეყანა ფეხზე უნდა დაგვეყენებინა და ვაჟკაცურად გვებრძოლა. თუ გავიმარჯვებდით, ხომ კარგი, მაგრამ თუ დავმარცხდებოდით, სახელიანად დავმარცხდებოდით და მომავლის წინაშე პირნათელი წარვსდგებოდით, რადგან სამშობლოს დასაცავად და გადასარჩენად ყველა ღონე ნაცადი და ნახმარი გვექნებოდა.

– რაკი განგებისგან განწირულნი ვიყავით და ამო წინააღმდეგობისაგან მაინც არა გამოვიდოდა რა, რაც მოხდა, ისა სჯობს, თურმან, ხალხი მაინც მორჩა უწყალოდ ჟლეტასა და ოხრობას, ცოცხლები მაინც დავრჩით.

– ჩვენ კი დავრჩით ცოცხლები, მთავარო, მაგრამ ჩვენს შვილებს რას ვუტოვებთ, მონის უღელსა და რკინის ბორკილებს...

ავაგი წამოწითლდა, თავი ჩაღუნა და ხმაში, ცოტა არ იყოს, სიბრაზეშეპარულმა თქვა:

– შენც სხვებივით სჯი, თურმან, ჭაბუკურად და გულფიცხად. სადაც ძალა არა სჭრის, იქ გონებას უნდა გააჭრევინო. ჩვენს ხალხს კარგად უთქვამს: ჩათრევას ჩაყოლა სჯობსო.

– ჩვენს ხალხს ისიც უთქვამს, მთავარო, სჯობს სიცოცხლესა ნაზრახსა სიკვდილი სახელოვანიო.

ავაგმა აღარა თქვა რა. ორივენი სდუმდნენ ერთხანს. მერე ისევ მხარგრძელმა აიღო თავი, შორს გაიხედა და დინჯად წარმოსთქვა:

– მომავალი გვიჩვენებს, რომელი გზა სჯობდა. დღესდღეობით მე ჩემი გზა მეჩვენება უმჯობესად. ღმერთმა იცის, ამ გზას ჩემი თავის გადასარჩენად არ დავდგომივარ, საქართველოს ხსნისა და ერის გადარჩენისათვის ზრუნვამ დამაყენა მორჩილების გზაზე, თურმან, თორემ მე ივანე ათაბაგის შვილი ვარ და სხვაზე კარგად ვიცი თავისუფლებისა და ქედმოუხრელობის ფასი.

ანტიოქიიდან ჩამოსულ უკანასკნელ ქარავანს სომეხი მწიგნობარი ვაჭარიც ჩამოჰყოლოდა.

მონგოლების მოსვლის შემდეგ იერუსალიმის, ანტიოქიის, ათონისა და პეტრიწონის ქართულ კერებთან თითქმის გამწყდარიყო აღმოსავლეთ საქართველოს კავშირი. საქარავნო გზები ჩამკვდარიყო, მონგოლები შავი ზღვისკენ გასვლას ესწრაფოდნენ და მალე საქართველოს სრულიად მოსწყვეტდნენ სამხრეთ-დასავლეთის განათლებულ ქვეყნებს.

ასეთ პირობებში იერუსალიმისა და ანტიოქიის, ათონისა და პეტრიწონის ამბების გაგებას, იქაურ ფილოსოფოსთა და ღვთისმეტყველთა ნაღვაწის შეტყობასა და გაცნობას დიდი მნიშვნელობა ჰქონდა ყველა ქართველი მწერლისა და მწიგნობრისათვის.

პავლია კუტმა დროზე შეიტყო სომეხი ვაჭრის ჩამოსვლა, სხვაზე ადრე მიატანა და ახლა ხურჯინი წიგნებით სავსე მოჰქონდა. ჯორზე ამხედრებულ კუტს თან თავისი განუყრელი მორჩილი მოსდევდა და მონასტრისკენ ფრთაშესხმული ბრუნდებოდა.

ჩქარობდა პავლია, ერთი სული ჰქონდა, როდის გახსნიდა ხურჯინს. წინასწარ სტკბებოდა ამ ძვირფასი წიგნების ფურცლითა და კითხვაზე დათენებული ღამეების განცდით.

მონასტრიდან შორს აღარ იყვნენ.

გზაზე მარტომომავალი მონგოლი შემოეყარათ.

ქვეითად მოდიოდა მონგოლი, მათრახს იქნევდა და გასაძღომის მაძებარი ნადირივით თვალს აქეთ-იქით აცეცებდა.

ბერებს რომ გაუსწორდა, სახეზე ღიმილი გადაეფინა და ისედაც ძლივს შესამჩნევი თვალეზი სულ მიეწურა, დაეკარგა.

მონგოლი წინ გადაუდგა ჯოროსანს და აღვირში ხელი უტაცა. ჯოგი შედგა.

– აბა, ახლავე ჩამოხდი მაგ ჯორიდან!

უბრძანა მონგოლურად და აღვირს მაგრად დასწია, პავლიამ ვერ გაიგო მონგოლური.

– გზა მოგვეცი! უფლის მსახურები ვართ!

სპარსულად მიმართა კუტმა.

ვერც მონგოლმა გაიგო სპარსული და ახლა თურქულად და არაბულად გაუმეორა პავლიამ ნათქვამი.

მონგოლმა ვერც ერთი ვერ გაიგო, მიხვდა, რომ არც მისი ესმოდათ და ხელით ანიშნა, ძირს ჩამოსულიყო და ჯორი მისთვის დაეთმო.

პავლიამ ჯვარი აღმართა მაღლა.

მონგოლმა ამ ჯვარს ზედაც არ შეხედა.

მაშინ ხელით აჩვენა საპყარმა, კუტი ვარ და ძირს ჩამოსვლა, ქვეითად სიარული არ შემიძლიათ.

მონგოლს უნაგირს უკან შემოკრული ხურჯინისთვის დაედგა თვალი და ყურს არ უგდებდა.

უცებ იმ ხურჯინს ეცა და ისე სწრაფად მოგლიჯა უნაგირს, პავლიამ წინააღმდეგობის გაწევა ვერ მოასწრო, ხურჯინი წინ დაიგდო, თავი მოხსნა.

მორჩილმა წასართმევად გაიწია, მაგრამ წინამძღვარმა შეაჩერა.

– დაეხსენ, საჭმელი ჰგონია და რომ ნახავს, მოემშვება.

მონგოლმა ერთი წიგნი ამოიღო, დახედა და ისროლა. წიგნი დაიშალა და ფურცლები გაიფანტა.

მორჩილი წიგნის ასაღებად გაიქცა, ქარისაგან გატაცებული ფურცლები ჰაერში დაფარფატებდნენ.

მონგოლმა უცქირა, მოეწონა წიგნის ფურცლებს დადევნებული მორჩილის სირბილი, კიდევ ორი წიგნი უფრო შორს გასტყორცნა, მერე ხურჯინი აიღო და მთლიანად კლდეზე ისროლა. ხურჯინი დაგორდა და მორჩილი ყვირილითა და წყევლით მიჰყვა უკან.

მონგოლი აღტაცებული უყურებდა დაბლა დაგორებულ ხურჯინს და კლდეებზე ფაცხაფუცხით დაქანებულ ბერს. მოსწონდა მის მიერ მოგონილი გასართობი, ხელეზს იქნევდა და სიცილით იჭაჭებოდა.

პავლიას გულზე ცეცხლი ეკიდებოდა წიგნების დაფანტული ფურცლების ცქერითა და იმ პირუტყვი მონგოლის ღრეჭით.

– რას სჩადი, წყეულო, ღვთისპირისაგან შეჩვენებულო! – უყვიროდა და მუშტებს უქნევდა.

მონგოლმა ჯოროსნისკენ მოიხედა, ფურცლებს გამოკიდებული მორჩილის ცქერას თავი ანება და პავლიასკენ წამოვიდა.

– აბა, მეყოფა ლოდინი, ახლავე ძირს ჩამოდი! – უყვირა და ხელით ანიშნა.

წიგნების გაფანტვით გამწარებულმა პავლიამ შეუტია, ორივე ხელით გაიწია, მაგრამ ჯორიდან ვერ გადმოდიოდა და ვერ მისწვდა.

მონგოლი გაბრაზდა, მათრახი მოიქნია და შიგ სახეში გაართყა.

პავლიას ლოყაზე სისხლი წასკდა, კიდეც უფრო გამწარდა, წინ გადაწეულმა, მონგოლს საყელოში წაავლო ხელი და თავისკენ დაითრია.

მონგოლი ჯერ არაფრად აგდებდა ბერის ფაფხურს, ეცინებოდა კიდეც საპყარის ფართხალზე, მაგრამ საყელოში ჩაფრენილმა ხელმა რომ ღონივრად დასწია, მაშინ კი გაანჩხლდა. მათრახი გამეტებით დასცხო თავში, მაგრამ ბერი არ დაეხსნა, ჯორი ზედ მიაგდო და ყელში ორივე ხელით სწვდა.

მონგოლმა თავი ძლივს წაართვა და ძირს დაკოტრიალდა. ფეხზე რომ წამოხდა, ხმალი იძრო.

მორჩილმა წიგნები მოაგროვა, ისევ ხურჯინში ჩაჰყარა უწესრიგოდ და გზაზე რომ ამოვიდა, სახეგასისხლიანებული წინამძღვარი დაინახა. ხურჯინი ხელიდან გააგდო, ქვას დასწვდა და მონგოლისკენ გაიქცა.

სწორედ ერთდროულად დაინახა პავლიამ ხმალშემართული მონგოლი და ქვადაბლუჯული მორჩილი.

უნდოდა ეყვირა, არ ესროლოო, მაგრამ პირის გაღებაც ვერ მოასწრო.

გატყორცნილი ქვა თავში მოხვდა ხმალშემართულ მონგოლს. მონგოლი თავგახეთქილი დაეცა და ხელიდან გავარდნილმა ხმალმა ქვებზე გაიწვრიალა.

მორჩილმა თავგაჭექყილ მონგოლს დახედა, ფერი წაუვიდა და დაბნეული, გამტერებული თვალებით მიაჩერდა წინამძღვარს.

წინამძღვარს თვითონაც აღარ ჰქონდა კაცის ფერი.

პავლია კუტი უნაგირიდან გადმოიხარა, სისხლსა და ქვაზე დანთხეულ ტვინს დახედა და ხელი კანკალით ამართა პირჯვარის დასაწერად.

მორჩილი მიხვდა, რომ კაცი შემოაკვდა; უცებ გამოერკვა, ცრემლი წასკდა და აღრიალდა. მერე, თითქო ვინმე მოსდევდა, თავი დალუნა და, რაც ძალი და ღონე ჰქონდა, გაიქცა.

პავლიამ ერთხანს უყურა გაქცეულს, მერე თავის ქნევითა და პირჯვრის წერით ჯორი მოატრიალა, დიდი ვაივაგლახით ხურჯინს დასწვდა, ისევ უნაგირზე შემოიგდო და ჯორი ჩაქჩაქით გამოუყენა გაქცეულ მორჩილს.

მონასტერს მიაღწიეს. ხმა არავისთვის გაუციათ, ჭიშკარი მაგრად ჩააკეტინეს და წინამძღვრის სენაკში შევიდნენ.

მორჩილი ჯვარცმის წინაშე დავარდა და წელანდელზე მეტად აღრიალდა.

დაღლილები და მშივრები იყვნენ, მაგრამ არც ერთს საჭმელი არ გახსენებია.

ორივე ხატის წინ იდგა დაჩოქილი და ლოცვას ბუტბუტებდა.

სამხრობა გადავიდა. ნელ-ნელა ჩამობნელდა. პავლია წამოდგა, მორჩილი წამოაყენა, დაამშვიდა და თავის სენაკში წასვლა უბრძანა.

– შენსა და უფლის მეტმა არავინ იცის, წინამძღვარო, რაც შემემთხვა. ღმერთი მოწამეა, კაცის მოკვლა არ მინდოდა. ნუ მიმცემ მონგოლებს და მითავდებე უფალთან!.. – შესთხოვა მორჩილმა, თანაც მუდართა და სასოწარკვეთით სავსე თვალები მიაპყრო წინამძღვარს.

– დამშვიდდი და გულით წმინდით ევედრე უფალს, მე ვიქნები თავმდეები შენი უფალთან და ყოველ კაცთან, – უთხრა პავლიამ.

შიშისაგან აცახცახებულსა და დაბეჩავებულ მორჩილს ჯვარი გადასახა და დასაძინებლად გაისტუმრა. მერე დაბნეულმა სანთელი აანთო და ხურჯინს თავი მოხსნა.

კითხვა უნდოდა, მაგრამ გული ვერ დაუდო, მხოლოდ გადაათვალიერა ძვირფასი წიგნები. მერე თაროებზე შეაწყო, სასთუმლის ახლო, სკივრიდან სქელი წიგნი ამოიღო და გადაფურცლა.

თავისი მატიანის უკანასკნელი გვერდები გადაიკითხა პავლიამ. კალამი აიღო და წერას შეუდგა. წერდა მონგოლთა მძლავრობასა და ბოროტებაზე, თავისი თვალთ ნახულსა და სხვათაგან ნაამბობს ქართველთა შეჭირვებაზე, თათართა უღლის სიმძიმეზე, ხალხის გამწარებაზე.

ბერებს, ალბათ, ლოცვა უკვე მოეთავებინათ, ყველას ეძინა და ისედაც მყუდრო მონასტერში სამარისებური სიჩუმე გამეფებულიყო.

უცებ რკინის ჭიშკარმა გაიღო ზრიალი, ვიწრო სარკმელს იქით ანთებულმა ჟინჯილილებმა გაიელვეს და ყაყანმა და ყვირილმა წინამძღვრის ყურამდე მოაღწია.

კუტმა წერა შეწყვიტა და ყური მიუგდო. ხმაური ძლიერდებოდა და ახლოვდებოდა. მერე კარების ბრახუნი და ლაწალუწი გახშირდა.

გრძელ დერეფნებში არეული ფეხის ხმა და ყვირილი გაისმა.

ეტყობოდა, ახლო იყვნენ.

პავლიამ კალამი გააგდო და ლოცვად დავარდა.

უცებ კარზე მაგრად დაარახუნეს; წინამძღვარმა ხმის ამოღება ვერ მოასწრო, კარი წიხლით შემოაღეს და სენაკში მონგოლები შემოცვივდნენ.

მონგოლთა ნოინის პატარა თვალები ცეცხლს კვესავდა და მრისხანებით ანათებდა.

– შენა ხარ მონასტრის წინამძღვარი? – იკითხა სპარსულად.

– მე გახლავარ! – მიუგო საპყარმა და სავედრებლად ამართული ხელები უღონოდ დაუშვა.

– ვინ მოჰკლა მონგოლი ჯარისკაცი?

– მე სულისათვის ვიღვწი და ჯარის საქმისა არაფერი ვიცი.

– თავს ნუ იკატუნებ, ჩვენ კარგად ვიცით, რომ შენმა ბერებმა მოჰკლეს. ახლავე მოგვეცი მკვლელები და მონასტრის განძი, ოქრო და ვერცხლი, თუ გინდა, მშვიდობით გაგეცალოთ!

– მონასტერში მკვლევლები არ არიან და არც ოქრო-ვერცხლი გვაბადია. ვინ მოგვცა განძი ღვთის გლახაკებს, ჩვენი განძი ეს წიგნებია, – მიუგო პავლიამ და ჭერამდე წიგნებით გაჭედებულ თაროებზე და სავსე სკივრებზე მიუთითა.

– ეს რა განძია! აბა, გასინჯეთ! – უბრძანა მხლებლებს ნოინმა. მონგოლები სკივრებს ეცნენ, თავი აგლიჯეს და წიგნები ამოყარეს.

– თავი ანებეთ! – შეუყვირა ნოინმა, – ბერო, მე ბევრი ლაპარაკი არ ვიცი, ვიდრე ათს დავთვლი, მკვლევლები და ოქრო-ვერცხლი მომეცი, თუ არა, ყველაფერი შენს თავს დააბრალე. ჩვენ ხუმრობა არ გვიყვარს და შენს მონასტერში ქვა ქვაზე აღარ დარჩება.

მონგოლმა ცოფიანივით შეხედა, მერე ხელი ამართა და მონგოლურად ნელა დაიწყო:

– ერთი... ორი... სამი...

ყოველ სიტყვაზე თითო ღუნავდა და თან წინამძღვარს უყურებდა სისხლმოწყურებული ნადირივით.

წინამძღვარი არ ინძრეოდა და ხმას არ იღებდა.

– ათი! – დაიძახა ნოინმა, უკანასკნელი თითიც მოკეცა და უდრტვინველ წინამძღვარს რომ შეხედა, გაცეცხლდა.

– როგორ ბედავ, რომ ჩემს წინაშე ფეხზე არ დგახარ?!

– საპყარი ვარ, ბაღლობიდან დაკუტებული, დაუხმარებლად ადგილიდან ვერ ვიძვრი და ამ სკამით მატარებენ, – აუხსნა პავლიამ და თავის ბორბლებიან სკამზე მიუთითა.

ნოინი უცნაურ სკამს დააცქერდა.

– აბა, დაჯექ! ვნახო, როგორ დადიხარ! – ბავშვივით მოუნდა მონგოლს ამ უცნაური ბერის სიარულის ნახვა.

ნოინის მხლებლების დახმარებით წინამძღვარი სკამზე გადმოვიდა. ნელ-ნელა გააგორეს. ნოინი უყურებდა და იცინოდა.

– სწრაფად, სწრაფად გააგორეთ! – უბრძანა თავის ნუქერებს.

ნუქერებმა სწრაფად გააქანეს ბორბლებიანი სკამი.

– ახლა ხელი უშვით! – უყვირა ნოინმა.

ნუქერებმა უცებ უშვეს ხელი ღონივრად გაქანებულ საგორავს, სკამი კედელს შეენარცხა, წინამძღვარი კედელს მიეჯახა და ძირს დავარდა მძიმედ.

ნოინი სიცილით გადაბრუნდა.

გული რომ მოიჯერა, გასისხლიანებულ კუტს მიუბრუნდა:

– ერთხელ კიდევ გეკითხები, ვინ მოჰკლა მონგოლი ჯარისკაცი?

– მე მოვკალი! – დინჯად თქვა წინამძღვარმა და შუბლიდან სისხლი მოიწმინდა.

– შენ? საპყარმა მოჰკალი?

– მე მოვკალი, მძლავრობისა და ძალადობისათვის.

– ეგ შეუძლებელია! შენ ვერ მოჰკლავდი. ალბათ, დამნაშავის დაფარვას ფიქრობ იმ იმედით, ღვთისმსახურთა მეთაური ვარ და მაპატიებენო. ჩინგიზ-

ყენის იასაში პატიება არ სწერია, ჩვენ ყველას ერთნაირად ვსჯით, მეფესაც და მონასაც, წინამძღვარსაც და უბრალო ბერსაც.

– მე მოვკალი მონგოლი! – ისევ დინჯად გაიმეორა საპყარმა და ნოინი დარწმუნდა, რომ წინამძღვარი არა სტყუოდა.

– მაშ, შენ ახლავე დაგსჯით, მაგრამ რომ არ მოგვატყუო და ნამდვილი დამნაშავე არ გადაარჩინო, სხვა ბერებსაც შენთან ერთად დავსჯით მძიმე სასჯელით.

– სხვებს რას ემართლებით, დამნაშავე მარტო მე ვარ!

– აგრეც რომ იყოს, შენისთანა წინამძღვარის სამსახურისთვის ღირსნი არიან სასჯელის. აბა, ცეცხლი! – ბრძანა ნოინმა და ნუქერები სენაკიდან გავარდნენ.

ცოტა ხნის მერე სარკმელი აღმა გაანათა გარედან.

წინამძღვარს ჯვარცმისკენ მიებრუნებინა სისხლით მოსვრილი სახე და თითქო იქ მის მეტი არავინ ყოფილიყოს, მხურვალედ ლოცულობდა.

მონგოლი დააკვირდა ლაღადისში გადასულ საპყარს, მერე უცებ რაღაც მზაკვრობა გაიფიქრა და ნუქერებს უბრძანა:

– დასვით თავის ტახტზე!

ნუქერები მისცვივდნენ, ძლივს ასწიეს წინამძღვრის მძიმე სხეული და სკამზე დასვეს.

– მოაგორეთ შუა ადგილას! – ბრძანა ნოინმა.

სკამი გამოაგორეს და სენაკის შუაში გააჩერეს.

– დააბით სკამზე! – უბრძანა ნოინმა.

ნუქერებმა წინამძღვარს ხელ-ფეხი გაუკრეს და სკამზე დააბეს...

– შემოუწყვეთ წიგნები! – შეჰყვირა ნოინმა.

ნუქერები დაფაცურდნენ, ყველა წიგნებს ეცა, თაროებიდან და სკივრებიდან ისროლეს ძვირფას ყდებში ჩასმული არისტოტელესა და პლატონის, პროკლე დიადოხოსისა და ნეტარი ავგუსტინეს, პეტრე იბერისა და იოანე პეტრიწის წიგნები.

წიგნები დაგლიჯეს და ფურცლების გროვა წინამძღვრის ფეხებთან დაჰყარეს.

– ააგზნეთ! – ბრძანა ნოინმა.

ფურცლებს ცეცხლი მისცეს და პავლიას ფეხებთან ალი ავარდა.

ცეცხლის პირველ შეხებაზე შეხტა წინამძღვარი, სახე ტკივილმა მოუქცია. მაგრამ ტუჩები მოიკვნითა და ისევ მალე გაწონასწორდა, თვალთ ჯვარცმა მოძებნა და კვნესით შეჰლაღადა:

– გმადლობთ, უფალო, რამეთუ ღირს მყავ აღსრულებად მოწამეთა სიკვდილითა!

ცეცხლი თანდათან ძლიერდებოდა.

მონგოლები ჭინკებივით ხტოდნენ და იკრიჭებოდნენ ცეცხლის აღზე.

ნოინი გაოცებული იყო წინამძღვრის სიმტკიცით, ნუთუ ერთხელ არ დაიკვნესებს, ნუთუ ერთს მაინც არ დაიყვირებსო, – ფიქრობდა.

ცეცხლმოდებულმა საპყარმა უცებ თავს ძალა დაატანა, ტკივილისაგან თუ ნებისყოფის უკიდურესი დამაბვისაგან პირველად თავის სიცოცხლეში წამოიწია, ფეხზე დადგა, რამდენადაც ზედმიკრული სკამი ნებას აძლევდა, და ბოხი საამო ხმით გალობა დააგუგუნა:

ღირს არს ჭემმარიტად,
რათა გადიდებდეთ...

მონგოლებმა თვალეზი დააჭყიტეს, გაოცებისაგან ადგილზე გაქვავდნენ და სული განაბეს.

გალობდა პავლია, სულიერად, რწმენით მათთან გადასული, ვისაც უფლისა და სამშობლოსათვის თავი მასზე ადრე გაეწირა. საშინელი ტკივილი მის ტვინსა და აღქმას აღარ სწვდებოდა, რადგან იგი იმ წუთებში რწმენად იყო გადაქცეული, საკუთარ სხეულს სიცოცხლეშივე განშორებული და ღვთაების განცდით, მასთან შეერთების რწმენით ამალღებული.

უცებ თვალი დახარა პავლიამ. ახალ წიგნებს ხევდნენ და აყრიდნენ. აგერ ბერძნული წიგნის ფურცლებს გააყოლა თვალი და შორიდან იცნო წითელი მელნით გადაწერილი «ოდისეას» სტრიქონები. სადღაც რუსთველის ლექსებსაც მოჰკრა თვალი და კუტს სიხარულისგან გული აუჩქროლდა:

– ასეთ ღვთაებრივ ცეცხლზე ჯერ არც ერთ მოწამეს არ ღირსებია სიკვდილიო, – გაიფიქრა და თავი ამაყად ასწია.

მის მიერ ნაწერი მატთანე ისევ გაშლილი იყო. მასაც ცეცხლი მოსდებოდა და იწვოდა.

– დაიწვეს, დაიღუპოს ჩვენი წახდენისა და დამხობის წიგნი. დე, ნუ ეცოდინება შთამომავლობას საქართველოს დიდების დაცემა და მოსპობაო, – გაიფიქრა და თვალთ იმ წიგნს მიაცივდა.

– მეც გავუძლებ, ვიდრე ეს წიგნი არ დაიწვება, – იმეორებდა თავისთვის და უკვე ამოსასვლელად დაძრულ სულს ძალით კიდევ აჩერებდა.

ცეცხლმა მატთანის უკანასკნელი სტრიქონები შეჭამა. წიგნის ადგილზე შავი, ჯერ კიდევ წიგნის სახედ დარჩენილი ფერფლია ჩანდა.

მემატიანის მიერ ანთებული სანთელიც დაიღვენთა, ბოლომდე დაიწვა.

გალობა შეწყდა.

ალი წინამძღვრის ხორცს სწვდა, სული უკვე გამქრალიყო, იქაურობას გასცილებოდა და მარადისობის უქრობ ცეცხლს შეერთებოდა.

მონასტერი იწვოდა.

მონგოლი ნოინები ლიხთიმერეთში გადასვლას ვერ ბედავდნენ, აღმოსავლეთ საქართველოში კი საბოლოოდ დამკვიდრდნენ და ქვეყნის მართვის თავიანთი წესები შემოიღეს.

დამპყრობლებმა საქართველოში მანამდე უცნობი ათასგვარი გადასახადი დააწესეს. მონგოლი მოხელეები მშიერ მგლებივით დაძრწოდნენ ქალაქად და

სოფლად, მიწის მუშაკებს ცხენსა და ხარს ართმევდნენ, შინ აღარაფერს უტოვებდნენ და პირში ლუკმას აცლიდნენ.

შეწუხდა, გაღარიბდა ისედაც წელში გატეხილი ქვეყანა. დოვლათმა იკლო, ბარაქა გაქრა. სამაგიეროდ, მაწანწალები და გზებზე ხელგაშვერილი მათხოვრები მომრავლდნენ.

ყველა გადასახადსა და გაჭირვებაზე მეტად ქართველობა მონგოლთა სამხედრო ბეგარამ შეაწუხა. ქართველი ვაჟკაცები ძალით მიჰყავდათ, ოჯახსა და სამშობლოს ამორებდნენ და მონგოლთა ლაშქართან ერთად ცხრამთას იქით გზავნიდნენ უცნობი ქვეყნების ციხეებისა და ქალაქების დასაპყრობად.

სამხედრო ბეგარა უვადო იყო და ერთხელ გაწვეულები სავალდებულო სამსახურს სიცოცხლესთან ერთად ათავებდნენ.

იქცეოდნენ ბოძგამოცლილი სახლები, ქვრივდებოდნენ ქალები და ობლდებოდნენ ბალები. გამძვალტყავებული ხალხი მძიმე უღელქვეშ გმინავდა და სულს ძლივს ითქვამდა.

ხალხი შფოთავდა და დრტვინავდა, მოთმინების ძაფი ყოველ წუთს გაწყვეტაზე იყო, ვაჟკაცები სიკვდილს არჩევდნენ მონგოლების უღელსა და მათ ლაშქარში წასვლას.

ხალხი ბობოქრობდა, უსამართლობის წინააღმდეგ ამხედრებულებით ივსებოდა ტყეები და გამოქვაბულები.

ხალხის მრისხანება გზას ეძებდა. ერის მშფოთვარებას გეზის მიმცემი და წინამძღოლი უნდოდა.

ლიხთიმერეთს შეფარებულ მეფის კარს ჯერ კიდევ ჰქონდა გარედან დახმარების იმედი. კავკასიონის გადაღმა მხედრობის შეკრების ცდისაგან რომ არაფერი გამოვიდა, ქართველთა მეფემ ეგვიპტის სულტანსა და რომის პაპს მიმართა. ერთსაც და მეორესაც წერილს წერილზე უგზავნიდა და მონგოლთა განდევნაში შეწევნას ითხოვდა.

თავის მხრივ, მონგოლები საქართველოს მეფის ნებით დამორჩილებას ცდილობდნენ, ავაგ მხარგრძელის პირით უვნებლობის ფიცს უთვლიდნენ და თბილისში იწვევდნენ სამეფო ტახტზე დასაჯდომად.

ქართველთა დედოფლისათვის მონგოლთა სისასტიკის ამბებს ცხოველური შიში ჩაენერგა და წარმოდგენით სჯეროდა, რომ ცოცხლად შესჭამდნენ, თუ მათ ხელში ჩავარდებოდა.

სამეფო კარი ქუთაისიდან ფარულად წარმართავდა შეთქმულთა მოქმედებას, მემბოხეებს აქეზებდა და აჯანყების ცეცხლს აღვივებდა.

აღმოსავლეთ საქართველოს ხან ერთ, ხან მეორე კუთხეში სტიქიურად იფეთქებდა აჯანყება. მონგოლები სასტიკად უსწორდებოდნენ უღელს შეუჩვეველ ქართველებს. ამბოხებას ჩანასახშივე სპობდნენ და ქართველთა ურჩ მეთაურებს სამაგალითოდ სჯიდნენ.

საქართველოს სამხრეთიდანაც მოდიოდა მონგოლთა ბატონობის წინააღმდეგ ამბოხებულთა ხმა: ირანის ხან ერთი მხარე ეხვეოდა აჯანყების ცეცხლში, ხან – მეორე. საყურადღებო ის იყო, რომ აჯანყებულთა მეთაურები

თავიანთ თავს მონგოლთა დევნისაგან გადარჩენილ ჯალალედინად აცხადებდნენ და ხვარაზმის შეუპოვარი სულტნის სახელს ირქმევდნენ, რათა მეტი მომხრე გაეჩინათ და ხალხისთვის მონგოლებზე გამარჯვების იმედი განემტკიცებინათ.

რაკი მონგოლთა ბატონობის წინააღმდეგ აჯანყებულ ხალხებს ერთი პირი და მოქმედების საერთო გეგმა არა ჰქონდათ, დამპყრობლები ადვილად უსწორდებოდნენ, ქვეყანას არბევდნენ და ხალხს უწყალოდ ჟლეტდნენ.

უთანასწორო ბრძოლებში ძლეული ხალხები გატყდნენ, გამარჯვების იმედი დაკარგეს და ახალი გზების ძებნა იწყეს.

ბედს შერიგებულთა და დამორჩილებულთა წასახალისებლად მონგოლთა მბრძანებლებმა თავიანთ შორეულ სატახტოში – ყარაყორუმში იწყეს მეფეთა და ქვეყნების სხვა მეთაურთა წვევა.

ყარაყორუმის კარზე ჩასულ მეფეებსა და მთავრებს მონგოლთა მბრძანებელი ტახტსა და სამკვიდროს უმტკიცებდა და უკან წყალობით ისტუმრებდა. ყარაყორუმიდან დაბრუნებულთ მათი ქვეყნის გამგებელი ნოინები პატივითა და რიდით ექცეოდნენ, ყაენის ბრძანებას ემორჩილებოდნენ და მათი პიროვნებისა და ქონების ხელყოფას ვეღარ ბედავდნენ.

ყარაყორუმისაკენ მეფეებისა და მელიქების, სულტნებისა და ათაბაგების, მთავრებისა და ემირების ქარავნები დაიდრა.

ქართველთა უპირველეს მთავარს, ავაგ მხარგრძელს თავის სამკვიდროში აღარ ედგომებოდა. მის მწყალობელ მონგოლ ნოინთაგან ზოგი დახოცილიყო, ზოგსაც მისი დამსახურება დავიწყებოდა და თუმცა ავაგი მონგოლთა საწინააღმდეგოდ თითს არ ანძრევდა, მასაც დანარჩენ ქართველებსავით თავიანთ ფარულ მტრად და მეამბოხეთა ხელისშემწყობად თვლიდნენ.

მხარგრძელის საგამგეო ქვეყანას მონგოლები ისე მართავდნენ, მას არაფერს ეკითხებოდნენ. თვითონ ავაგსაც აღარაფრად აგდებდნენ, უნდოდათ, პატიმრად შეიპყრობდნენ, უნდოდათ, გაუშვებდნენ. დამცირებული, თავმოძულებული მხარგრძელი მფარველს ეძებდა და თვალი მანაც შორეულ ყარაყორუმს მიაპყრო.

მონგოლთა წესისა და ცხოვრების, მათი გზისა და ენის მეცნიერები რომ მოიკითხა, ქართველთაგან თურმან თორელიც დაუსახელეს.

ავაგმა თურმანს წერილი მისწერა და ბიჯნისს სტუმრად მიიწვია.

კარგა ხნის უნახავი მთავარი თურმანს მოტეხილი ეჩვენა.

ავაგმა მონგოლთაგან ათვალისწუნება, აბუჩად აგდება შესჩივლა და ყარაყორუმს წასვლის ფიქრი გაანდო.

მთავრებმა წინ რუკები დაიდეს, ქვეყნის მეორე კიდემდე გაჭიმული გზების სიგრძე იანგარიშეს, ყარაყორუმამდე რამდენ ხანში ჩავიდოდნენ, ისიც დაახლოებით გამოითვალეს და შეშინდნენ.

– რაკი ჯერ ბათო-ყაენს უნდა ეახლო და მერე იქიდან ყარაყორუმს გაემართო, დიდი დრო დაგჭირდება. ბათოს ნახვასა და შემდეგ უმთავრეს

ყენთან მისვლას, სულ ცოტა, წელიწადი მაინც უნდა, თუ კარგად ივლი, ყაენებიც კარგად შეგხვდებიან და გზაზეც ხიფათი რამ არ შეგემთხვევა. წელიწადიც უკან დაბრუნებას უნდა. ახლა ყაენების კარზე საქმის გარიგებასაც დრო დასჭირდება და ერთად ყველაფერს ორწელიწადნახევარი მაინც მოუნდება! _ დაასკვნა თორელმა.

_ ორწელიწადნახევარს ძნელ გზაზე კი არა, ალბათ, შინაც ვეღარ გავატან! _ ჩაიქნია ხელი ავაგმა და სტუმარი სუფრაზე მიიწვია.

პური გასტეხეს და თითო სასმისით დაილოცნენ.

_ წავალ, ვაია, არ წავალ, უი! _ წარმოსთქვა ფიქრში წასულმა ავაგმა.

_ გზა საშიშია, დიდი და ფათერაკიანი. ვინ იცის, ორ წელიწადში ან იქ რა შეგემთხვევა, ან აქ რა მოხდება. მონგოლი ნოინები ქართველ მთავართაგან ყველაზე მეტი პატივით მაინც შენ გეპყრობიან. თუ უკიდურესად არ შეგაჭირვებენ, ამოდენა ხიფათიან გზაზე დადგომას ვერ გირჩევ.

_ არ წავალ, მაგრამ ასე ცხოვრებაც აღარ ღირს. მთავრის ღირსებას ვინ დაეძებს, უბრალო აზნაურის საკადრისადაც აღარ მექცევიან, ჩემს სამთავროში ბატონები თვითონ არიან, მე აღარაფერს მეკითხებიან...

უცებ ვიღაცამ კარს წიხლი ჰკრა და შემოაღო. ზღურბლზე მონგოლი ასისტავი შემოდგა, სახეწამოწითლებული და თვალებდაწკურული.

ასისტავს ეტყობოდა, ნასვამი იყო. იქაურობას ამღვრეული თვალები მოავლო წამით, მერე კატასავით ისკუპა და ავაგის წინ გაჩნდა.

_ როგორ ბედავ, რომ ფეხზე ამდგარი არ მეგებები! _ შეჰღრიალა და ყელზე ლუკმადამდგარ, დაბნეულ ავაგს თავში შოლტი უჭირა.

თორელმა ხელი სატევარზე იტაცა, მაგრამ ავაგი ეცა, მთელი ტანით გადაეფარა, ქვეშ მოიგდო და სატევრის გამრობა არ დაანება.

ასისტავის უკან თავიდან ფეხებამდე შეიარაღებული მონგოლი ნუქერები იდგნენ. მთავრის თავზე შოლტის ცემას ღრეჭით უყურებდნენ, ხორხოცობდნენ და სიცილით კვდებოდნენ.

ასისტავმა ერთხელ კიდევ მოიქნია შოლტი. შოლტის კუდი თორელის ყურისძირს მისწვდა.

მონგოლთა უფროსმა სუფრას წიხლი ჰკრა და გადააბრუნა. ნუქერები ღვინოსა და საჭმელს ძაღლებივით მისცვივდნენ.

ასისტავმა შოლტი ერთხელ კიდევ გაიქნია ჰაერში. შოლტის სტვენას გინებაც მიაყოლა, მუშტით დაემუქრა ქართველ მთავარს და იქიდან გავარდა.

ნადავლით დატვირთული, საჭმლით ყბებგამოტენილი ნუქერები ძუნძულით და ყაყანიით მიჰყვნენ უკან.

მონგოლები თვალს მიეფარნენ.

ავაგი წამოდგა და თურმანიც აუშვა.

გაფითრებულმა, ბრაზისაგან ერთიანად აცახცახებულმა თორელმა ყურისძირთან ხელი მოისვა: ყურისძირში სისხლი მოჟონავდა.

_ რატომ არ გამიშვი?!

ძლივს ამოიხრიალა ბოლმით გაგუდულმა თორელმა.

– ხელის განძრევაც რომ მოგესწრო, ორივეს მოგვკლავდნენ... – წაიდუღუნა შერცხვენილმა, შოლტის ცემისაგან თავპირდახეთქილმა ავაგმა.

– მოვეკალით, თუ მოგვკლავდნენ!.. ამნაირ სიცოცხლეს მაინც სიკვდილი სჯობს!.. – დაიგმინა თორელმა, სახეზე ხელი აიფარა და ქვითინი წასკდა.

პირველად ტიროდა ხმამაღლა თავის ვაჟკაცობაში თორელი, გულამოსკვნილი ბლაოდა და თვალებიდან ხელს არ იშორებდა, რომ ესოდენ შერცხვენილი და ლაფდასხმული ავაგისათვის – დიდი მხარგრძელების მემკვიდრისა და საქართველოს სამეფოს უპირველესი მთავრისათვის არ შეეხედა.

– ამ დღეში ყოფნას, ყაენთან წასვლა კი არა, ჯოჯოხეთში ჩასვლა სჯობს! ხვალვე წავიდეთ ყარაყორუმს, მეც წამოგყვები...

ტირილით შეჰკლმუვლა თორელმა.

– წავიდეთ, თუგინდ ჯანდაბასაც წავალ... – ქშენით ამოიჩურჩულა ბრაზისა და ჯავრისაგან ცრემლგამშრალმა ავაგმა.

ქუთაისში ჩუმად მცირე ამალით გადავიდა ავაგი, დედოფლის წინაშე თვალცრემლიანი დაემხო და შეჰლაღადა:

– ბრძენი ხარ, გვირგვინოსანო, რომ გულმხეც და მუხთალ მონგოლებს არ დამორჩილდი! კვლავაც არ მიენდო მათ ცბიერებასა და ლიქნს, ხიფათში არ ჩააგდო შენი სიცოცხლე და მთელი საქართველოს იმედი. შემცოდე ვარ შენს წინაშე, რამეთუ გიწვევდი დედაქალაქში ტახტზე დასაჯდომად და მონგოლებთან შესარიგებლად. არ მიუპყრა ყური მათი ნოინების სიტყვას, არც მათ დაპირებას, ვიდრე დიდი ყაენისაგან არ გექნება უვნებლობის ფიცი და შეწყნარების დასტური.

– დიდ ყაენთან წასვლას ვერ შევძლებ, ავაგ. მეშინია მათი მინდობის...

– შენ ნუ, მბრძანებელო! შენ როგორ გაგიშვებთ ვერაგ ყაენთან... მე გადავწყვიტე ურდოს წასვლა, რათა შენთვის და მთელი საქართველოსათვის გამოვითხოვო მონგოლთა მბრძანებლის წყალობა.

– რას ამბობ, ავაგ? ყარაყორუმს წასვლა როგორ იფიქრე? – შეიცხადა რუსუდანმა.

– ბევრი ვიფიქრე, ხელმწიფევ, ვიფიქრე და საბოლოოდ ეს გადავწყვიტე, ურდოს წავიდე. ჯერ ბათო-ყაენს ვეახლო, შემდეგ ყველა მონგოლთა უზენაეს მბრძანებელს, ჩინგიზის მემკვიდრეს, დიდ ყაენს.

– როგორ გასწირე თავი, ან რატომ მოიძულე სიცოცხლე? – შესტირა ავაგს ცრემლის წმენდით დედოფალმა.

– ასეთ სიცოცხლეს მაინც სიკვდილი სჯობს, დედოფალო! – აღმოხდა ავაგს.

– ჭეშმარიტად, ავაგ! ღმერთია მოწამე, დღედაღამ სიკვდილის მნატვრელი ვარ. სულ იმას ვევედრები ღვთისმშობელ ქალწულს, წამიყვანოს ჩემს ნეტარ დედასთან...

დედოფალს ისევ ცრემლი მოეძალა და ხმა აუკანკალდა:

– ერთი საზრუნავი მაჩერებს, თორემ აქამდე ღვთის აუგს დავადგებოდი და თავს ძალით მოვიკლავდი: ჩემი დავითი ჯერ კიდევ უასაკოა და მეც რომ თავი მოვიკლა, სამეფო უპატრონოდ დარჩება. მანამდე კიდევ მინდა მივიტანო გატანჯული სული, ვიდრე დავითის სრულწლოვანებასა და სრულიად საქართველოს ტახტზე მის დასმას მოვესწრებოდე.

– ღმერთმა დიდი დღე მოგცეს, ხელმწიფევ! შენლა ხარ ქართველთა იმედი და შენს ერს როგორ გასწირავ დასაოხლებლად?!

რუსუდანს ეამა ავაგის სიტყვა, ცრემლი მოიწმინდა და შუბლი გაიხსნა.

– აღარ შემიძლია მონგოლთა თავდასხმის შიშით მთებში მალვა, ავაგ, ნეტავ, ერთი კიდევ ველირსებოდე დაწყნარებულ ცხოვრებას, თბილისის ნახვას და იქაურობის ცქერით გაძლომას. ბათო-ყაენი ელჩს ელჩზე მიგზავნის, აქამდისაც წავიდოდი, მაგრამ ვერ ვბედავ, ასე მგონია, შერცხვენას არ მაკმარებენ და ქოფაკებივით დამგლეჯენ მონგოლები. რუსთა მთავრების მაგალითით ვიცი, რა ძნელი მისანდობიც არიან ყაენები.

– შენი თავი ღმერთმა ნუ ჩაუგდოს ხელში მაგ პირუტყვეებს, ღმერთმა ნუ ჰქნას და, შენი შეურაცხყოფა მთელი საქართველოს შეგინება იქნებოდა, ხელმწიფევ, ცოტა ხანს კიდევ გაუძელი შეჭირვებას, სვანეთის მთები მიუვალია და იქ თათრები ვერ მოგწვდებიან. ამასობაში, თუ ღმერთმა მიწინამძღვრა და ხელი წარმიმართა, მე გავარიგებ ყაენის კარზე შენი ტახტისა და ჩვენი სამეფოს საქმეს, ორთავ ყაენისაგან უვნებლობისა და შეწყნარების იარლიყს მოგიტან; თბილისის ტახტზე დაბრძანდები და აქაური ნოინები უპატრონოდ ხმის გაცემას ველარ გაგიბედავენ.

– რაკი ქართველთა მეფისა და ყველა ნათესავისათვის თავისდადება გადაგიწყვეტია, ამას შემოგვედრებ, ავაგ, მონგოლთა ყაენისაგან ჩემი ძის – დავითის მეფედ ცნობის დასტური გამოითხოვო.

– ან ყაენის წყალობას, ქართველების შეწყნარებას, შენი და შენი მემკვიდრის უვნებლობისა და ხელმწიფობის ბრძანებას მოვიტან, დედოფალო, ან არ დავბრუნდები და მაშინ შენდობით მომიხსენეთ, ვითარცა ჩემი მეფისა და ხალხისთვის განწირული, – თქვა გულაჩუყებულმა ავაგმა და დედოფლის კალთისკენ მიიწია სამთხვევად.

დედოფალი გადაეხვია და ტირილით გამოემშვიდობა სიყრმიდან თანშეზრდილ მხარგრძელს.

ავაგისა და თურმანის გასაცილებლად საქართველოს ყველა მთავარი მოვიდა. ყველას რჩეული ძღვენი და საგზალი მოჰქონდა. მარტო ნათესავნი და შინ ზრდილნი კი არა, მთელი სოფლები გამოსულიყო, ნაცნობი და უცნობი გულში მჯიღის ცემით და ხელაპყრობით მოჰყვებოდათ. უმრავლესობას წარმოდგენა არა ჰქონდა, საით და რა გზით მიდიოდნენ საქართველოს პირველი ვაზირი და გარნისის გმირი მგოსანი. გაგონილითა და გუმანით ხვდებოდნენ, რომ ქვეყნისთვის თავის დასადებად მიემართებოდნენ სადღაც,

დაუსრულებელ სიშორეში და რომ ამ გზით წასული კი გაუგონიათ, მაგრამ მოსული აღარავინ უნახავთ.

თითქო მართლა საიქიოში ისტუმრებდნენ, პატიებას ითხოვდნენ. თუ რამ ეწყენინებინათ, ეხვეოდნენ და გულამომჯდარნი ჰკოცნიდნენ.

ზარითა და მოთქმით, თავშიცემითა და პირისხოკვით ეთხოვებოდნენ «მოუსავლეთისკენ» მიმავალ მთავრებს.

გრძელ, იდუმალებით მოცულ გზაზე გაიჭიმა ქარავანი. თარგამოსის ნათესავ-შთამომავალთათვის მანამდე უცნობი და უვალი გზით პირველი ქართველები ყარაყორუმისკენ მიდიოდნენ.

ქვეყანა ისევ დულდა და შფოთი არ ცხრებოდა. მონგოლთა ცხენების ჭიხვინი და თქარათქური უფრო და უფრო მეტ ხალხს უკარგავდა ძილს, უფრო და უფრო შორს ისმოდა.

იმ ცხენების დაუჭედელ ფლოქვებქვეშ ახალ-ახალი ქალაქები და სოფლები, წალკოტები და ჯეჯილები ითქერებოდა, მიწა კვნესოდა, ცა კვამლითა და მტვრით ბნელდებოდა.

ბათო-ყაენის ლაშქარმა, ცალთვალა სუბუდაის მეთაურობით, რუსეთი დაიპყრო, რიაზანი, ვლადიმირი და კიევი ნანგრევებად აქცია, ყივჩაღეთი მოსპო, უნგრეთის ველებზე გაიქროლა, ბალკანები დაღეწა და ხმელთაშუა ზღვის ნაპირამდე მივიდა.

სულ ახლო იყო ვენა და ვენეცია – ევროპის უმდიდრესი და უმშვენიერესი ქალაქები.

მონგოლთა სისასტიკისა და უძლეველობის შიშს იაპონიის სანაპიროებიდან ბრიტანეთის კუნძულებამდე მიეღწია. ევროპა ძრწოდა და ცახცახებდა. ჩეხთა მეფე ხანგრძლივ საომარ სამზადისს შესდგომოდა, ხოლო ისეთი შორეული ქალაქებიც კი, როგორებიც ნიურნბერგი და ლუბეკი იყვნენ, მონგოლთა თავდასხმას ახლო მომავლის საქმედ თვლიდნენ, ზღუდეებს ამაგრებდნენ და ძნელი ომის თადარიგს იჭერდნენ.

თათრების შიშით, ინგლისმა ერთხანს დიდ ხმელეთთან ვაჭრობაც კი შესწყვიტა და დანარჩენ ევროპასთან მისვლა-მოსვლა შეზღუდა.

წყეული ჩინგიზისა და მისი სისხლიანი შვილიშვილის ბათო-ყაენის სახელი ევროპის ყველა ხალხმა იცოდა და მათ გარშემო ათასგვარ დაუჯერებელ ამბავს და ზღაპრებს ჰყვებოდნენ.

მონგოლთა ცხენების ჭიხვინის შორეული ექო რომსა და პარიზსაც წვდებოდა და ევროპა საშინელების მოლოდინში თრთოდა.

მაგრამ ყველაზე ძლიერ ქარიშხლისაგან აღძრულ ტალღასაც ბოლოს და ბოლოს ძალა ელევა, სუსტდება და ცხრება. ამოდენა ბრძოლამ და გზამ სისხლისაგან დაცალა და მოქანცა ალაფისაგან დამძიმებული მონგოლთა უძლეველი ლაშქარი. ყოვლისამტანი მონგოლური ცხენებიც გახდნენ და ბათო-ყაენმა მოულოდნელად შემოაბრუნა უკან თავისი მხედრობა.

ამასობაში მონგოლები საქართველოს სამხრეთითაც არ ისხდნენ გულხელდაკრეფილნი, ირანის დაპყრობა თითქმის მოეთავებინათ და ერთ დროს უძლიერესი ბიზანტიის ნამსხვრევებს მისდგომოდნენ.

იკონიის სულტანი უზარმაზარი ლაშქრით დახვედროდა თათრებს. რუსუდან მეფის ამაყ სიძეს მონგოლებზე გამარჯვება წინასწარ უზრუნველყოფილად მიაჩნდა თურმე, ბანაკში ქეიფობდა და თან წამოყვანილ უცხო ფრინველებითა და ცხოველებით ერთობოდა. მონგოლები მოულოდნელად დასხმოდნენ თავს, სასტიკ ომში დაემარცხებინათ და მისი ურიცხვი ლაშქარი გაენადგურებინათ. სულტანს თავი გაქცევით ძლივს გადაერჩინა. მონგოლებს აურაცხელ ალაფში სხვა უთვალავ სიმდიდრესთან ერთად ყიასედინის უცხო ფრინველები და მხეცები დარჩენოდათ და ნიკეის მეფის ვატაცის კარზე შელტოლვილ სულტანს ცოლ-შვილზე და სამკვიდროზე მეტად თურმე ეს დანაკარგი აწუხებდა.

ყველაზე მნიშვნელოვანი საქართველოსათვის ის იყო, რომ ორივე მხრიდან ქართველობა იბრძოდა: ყიასედინის ლაშქრის სარდალი აფხაზი შერვაშიძე იყო, ხოლო სულტნის სამსახურში მყოფ ქართველ მხედართმთავრებს შორის შალვა ახალციხელის ძე ფარადავლეც იბრძოდა.

ბიჩუ-ნოინის ლაშქარში მონგოლთაგან დაპყრობილი საქართველოს მხედრობა წინამბრძოლობდა ვარამ გაგელის, ჯაყელისა და სხვა ქართველ მთავართა მეთაურობით.

საქართველოსათვის მონგოლთა დამარცხება და ყიასედინის გამარჯვება უნდა ყოფილიყო სანატრელი, მაგრამ საქართველოს ეკლესიებში ბიჩუ-ნოინის გამარჯვებას შესთხოვდნენ უფალს, რადგან მისი დამარცხება საუკეთესო ქართველი ვაჟკაცების დაღუპვა, უთვალავი ბავშვისა და ქალის დაობლება და დაქვრივება იქნებოდა. სივასის ომში ორივე მხრიდან ურიცხვი მოსწყდა. მონგოლებმა ქართველებისა და სხვა დაპყრობილი ხალხების შვილები შეაჟლიტეს ერთიმეორეს, თავათ უდიდესი დავლა იგდეს ხელთ და კიდევ ერთი სამეფო დაიმორჩილეს. იმ ძლიერ ომში გმირულად დაცემულთა შორის დარდნან შერვაშიძე და ფარადავლე შალვას ძეც იყვნენ.

ამიერიდან ქართველებს თავიანთი ყველაზე საშინელი მტრების დროშის ქვეშ უნდა ებრძოლათ, მათი დიდებისათვის სისხლი უნდა ეღვარათ და მათი გაძლიერებისათვის თავი უნდა გაეწირათ.

ყარაყორუმი!

მონგოლთა უზარმაზარი სახელმწიფო სატახტო!

მონგოლთა დაპყრობილი უთვალავი ქვეყნების მთელი სიმდიდრე, ოქრო და ვერცხლი, განძი და ფასეულობა ათეული წლების განმავლობაში აქეთ მოედინება უწყვეტ ნაკადად.

დაპყრობილი მსოფლიოს საუკეთესო ოსტატები, კალატოზები და დურგლები, ოქრომჭედლები და მხატვრები აქ ჩამოურეკნიათ ძლევამოსილ მონგოლებს.

ყარაყორუმი უკვე აღარ ჰგავს მონგოლურ ქალაქს, დროებით დადგმულ, სწრაფადვე ასაკეცი იურტების კრებას.

მონგოლთა სატახტოში სწორი ქუჩები და ფართო მოედნები, მკვიდრი შენობები და ბაზრები გაჩენილა.

ყოფა-ცხოვრების დაბალ საფეხურზე მდგარ მომთაბარეებს ოქრო და განძეულობა თავსაყრელი აქვთ, მაგრამ, ეტყობათ, ჯერჯერობით არც ხელოვნების ფასი იციან, არც გემოვნება აწუხებთ.

ეს უგემოვნება ყველგან თვალში ეცემა მნახველს, მონგოლი მთავრების ყოველდღიურ საოჯახო ყოფაშიაც, ყაენის მაღალ კარზეც და თვითონ სატახტოს კეთილმოწყობაშიც. ყველგან გამოსაჩენად მიყრილი სიმდიდრე ჰყვირის, ზომიერება და სინატიფე არსად არის, პატივი მხოლოდ სიმრავლესა და თვალისმომჭრელობას დასდებია. ყარაყორუმი ახალ ბაბილონსა ჰგავს, სადაც უამრავი ენა და ერი ერთმანეთში არეულა. ქუჩებში ყველა რჯულისა და ეროვნების ხალხი ტრიალებს და ყველა ხალხის ენაზე ისმის საუბარი და ყაყანი. რუსი და ინდოელი მთავრები, ბერძენი და სომეხი ვაჭრები, ფრანგი მისიონერები და ტიბეტელი ბუდას მსახურები, ირანელი ნესტორიანები და არაბი მაჰმადიანები ჯგუფ-ჯგუფად დადიან და გამვლელ-გამომვლელთა ყურადღებას მარტო თავიანთი ეროვნული ტანსაცმლით კი არა, თავისებური ქცევითაც და წესითაც იპყრობენ.

სატახტოში ცხოვრება დულს.

მონგოლთა დედაქალაქისათვის უცხო აღარაფერია, არც დასავლეთის რაინდთა ტურნირები, არც აღმოსავლეთის ჰარემები, არც ევროპული სინატიფის უკიდურესობანი და არც აზიური მოყირჭების უცნაურობანი.

ახლახან მონგოლთა უნაპირო სამფლობელოს უზენაესი მბრძანებლის გუიუქ-ყაენის ასვლა იდღესასწაულა დედაქალაქმა. სატახტო ჯერ კიდევ გაჭედულია ალღუმში მონაწილე ჯარებით, ზეიმი და შექცევა გრძელდება, ქუჩებში ნაქეიფარი თათრები დაყიალობენ.

გზის ორივე მხარეს ჯარის ნაწილები დგანან. ვიწროთვალეებიან, სახეყვითელ მონგოლებს შორის უფრო და უფრო ხშირად ჩანან შავგვრემანი და შავტუხა, ქერა და მწითური ჯარისკაცები. მონგოლთა ლაშქარი ისეთი როდილა არის თავისი შემადგენლობით, როგორსაც ოცდაათიოდე წლის წინათ ჩაუდგა სათავეში ჩინგიზ-ყაენი. ამ ლაშქარში ახლა მეთაურებს შორისდა სჭარბობენ მონგოლები, თორემ ჯარისკაცების უმრავლესობას დაპყრობილ ხალხთაგან გაწვეულები შეადგენენ.

ჯგუფად დგანან ქართველი და სომეხი ჯარისკაცები, ხმადაბლა ლაპარაკობენ. უცებ, ერთმა დანარჩენებს ხელით ანიშნა.

– სანადღეოს ვდებ, თუ ქართველები არ არიან! – წამოიძახა და წინ წავიდა.

ყველანი ქუჩის ნაპირისაკენ დაიძრნენ.

ქუჩაში ქართველი მთავრები მოდიოდნენ, გულზე ოქროს პაიცები ეკიდათ და გამვლელ-გამომვლელნი გზას უთმობდნენ.

– ქართველები არიან! ნამდვილად ჩვენები არიან! – ალტაცებით აღმოხდათ ჯარისკაცებს.

– მომკალით, თუ ავგ მხარგრძელი არაა, ივანე ათაბაგის შვილი! – შესძახა ბიჯნელმა სომეხმა და პირისპირ მომავალ მთავრებს მიაშტერდა.

– ისინი არიან, ქართველი მთავრები, ავგ მხარგრძელი და თურმან თორელი. გუშინ მითხრა ჩვენებურმა ვაჭარმა მათი აქ ყოფნა, – დაუდასტურა ანელმა ჯარისკაცმა.

– აქ რისთვის არიან ჩვენი მთავრები? – გაიკვირვა მესამემ.

– ახლა ყველა ქვეყნის მეფეები და მთავრები ყაენის კარზე არიან, დიდ ყაენს სთხოვენ თავიანთი სამეფოებისა და მამულების პატრონად დამტკიცებას.

– იქნებ ჩვენი ოჯახების რამე იცოდნენ, შვიდი წელია სახლისა აღარა გამიგია რა.

– ახლა ან მაგათ რა ეცოდინებათ, ორი წელია თურმე წამოსულები არიან, ჯერ ბათო-ყაენის კარზე ყოფილან, მერე ექვსი თვის წინათ ყარაყორუმს ჩამოუღწევიათ, – ჩაუფარცხა იმედი მთავრების ამბის მცოდნე ანელმა ჯარისკაცმა.

– ხედავთ? გულზე ოქროს პაიცები ჰკიდიათ; ეტყობათ, ყაენის წყალობა უკვე მიუღიათ და ამიერიდან გზა ხსნილი აქვთ მზის აღმოსავლიდან დასავლამდე.

– ნეტავი მაგათ! – ამოიოხრა ქართველმა ჯარისკაცმა.

– ეს ბუმბერაზი მონგოლი ვინდა მოჰყვებათ!

– ეგ შიდუნ-ნოინია, ყაენის ახლო ნათესავი. ქართველთა უპირველეს მთავარს თავისი სიუხვითა და სიდარბაისლით იმ ზომამდე მოუხიბლავს გუიუქ-ყაენი, რომ მასთან დამოყვრება მოუსურვებია, ავგ ათაბაგისათვის ყაენს შიდუნ-ნოინის ქალი მიუცია ცოლად, – განმარტა ისევ ანელმა ჯარისკაცმა.

მთავრები მოახლოვდნენ.

ქართულ-სომხური ლაპარაკის გაგონებაზე გამოცოცხლდნენ, ჯარისკაცებისკენ პირდაპირ წამოვიდნენ.

– სადაურები ხართ, ბიჭებო? – ქართულად ჰკითხა ავაგმა და ხელი ჩამოსართმევად გაუწოდა.

– ხაჩნიდან გახლავართ, – ქართულადვე უპასუხა შავტუხა სომეხმა.

– მე გიორგიწმინდიდან გახლავართ, გარეჯის მხრიდან, – წაიდუდუნა ბუღასავით გამომზირალმა სქელკისრიანმა გოლიათმა.

– მე ანისიდან ვარ!

– მე კიდევ არტანელი.

– მე კასპიდან გახლავართ.

დააყარეს ჯარისკაცებმა.

ავაგი და თურმანი ყველას სათითაოდ ართმევდნენ ხელს.

– რახანია, აქა ხართ?

– ამ დასაქცევ მონგოლეთში? – იკითხა არტანელმა ჯარისკაცმა.

ავაგმა აქეთ-იქით მიმოიხედა, ხომ არავინ გვისმენსო.

– მონგოლთა ჯარში, – განუმარტა კითხვა ავაგმა.

– ხუთი წელი იქნება, რაც წამომიყვანეს, – მიუგო არტანელმა.

– მე, აგერ მეშვიდე წელია, ამ წყეულებს ვემსახურები, – თითებზე ჩამოთვლითა თქვა ხაჩენელმა.

– როდის იქნება ჩვენი საშველი, შინ როდის უნდა გაგვიშვან!

– ერთი ისე არ მომკლა, საქართველოს ღრუბელი ველარა ვნახო.

– ამათგან ცოცხალი კაცი ვერ წავა, მაგრამ მკვდარს მაინც მეღირსებოდეს ჩემს ქვეყანაში დამარხვა.

ოხვრითა და მკერდში მჯილის ცემით გადმოშალეს გულის ნადები თვალებზე ცრემლმომდგარმა ვაჟკაცებმა.

– ძალიან გიჭირთ, ბიჭებო? ავად გეპყრობიან განა? – ხმადაბლა იკითხა თორელმა.

– გვიჭირსო? გვიჭირს რომელია, ყოველ წამს სიკვდილს ვნატრობთ: ომში წინ მიგვერეკებიან და მტერს პირველადვე ჩვენ გვაწყვეტენ, ქალაქებს ჩვენი ხელით იღებენ, მაგრამ უამრავი ალაფიდან გრამის წონას არ გვითმობენ.

– ალაფს ვინა ჩივის, ერთ ნაბიჯზე არ გვენდობიან, სულ ეჭვით გვიცქერენ...

– სულ ამბობხება და ღალატი ელანდებათ.

– ჰაი, დედასა, ერთი მართლა ავჯანყდებოდეთ და მაგათ ოხტში ამოვიდოდეთ!

– რას ამბობთ, არავინ გაგიგონოთ! – შეუწყრა ავაგი.

– არადა, მეტის მოთმენა აღარ შეგვიძლია!

– ჯავრი გაგვგუდავს!

– ნეტავ, რა დღეშია ჩვენი ქვეყანა! საქართველოსი არა იცით რა? – იკითხა გიორგიწმინდელმა გოლიათმა.

– საქართველოსი რა გვეცოდინება, ორი წლის წინათ წამოვედით. ორმა წელმა ისე ნელა გაიარა გრძელ გზასა და ყაენის კარზე წვალეებაში, საუკუნე მგონია, – ამოიოხრა თორელმა.

– ალბათ, უკან მალე დაბრუნდებით, – შეჰნატრა მთავრების ბედს კასპელმა ჯარისკაცმა.

– მალე, ორ-სამ დღეში, – ღიმილით თქვა ავაგმა, – არ კმარა, რაც ენით უთქმელი გაჭირვება გადაგვხდა?!

– წამოდით, ხალხნო, მანდ რას შეჩერდით! – გამოსძახა წინ წასულმა შიდუნ-ნოინმა და მთავრები აჩქარდნენ.

– კარგად იყავით, ვაჟკაცებო, გამაგრდით.

– ჭკუით მოიქეცით, თავი უბრალოდ არ წააგოთ, – დაარიგეს ქართველმა მთავრებმა, შვილებსავით გადაეხვივნენ და თვალცრემლიანნი გამოემშვიდობნენ. დარჩენილები გულჩამწყდარნი გაჰყურებდნენ მიმავალთ და ლოყებზე ცრემლი ღაპალუპით ჩამოსდიოდათ.

– გამაგრდითო! ერთი თქვენ იყვნეთ ჩვენს დღეში! – გამოსცრა რომელიღაცამ და ნათქვამი ეკალივით მოხვდა გულში თორელს.

დაძმარებულნი, გუნებაწამხდარნი წამოეწივნენ შიდუნ-ნოინს.

ნოინი კარგ ხასიათზე იყო. ლაშქრის დროშებზე უთითებდა, ჯარებისა და დუმანების მეთაურ ბალათურების ვინაობასა და საგმირო საქმეებს უამბობდა, შიგადაშიგ სასაცილო ამბებს ურთავდა, მსმენელებსაც აცინებდა და თავადაც გულიანად ჭიხვინებდა.

ტრიალ მინდორზე გავიდნენ.

საგანგებოდ გამართულ ჩარდახში მონგოლი დიდებულები დაბრძანებულიყვნენ და ცხენოსნების შეჯიბრებას უცქერდნენ.

ჯარისკაცები, უბრალო მოლაშქრეები მინდორზე ისხდნენ უზარმაზარ წრედ.

შიდუნ-ნოინსა და მის სტუმრებს შორიდანვე მიეგებნენ, წინ წაუძღვნენ და საპატიო ადგილებზე დასვეს. ერთ წამს ყველამ მათკენ იბრუნა პირი, მიაჩერდნენ და მთელს იმდენ შეკრებულებაში ჩურჩული ატყდა.

მინდორზე ბურთი გახურდა და მაყურებლებმა ისევ ცხენოსნებს მიაპყრეს მზერა. მალე ცხენოსნებმა ბურთის თამაში დაასრულეს. მათ შემდეგ მოედანზე მოისრეები გამოვიდნენ. ისრის ტყორცნის ოსტატობა და ცხენზე ჯდომის სიკისკასე აჩვენეს.

მოისრობას ნადირობა მოჰყვა. მინდორზე მელიები და კურდღლები გაუშვეს, იმ დამფრთხალ ცხოველებს უზარმაზარი ბერკუტები მიუტყეს და ყველანი ფეხზე წამოიშალნენ.

ტაშისცემითა და «ალაი! ალაი!»-ს ძახილით აჰყვნენ მალლიდან შურდულივით წამოსულ, ფრთებგაშლილ ფრინველებს. ნაპირისაკენ თავის გადასარჩენად გამოქცეულ მელიებსა და კურდღლებს საშინელი ხმით უყვიროდნენ, უკანვე, მინდვრისკენ აბრუნებდნენ და იმ არწივებზე მეტად უხეთქავდნენ გულს.

უმწეო ცხოველების სირბილი დიდხანს არ გაგრძელებულა, ბერკუტებმა კლანჭებში მოიქციეს, იქვე გაგლიჯეს და სისხლს რომ დაეწაფნენ, უთვალავი მაყურებელი კიდევ ერთხელ ერთი კაცივით წამოდგა ფეხზე და ნერწყვის ყლაპვით, აღზნებული მიაშტერდა არწივთა კლანჭებქვეშ მოფართხალე, ჯერ კიდევ ცოცხალ ოთხფეხს.

თორელი გოცეებული უყურებდა, როგორ ტკბებოდნენ მონგოლები გაგლეჯილ მელიებსა და კურდღლებზე შემომჯდარი სისხლისმსმელი ბერკუტების ცქერით, როგორ მთვრალელებით აგზნებულები ადევნებდნენ თვალს უმწეო ცხოველების სისხლის დენასა და სულის ლაფვას. იმ ბერკუტებივით თავისერწამოჭარხლებულებს, თვალიც მონადირე ფრინველებივით დასისხლიანებოდათ და მათ შემხედვარე თორელს გააჟრჟოლა. ეს ხალხი ყოველგვარი მხეცობის ჩასადენად მზად იყო, თვითონაც ნახევრად მხეცს ჰგავდა და აღტყინებისა თუ გახელების დროს ნადირისაგან არაფრით განირჩეოდა.

ნადირობაც დასრულდა და ახლა ჭიდაობა გაიმართა. მიწაზე მსხდომნი წამოიშალნენ, ჭიდაობისათვის საკმარისი ვიწრო წრე შეჰკრეს და ისევ ძირს დაეყარნენ.

ჯერ მონგოლები გამოვიდნენ.

წრეში ორი მონგოლი შემობაჯბაჯდა მოკლე ფეხებითა და უსწორმასწორო ნაბიჯებით.

თითოეული მათგანი სხვადასხვა დუმანიდან იყო და მაშინვე ყველამ თავი ჩარდახისკენ იბრუნა, სადაც იმ დუმანების უფროსი ნოინები ისხდნენ.

კარგა ხანს იბღლარძუნეს, ერთმანეთს ვერაფერი დააკლეს, ვერც წააქციეს ერთიმეორე, ვერც ლამაზი ჭიდაობით დაატკბეს მაყურებელი.

მოჭიდავეების დუმანების ნოინებმა ხელი ჩაიქნიეს, მაყურებლებსაც მოსწყინდათ უხალისო ძიგლიგის ცქერა და უშნო მამლებივით ერთიმეორეზე აქოჩრილი ფალავნები გააშველეს.

მეორე წყვილის გამოსვლაზეც თავი ისევ ჩარდახისკენ მოიბრუნა ყველამ, მაგრამ ახლა სხვა დუმანების უფროსებს მისჩერებოდნენ, ნოინები იცინოდნენ და ერთმანეთს სანამღლოს უდებდნენ.

ტანმორჩილმა მონგოლმა მოწინააღმდეგე დიდხანს არ აწვალა, მოულოდნელად მხარზე წამოიგდო და ორივე ბეჭით ძირს გაშალა.

ატყდა ერთი ყიჟინა, ზუზუნი, ყვირილი, სტვენა და ღრიალი.

გამარჯვებული ჯარისკაცის დუმანის ნოინი ფეხზე წამოხტა, სხვაზე მეტად ღრიალებდა სიხარულისაგან და დამარცხებულის პატრონს მხარზე მაგრად ურტყამდა ხელს.

ყიჟინა დაცხრა. მინდორზე ახალი წყვილი შემოვიდა.

მონგოლის პირისპირ უზარმაზარი ირანელი დადგა. ირანელს დამარღვული, მაგარი კუნთები შავად უზინავდა მზეზე. მონგოლსაც კარგად ჩასხმული ტანი ჰქონდა, მაგრამ ირანელ გოლიათთან შედარებით ყმაწვილივით გამოიყურებოდა.

ურიცხვი მაყურებლის შეძახილითა და ყიჟინით გამხნევებული მონგოლი მოპირდაპირის ბუმბერაზობას არ შეეპუა, მაშინვე ეცა და შეაჯანჯლარა. ირანელმა წაიბორძიკა, მაგრამ ისევ მალე აღიდგინა წონასწორობა. ეს საკმაო იყო, რომ იმდენი მაყურებელი ფეხზე წამომდგარიყო და სტვენითა და ღრიალით, მუშტებისა და მათრახების ქნევით ჩარდახის იმ მხარისკენ მიბრუნებულიყო, სადაც ყაენის კარზე ჩამოსული ირანელი სულტნები და ათაბაგები ისხდნენ. ამდენი გამხეცებული თვალის მოჩერებასა და ღრიალს, ცოტა არ იყოს, შეუშინდნენ გოლიათი მოჭიდავის თანამემამულენი, ფერი დაკარგეს, თავი ჩალუნეს და საფრთხის მოლოდინში გაინაბნენ.

მონგოლი მოჭიდავე ჩქარობდა, მოწინააღმდეგეს აწუხებდა, უცებ უტევდა, უცებვე უსხლტებოდა. ირანელი ზანტობდა, მაინცდამაინც თავს არ იდებდა, ხელთმოგდებულ მოწინააღმდეგეს არ ბლუჯავდა, წასაქცევად არ იმეტებდა და იოლადავე უშვებდა.

უეცრად მონგოლმა მუხლებზე ჩაიჩოქა და მაღლიდან წამოღებული ბუმბერაზი ლავაშივით გაშალა.

გაუგონარი ყიჟინა ატყდა, ქუდები და მათრახები ცაში ისროლეს, მოედანზე გადაცვივდნენ და გამარჯვებული ერთხანს აბურთავეს. ერთმანეთში არეული ყვირილი, სტვენა და ტაში დიდხანს არ დამცხრალა. მუმტებსა და მათრახებს ისევ იქნევდნენ ჩარდახში მჯდარი ირანელი ათაბაგებისა და სულტნებისაკენ, მაგრამ ეს უკვე გაბრაზებული ხალხის მუქარა აღარ იყო და წაქცეულის კეთილშობილი თანამემამულენი ურცხვად იღრიჭებოდნენ გახარებულნი, რომ მონგოლთა რისხვას მხოლოდ თავმოყვარეობის დამცირების ფასად გადარჩნენ.

ირანელი ძირს რომ გაიშალა, თორელმა ღიმილით მოხედა ავავს და ქართულად გადაულაპარაკა:

– ნაღდად დაუწვა, ეგ კამბეჩი!

– ძალიან კარგად მოიქცა! – მოუწონა დამარცხებულს ავავმა.

– რას ამბობ, მთავარო! – აღშფოთდა თორელი და ავავს ბრაზისაგან გაფითრებულმა მოხედა, – ვაჟკაცი მაშინ იქნებოდა, ეგ მონგოლი მაიმუნი რომ ძირს დაეხეთქებინა და ამ გახელებული მხეცებისათვის პირში ბურთი ჩაეგდო.

ხალხი ისევ დაცხრა და დაწყნარდა.

ახალი წყვილი შემოვიდა.

მონგოლის პირისპირ თურქი მოჭიდავე იდგა.

ისევ აგუგუნდნენ და ისევ ჩარდახისკენ იბრუნეს პირი. იქ თურქი სულტნები და მელიქები მოძებნეს თვალით და ახლა მათკენ მიმართეს მუმტები და მათრახები მუქარით.

თურქ ფალავანს კიდევ უფრო ცოტა დრო დასჭირდა, მონგოლის ორიოდ სარმას გაუმაგრდა, მაგრამ მოპირდაპირე ბევრი აღარ აწვალა, მოგვერდზე მოიგდო და მოულოდნელად თვითონვე გაეკრა მიწას ბეჭებით.

მაყურებელთა სიხარულსა და აღტაცებას საზღვარი აღარ ჰქონდა. წელანდელზე უფრო ყურისწამლებად ატყდა ღრიალიც, სტვენაც, ტაშიცა და ყვირილიც.

თურქი სულტნები და მელიქები თავგალუნულნი, ფერწასულნი ისხდნენ და ცივ ოფლში იწურებოდნენ. რამდენიმე ათასი მაყურებელი ერთნაირად გონდაკარგული ღრიალებდა, ფეხებს აბრაზუნებდა, სტვენდა და გაჰყვიროდა. იმ წუთში ყველა მთვრალივით იყო, ერთნაირად აღგზნებული, გონებადაბნელებული და განსჯის უნარს მოკლებული.

შიდუნ-ნოინმა გვერდით მჯდარ მეორე ნოინს რაღაც გადაუჭურჭულა, მერე თავისი მხლებელი ასისთავი იხმო და უბრძანა:

– აქ რამე უწესრიგობა არ მოხდეს. ახლავე წადი და ჩემი დუმანით აქაურობას ალყა შემოარტყი.

ასისთავი წავიდა და ნოინებმა საუბარი ჩურჩულითვე განაგრძეს.

ცოტა ხნის შემდეგ შიდუნიც წამოდგა, ავავს თვალით ანიშნა და გარეთ გაიყვანა. ავავის ადგილზე შაოსანმა ბერმა მოიჩოქა და თურმანის გვერდით მოთავსდა.

დიდხანს არ დაცხრა ყურისწამლები ყიჟინა და აურზაური. ხალხი ბობოქრობდა და ღელავდა. როგორც იქნა, მოედანი ისევ გაათავისუფლეს და წრეში ორი წყვილი გადმოხტა.

ორი მონგოლის პირისპირ ქართველი და სომეხი ფალავნები იდგნენ.

თორელმა იცნო ის გიორგიწმინდელი და ხაჩენელი ჯარისკაცები, რომელთაც აქეთ მომავალნი შეხვდნენ და ესაუბრნენ.

ისევ ადგნენ ფეხზე, ისევ ტყესავით აღიმართა მუშტები და მათრახები. და ქართველი მთავარი მიხვდა, რომ იმ წუთს ყველა მას მისჩერებოდა და მუქარაც მისკენ იყო მიმართული.

– დაილუპებით, თუ არ წაიქცნენ! – გადაუჩურჩულა უცნობმა ბერმა თურმანს.

– რას ამბობ! ღმერთმა ქნას, რომ გაიმარჯვონ და ამ გაყოყოჩებული მხეცების ჯავრი ამოგვყარონ! – კბილის ღრჭენით თქვა თორელმა და ხედვად იქცა. ფალავნებმა ხელი სტაცეს ერთმანეთს. ხაჩენელი შავტუხა ფალავანიცა და გიორგიწმინდელი გოლიათიც გულით ჭიდაობდნენ. მოპირდაპირეებს მაგრად ავლებდნენ ხელს და მარჯვედ უსხლტებოდნენ. მონგოლების უმნიშვნელო ილეთზე იქ მყოფნი ერთი კაცივით ფეხზე დგებოდნენ და ღრიალებდნენ. ქართველისა და სომეხის ყოველ ფანდზე ბრაზისაგან ენთებოდნენ და თავიანთ თანამემამულეებს მონგოლურად უყვიროდნენ:

– მოჰკალი!

– წიხლი მისცხე!

– მუცელში!

იმოდენა შეძახილით წათამამებული მონგოლი ფალავნები თავს არ იზოგავდნენ, წესებს გადადიოდნენ და აკრძალულ უხეშობასაც მიმართავდნენ, მაგრამ მაინც არაფერი გამოსდიოდათ, მოწინააღმდეგენი აშკარად სჯობნიდნენ და სადაც იყო, წააქცევდნენ. გვერდით მჯდარი ბერი წამოდგა, თურმანს ხელი მოჰკიდა და გადაულაპარაკა:

– წავიდეთ! აქ კარგი არა მოხდება რა.

თორელი მოჭიდავეებს მონუსხულივით მისჩერებოდა, სხვაზე აღარაფერზე ფიქრობდა და ბერის ხელი ისე მოიშორა, მისი ნათქვამი არც გაუგია.

ორჯერ მოიგდო გიორგიწმინდელმა მოწინააღმდეგე ზურგზე, დასცა კიდევ, მაგრამ ორივე ბეჭი ვერ დაადებინა და მოპირდაპირე სწრაფადვე წამოუხტა.

ხაჩენელმაც რამდენჯერმე წამოაჩოქა მონგოლი ფალავანი, დაღალა, გაასავათა და ახლა წამი-წამზე ქანცგაწყვეტილი მოწინააღმდეგე თვითონვე დაწვებოდა, ოღონდ ამ თავბრუდამსხმელ ტრიალს გადარჩენოდა. მაყურებლები ხედავდნენ მონგოლი ფალავნების წახდენას, ბრაზი ცეცხლს უკიდებდათ, გულზე სკდებოდნენ და გაწყვეტაზე იყო ის ბეწვი, რომელიც ოდნავ კიდევ აკავებდათ ჭიდაობაში აშკარად ჩარევისაგან.

თორელი ხედავდა მონგოლთა გახელებას და ბავშვივით უხაროდა. დიდი ხნის განმავლობაში მონგოლთა წინააღმდეგ გულში დაგროვილმა ჯავრმა და

ბოლმამ, უამრავი დამცირებისა და შეურაცხყოფის შედეგად გულში ჩაბუდებულმა სამაგიეროს მიზღვის წყურვილმა ერთბაშად იფეთქა და ფრთა გაშალა.

მისკენ მრისხანედ მზირალ, გაბოროტებულ მონგოლებს იგი დამცინავი ღიმილით გამომწვევად უყურებდა და თავი ამაყად ეჭირა, თითქო ეუბნებოდა – ახლა მაინც ხომ ვიყრი თქვენს ჯავრსო.

გიორგიწმინდელმა უცებ მალლა აიტაცა მოწინააღმდეგე, კისრულზე წამოიღო და წამით გამეფებულ სამარისებურ სიჩუმეში მონგოლი ორივე ბეჭით მიწას დაახეთქა.

საშინელი ღუმილი ერთ წამს გაგრძელდა. მერე უცებ, თითქო გამოერკვენენო, ათასებმა ერთად იზრიალეს, გრიგალივით წამოიჭრნენ, ადგილს მოსწყდნენ და ის იყო მოედნისკენ დაიძრნენ იქაურობის წასალეკავად, რომ მეორე მონგოლიც ძირს გაიშხლართა. წაქცეულებს ჯერ კიდევ გულეზზე ადგნენ მუხლებით ორივენი, ქართველიცა და სომეხიც. თუმცა იქაურობა ტყესავით აიშალა და ქარიშხალივით მათკენ წამოვიდა ოთხივ მხრით, ფალავნები თითქო ტკბებოდნენ გამარჯვებით, განგებ არ დგებოდნენ, რომ მათ ფეხქვეშ დიდხანს ყოფილიყვნენ გართხმულნი ისინი, ვის ჯავრსაც ამდენ ხანს გულში ატარებდნენ ფარულად.

თორელმა ერთი აღტაცებით შესძახა, მაგრამ მოჭიდავეებისკენ წრეში გადაშვებული, გამხეცებული მონგოლები რომ დაინახა, ხმალზე ხელი იტაცა და გადასახტომად წამოიწია... და ყველაფერი ფიქრის უსწრაფესად დატრიალდა.

მონგოლები გამარჯვებულებს ეცნენ და თორელსაც უცებ თვალთ დაუბნელდა. თავში რაღაც მძიმედ მოხვდა და ძირს დაეცა.

მოედანს ცხენოსანი ჯარი შემოერთყა შიდუნ-ნოინის მეთაურობით.

– ყაენის სახელით, გიბრძანებთ, დაიშალეთ! – ყვიროდნენ შიდუნის ცხენოსნები და მათრახის ცემით ცდილობდნენ საჭიდაო წრესთან შეკრული ზედახორის დაშლას.

თვითონ შიდუნი, რამდენიმე ტურგაუდის თანხლებით, ჩარდახში აიჭრა და ყვირილითა და მუქარით მისწი-მოსწია მონგოლები, რომლებიც ძირს დაცემულ თორელს გააფთრებით სცემდნენ წიხლებს.

როგორც იყო, შემოაცალა გამხეცებული, სახეშეშლილი მონგოლები მსხვერპლს. ერთიანად დათეთქილი, თავგატეხილი, სისხლსა და მტვერში ამოსვრილი თორელი ოთხმა კაცმა ჩვარივით აიღო და შიდუნის იურტისაკენ გააქანა.

საჭიდაო წრეც რომ დაცარიელდა, თვალწინ საშინელი სურათი გადაეშალათ:

გამარჯვებული ფალავნების მკლავები და ფეხები მოწყვეტილი ეყარა ცალ-ცალკე, ხერხემლები ორთავეს გადატეხილი ჰქონდა და თავები ქვით გაჭეჭილი.

დანთხეული ტვინი, სისხლი და აჩიქნული მიწა ერთმანეთში არეულიყო და გულისამრევ სანახაობას წარმოადგენდა.

ნაბადივით მოთელილი თორელი მკვდარი ეგონათ. ავაგმა ექიმის მოსაყვანად კაცი აფრინა და იქ მყოფებს უმწეოდ მოავლო თვალი. შეკრებილებს ის უცხო ბერი გამოეყო, თორელს რომ ჭიდაობიდან წასვლას ურჩევდა.

ნაგვემთან მივიდა, ჯვარი გადასახა და მაჯა გაუსინჯა. როგორც იყო, მისუსტებული მაჯის დუნე ფეთქვა დაიჭირა და დარდისაგან გათავებულ ავაგს ახარა:

– ცოცხალია!

– მიშველე, მაგ ჯვარის მადლს გაფიცებ, – შეევედრა ავაგი, – თუ მკურნალი ხარ, გადამირჩინე!..

– მე ყოველთა ქრისტიანთა ამქვეყნიური მეუფის პაპის ელჩი ვარ დიდი ყაენის კარზე. მაგრამ ჩემი ორდენის ყველა წევრმა მკურნალობაც იცის, რადგან ჩვენს მოვალეობად ვთვლით, ხორციელი ტკივილისაგან ისევე ვუღბინოთ მოკვდავთ, როგორც სულიერი ტანჯვისაგან.

– ოღონდ ეს გადამირჩინე და მთელს ჩემს საბადებელს შენ გადაგაგებ, – შეჰლაღადა თვალცრემლიანმა ავაგმა.

– ჩვენ ყოველ ღონეს ვიხმართ, მთავარო, წამალსა და ზრუნვას არ მოვაკლებთ. გადარჩენა კი უფლის ნებაა. ვილოცოთ, რომ უფალმა იხსნას მონა თვისი სიკვდილისაგან.

– ყმად დაგიდგები... მონად გაგიხდები! – ისევ შეევედრა ავაგი.

– წმიდა პაპის დესპანმა, ჯოვანი დელ პიანო კარპინიმ საკუთარ ყმებსა და ქონებაზეც უარი თქვა, მთავარო, და თავის მეგობარ ფრანჩესკო ასიზელთან ერთად გლახებსა და ღარიბ-ღატაკებს გაუყო, თუ რამ ებადა. მას შემდეგ, რაც წმინდა ფრანჩესკოს გზას შევუდექი, ჩემი სიხარული მოყვასის შველას მხოლოდ და ახლაც, ღვთის შეწევნით, ყველა ღონეს ვიხმარ გვემულის გადასარჩენად.

პიანო კარპინიმ გატეხილ-დათეთქვილი თორელი განზანა, წამლები დაადო, დაზილა და შეუხვია. ერთი თვის განუწყვეტელმა მკურნალობამ ნაყოფი გამოიღო, თორელს გატეხილი გაუმთელდა, დათეთქვილი დაუამდა და წყლულები მოუშუშდა.

ცალი თირკმელი გვემისაგან დაზიანებული აღმოაჩნდა და სახე და თვალის უპეები გაბიჟინებული და შემუშუბული დარჩა ღამენათევ მემთვრალესავით.

თითქმის ყველა ასო და ნაკვთი გამოუკეთდა, მაგრამ რატომღაც გულის ფრიალი დასჩემდა. სრულიად მოსვენებულსაც კი მოულოდნელად ჰაერი აღარ ჰყოფნიდა, გული შეუქანდებოდა და სული ყელში ებჯინებოდა.

– ეს უკვე ადვილად აღარ გაუვლის, მშვიდი, დასვენებული ცხოვრება, სუფთა ჰაერი და დიდი დრო უშველის თანდათან, – ირწმუნებოდა მკურნალი ბერი და თუმცა ავაგსაც სული მისდიოდა საქართველოში წასვლისათვის, ჯერ კიდევ ეშინოდა სნეულის დამპრისა.

– თუ მოსარჩენი ვარ, ჩემი მიწა-წყლის ჰაერი მომარჩენს, თუ სასიკვდილოდ ვარ განწირული, ჩემს ქვეყანაში სიკვდილი და მშობელ მიწაში განსვენება მაინც მელირსება. წავიდეთ, გზაზე უკეთ გავხდები.

ეხვეწებოდა თორელი, მაგრამ ავაგი არ ჩქარობდა, მოთმინებით უცდიდა თურმანის გამომთელებას.

საქართველოში წასვლის სურვილით ერთიანად შეპყრობილმა თორელმა თავს ძალა დაატანა, ჭამა-სმასა და ძილს უმატა და ცოტა მომჯობინდა. გულისფრიალი და ხუთვა მაინც არ ეხსნებოდა, მაგრამ ცდილობდა, სხვებისთვის თავი მოერიდებინა და გასაჭირი არ ეჩვენებინა.

ავაგმა შეამჩნია, როგორ ატანდა თავს ძალას თორელი, როგორ ცდილობდა, ისე ჩვენებოდა, ვითომ ყველა სატკივარს გაეველო და აღარაფერი აწუხებდა.

– ფიცხი ხარ, თურმან, და გულის ამყოლი, შენ გეჩქარება და ბოლოს რა მოგივა, იმას კი არ ანგარიშობ! – ღიმილით უსაყვედურა ავაგმა, – მაგ გულის ამყოლობამ კინალამ დაგლუპა. იმ დღეს რომ მამა ჯოვანისთვის დაგეჯერებინა და ჭიდაობა მიგეტოვებინა, ამ უბედურებას გადავრჩებოდით და ახლა კარგა ხნის წასულიც ვიქნებოდით.

– გულმა არა ქნა, ავაგ, ადგილზე მიმაჯაჭვა და არ ამიშვა. იმ უძლეველი ვაჟკაცების ცქერით ვერ გავძეხი, თვალი ვერ მოვსწყვიტე.

– ისინიც გულის აყოლამ დაგლუპა, ის ბედშავები რომ წაქცეულიყვნენ იმ თურქი და ირანელი კამბეჩებივით, თავსაც ცოცხლად გადაირჩენდნენ და ამით არც ქვეყანა დაიქცეოდა.

– ეგრე ნუ ამბობ, ავაგ, კაცს ერთხელ რომ მიეცემა მთელი სიცოცხლის სანატრელის ასრულების შემთხვევა, ხელს როგორ ჰკრავს და გვერდს როგორ აუვლის?! განა სიცოცხლე იმად ღირს, რომ ასეთი ნატვრის ასრულებაზე უარი თქვა? შეიძლება ასი წელი გავიდეს და მონგოლებს ისეთი წყენა და შეურაცხყოფა ქვეყნად ვერავინ მიაყენოს, როგორც იმ ჩვენმა მოჭიდავეებმა აწვნიეს. მონგოლებს თავი ქვეყნის ბატონებად მიაჩნდათ, დანარჩენ ხალხებს მათ მონებად გაჩენილებს ეძახიან, და ვერ წარმოუდგენიათ, ვინმემ მათზე ან ხელი ამართოს, ან სიტყვის შებრუნება გაუბედოს. რაკი წინააღმდეგობას ვერავინ უბედავთ, თავი ღვთის სწორებად მოაქვთ, გაამპარტავანდნენ და ისე გაყოყოჩებული დადიან, ცა ქუდად აღარ მიაჩნიათ, დედამიწა – ქალამნად. ამიტომ ღირდა მარტო იმ ორი ვაჟკაცის სიცოცხლედ კი არა, ჩვენი ხალხების სიცოცხლედაც გამარჯვების ის ერთი წამი, როცა ჩვენი მოჭიდავეები წაქცეულ მონგოლებს გულზე ფეხს აჭერდნენ და გამარჯვებულნი ზევიდან დაჰყურებდნენ ამაყად.

– არ გედავები, თურმან, ალბათ, ლამაზი სანახაობა იყო და გულსაც მოგფხანდა, მაგრამ იმ უბედურებს სიცოცხლედ დაუჯდათ ეგ ერთი წუთი და კინალამ შენც ზედ მიჰყევი.

– იმ წუთს რომ მოვმკვდარიყავი, სანაღური არაფერი წამყვებოდა, იმდენად ბედნიერი და ამაყი ვიყავი! ასე მეგონა, იმ ჩვენი ფალავნების ფეხქვეშ კი არ იყვნენ გართხმული ძლეული მონგოლები, არამედ მთელი ქართველი და

სომეხი ხალხის, მათ მიერ დაპყრობილი ერების ფეხქვეშ დაცემულად და დამდაბლებულად წარმოვიდგინე იმ წუთს ის მხეცები და მართალი გითხრა, ამ ბედნიერების განცდის შემდეგ რომ იქვე მოვმკვდარიყავი, სიკვდილი ღვინად მომეჩვენებოდა.

– გულის აყოლა, სილამაზისთვის თავგანწირვა ჭაბუკებს კიდევ ეპატიებათ, თურმან, მაგრამ ქვეყნის მეთაურად მოწოდებულ ბრძენთ სიფიცხე და გულის აყოლა არ შეჰფერით. შენ უკვე მარტოოდენ კარის უზრუნველი მგოსანი აღარა ხარ, ქვეყნის ბედსა და შენი ხალხის მომავალზე მზრუნველი მოღვაწე ხარ და განსჯაც სხვაგვარი გმართებს.

– ვიცი, ავაგ, მაგრამ, რაც უნდა ცივად ვსჯიდე, იმ ირანელი ბუმბერაზის ქცევას მაინც ვერ გავამართლებ, მონგოლს რომ ზაქივით დაუწვა და ამით თავი გადაირჩინა. შენ, ალბათ, იმის ქცევა უფრო მოგწონს. ჩვენც ხომ დავუწუქით მონგოლებს და უომრად დავმორჩილდით!..

ავაგს გულზე მწარედ მოხვდა თურმანის ნათქვამი და წამოწითლდა.

– შენ ისევ ძველ აზრზე დგახარ! ხომ შენი თვალით დარწმუნდი, რომ ურიცხვი მონგოლების გამკლავება ერთ მუჰა ქართველობას არ შესძლებია. მაშინ რომ ჩორმალონის ლაშქარი დროებით კიდევაც შეგვეჩერებინა, საბოლოოდ ხომ მაინც ვერას გავხდებოდით, ჩრდილოეთიდან ბათო მოგვადგებოდა და სამხრეთიდან ბიჩუ, ორ ცეცხლსშუა დავინთქებოდით და ეგებ კიდევაც აღვგვილიყავით მიწისპირისაგან.

– მართალია, ალბათ, აგრე იქნებოდა, მაგრამ ნაზრახ მონურ სიცოცხლეს მე იმ ჩვენი ფალავნებივით სახელოვანი სიკვდილი მერჩივნა.

– ნაზრახ სიცოცხლეს სახელოვანი სიკვდილი სჯობს, მაგრამ საკუთარი თავისა და მთელი ერის განწირვა სხვადასხვა საქმეა. ჩვენ ჩვენი თავის განწირვის უფლებაც არა გვაქვს ყოველთვის და მთელი ერის განწირვის ნება ვინ მოგვცა. თურმან! როცა ერის ბედი წყდება, გულს არ უნდა აჰყვე და ერთი წუთის სიამოვნებისათვის მთელი ერის აწმყო და მომავალი სასწორზე არ უნდა შეაგდო, ავი და კარგი დინჯად უნდა აწონ-დაწონო. ცივად უნდა იანგარიშო და უკეთესი უნდა გამოარჩიო. როგორც ჩანს, განგებას მართლა ასე სურდა. დმერთმა მონგოლებს მისცა ძლევა ბევრ ჩვენზე უფრო ძლიერსა და მრავალრიცხოვან ხალხზე. ახლა ჩვენი ვალია, გულს არ ავყვეთ და ეს დაუნდობელი მტერი არ გავაღიზიანოთ, თორემ შენ თავათ ნახე. მაგათთვის მთელი ერის მოსპობაც ისევე ადვილია, როგორც ერთი კაცისა. თავი უნდა შევინახოთ, თურმან, უკეთესი მომავლისათვის და ის მომავალი ჩვენვე უნდა მივცეთ ჩვენს ხალხს.

– მართალი ხარ, ავაგ, გონება მეც შენს სასწორზე მხრის, მაგრამ გული მაინც სხვაა, გული მაინც არ დაბერდა და ჯერ კიდევ ძველებურად მამღერებს!

მას შემდეგ, რაც თორელმა მოიხედა, მამა ჯოვანისთან საუბარი მისთვის ყველა წამალზე სარგო გახდა. დაუსრულებლად აამბობინებდა პაპის განათლებულ ელჩს თავის სამშობლო ქალაქების – პერუჯისა და ასიზის

ამბებს. იქაური მთა-გორებისა და ხევხუვების, ცადატყორცნილ მთებზე წამომართული ტაძრებისა და ციხე-დარბაზების ამბებს რომ მოუთხოვობდა, თორელს ეგონა, საქართველოს მთებისა და ხეობების, ტაძრებისა და სასახლეების ამბებს ვისმენო. ქვეყნის მეორე კიდიდან მოსული, ამდენ ხანს ერთთავად ველურ მონგოლებში ტრიალით თავმოებურებული პაპის ელჩიც განათლებულ ადამიანებთან საუბარს იყო დანატრებული და არა მარტო იტალიის ამბებს მოუთხოვობდა ქართველ მთავრებს, მათგანაც სიამოვნებით ისმენდა საქართველოს სიტურფის ქებასა და ქართველი ხალხის გმირულ თავგადასავალს.

მამა ჯოვანი წმინდა ფრანჩესკოს მეგობარი და თანამებრძოლი იყო და დიდი გატაცებით ჰყვებოდა ასიზელი სასწაულთმოქმედის გასაოცარი ცხოვრების ზღაპრულ ამბავს.

უმბრიელი დიდვაჭრისა და პროვანსელი ფრანგი ქალის ნებიერი ვაჟი ფრანჩესკო თავზეხელაღებული მოჩხუბარი და შფოთისთავი იყო თურმე. შეძლებული და უზრუნველი ჭაბუკი რაინდის სახელზე ოცნებობდა, მაგრამ ყველასათვის მოულოდნელად, ომში გამგზავრების წინ თავისი ბრწყინვალე სამოსელი ერთ ღატაკ რაინდს გაუცვალა ძონძებში, მერე, ის იყო, ავად გამხდარა ფრანჩესკო და სიცხიანს უფალი გამოცხადებია. იმ დღიდან ფრანჩესკოს ხელი აუღია ცხოვრების წინანდელ წესზე და მართალთა და წმინდანთა გზას შესდგომია, სიმდიდრე შეუჯავრებია და სიღარიბე შეუყვარებია.

– ფრანჩესკოს აკვნიდან ესმოდა პროვანსელი სახალხო მგოსნების, ტრუბადურების შესანიშნავი სიმღერები. იმ ლექსებით შთაგონებულმა წმინდანმა თავათაც ბევრი ბრწყინვალე ლექსი და საგალობელი შეთხზა, რომელთაც დღეს მთელი განათლებული ევროპა მღერის სასოებით.

– ერთი ლექსი მაინც მითხარი იმ სახალხო მგოსნებისა, მამაო ჯოვანი, – შეეხვეწა თორელი და უკვე ხანშიშესული, პაპის კარზე ამალღებული ფრანცისკანელი ბერი, თითქო გაჭაბუკდაო, თვალაღზნებული და თავგადადებული მოყვა მისი ჰასაკისა და ღირსებისათვის შეუფერებელ სიმღერას, მაღალი წრის ულამაზესი ქალისადმი კეთილშობილი რაინდების თავგანწირული სიყვარულისა და თავყვანისცემის საგალობელს.

– რა ლამაზი ენაა, მამაო ჯოვანი! – აღტაცებით შესძახა თორელმა, – სამოთხის ჩიტების გალობასავით ატკბობს სასმენელს ეგ ლექსები.

– მაგრამ ჩვენი ენა კიდევ უფრო ტკბილხმოვანია, შვილო, იტალიური ენა ულამაზესი და უკეთილხმოვანესია ყველა იმ ენათაგან, რომელზედაც ადამის ძეს დაულაპარაკნია ოდესმე.

– მითხარი რამე, მამაო ჯოვანი, თქვენს ენაზე, წმინდა ფრანჩესკოს ერთი საგალობელი მაინც მითხარი, – შეევედრა თორელი.

– «დიდება შენდა, უფალო, ჩემი დებისათვის – მთვარისა და ვარსკვლავებისათვის! შენ შეჰქმენი ისინი ცაზე ნათელი და ლამაზი.

– დიდება შენდა, უფალო, ჩემი ძმებისათვის – ქარისა და ჰაერისათვის, ღრუბლისა და სიჩუმისათვის და ყოველგვარი ამინდისათვის, რომლითაც შენ ააღორძინებ ყოველთა სულდგმულთა სიცოცხლეს!

– დიდება შენდა, უფალო, ჩვენი დისათვის – წყლისათვის, რამეთუ იგი არის სარგებელი ჩვენი, უწყინარი, ძვირფასი და წმინდა.

– დიდება შენდა, უფალო, ჩვენი ძმისათვის – ცეცხლისათვის, რამეთუ ცეცხლის შუქით ანათებ ღამეებს, იგი ღამაზია და ახარებს თვალსა კაცისასა, შმაგი და უძლეველია იგი!

– დიდება შენდა, უფალო, ჩვენი დედისათვის – დედამიწისათვის, რომელიც გვიზიდავს ჩვენ და გვარჩენს და აღმოაცენებს ყოველთა ნაყოფთა, ყვავილთა ფერად-ფერადთა და ბალახთა!»

უცხო ენის მუსიკით მოჯადოებული თორელი ღიმილით შეჰყურებდა მომხიბვლელი ბანით მაგალობელ ბერს. მამა ჯოვანიმ საგალობელი იტალიურად მოათავა და მერე ბერძნულად თარგმნა სიტყვასიტყვით.

თორელი გაფართოებული თვალებით მისჩერებოდა. ბერს უჭირდა სწრაფად თარგმნა, სახელდახელოდ საჭირო სიტყვის პოვნა. თორელი გუმანით ხვდებოდა იმ სიტყვას და შეყოვნებულ ბერს აწოდებდა.

– «დიდება შენდა, უფალო, მთვარისა და ვარსკვლავებისათვის, ქარისა და ჰაერისათვის, ღრუბლისა და სიჩუმისათვის!» რა კარგად უთქვამს, მამაო ჯოვანი, თქვენს წმინდანს, მთვარე და ვარსკვლავები დები ყოფილან მისი, ქარი და ღრუბელი – ძმები! რა უბრალო და ამაღლებულია სამადლობელი სიჩუმისა და წყლისათვის, ცეცხლისა და ნაყოფისათვის, ფერად-ფერად ყვავილთა და ბალახთათვის!

– ყვავილები და ჩიტები იყვნენ ღარიბ-ღატაკებთან ერთად ფრანჩესკოს სიყვარულისა და ზრუნვის უმთავრესნი საგანნი. მონასტრებში ყვავილნარებს აშენებდა და თავისი ხელით რწყავდა, ხოლო ჩიტები იმდენად შეჩვეულნი იყვნენ ნეტარი ფრანჩესკოს ალერსს, რომ მხრებზე უშიშრად ასხდებოდნენ და მისი ხელიდან პურდებოდნენ ხოლმე ხალხით სავსე ქუჩებში... ნეტავ, თუ კიდევ მეღირსება იმ ქუჩებში გავლა! – ამოიოხრა ბერმა.

– ალბათ, რწმენამ, ქრისტეს სჯულის ქადაგების სურვილმა წამოგიყვანა იმ სიშორიდან, თორემ შენს თავისუფალსა და ეგზომ საყვარელ ღამაზ სამშობლოს როგორ დატოვებდი, მამაო ჯოვანი!

– ქრისტეს სჯულის ქადაგება ჯერ კიდევ ნახევრად ველურ მონგოლებს შორის ძნელია, თურმან, სარწმუნოება, და ისიც ქრისტეს სარწმუნოება, შოვნასა და გაძღომაზე დახარბებული გულმხეცი ადამიანებისათვის როდია მოგონილი. ქრისტეს სარწმუნოების თესლი ჯერჯერობით მონგოლ მოლაშქრეთა შორის ვერ ჰპოვებს შესაფერის ნიადაგს აღმოსაგენებლად, რადგან ჯერ კიდევ არ გამძღარა სისხლით მათი ხარბი თვალი და არ დამცხრალა გული ბოროტებით.

– მონგოლები ჯერ კიდევ მგლები არიან და ჩვენში ასე ამბობენ, მგლის თავზე სახარება რომ იკითხო, ის მაინც ტყისკენ გაიწევსო.

– ჭეშმარიტება აგრეა, თურმან, და მე ამ დასაკარგავში მხეცების მოსაქცევად როგორ წამოვიდოდი! მაგრამ სამშობლოს წინაშე მოვალეობა ადამიანის ვალდებულებათა შორის უმაღლესია და მეც მარტო სულის საქმეებისათვის რომ არა ვარ ამ დასაქცევში მოსული, შენ თვითონ მიხვდებოდი.

– მივხვდი, მამაო ჯოვანი, მივხვდი და ვიცი, რაც აშფოთებს წმინდა პაპსა და მთელ ევროპას. მონგოლებმა, ბათო-ყაენის მეთაურობით, ევროპის დიდი ნაწილი დაიპყრეს, მოაოხრეს და მერე მოულოდნელად უკანვე შემოიქცნენ. ახლა თქვენს მეფეებსა და ქრისტეს ამქვეყნიურ მოადგილეს, ალბათ, იმის შეტყობა სურთ, რა სამხედრო ძალა გააჩნიათ მონგოლებს და აპირებენ თუ არა ევროპის წინააღმდეგ ახალ ლაშქრობას, – თორელმა გამომცდელად შეხედა, ჯოვანიმ მზერა აარიდა და ღიმილით თქვა:

– მაგათი განზრახვის გაგებას დიდი რკვევა არ უნდა, თურმან, მონგოლები ხმამაღლა ამბობენ, რომ მთელი ქვეყანა მათ ეკუთვნით და ყველა ხალხი მათ უნდა დაემორჩილოს. როგორც იყო, გუიუქ-ყაენმა პაპის საპასუხო წერილი მაღირსა და აი რას სწერს ქრისტიანთა მეთაურს ეს ბარბაროსი, – მამა ჯოვანიმ ყაენის დაბეჭდილი წერილი ამოიღო და წაიკითხა:

– «ძალითა ღვთისათა, ყოველი ქვეყანა მზის აღმოსავლიდან დაწყებული და მზის დასავლით დასრულებული, ჩვენ გვეკუთვნის. ახლა თქვენ წმინდა გულით უნდა აღიაროთ, თქვენი მოხარკენი ვიქნებით და მთელს ჩვენს ქონებას მოგართმევთო! – შენ თვითონ წამოუძეხი თქვენს მეფეებს, ყველანი უკლებლივ მეახლეთ და სამსახური და მორჩილება გამოგვიცხადეთ», – ჯოვანიმ წერილი დაკეცა და შეინახა, – ამის შემდეგ რა ეწერება, ალბათ, მიხვდები, მუქარა საშინელი და ლანძღვა უშვერი.

– ნუთუ ადასრულებენ მონგოლები დანაქადს და მართლა მთელ ქვეყანას დაიპყრობენ, მზის აღმოსავლიდან დასავლამდე?!

– ეგ უფლის მეტმა არავინ იცის, შვილო. ჩვენი ვალია, ვილოცოთ და ქრისტიანებს ჩავაგონოთ, რა საშინელი მტერიც ემუქრებათ განადგურებით, თუ ხმაღს დროზე არ გალესავენ და შეერთებული ძალით წინ არ აღუდგებიან ველურ ურდოებს...

საქართველოს საზღვრებს მცირერიცხოვანი ქარავანი მოადგა – ნათესავთაგან გამოგლოვილ-გამოტირებულები, თითქმის დავიწყებულნი ბრუნდებოდნენ სამშობლოში.

თმაწვერმოშვებული, დამტვერიანებული მოალასლასებდა ცხენს ნაადრევად მიმხცოვანებული ავაგ მხარგრძელი.

ფათერაკებითა და ხიფათით სავსე დაუსრულებელი გზისაგან გაწამებული ავაგი კმაყოფილი ბრუნდებოდა. თუმცა ბევრი დამცირება და შეურაცხყოფა, წვალება და გაჩენის დღის წყევლა გამოეწყო, მაინც მიზნისათვის მიედწია; ყაენებს ქართველთა მეფისათვის წყალობის იარლიყი ებოძებინათ, ავაგის უფლებებიც ეცნოთ, მისი დიდი მამის მემკვიდრედ დაემტკიცებინათ, მამის

მსგავსად, ათაბაგის სახელი და საქართველოს უპირველესი მთავრის პატივი მიენიჭებინათ.

იქით მიმავალთ მრავალრიცხოვანი ამაღა ახლდათ, დატვირთული აქლემები და ჯორკიდებული მიუძღოდათ.

აქეთობას იმ ამალიდან თითებზე ჩამოსათვლელი აღარ მოჰყვებოდათ და თან სულის გარდა აღარა მოჰქონდათ რა.

დამდნარიყო, დალეულიყო ამოდენა გზაზე ავაგის დიდი ამაღაცა და აურაცხელი სიმდიდრეც.

სნეულებისაგან საბოლოოდ განუკურნელი თორელი გზაზე მთლად დავარდნილიყო და ახლა ტახტრევანით მოჰყავდათ მწოლარე.

მას არც იქით წაჰყოლოდა რაიმეს შოვნის იმედი და არც აქეთ მოჰყვებოდა რაიმე.

ამ გრძელ გზაზე სნეულების, ჯავრისა და ხნოვანების მეტი არა მომატებოდა რა. ის ჯავრი მხრებზე მძიმედ დასწოლოდა და უკვე მიმხცოვნებული კაცი გაედრიკა, გაელუნა.

ხორცი გალეოდა და ფერი დაჰკარგოდა, აღარც გზის სიგრძეს კითხულობდა, აღარც დაღამებასა და გათენებას.

ჩქარობდა ავაგი და თავის შეთხელებულ ამაღასაც აჩქარებდა, სამშობლოს იმედი ჰქონდა, საქართველოს ღრუბელის დანახვა, მისი ნიავის მოხვედრა ჩაუბრუნებს სულს ავადმყოფ მგოსანსო, – სჯეროდა ავაგს და ამიტომ იჩქაროდა.

საქართველოში შემოსულები მშობლიური მთა-გორების ცქერით ვერ ძღებოდნენ, წყაროსდაწაფებული მწყურვალელებით ჰაერს ხარბად ისუნთქავდნენ, მუხლებზე ეცემოდნენ და მიწას ჰკოცნიდნენ. მშობლიურმა ჰაერმა თორელს სული ჩაუბრუნა, გამოცოცხლდა და გახალისდა.

გზები სოფლებზე გადიოდა.

ორღობებში ბავშვები გამორბოდნენ, უცნობ მგზავრებს აკვირდებოდნენ.

თორელს სოფლები მოშენებული ეჩვენა: ნაოხარებზე ქოხები გახშირებულიყო, ბუხრებიდან იისფერი კვამლი ამოდიოდა და ღობეებს ყეფით ავი ნაგაზები აწყდებოდნენ.

უცებ ბავშვების წიოკი და ქალის კივილი მოესმათ.

გზის პირას თითქმის მთელი სოფელი შეკრებილიყო, მეორე მხარეს გადასვლას ვერ ბედავდნენ და შორიდან უყურებდნენ მეზობლის უბედურებას.

ავაგი ჭიშკარს გაუსწორდა, ცხენზე გადმოიხარა და ეზოში გადაიხედა: მონგოლი ხარკის ამკრეფები ძროხას შოლტს სცემდნენ და ძალით წინ მიერეკებოდნენ. თმაგაშლილი შავოსანი ქალი კრუხივით გაფოფრილიყო, ძროხას რქებში ჩაფრენოდა და არ ანებებდა.

– ცოცხალი თავით არ გაგატანთ ჩემი ობლების მარჩენალს, – ყვიროდა გამწარებული დედაკაცი და ძროხის რქებს ებლაუჭებოდა, – ყველანი აქვე დაგვხოცეთ, შიმშილით ბალღების სიკვდილს ეს მირჩევნია!

ბაღლები ამ სიტყვებზე კიდევ უფრო გულისმომკვლელად აზმუვლდნენ, დედას წიწილებივით შემოეხვივნენ და ხმამაღლა ატირდნენ.

მონგოლმა დედაკაცს წიხლი ჰკრა. ქალი პირქვე დაეცა და შემინებული ბავშვები წამით გაიფანტნენ.

მონგოლებმა ნიშა ძროხა წინ გაიგდეს.

ჭიშკართან გაქვავებულივით იდგა ორი ქართველი ჯარისკაცი. თვალეზზე ცრემლი მოსდგომოდათ და დარბეული ეზოსათვის ზურგი შეექციათ.

მონგოლმა ქართველ ჯარისკაცებს ძროხის ბაწარი მიუგდო, თავათ ცხენს მოახტა და გააქროლა. დანარჩენი მონგოლებიც ცხენდაცხენ დაედევნენ.

ქართველი ჯარისკაცები ძროხას გაუძღვნენ და მონგოლებს მიჰყვნენ.

ავაგი წინ გადაუდგა:

– ქართველები ხართ? – ესროლა, ცოტა არ იყოს, შემკრთალმა ჯარისკაცებს.

– ჰო, ქართველები ვართ, – უპასუხა ერთმა.

– მერე, სად არი თქვენი ქართველობა?! – შეუმახა ავაგმა. – ქვრივ-ობლებს მარჩენალ ძროხას სტაცებთ და უკანასკნელ ლუკმას ართმევთ, როგორ არა გრცხვენიათ?!

ჯარისკაცები დაიბნენ, სახე წამოუწითლდათ და ავაგის მზერას თვალი მოარიდეს.

– გვრცხვენია, მაგრამ... ჩვენი ბრალი არ არი, ჩვენ მათი ჯარისკაცები ვართ. ასე რომ არ მოვიქცეთ, დაგვხოცავენ, – წაიდუღუნა პირველმა.

– ჩვენზე მეტად მათ უნდა რცხვენოდეთ, ვინც ამ დღეში ჩაგვაგდო, – ხმა აღიმადლა მეორემ და ავაგს თვალში პირდაპირ შეხედა. ბრაზისაგან ატანილი ავაგი უცებ წახდა, ასეთ პასუხს არ მოელოდა.

– ჩვენი რა ბრალია, მათ უნდა რცხვენოდეთ, ვინც ეს ურჯულოები ჩვენს ქვეყანაში ჩამოათესლა... – გული მიეცა მეორე ჯარისკაცსაც.

– თავათ უომრად კარი გაულეს, თავი მონის უღელში გაგვაცოფინეს და პასუხსაც ჩვენ გვთხოვენ! ჩვენ სად ვიყავით მაშინ, მონგოლებს რომ ჩვენს ქვეყანას უომრად აბარებდით?!

– თავათ მაშინაც ბატონები იყვნენ და ახლაც ცხენით დაბრძანდებიან!..

ზიზღით შეხედა თავჩაღუნულ, გაფითრებულ ავაგს ჯარისკაცმა, ძროხას თოკი მიუშვა და წინ გაიგდო.

ავაგმა თავაუღებლად მისცა გზა.

ჯარისკაცებმა ძროხას შოლტი გადაჰკრეს და სირბილით დაედევნენ წინ წასულ მონგოლებს.

მირბოდნენ და თან რაღაცას ხმამაღლა ლაპარაკობდნენ. ერთი სიცილით მოხედეს ცხენზე დაპატარავებულ, მოზუზულ ავაგს და სირბილს უფრო უმატეს.

გზის მეორე ნაპირიდან მეზობლებმა იხუვლეს და ქვრივის ეზო გულშემატკივრებით გაივსო.

ავაგი ყველაზე ბოლოს მიჰყვა წინ მიმავალ თავის თანამგზავრებს. ზურგში გრძნობდა დარბეულ ეზოდან ზიზღითა და დაცინვით მზირალი თვალების ჩხვლეტას.

მიდიოდა რეტდასხმული და გულმოკლული.

თორელი ტახტრევიდან უცქერდა ქვრივის ოჯახის დარბევას.

თავჩალუნულ ავაცს რომ გაუსწორდა, ტახტრევიდან გადმოიწია და ოხვრით თქვა:

– გული მომიკლა იმ საცოდაობის ნახვამ, იმ ბიჭების ნათქვამმა ხომ სულ მომწამლა!..

– ნულარ იტყვი, თურმან! დანა რომ დამკრა, წვეთი სისხლი არ გამომივა, როგორი ზიზღით გვიცქეროდნენ, თითქო მართლა ჩვენი ბრალი იყო მთელი ჩვენი ქვეყნის უბედურება!

– ჩვენი ბრალია, ავაც! მართალს ამბობდნენ და შენც იმიტომ დამუნჯდი. მათი პირით ჩვენი ერის დღევანდელი და მომავალი ერთად გვდებდა ბრალს და გვამუნათებდა...

ავაცს უნდოდა რაღაც ეთქვა, მაგრამ თორელს რომ შეხედა, ენა ჩაუვარდა: თურმანს სახეზე მიწისფერი ედო და მსხვილი ცრემლები დაპაღუპით ჩამოსდიოდა.

ნახევარი დღის სავალზე ავაცის დაბრუნების მახარობელი დაწინაურდა. სადამო ხანს მთავრებმაც მიაღწიეს თბილისს.

საიქიოდან მოსულეხსავით განცვიფრებულნი შესცქეროდნენ ავაცსა და თურმანს თავისიანები, დიდი ხნის გამოტირებულების ცოცხლად დაბრუნება არ სჯეროდათ, ეხვეოდნენ, ანჯღრევდნენ, ჰკოცნიდნენ და სულის მოთქმას არ აცლიდნენ, კითხვას კითხვაზე აყრიდნენ.

როგორც კი ცოტა სულს მოიბრუნებდნენ, საქართველოს ამბებს კითხულობდნენ და გაცვებით იგებდნენ მათ არყოფნაში მომხდარს.

რუსუდან მეფეს ერთი წლის წინათ თავისი მემკვიდრე ყარაყორუმს გაეგზავნა. ისედაც ბედგამწარებულ დედოფალს შვილის ამბის უცნობლობის ჯავრი ვერ აეტანა და მიცვლილიყო. დავით რუსუდანის ძისა აღარაფერი ისმოდა, საქართველო უმეფოდ დარჩენილიყო და მონგოლებს თავისი ერთგული მედროვეები აღეზევებინათ.

ქვეყნის ამბებს წვრილად მოუთხრობდნენ თორელს, მაგრამ მისი ოჯახისას არავინ არაფერს ეუბნებოდა, სიტყვას ბანზე უგდებდნენ და პირდაპირ პასუხს გაურბოდნენ.

შეშფოთებულმა თურმანმა თბილისში დარჩენა და შესვენება აღარ ინდომა, ავაცს არ დაუჯერა, ცხენზე შეჯდა და ვერეს ხეობას შეჰყვა.

სოფელში შესულს არემარე ესხვაფერა, აჩეხილ, თითქმის გადაშენებულ ხეხილის ბაღს ღობე შემოსცლოდა; ვენახში ბალახი ბიბინებდა. მოუვლელი ვაზი ძირს გართხმულიყო, ზედ საქონელი დააბოტებდა და თქერავდა.

გული ყელში მოეზღინა. სახლამდე ვერ მივატანო, შეეშინდა და ვაჩეს ეზოს რომ გაუსწორდა, ცხენიდან ჩამოხდა.

ხის ქვეშ გრძელ სკამზე იჯდა ვაჩე, ჩამავალ მზეს ეფიცებოდა, ეტყობოდა, თვლემდა.

თურმანმა ცხენი ჭიშკართან გამოაბა და ეზოში შევიდა. ფეხის ხმაზე ბრმამ თავი აიღო, მიაყურა.

– რომელი ხარ? – იკითხა და პასუხის მოლოდინში გაინაბა.

თურმანი მიუახლოვდა და მოეხვია.

– თურმანი ვარ, ვაჩე... თურმანი...

ქვითინით ამბობდა თორელი, უსინათლოს ეხვეოდა და ჰკოცნიდა.

– თურმანი? თურმან თორელი?

ხელის ფათურით წამოიწია ვაჩე.

– ჰო, მე ვარ... დავბრუნდი, ვაჩე...

– ცოცხალი დაბრუნდი?.. ჩვენ კი აღარ გვეგონე ცოცხალი, ბეჩავო... – ეხვეოდა და გულაჩუყებული ბუბუნებდა ვაჩე.

სკამზე ჩამოსხდნენ.

– თქვენ როგორღა ხართ, ღვთის მადლით, ხომ ყველანი ცოცხლები დამხვდით...

– ყველანი? ჰო... მე ცოცხალი ვარ, დიდი ხანია, სიკვდილმა მომიძულა, აღარც სიკვდილს ვუნდივარ, თურმან...

– ცაგო ხომ კარგად გყავს, ხომ არ გაათხოვე?

– ცაგო სადღა მყავს, თურმან! ის რომ მყავდეს, სიკვდილი სანატრელი მექნებოდა?!

– სად არი, რა მოუვიდა ცაგოს?

– უბედურება! შენ საიდან გეცოდინება... შარშან დავკარგე მე ბედშავმა და მისი დამკარგავი კიდეც ცოცხალი ვარ!.. – ვაჩემ სული მოითქვა და ზღუქუნით განაგრძო, – ცაგო უკვე დაქალბული იყო, მე რას ვხედავდი, მაგრამ სხვები ამბობდნენ, ძალიან დამშვენდა, მაგისთანა გოგო ერთი აღარსად არისო. ბევრი კარგი კაცი ეძლეოდა, შეძლებულიც და სახელიანიც, მაგრამ გათხოვებაზე ცივ უარს ამბობდა, ჩემს უსინათლო მამას ჩემს მეტი არავინა ჰყავს და მე იმას ვერ მივატოვებო. თურმე შენს შალვას და ცაგოს ერთმანეთი ჰყვარებიათ და ამიტომ არავის მიჰყვებოდა.

ვაჩემ ამოიოხრა, წამით გაიტრუნა, თორელი რას იტყვისო... თურმანმა არაფერი თქვა და ისევ განაგრძო ბრმამ:

– შარშან, აქეთ გამოვლილ მონგოლ ნოინს მოუკრავს თვალი. მოსწონებია იმ უღმერთოს და თავისი ნუქერები გამოუგზავნია მოსატაცებლად. სადამო ხანს, ცაგო რომ ჭიშკარში შემოვიდა, უკან მონგოლებიც მოჰყვნენ, თურმე მზირად ყოფილან ჩასაფრებულნი. სახლში შემოსვლა არ აცალეს, შეჰკრეს და ცხენზე მოიგდეს. ცაგოს კივილმა და ჩემმა ღრიალმა სოფელი გააყრუა, მაგრამ ვიდრე მშველელი მოვიდოდა, ქალი გაიტაცეს. ცოტა ხნის მერე შალვა გამოჩნდა. შინ არ ყოფილიყო და ვერაფერი გაეგო. ჩემი უბედურება რომ შეიტყო, რამდენიმე

ვაჟკაცი გაიყოლა და ცხენებით ცაგოს გამოუდგნენ. შუაგზაზე დასწევთან თათრებს, თავს მოულოდნელად დასხმიან, ზოგი დაუხოციათ, ზოგიც გაქცეულა, იმ დღიდან ცაგო აღარსად ჩანს; ერთნი ამბობენ, ტყეში იმალებაო, სხვებს ისიც წამოსცდათ, მონგოლმა გამტაცებლებმა მდევერებთან ხელჩართულ ბრძოლაში მოჰკლესო.

თორელს მკვდრისფერი დაედო, თითქო ძარღვებში სისხლი გაეყინაო, ხელები გაუცივდა და ჟრჟოლამ აიტანა. შალვას ამბის კითხვა უნდოდა, მაგრამ იმის შიშით, ვაითუ, ცუდი რამ მითხრასო, ენის დაძვრა ვერ გაბედა.

ვაჩემ ცოტა წაიტირა და ისევ გაწყვეტილ ამბავს დაუბრუნდა:

– შალვა იმ დღიდან შინ ვეღარ დაბრუნდებოდა, თავის ამხანაგებთან ერთად ტყეში გავიდა და ახლაც იქ იმალება. თურმე თათრების ძალმომრეობით შეწუხებული ამბოხებული ქართველები შალვასთან გარბიან ტყეში, მისი მეთაურობით მტერს თავს ესხმიან, ხალხის ნამარცვს სტაცებენ და ჟლეტენ, სადაც მოახელებენ.

ვაჩემ დაასრულა. ერთხანს სდუმდნენ. მერე თორელმა აიღო თავი და მძიმედ თქვა.

– რას მოგვიტანს თითო-ოროლა მონგოლის აგრე ხოცვა! დამპყრობლებს უფრო გაახელებს და ხალხს უფრო მეტად ააწიოკებენ.

– ეგ მართალია, ჩვენი სოფელი ორჯერ დაარბიეს, ეჭვი აქვთ, ტყედგასულებს ინახავთო... შენი სახლ-კარიც...

– გადასწვეს, არა?

ვაჩემ არაფერი უპასუხა, თავი ჩაღუნა და თორელი მიხვდა, რომ მისი სახლ-კარი მართლა გადაეწვათ.

– წავიდეთ, ნახანძრალი მაინც ვნახოთ, – თქვა თორელმა, ფეხზე წამოდგა და ვაჩესაც წამოდგომა უშველა.

წინ ნელი ნაბიჯით მიუძღოდა თურმანი, გზას ურჩევდა ცალ ხელში დაბიჯგებული ჯოხის კაკუნით მიმავალ ვაჩეს.

– მაშ, გადასწვეს ჩემი სახლ-კარი, არა?.. გასაკვირი არაფერია. მონგოლები ავები და დაუნდობლები არიან, მე მათი ხასიათი კარგად ვიცი, თუ გაბრაზდნენ, მთელ საქართველოს გადასწვავენ, ქართველებს სულ ერთიანად ამოჟლეტენ და აქ სხვებს დაასახლებენ.

– ეგ შეუძლებელია, თურმან, მთელ ერს როგორ გაჟლეტენ?

– შეუძლებელი მათთვის არაფერია! ღმერთთან არ აგებენ პასუხს და კაცთან, კანონთან და სამართალთან... თითქმის მთელი დედამიწის ზურგი დაპყრობილი აქვთ და უამრავ ჩვენზე დიდსა და მრავალრიცხოვან ხალხზე ბატონობენ. იმოდენა ძალა აქვთ, რომ მოინდომონ, ერთი სულის შებერვით გაგვაქრობენ, მაგათთვის ზღვაში წვეთი ვართ, ჩვენი არც არსებობა უღირთ არაფრად, არც მოსპობა. ერთი წლის სავალზეა გაჭიმული მაგათი სამფლობელო, ჩვენ აქ რაც უნდა ვიფაფხუროთ, მათ ძლიერებას ვერას დავაკლებთ. ამიტომ, ვისაც ჩვენი ერის სიყვარული აქვს და მის მომავალზე ფიქრობს, ახლა წინდახედულება მართებს. თათრების გაღიზიანება და

გახელება არ ღირს, თავისუფლებას ვერ მოგვიტანს. შეიძლება ასეთი ძლიერი და უგუნური მტრის გახელებას საქართველოს სამუდამოდ გაქრობა მოჰყვეს.

– მაშ, რა ჰქნას გამწარებულმა ხალხმა, გულხელი დაიკრიფოს, უსამართლობას არ ებრძოდეს?!

– მაგათთან ბრძოლით ჯერ არა გამოვა რა. უნდა მოვუთმინოთ და თავი შევინახოთ.

– რალა დღისთვის უნდა შევინახოთ თავი, ან როდემდე უნდა ვითმინოთ?

– უკეთეს დრომდე, ვაჩე, ხელსაყრელ დრომდე!

– მერე ეგ უკეთესი დრო როდის დადგება, თურმან?

– დადგება! გვიან, მაგრამ მაინც დადგება! მონგოლებმა იმოდენას მოხვიეს ხელი, იმოდენა მიწა-წყალი დაიპყრეს, რომ ვერ გასწვდებიან. ჩინგიზის მემკვიდრეებს ერთმანეთში შუღლი აქვთ, ამოდენა ნადავლის გაყოფაზე საბოლოოდ ერთიმეორეს აეშლებიან და დაერევიან, დღეს თუ არა, ხვალ აღსდგებიან. მაშინ დაპყრობილი ხალხებიც აჯანყდებიან და მონგოლთა უღელს მოიშორებენ, აი, იმ დროისათვის უნდა შევინახოთ თავი, ვაჩე, და მაშინ უნდა დავკრათ მტერს, როცა ჩვენი ხმალი ნამდვილად გასჭრის.

– მე კი მგონია, რომ ეგ დრო არასოდეს აღარ დადგება, როგორც ჩემს დათხრილ თვალებში ჩამდგარი წყვილი არ გაიფანტება აღარასოდეს, ისე საქართველოზე გამეფებული დიდი ღამე აღარ გათენდება.

– გათენდება, ვაჩე, გჯეროდეს, რომ გათენდება!..

– გათენებული გვქონდა და ჩვენს თვალწინ დაღამდა. ვინ იცის, საქართველოს კიდევ უწერია თუ არა ცისკრის გახსნა?! იქნებ მართლა ერთხელ იხსნება ერისთვისაც ცისკარი და თუ მაშინ ვერ მოასწრო საუკუნო ძლიერებისა და უკვდავების დამკვიდრება, მერე ის ცისკარი აღარასოდეს აღარ გაეხსნება.

– საქართველო უკვდავია, ვაჩე, კიდევ ბევრჯერ გაიხსნება მისი ცისკარი.

– ღმერთმა ჰქნას, თურმან, მაგრამ ჩვენ კი ველარ მოვესწრებით.

– ჩვენ, ალბათ, ვერა. ჩვენ ქართველთა მოდგმის ყველაზე უბედური თაობა ვართ, რომელიც საქართველოს ყველაზე დიდ ბრწყინვალებასაც მოესწრო და ყველაზე დიდ უბედურებასაც. ჩვენ სუსტნი და უღონონი აღმოვჩნდით, დაგვეცვა, შთამომავლობისათვის გადაგვეცა საქართველოს თავისუფლება და ძლიერება. მაგრამ ბოლოს მეც იმ აზრზე დავდექი, რომ ყველაფერი, ჩვენი ნებაც და მოქმედებაც განგებისაგან არი განსაზღვრული. განგებამ მისცა მონგოლებს მთელ ქვეყანაზე გამარჯვება და აქაც, ჩვენშიაც ისე მოაწყო, რომ მათ წინააღმდეგ სუსტი, უნებისყოფო თაობა წამოაყენა. განგებამ, ბედისწერამ დაამხო საქართველოს ძლიერება, ისევ ის ბედისწერა აღადგენს ახალ, ძლიერ საქართველოს. იმ საქართველოს ჩვენზე ძლიერი შვილები ეყოლება. ჩვენ უზრუნველობით მოდუნებულნი ვიყავით, ისინი გაჭირვებისაგან გამოწრთობილნი, განსაცდელისაგან გაკაყებულნი იქნებიან.

– მაშ, კიდევ დაიბადება დავით აღმაშენებელი?

– დაიბადება, ვაჩე, კიდევ დაიბადება!..

– ვაი, რომ ჩვენ ვეღარ მოვესწრებით! მე ჩემი თავი დიდი ხანია მკვდარი მგონია, თურმან, ხანდახან ვფიქრობ და ვრწმუნდები, რომ ჩემი სიცოცხლე მაშინ გათავდა, როცა თვალი დამთხარეს და მზე დამიბნელეს, როცა თბილისი პირველად დაიწვა და რუსუდანის ახალ პალატებთან ერთად ჩემი მხატვრობაც დაიფერფლა.

– ჩემი სიცოცხლე იქ გათავდა, ვაჩე, გოჩი მუხასძისაც, ჩვენი თაობის სხვა საუკეთესო შვილებისაც... მას შემდეგ, როგორც იმ ბრწყინვალე სასახლის აღდგენა აღარ მოხერხდა, ჩვენი სიცოცხლის ეშხის მობრუნებაც აღარ იქნა... ჩვენ კი აღარ ვცხოვრობთ, ვცოცხლობთ მხოლოდ, ვაჩე, სული არ ამოგვსვლია, თორემ ლეშებილა ვართ, რადგან სიცოცხლის სიხარული ჩიტივით გაგვფრენია და სამუდამოდ დაგვკარგვია. შენ ბრმა ხარ და გარს წყვდიადი გაკრავს, მე თვალხილული ვარ და ჩემთვისაც ირგვლივ სიბნელეა, დიდი ღამის უკუნი სიბნელე...

თურმანმა აიხედა და ხმა ჩაუწყდა: ღობემორღვეულ ეზოში დამწვარი სახლის კედლები შავად აჩონჩხილიყო. კედლებს შიგნით ნაცრის გორა იდგა. ეზოში ყველაფერი ცეცხლითა და კვამლით იყო გარუჯული, უსიცოცხლო ხეებიცა და გატრუსული ბალახიც.

უცებ სუნთქვა შეეკრა თურმანს, ჰაერი აღარ ეყო და სული ვეღარ მოითქვა. მერე გულში რაღაცამ მაგრად დაარტყა, რეტი დაესხა და თვალი დაუბნელდა. ვაჩემ იგრძნო თორელის დაბარბაცება და ღონიერი ხელი შეაშველა.

წამით ყველაფერი ირწეოდა და ტორტმანებდა, მერე ნელ-ნელა თვალის ბრჭყვიალმა უკლო და შუქი მოუბრუნდა, ხელ-ფეხში დავლილი ცივი ჟრუანტელი თანდათან ქრებოდა და მის მაგივრად მთელ სხეულში გამაბრუებელი, დამთენთავი სითბო ეღვრებოდა.

– მგონი, მოვედით! – თქვა ვაჩემ და ყავარჯნის კაკუნით იქაურობა მოსინჯა.

– მოვედით... – ძლივს ამოთქვა თურმანმა. თავს ძალა დაატანა და ნაბიჯი გადგა.

მიდიოდნენ: ერთი ბრმა, თვალდათხრილი, მეორე მხედველი, მაგრამ თვალგამოშტერებული, ჯავრისაგან გახევებული და შუქდაკარგული.

უსინათლოს ჯოხი რბილ საგანს მოხვდა, ერთხელ კიდევ მოსინჯა.

– ნაცარია? – იკითხა ბრმამ.

– ნაცარია... – მიუგო თვალხილულმა.

– ჩამოვსხდეთ. – თქვა ვაჩემ.

– ჩამოვსხდეთ... – დაეთანხმა თურმანი, უსინათლოს ხელი მოჰკიდა, ლოდზე ჩამოსვა და თვითონაც ჩამოჯდა.

ერთხანს ასე ისხდნენ თავჩალუნულები.

ბრმა ქანდაკივით გაუნძრევლად იჯდა და რაღაცას დაჟინებით უცქეროდა თავის გონებაში. თვალხილულიც რაღაცას მიშტერებოდა, მაგრამ ვერაფერს ხედავდა, ისიც ქვასავით გაუნძრევლად იჯდა, ცივი და უგრძნობელი.

ირგვლივ ფერფლი და ნაცარი იყო. ნახანძრალი კუნძებივით დაპატარავებულნი ისხდნენ წელში მოხრილი ვაჩე და თურმანი. თმა-წვერი

თეთრად დაჰფენოდათ და ხშირი ჭაღარაც დანახშირებულ კუნძებზე წაყრილი ფერფლივით ვერცხლისფრად უბრწყინავდათ.

– ამას წინათ შალვამ შემატყობინა, ამ დღეებში ჩემი ბიჭებით მოვალ და სახლის შენებას დავიწყებო, – ხმადაბლა თქვა ვაჩემ, თითქო ეშინოდა ნახანძრალის იდუმალი მყუდროება არ დაერღვია. შალვას ხსენებაზე თორელი ოდნავ შეირხა.

– ასე უთქვამს, მამაჩემს სახლი აშენებული უნდა დავახვედროო, – დაუმატა ნათქვამს ვაჩემ და ჩაახველა.

თორელი ხმას არ იღებდა.

ვაჩეს ყურს შორეული სიმღერის ხმა მისწვდა.

– გესმის, თურმან? – გამოცოცხლდა უსინათლო.

თურმანს ესმოდა და აღარც ესმოდა. ერთნაირად მოდუნებულს გაზმორება უნდოდა და ვერ ინძრეოდა.

გზაზე ცხენოსნები გამოჩნდნენ. წინ შალვა მოუძლოდათ გაშლილი თეთრი დროშით. გვერდით ცაგო მოჰყვებოდა, ქარი მანდილს უფრიალებდა და თმას უწეწავდა.

– ცხენის ფეხის ხმა მესმის, ნამდვილად შალვაა! – აფორიაქდა უსინათლო, – დროშას თუ ხედავ, თურმან, თეთრ დროშას? შალვას და მის მეამბოხეებს იმით ცნობენ, თეთრი დროშა მიუძღვით თურმე.

– ვხედავ, ვაჩე, და ვეღარც ვხედავ... უკვე ღამდება. ბინდი წვება...

– ჯერ აღრე არ არის დაღამება?... – გაუკვირდა ვაჩეს, – მე ჯერ კიდევ დღე მგონია, მეჩვენება, თითქო მზე მათბობს ისევ...

თორელი გრძნობდა, რომ სუნთქვა თანდათან უძნელდებოდა, გული და ღონე სადღაც ეპარებოდა და თვალს ძილი ეძალებოდა. იმ დროშის ლანდი და თვალში ჩამოწოლილი ბინდი ერთიმეორეში აირია, დროშა შეტორტმანდა, შექანდა...

მერე თვალში უკანასკნელი სხივიც გაჰქრა და თორელმა ერთი გრძლად ამოისუნთქა ხრიალით.

– ამბობენ, შალვას დროშა გორგასლიანი თეთრი დროშა არი და ღამეშიაც ანათებსო, – აღტაცებით თქვა ვაჩემ.

თორელი სდუმდა.

– იმ დროშის ნათელი გაჰფანტავს ღამის სიბნელესო, ამბობენ, თურმან, და ნეტავ როდის იქნება?

სიმღერა და ცხენების ფეხის ხმა მოახლოვდა.

აღსდექ, ნუ გძინავს, ქართველო,
ხელში აიღე ფარ-ხმალი...

თეთრი დროშის რხევით მოგუგუნებდნენ ტყედგასული მეამბოხეები.

– ახლა მაინც ხომ ხედავ, თურმან, იმ ნათელ დროშას, მგონია, სულ ახლო არიან...

თურმანი ხმას არ იღებდა. ბრმას ეჭვმა გაჰკრა, გაიღურსა და სმენად იქცა.
– თურმან! არ გესმის? თურმან, სადა ხარ? – ხმამალა იკითხა ბრმამ და
ხმაში შეშფოთება შეეტყო.
თორელი არც შერხეულა.
– წასულა... მაგანაც დამტოვა...
წაიხურჩულა ვაჩემ, მაგრამ თორელი არსადაც არ იყო წასული, იქვე იჯდა
გაციებული, სამუდამოდ სმენადახშული და თვალდახუჭული.